

2

FRANC.
HOTOMANI
IVRISCON-
SVLTI,

*Dialecticæ Institutionis li-
bri IIII.*



Ex officina Iacobi Stœrij.

1573.

CVM PRIVILEGIO REGIS.

1757. venezian
Petri Mon-

1757. 1758.
1759. 1760.



GENEROSISSIMO
ET SPLENDIDISSIMO CO-
miti ac domino, Do. Philippo Lu-
douico, Comiti in Hanavv & Ri-
nek, domino in Mintzenberg, &c.
Franc. Hotomanus S.



N I sunt ferè
9. or & viginti, Ge-
neris, Comes Phi-
lippe, ex quo tātum in arte Dia-
lectica prasidium ad Juris civilis
cognitionem esse animaduerti, vt
ex eo tempore nunquam ferè de-
stiterim, quæ ad illius artis vsum
pertinere arbitrabar, privato mi-
hi studio notare atque seponere.
quin etiam omnes ferè Aristotelis

de arte illa libros in Latinum sermonem exercendi excolendique ingenii mei causa conuerti: quoniam incredibile quoddam illius Philosophi acumen in tradendis artis illius præceptis mihi perspicere videbar. Cum autem quatuor abhinc annis latronum beneficio in eruditissimi viri [redacted] taurei Senatoris [redacted] bibliothecarii Regii consuetudinem incidissem, otiumque ex infelicitate publica felicissimum nactus essem, cæpi observationes illas meas cum illo præstanti & singulari viro communicare: quo certè neminẽ magis vel in Aristotelis libris exercitatu, vel bonis omnibus instructũ disciplinis, nostra Gallia, nostra,

P R A E F A T I O.

stra,inquam ,cùm in alios cõplures ,tum in illum ingrata Gallia, iampridem vidit. Sic autem ille observationibus istis nostris delectabatur, quinetiã ita libẽter quæ nõ placebant meo rogatu emẽdabat , ut iã tum illarum à me promulgationem exposceret: præsertim propter novas hominum quorũdam opinionẽs, q̃ iuventutẽ ab Aristotelis præceptis reuocabãt: quorũ ille se rationibus atque institutis infestissimũ semper præbuit. Post verò intermissis civilibus latrociniis cùm illas easdem observationes meas Lutetiam ad exercitatisimos Dialecticos emẽdandi, siquid vellẽt,caussa misissem, easque ipsis mirificè probari

P R A E F A T I O.

*intellexissem: tandem consilium
cepi, quicquid istud erat, in vul-
gus edere: partim ut si iuventuti
prodesse posset, utilitatē hanc illi
etati nō inuiderem: cuius me stu-
diorum adiutorē atque admini-
strum Deus constituit: partim e-
tiam quòd multas meas lucubra-
tiones in illis latrociniis ac turbu-
lenti tempestatibus, crebrisq₃ for-
tunarum mearū naufragiis, &
binis bibliothecæ meæ direptio-
nibus, magno cum animi mei lu-
ctu ac mœrore perdididi. verebarq₃
ne posthac idem fortasse (ut sunt
humana) in his Dialecticis no-
stris lucubrationibus, ceterisque
aduersariis & scriptionibus no-
stris accideret. quod tamen Deus
omen*

P R A E F A T I O.

omē in latronum caput ac perniciem cōuertat. Eò accedebat nostra huius Academia noua ratio: in qua (etsi ex illis nostris Dialecticis partim Montarei consilio, partim aliorum permultorū suasu exempla è Iure nostro deprompta, ne alios studiosos detererēt, magna ex parte sustuli) cupiebam legum nostrarum candidatis gustum huius suauissimæ disciplinae præbere, & Seruium illis Sulpitium ad imitandū proponere: quem M. Tullius testatur Iurisprudentia principatum huius unius artis præsidio adeptum fuisse: & cū aliis Iuriscōsultis iuris usum tribuat, illi uni artem concedit. qua laude haud

P R A E F A T I O.

scio an alia tribui Iurisconsulto
 maior possit. nam ceteri, quid de
 quaque re iuris sit, & (ut Ari-
 stoteles loquitur) τὸ ὅτι ὕψι τὰ τὸν
 & tractatione cognoscunt: hic e-
 tiam qua de causa quidq; iuris
 sit: hoc est (ut idem loquitur) τὸ
 διότι animaduertit: siquidem Ars
 est, (ut idem luculenter definit)
 rei cuiusque per suas causas co-
 gnitio, quæ aliter se habere nō pos-
 sunt. Etenim (ut ex doctissimi
 viri Matthæi Delii præceptis
 atque sermonibus eruditissimis
 iam pridem cognouisti) à Diale-
 cticis certa quadā veri falsiq; in
 omnibus disputationibus cognos-
 cendi ratio animaduersa est. Idē
 rem vniuersam in partes distri-
 buunt,

P R A E F A T I O.

buunt, latentes explicāt definiēdo, obscuras explanant interpretando, ambiguas primū vident, deinde distinguūt, tum quod cuique consentaneum sit, quid repugnans animaduertunt. Quæ tibi omnia, Generosissime Comes, nota (ut dixi) & perspecta esse cōfido: neque ullam esse artem arbitror dignam adolescentis liberaliter educati studio, quam non à pueritia degustaris: cui laudi tantum tribuo, ut ei ne nobilitatem quidem generis vestri, aut vetustatem, aut potentiam, anteponam. Sed cū omnes animi, atque ingenii tui dotes sunt eximia, tum verò mores illi aurei (ut illud Poetæ verbum vsur-

P R A E F A T I O.

pem) tum illa comitas, facilitas, humanitas ad quã te lectissimus vir Paulus à Velsperg suo exemplo à pueritia informavit: cuiusque nuper nobis specimẽ cum hic apud nos esses, edidisti, vehementer me ad dignitatem tuã amandam atque observandam incitavit: ut etiam cum huic libro Patronus, scriptorum omnium consuetudine, quarendus esset, primus mihi cuius illum auctoritati ac patrocinio commendarem, in mentem venires: partim ut splendidissimi nominis tui praesidio tutior atque ornatior in manus hominum veniret: partim etiam ut aliquod iudicii mei de tuarum virtutum indole testimoniũ extaret

P R A E F A T I O

*taret: quam indolem Deum Opt.
Maximum oro, ut ad frugem
& maturitatem perducatur: teq^{ue},
Generosissime Comes, ita bene-
volentia sua complectatur, ut te
quã primùm inter summos Ger-
maniae procures florentem, bea-
tum, atque illustrem videamus.
Vale. Kal. Augusti M. D.
LXXIII.*





INDEX CAPITVM

LIBRI I.

D ialectica & Logica definitio. cap.1.	pa- gina 1.
De materia Dialectica, & quatuor qua- stionum generibus. cap.2.	pag.4.
De partibus,caussis,& fine Dialectica. ca.3.	pa.9.
De Notionibus, quibus rerum & verborum inter se comparationes fiunt. cap.4.	pag.11.
Diuisio affectionum, siue habituum. cap.5.	pag.18.
De Genere, Specie, & Differentia. cap.6.	pa.19.
De Toto & partibus. c.7.	pa.27.
De quatuor caussarum generibus. c.8.	pa.36.
De multiplici caussarum efficientium genere. c.9.	pa.40.
De effectis. cap.10.	pa.46.
De proprio. cap.11.	pa.48.
De antecedente. cap.12.	pa.49.
De consequentibus. cap.13.	pa.51.
De adiunctis. cap.14.	pa.52.
De accidenti. cap.15.	pa.54.
De paribus. cap.16.	pa.56.
De similibus. cap.17.	pa.57.
De eodem. cap.18.	pa.61.
De rebus diuersis. cap.19.	pa.65.
De contrariis. cap.20.	pa.68.
De medio in contrariis. cap.21.	pa.75.
De repugnantibus. c.22.	pa.79.
De disparibus. c.23.	pa.80.
De	

INDEX.

<i>De Dissimilibus. cap. 24.</i>	<i>pag. 83.</i>
<i>De Dictione, & variis ipsius diuisionibus. c. 25. p. 85.</i>	
<i>De Synonymis, Homonymis & Paronymis. ca. 26.</i>	
<i>pa. 88.</i>	
<i>De Affectionibus verborum. cap. 27.</i>	<i>pa. 94.</i>
<i>De Categoriis, unde attributa dicuntur. c. 28. pa. 95.</i>	
<i>De vi & usu Categoriarum. cap. 29.</i>	<i>pa. 100.</i>
<i>Reditus ad affectiones dictionum. cap. 30.</i>	<i>pa. 103.</i>

LIBRI II.

<i>De Triplici methodo. cap. 1.</i>	<i>pa. 113.</i>
<i>De Dialogorū & Dialecticorū methodo. c. 2. p. 120.</i>	
<i>De artis & libelli huius methodo. cap. 3.</i>	<i>pa. 124.</i>
<i>De Diuisione. cap. 4.</i>	<i>pa. 127.</i>
<i>De multiplici diuisionum genere. c. 5.</i>	<i>pa. 129.</i>
<i>De arte & praeceptis Diuidendi. cap. 9.</i>	<i>pa. 136.</i>
<i>De Partitione Totius. cap. 7.</i>	<i>pa. 140.</i>
<i>De vocabulis Definitionis & Enuntiationis. cap. 8.</i>	
<i>pa. 143.</i>	
<i>De Subiecto & Attributo. cap. 9.</i>	<i>pa. 146.</i>
<i>Diuisio Enuntiationum. cap. 10.</i>	<i>pa. 150.</i>
<i>De Comparatione Enuntiationum per contradictionem. cap. 1.</i>	<i>pa. 162.</i>
<i>De Pariatione. c. 12.</i>	<i>pa. 165.</i>
<i>De Conuersione. cap. 13.</i>	<i>pa. 169.</i>
<i>De vera & propria Definitione. cap. 14.</i>	<i>pa. 175.</i>
<i>De Definitione adumbrata, siue minus propria. cap.</i>	
<i>15.</i>	<i>pa. 182.</i>
<i>De reliquis generibus definitionum. cap. 16.</i>	<i>pa. 186.</i>
<i>De praeceptis Definitionis. cap. 17.</i>	<i>pa. 190.</i>
<i>De materia Dialectica. cap. 18.</i>	<i>pa. 195.</i>

INDEX.

LIBRI III.

<i>De argumento, & argumentatione. cap. 1.</i>	pa. 198.
<i>De Materia, sine & partibus argumentationis.</i>	
cap. 2.	pa. 201.
<i>De Medio & eius præstantia. cap. 3.</i>	pa. 204.
<i>De Aceruali Stoicorum conclusione. cap. 4.</i>	pa. 206.
<i>In quibus argumentationibus medium adhibeatur.</i>	
cap. 5.	pa. 209.
<i>De locis siue sedibus Medij Dialectici. cap. 6.</i>	pa. 211.
<i>De firmamentis, quæ vulgò Maxime appellantur.</i>	
cap. 7.	pa. 213.
<i>De quadruplici locorum questione. cap. 8.</i>	pa. 216.
<i>De proportionē. cap. 9.</i>	pa. 219.
<i>De Reciprocatione. cap. 10.</i>	pa. 221.
<i>De loco generis. cap. 11.</i>	pa. 222.
<i>De loco Speciei. cap. 12.</i>	pa. 228.
<i>De loco Totius. cap. 13.</i>	pa. 232.
<i>De loco Partium. cap. 14.</i>	pa. 235.
<i>De loco Causarum. cap. 15.</i>	pa. 239.
<i>De loco effectuum. cap. 16.</i>	pa. 242.
<i>De loco Relationis. ca. 17.</i>	pa. 245.
<i>De loco Proprij. cap. 18.</i>	pa. 247.
<i>De loco Antecedentis. cap. 19.</i>	pa. 248.
<i>De loco Consequentis. cap. 20.</i>	pa. 250.
<i>De loco Adiunctorum. cap. 21.</i>	pa. 253.
<i>De loco Accidentis. cap. 22.</i>	pa. 254.
<i>De loco Parium. cap. 23.</i>	pa. 255.
<i>De loco Similium. cap. 24.</i>	pa. 258.
<i>De loco Aduersorum. cap. 25.</i>	pa. 260.
<i>De loco Priuantium. cap. 26.</i>	pa. 263.
<i>De loco Aientium & Negantium. cap. 27.</i>	pa. 266.

De

INDEX.

<i>De eadem Contrariorum disciplina. cap. 28.</i>	<i>pa. 268.</i>
<i>De loco repugnantium. cap. 29.</i>	<i>pa. 272.</i>
<i>De loco Dissparium. cap. 30.</i>	<i>pa. 273.</i>
<i>De Cōparatione maioris & minoris. cap. 31.</i>	<i>pa. 275.</i>
<i>De loco Dissimilium. cap. 32.</i>	<i>pa. 278.</i>
<i>De loco Definitionis. cap. 33.</i>	<i>pa. 279.</i>
<i>De loco Notationis. cap. 34.</i>	<i>pa. 284.</i>
<i>De Coniugalis. ca. 35.</i>	<i>pa. 286.</i>


LIBRI III.

<i>De Analytice, siue arte iudicandi. cap. 1.</i>	<i>pa. 290.</i>
<i>De Syllogismo & variis syllogismi generibus. cap. 2.</i>	<i>pa. 291.</i>
<i>De partibus Syllogismi, & vi cōclusionis. c. 3.</i>	<i>pa. 293.</i>
<i>De tribus Syllogismorum figuris. cap. 4.</i>	<i>pa. 297.</i>
<i>De modis primæ figuræ. cap. 5.</i>	<i>pa. 300.</i>
<i>De quatuor secundæ figuræ modis. cap. 6.</i>	<i>pa. 303.</i>
<i>De sex tertiæ figuræ modis. cap. 7.</i>	<i>pa. 305.</i>
<i>De Syllogismo copulato, & primū de figuris cōditionalis. cap. 8.</i>	<i>pa. 307.</i>
<i>De Syllogismo disiunctiuo. cap. 9.</i>	<i>pa. 310.</i>
<i>De figuris syllogismi coniunctiu. cap. 10.</i>	<i>pa. 311.</i>
<i>De Dilemmate. cap. 11.</i>	<i>pa. 313.</i>
<i>De partium enumeratione. cap. 12.</i>	<i>pa. 317.</i>
<i>De Enthymemate. cap. 13.</i>	<i>pa. 321.</i>
<i>De Sorite Dialectico. cap. 14.</i>	<i>pa. 325.</i>
<i>De inductione & exemplo. cap. 15.</i>	<i>pa. 329.</i>
<i>De captionibus Sophisticis. cap. 16.</i>	<i>pa. 337.</i>
<i>De Sorite Sophistico. cap. 17.</i>	<i>pa. 342.</i>
<i>De diuisione captionū Sophisticarum. ca. 18.</i>	<i>pa. 345.</i>
<i>De captionibus extra dictionem. cap. 19.</i>	<i>pa. 354.</i>

FINIS.

CAROLI IX. Galliarum Regis priuilegio
fancitum est, nequis Typographus impri-
mere, neu quis bibliopola diuendere hos
*Franc. Hotomani Iurisc. quatuor de Institutione
Dialectica libros* audeat ante decennium,
absque eiusdem Franc. Hotomani consen-
su. Qui secus faxit, multa illi esto confisca-
tionis librorum. Datum Ambosiæ VI.
Ianuarij, Anno à Christo nato CIO IO
LXXII.

Coignet.



FRANC. HOTOMANI
IVRISC. INSTITVTIO-
NIS DIALECTICÆ
LIBER PRIMVS.

Dialectica & Logica definitio.

CAP. I.



QVID est Dialectica? Est ars, quæ ex cuiusq; rei & verbi affectione diuidēdi, definiendi, & argumentandi rationē comōstrat: quæ eadem & Logica vulgò nominatur.

Quid est Rei & verbi affectio? Est ratio, quam quæque res & dictio habet ad alteram. vt Homo est species animalis: Membrum est pars corporis. Græci λόγον appellant. Itaque commodius Rationem appellare possemus. Sed vitandæ ambiguitatis causâ nomen Affectionis delegimus: quo eodē Cicero & in Topicis & in Partitionibus hac eadem in re est vsus. Rationis autem verbum à Mathematicis sumptum est, qui λόγον definiunt duarum eiusdem generis quantitatum comparisonem. Interpretes Proportionē Latinè nominarūt: quidam Habitudo: nonnulli Habitū: qui

commodius, Respectū. Barbari fortasse Correspondentiam appellarent.

Quænā illius λόγου, siue respectus vis ac facultas est? Declarat videlicet, quānam rei cuiusque, aut dictionis cum altera ratio sit: quemadmodum inuicem affectæ sint: quomodo se inter se habeant, qualis inter ipsas comparatio atque affectio sit. veluti, sintne pares, vt in quantitatibus duo cubiti, & duo binarij: an impares, vt cubitus cum pede, & quaternarius cum binario collatus. Nam res omnis & dictio quæ in Dialecticā disputationem cadit, iccirco cum altera comparatur, vt quemadmodum inter se affectæ sint, id est, sintne verbi gratia, pars an totum, genus an species, consentaneæ an dissentaneæ, eadem an diuersæ, congruentes an contrariæ: intelligatur.

Cur in definitione addidisti Et verbi: cū verborum ars vel Grammaticæ, vel Rhetoricæ propria esse videatur? Quia nihil ambigi potest (ait Cicero) in quo non aut res controuersiam faciat, aut verbum. Et alio loco: Cū omnis controuersia aut de re soleat, aut de nomine esse, vtraque earum nascitur, si aut res ignoratur, aut erratur in nomine. In dictionibus igitur æquè atque in rebus, Dialectica versatur, τυγχάνει γδ (vt Chrysippus, auctore Laertio, dicebat) ὡς ἐν σημεινόντα καὶ σημαινόμενα. Idque eo magis, quia etiam si de rebus nudis instituta esset disputatio, tamen

men verbis, quasi notis, uti cogeremur, quemadmodum ratiocinatores calculis. Hac enim similitudine Aristoteles utitur.

Vnde Dialectica & Logica dictæ sunt? Vtranque à sermone, siue oratione dictam apparet. sed illa propriè ab eo genere sermonis, qui cum altero interrogando & respondendo commiscetur. Fictum enim verbum est *διαλέγεσθαι*: quod est, verba cum altero commutare, colloqui, disputare, sermocinari, sermones cædere. Nam cum Philosophorum consuetudo hæc esset, ut de rebus ad artes suas pertinentibus sæpe inter se commentarentur, eruditas illas collocutiones *διαλόγους* (ut idè Laertius in Platone scribit) appellarunt: earumque habendarum artem, Dialecticam. Qua de causa eandem Laertius eodem loco definit artem sermonis, per quam ex eorum quibuscum sermo est interrogatione & responsione, aliquid vel confirmatur, vel refellitur. Quod cum ita sit, difficile dictum est, Dialecticè nomen non eius sermonis esse proprium, qui in Dialogis habetur: cum perpetua non continuatur oratio, sed in rebus singulis insistitur, & intelligitur quid quisque concedat, aut abnuat: ut ex concessis disputatio concludatur.

Et quinam istorum inuentores laudantur? Laertius eodem loco Platonis inuentum esse scribit, vocabulum Dialecticæ: Logicæ autem nomen Aristoteli tribuitur. Vtranque autem Cicero differendi rationem multis locis La-

tinè interpretatur : id est, (vt Græci dicunt)
ὁπτις ἡμῶν τῆ ὀρθῶς διαλέγεσθαι. Sic enim , eodem
 auctore Laertio, Stoici definiebāt. Ex quo in-
 telligi potest, cū & Græcorū & Latinorū
 consuetudine nihil quicquam inter Dialecti-
 cæ & Logicæ verbum præter vocis sonum in-
 terfit, videri tamen Logicæ vocabulum ad eā
 differendi rationem quæ perpetua oratione
 constat, & qua hodie plurimum vtimur, ac
 multo magis ad eas disputationes quæ literis
 mandantur, accommodatum esse. Verū vt-
 cunque sit, nos eam Dialecticæ definitionem,
 quæ ad nostri temporis vsum & consuetudi-
 nem accommodata videbatur, delegimus.

*De materia Dialecticæ, & quatuor quæstio-
 num generibus.*

C A P. I I.



QUAE est materia Dialecticæ? Dia-
 lectica nullum habet certum ac
 proprium materiæ genus, in quo
 solo versetur : eoque à ceteris arti-
 bus ferè omnibus discrepat, quibus sua certa
 & definita materia subiecta est : vt Arithmeti-
 cæ, numeri: Geometriæ, magnitudines: Musi-
 cæ, soni: Iurisprudentiæ, lites: Medicinæ, mor-
 bi. At Dialectica per omnes artes ac discipli-
 nas fusa est. Omnibus enim vsus sui præstan-
 di munerisque fungendi facultatem præstat:
 ac planè tanquam instrumentum quoddam
 est,

est, quo reliquæ artes vsum sui hominū generi præstant. Itaque sine illa ceteræ artes omnes non minus mancæ essent, quàm aut Pictura sine penicillo, aut Geometria sine radio, aut Architectura sine securibus atq; asciiis, ceterisque cuiusque generis instrumentis. Quod igitur opificibus omnibus instrumentum est, id eruditis disputationibus est Dialectica.

Quænam in singulis artibus materia est, in qua instrumentum istud Dialecticæ adhibetur, atque, vt ita dicam, operatur? Genus omne quæstionis: hoc est, quæcunque in disputationem & humani ingenij disquisitionem cadere possunt. Est autem Quæstio (vt Cicero definit) cognitionis appetitio.

Quotuplex est quæstio? Quadruplex: An sit, quid sit, quale sit, & quæ caussa sit. Aristoteles enim quatuor illas posuit: *εἰ ἔστι, τί ἔστι, τὸ ὅτι, & τὸ διότι*: hoc est, An sit, quid sit, an ita sit, & cur ita sit. Quamuis autem multis verbis idem ostendat, quæstionem quid sit, vi ipsa eandem esse cum quæstione quæ caussa sit: quia nosse quid sit, & quæ caussa sit, vi ipsa idem est: tamen perspicuitatis caussa, nequid confundatur, satius visum est, vtranque distinguere. Idque eo magis, quia reliquæ omnes à prima vim inter se quodammodo implicatam atque permixtam obtinent.

Qualis illa implicatio est? Primum quia neque quid res sit (vt modò dicebamus) sciri potest, vt non simul, quænam eius caussa sit,

noscat. qua de causa definitio (vt scribit Aristoteles) quæ docet quid res sit, & causam cur res sit, eadē est. veluti, Quid est defectio Lunæ? Est obscuratio Lunæ, quæ interpositu terre efficitur. Quamobrē deficit Luna? quia lumen eius terræ interpositu obscuratur. denique cui responsum est ad quæstionē quid sit, superuacanea est quæstio, quæ illius causa sit.

Quænam altera quæstionū implicatio est? Quia iciri quid res sit, planē & commodē nō potest, nisi simul an ita sit, hoc est, qualis sit, intelligatur. nam cui respondetur ad quæstionem quid sit, vi ipsa responderi videtur ad quæstionem, an ita sit. vt iam propē superuacanea hæc posterior videatur: veluti, Quid est Rhetorica? est ars copiosē loquendi. qua responsione illi alteri satisfactum est: Qualis est Rhetorica? vel, An Rhetorica est ars copiosē loquendi? qua formula quæstio An ita sit, continetur.

Quid? quæstionis An sit, quænam natura est? Hæc sola vim habet propriam, & præcipuam, neque cum aliis implicata est. nam cui interroganti, verbi gratia, Sūntne Pygmæi, an non? respondetur, Sunt Pygmæi: certē non est superuacanea quæstio, quid sunt, aut an ita sunt, aut cur ita sunt? hoc est, sūntne homines, an non: an ita sunt statura bipedali, vt feruntur: & cur ita sunt breues, cur gruibus infesti, cum quibus belligerantur. Quanquam harum duarum postremarum quæstionum formula veteri-

veteribus propriè dialectica non erat.

Quid? Ecquamnā Dialecticarum quæstionum formulam appellas? Intelligendum est, in illis Philosophorum dialogis, de quibus paulò antè diximus, institutum eorum hoc fuisse, vt quauis quæstione proposita paratos se profiteretur, vtram aduersarius vellet partem vel defendere, vel euertere. Itaque quæstionis formulam ad illud institutum accommodabant. *δεῖ γὰρ δεδόσθαι* (inquit Aristoteles) *ἐκ τῆς ἐρωτήσεως, ἕλκεσθαι ὁποῦτερον βέλεται τῆς ἀντιφάσεως μόνον ὁπορεύεσθαι*. Oportebat (inquit) per interrogationem dari optionem aduersario, vtram vellet contradictionis partem explicari. veluti, Sūntne Cētauri an non? Estne voluptas summum bonum, an non? Sūntne expetēdi honores, an non? vt quæstionis formula & conceptio anceps esset, atque apta & parata vel Etiam vel Non recipere. quæ solæ (vt Aristoteles & Gellius scribunt) Dialecticarum responsionum erant legitimæ formulæ. Qua de causâ quæstionem Dialecticam Aristoteles definit petitionem responsionis, vt alterutra cōtradictionis pars accipiatur. Simplicem autem interrogationis formulam, veluti, Estne in hominum genere sapientia? cui additum non esset, An non: Propositionem Aristoteles multis locis appellat: eamque inter Quæstionem & Propositionem differentiam constituit.

Quótnam igitur quæstionum genera con-

stituemus? Quoniam vis artis Dialecticæ per omnia (vt modò diximus) cognitionum genera fusa est, neque hoc tempore veteres illas disputandi formulas obseruamus; quamuis quæstionis concipiendæ formula veterum instituto Dialectica non sit: tamen vim & materiam potius, quàm verborum conceptionem ponderabimus: & quatuor illa siue quæstionum, siue propositionū genera retinebimus; An sit, quid sit, quale sit, & quæ causa sit.

Quoniam superius dixisti Dialecticam versari in rebus & dictionibus, quæro nunquid illæ ad Physicos potius, hæ verò ad Grammaticos pertinent: aut quid inter horum trium studia intersit? Physicus res per se, ac separatim considerat. Dialecticus & Grammaticus rerum & dictionum aptam vel ineptam consecutionem: Id est, earum inter se conuenientiam in oratione, vel discrepantiam, verum illud inter hos interest, quòd ille insitam earum inter se rationem, habitum, respectum, affectionem: hic verò tantum accidentia, & popularis sermonis in iis iungendis consuetudinem exquirat.

Cedo harum rerum familiare aliquod exemplum. Sumatur illud pene puerile: Physici notio est, qua ex materie confici commodè nauis malus possit. Dialectici, conueniántne hæc inter se ex affectuū ratione, an non: Malus est arbor: Arbor est malus: Malus non est arbor: Arbor non est malus. Affectus autem
in eo

in eo est, quòd malus frugifera eundem habet respectum ad arborē, quem species ad genus: malus nauis eundem habet respectum ad nauem, quem pars ad totum: & quod superiora de inferioribus dici possunt, inferiora de superioribus non possunt. Grammatici verò iudicium est, conueniāntne hæc inter se ex accidētibus, id est genere, numero, casu: Malus naualis est infructuosus. Malus hortensis est fructuosa. Hic ex sermonis consuetudine iudicandi regulam exquirat: ille ex affectuum ratione: & vt barbari loquuntur, ex correspondētia.

De partibus, causis, & fine Dialecticæ.

CAP. III.



QVOT sunt partes Dialecticæ? Quatuor. Notio affectionum, diuissio, definitio, & argumentatio. Sice-
nim Cicero Tusc. 5: Differendi ratio & scientia (inquit) quæ per omnes partes sapientiæ manat & funditur, rem definit, genera dispartit, sequentia adiungit, perfectæ concludit, vera & falsa diiudicat. Harum autem partium quatuor argumentatio principatum obtinet. superiores enim omnes non modò ei vni seruiunt, eiúsque sunt quodammodo ministræ: verùm etiam ab ea sola probantur, ac iudicantur.

Quibus rebus Dialectica comparatur? Na-

tura, arte & exercitatione. Nam in artifice futuro primū acumen exquiritur ingenij : quod naturæ bonum est: tum artis & doctrinæ perceptio: postremò vsus, qui cū rerum omniū Magister est summus , tum etiam Magistrorū omnium præcepta superat.

Estne igitur Dialectica quædam naturalis, quædam artificiosa? Nequaquam: sed eius initia & semina quædam in hominum mentibus natura ingenerauit , quæ cū præceptis ac disciplina, tum vsu & assiduitate excoluntur : eadēque cū aliarum artium omniū, tum præcipuè Musicæ ratio est. nam omnibus à natura rudis quædam canendi facultas data est : ab arte verò , quam naturæ notatio atque animaduersio peperit , certa ratio traditur. non enim ars naturam imitatur tantummodo : verumetiam (vt veteres docuerunt) emendat, confirmat & amplificat, causāque cur quidque vel hoc, vel illo modo fieri debeat, reddit. quod præstare natura non potest, eaque sola re artifex ab inscio discernitur.

Quis est finis Dialecticæ? Satis constat, nullam in sese artem versari : sed esse aliud artem ipsam, aliud quod propositum sit arti. Itaque cuiusque artis finis extra ipsam artem querendus est. Vt igitur medicinæ finis propositus est, valetudo: arti militari, victoria : architecturæ, opus : sic Dialecticæ finis propositus est Demonstratio : id est, veri & falsi diiudicatio:

tio: siue facultas iudicandi, quemadmodum verum à falso internoscatur: quidnam in oratione consentaneum sit, aut dissentaneum; quæ sit apta aut inepta verborum consecutio: & quamobrem ea vel apta vel inepta esse pronuntianda sit.

De Notionibus, quibus rerum & verborum inter se comparationes fiunt.

CAP. IIII.

AGESIS, deinceps singulas Dialecticæ partes eo quo proposuisti ordine persequamur. Et quoniam superius quid esset affectio, siue λόγος cuiusque rei & dictionis, exposuisti: quæro primum vnde illa affectionum ac respectuum scientia nascatur? Non ex sensibus certè, sed ex notionibus. Notionem autem appellamus, insitam à natura animis nostris & antè perceptam cuiusque formæ nõ satis explicatam, ideóque enodationis indigentem cognitionem. Sic enim eam variis locis Cicer. definit: atque à Græcis tum ἐννοια, tum πρόληψιν appellari scribit. Notitiam quoque idem appellat, in hominis mente informatam & antè perceptam, sine qua nec intelligi quicquam, nec quæri, nec disputari potest.

Vnde notiones illæ nascuntur? Ex iis quas Plato Ideas, hoc est formas & species appellauit: quas tanquam cœlestis animæ parti-

culas, in animis hominum, (quos ex Diuinitate delibatos credidit) insitas putabat: ac proinde ab iis quæ sensibus subiecta sunt auulsas, per se ac seorsim constare. Alij verò nasci eas putarunt ex imaginibus & simulacris corporum: cum impulsione oblata extrinsecus, species rerum sic in animis imprimuntur, tanquam imagines in speculis: aut potius quasi annulorum signa in cera. veluti cum ex Oloris aut Pauonis aspectu imago quædam omnium illiusmodi auium in animo imprimitur, quæ post in memoria ita perpetuò circumfertur, vt vbiuis ea species agnoscî possit. Verùm hæc eadem planius ex rei definitione & diuisione intelligentur.

Quid est Res? Quod vel animo & ratione intelligi, vel sensu, qui rationis expers est, percipi potest. Nos illam Intellectam, hanc verò Corporatam appellabimus. Intellectā Plato verè ac propriè esse dicebat, Ideamque appellabat, quæ neque gigneretur, & semper esset vniuersimodi, ac ratione & intelligentia contineretur. veluti apud Philosophos, Virtus, sapientia, iustitia: apud Iurisconsultos, Seruitus, vsus, vsusfructus. Corporatam alij *scilicet* propriè dici disputarunt, quam Latini modò Naturā, vt Varr. & Cic. modò Essentiā, modò Substantiam appellarunt: quæ per se tangi ac videri potest: vt Fundus, Stichus. Atque vt hæc minui controuersia posset, duplicem substantiam induxerunt, primam & secundam.

Quæ

Quæ est prima Substantia? τὸ ὑφίστηκός, corpus, quod sensibus subiectum, cerni ac tangi potest: vel quod neque in aliquo inest, neque de aliquo dicitur: sed cum alia omnia in ipso insunt, tum de ipso dicuntur. Hoc idem Individuum Dialectici appellant: Græci ἀτομον, vel καθεκαστον: vt Plato, Socrates, Stichus, aut Pamphilus: hic homo, hæc naus, hic fundus, hoc prædium.

Quare dicitur individuum? Quia diuidi in partes corporatas sine interitu non potest. Nam si Totum in partes distrahatur, nulla pars erit Totum, neque Totius nomine appellari poterit. Itaque neque truncus, neque ramus, neque radix arbor dici poterit. Nauem duorum communem si diuidas (inquibat iocans Cascelius Iuriscōsultus) neque tu, neq; socius habebitis. Sic Stichus debitus solui ac præstari per partes corporatas sine certissimo interitu nō potest. Et quanuis fundi diuisi partes omnes quantumuis multæ, fundus dicantur, tamen nulla illarum dici poterit fundus ille qui antea fuerat.

Quæ est secunda Substantia? Quæ non sensu illa quidem, sed tamē sensuum opera & ministerio, ac tanquam instrumento, à ratione & intelligentia percipitur: qua de caussa illam Secundæ nomine appellarūt. vt cum Leone conspecto, imago quædam omnium illius formæ belluarum in mente & memoria ita imprimitur, vt postea Leones vbique omnes

agnosci possint. Notiones igitur indiuiduis cohærere putarunt, sicuti rerum obiectarum imagines, oculis, aut speculis inhærent.

Expone istud, si potes, planius. Plato ea demum esse verè ac propriè dicebat, quæ à sensibus remota tantùm ratione & animo perciperentur: propterea quòd semper vniusmodi essent, neque ortum, neque interitum haberent: cùm indiuidua infinita, fluxa & caduca essent, orirenturque & occiderent, nec diutius vno & eodem statu essent. Aristoteles verò nullas putabat esse extrinsecus substantias: sed intellectam plurimorum inter se differentium similitudinem, vel genus, vel speciem appellabat. Primus Aristoteles (ait Cicero) species labefactauit, quas mirificè Plato fuerat amplexatus, vt in iis diuinum quiddam esse diceret. Ac de vtrisque istiusmodi substantiis, idem Cicero in lib. de Vniuersitate ex Platonis Timæo ita scribit: Quid est quod semper sit (hæc idea est) neque vllum habet ortum: & quod gignatur (hoc indiuiduū est) nec vnquam sit. quorum alterum intelligentia & ratione comprehenditur, quod vnū semper atque idem est: alterum quod affert opinionem per sensus, rationis expers, quod totum opinabile est, id gignitur & interit, nec vnquam esse verè potest?

Vtrius igitur illorum probabilior sententia videtur? Non est humilitatis nostræ tantam inter summos omnium Philosophos controuer-

trouerſiam diſceptare. Magis tamen aliquanto ad notionum noſtrarum rationem accommodata Platonis ſententia videtur: quippe, cùm ſatis conſtet, non omnes notiones ex oblata extrinſecus indiuiduorum corporũ impulſione exiſtere: ſed quaſdam per ſe cõſtare, neque vel aliunde originem habere, vel alio quàm ſuo ac proprio fundamento niti. quo in genere ſunt intellectæ res omnes: vt quãtitates, & qualitates. veluti, Lõgitudò, Latitudo, & Altitudo. Item, Iuſtitia, Temperantia, Eloquentia. Item, Morbus, Valetudo, Imbecillitas. Quæ ſi in ſubiecto aliquo inſunt, per ſe tamen, & tanquam auulſæ & abſtractæ conſiderantur.

Cedo familiare aliquod exemplum. Nos verò etiam è pinguiore Minerua perſpicuitatis cauſſa ſumemus. Vidẽſne quam ſutores & calceolarij formam calceorum appellent? nimirum lignum oblongum, calcei inſtar portione aptum, atque incifum. At iidem formam calcei aliam in mente atque intelligentia impreſſam atque inſignitam habent: quæ vna verè proprièque tum Idea, tum Forma & eſt, & dici debet: ad quam, tanquam pictores ad exemplar ſuam picturam, ita illi opus ſuũ dirigunt. Forma igitur calcei lignea ſubiectũ eſt: ſpecies in mente inſita, auulſa atque abſtracta eſt.

Quæ eſt altera rerum diuiſio? Secunda rei diuiſio, quę quidem ad Dialecticæ artis ratio-

nem atque vsum accommodata sit, similiter bipertita est. Nam aliæ dicuntur, Eadem, quarum scilicet vna eaque angustissima notio est, quamuis nomine fortasse discrepent: vt vestis, & vestimentum: ensis, & gladius: dialectica, & logica: homo & animal rationis particeps. Aliæ diuersæ, quæ non eadem notione continentur, sed alia atque alia intelligentia comprehenduntur. vt Animal, Elementum, Arbor, Sydus. Item, Leo, Aquila, Muræna, Platanus. Sed hanc diuisionem posterius vbi rerum affectiones cognoueris, paulo subtilius explicabimus. Tantum illud hoc loco intelligendum est, earum rerum quæ sunt eadem, nullam in Dialectica nasci quæstionem posse: propterea quod omnis quæstio Dialectica in rerum affectionibus, comparisonibus, & proportionibus versatur, quæ nisi in diuersas & differentes res cadere non possunt.

Quæ est tertia rerum diuisio? Hæc tripartita est. nam aliæ dicuntur esse prius, aliæ posterius, aliæ simul. Prius autem aliquid est, aut tempore, aut ordine, aut non reciprocante cōsecutione essentia. His enim tribus modis ad huius institutionis vsum contenti esse possumus. Prius autem ex non reciprocante essentia consecutione, ἀφ' ἧ μὴ ἀντιστρέφει ἡ τῶ ἐξ ἀκολουθείας sic æstimatur: veluti cū dicimus vnum esse prius duobus, quia si duo sunt, etiā est vnum: at non, si vnum est, continuò sunt duo. Itēque animal prius equo: quia si equus est,

est, etiam animal sit necesse est. at non ex cōtrario. Quid sit autem Esse posterius, hoc ipso intelligitur : nām contrariorum eadem scientia est.

Quot modis simul res esse dicitur? Duobus: tempore, & natura. Tempore, cū singulorum ortus eodem tempore est: veluti cū in diuidendo res eodem ex genere & capite diducuntur. vt Belluarum aliæ sunt volatiles, aliæ terrenæ, aliæ aquatiles. Natura autē, cū in essentia consecutione reciprocatio est, quanuis neutrum alteri ortus & essentia causam attulerit. vt si duplum sit, etiam est simplum: & si simplum sit, certè est duplum. Si sol lucet, dies est. Si dies est, sol lucet. Atque hæc ἀντιστροφῇ, siue reciprocatio, diligenter notanda est: quoniam eius vsus in hac arte longè est maximus.

Altè verò Dialecticę principia repetis. Sed difficillimū est (vt Plato scribit) in omni conquisitione rationis exordium. Deinceps de dictione differemus. Quid est dictio? Nota qua quæque res significatur. Nam quod Aristoteles σύμβολον dicit, notā Cic. cōuertit: & verba rerum notas definiuit. vt enim forma publica nota est numorum: sic dictiones, nomina, vocabula, & appellationes, rerū notæ sunt. iisque notis similiter in rebus enūtiadis vtimur, quomodo in ratiocinationibus vtimur calculis.

C A P. V.

QUONIAM prius est (vt ait Quintilianus) concipere animo res, quam enuntiare, prius de rei affectionibus differamus. Sed primum omnium quotuplex huius doctrinae de ratione est vsus? Quadruplex. nam primum mutuam (vt saepe iam dixi) rerum ac dictionum omnium affectionem ostendit: id est, vel conuenientiam, vel repugnantiam. Deinde materiam diuidendi, definiendi, & argumentandi suppeditat. Quae de causa Peripatetici, cum ad argumentorum tractationem perueniunt, quoniam ex iis argumenta depromunt, *τότες* illos appellant. Cicero Latine locos, sedes, fontes nominat. Nos eorum in diuidendo, definiendo, & argumentando vsu atque opportunitatem ostendemus.

Qua est affectionum diuisio? Rerum (vt modo dictum est) aliae sunt eadem, quae in dialecticam quaestionem non cadunt: aliae diuersae, quarum ab arte dialectica comparatio fit. Earum igitur aliae consentaneae sunt; quarum inter se rationes consentiunt: vt in musica numeri, & voces, & modi: itaque ex iis argumenta de conuenientia sumuntur: aliae dissidentiae, quae inter se discrepant.

Quot sunt rationes consentaneae? Quintidecim, Genus, Species, Totum, Partes, Causa,

sa, Affectus, Proprium, Relatio, Antecedens, Consequens, Adiunctum, Accidens, Comparatio parium, Comparatio minorum, & Similitudo.

Quot sunt Rationes dissentaneæ? Septem, Aduersa, Priuantia, Negantia, Repugnantia, Disparia, Comparata ex maioribus; & Dissimilia.

Ecquemnam igitur in iis exponendis ordinem sequemur? Eum nimirum, qui naturæ accōmodatus est maximè: vt quo quisque rei propositæ adiunctior est, eum potissimum explicemus: quo remotior est, postremum. Primùm igitur de iis dicemus, qui in re ipsa insiti sunt, hoc est de Genere, Specie, Toto & Partibus. Tum deinde de externis: è quibus eos primùm qui consentanei sunt, tum eos qui dissentanei, persequemur. & quoniã contrarij inter dissentaneos summum locum obtinent, ab iis exordiemur.

De Genere, Specie, & Differentia.

C A P. V I.



QVOD est Genus? Notio, quæ sui similes communionem quadam, specie autem differentes, duas aut plures amplectitur partes: quæ definitio Ciceronis est. Illa autem Aristotelis: γένος ἐστὶ τὸ καὶ πλειόνων καὶ διαφερόντων τῶν εἶδῶν ἐν τῷ τί ὅτι κατηγορούμενον, id est, Genus est, quod de pluribus, specie

differentibus, in quæstione quid sint, dicitur. Sic enim conuertendum arbitror, non *QVI D SIT*, nisi fortè hoc potius interpretemur modo: in quæstione quid eorum quidque sit. Vt plura dici ab Aristotele intelligantur ea, quorum aliqua communio, & quasi cognatio est. veluti cum quæritur aceruatim, quid sit homo, quid auis, quid piscis, quid quadrupes: aptè de vniuersis semel respōdebitur, animal.

Quæ sunt igitur quæ generis eiusdem dicuntur? Quæ superioris alicuius cōmunionē inter se continentur: ac de quibus omnibus vnum respondetur. Nam (vt Zeno apud Laertium definit) *γένος ἐστὶ, πλειόνων ὁνομαμάτων σύλληψις*. Itaque plures cognati qui sanguinis eiusdem communione inter se cohærent, quam ab vno eodémque capite duxerunt, iccirco à Græcis appellantur *ὁμογενεῖς* vel *συγγενεῖς*: cum alij qui gentis ac stirpis alterius sunt, *ἑτερογενεῖς* vel *ἀλλοτρίοι*, id est alieni, & extranei nominentur. quocirca plures res de quarum singulis non vnū idémquē respondeatur, diuersi generis sunt: appellanturque Diuersæ, Disparatæ, Variæ, Differentes, Dissimiles: nullo tamen certo & proprio vocabulo. veluti, Homo, Ignis, Arbor, Lapis, Linea, Candor: de quibus si quærat, quid eorum quidque sit, responderi vnum atque idem nomen non potest.

Quid est Species? Notio angustior, quæ cum altera pluribúve aliis generis eiusdem
com-

cōmunionē cōtinetur. veluti, Platanus, notio est quę cum Lauro, Piro, Pomo, Quercu, & Ceraso arboris communione comprehenditur. Nonnulli tamen Species etiam appellant notiones angustissimas quarum proprietates in nullum aliud conueniunt: quę vulgò *ἄτομοι*, siue indiuidua nominantur. Nam Iurisconsulti ex Stoicorum (vt opinor) sententia Stichum & Pamphilum & certum quoduis aliud corpus Speciem appellāt. l. talis, 30, l. cū res, 4. §. 1, D. de legat. j. l. in stipulationibus, 45, D. de verb. obligat. Genus contrā plerunque appellant, quam Speciem nominauimus: veluti Fundū, aut Seruum, siue Hominem, cuius notione serui omnes comprehenduntur. Quinetiam Speciem interdum pro parte, Genus pro toto vsurpant. vt cū in §. lex est, de iur. nat. Plebs à populo eo differre dicitur, quo species à genere. Item Speciem pro re singulari: & Genus, pro Vniuersitate. vt in Regula iuris, Generi per speciem derogatur. veluti si Peculium legatum sit, & vicarius liber esse iussus sit. l. si peculium, 10, D. de manu. testam.

Quid si plures sint eiusmodi notionū gradus? Tū verò ancipiti vti nomine cogemur, & respectu superiorum, Speciem: inferiorum, Genus appellare. hoc Græci solent *ὑπαλάληλον* nominare, nos interiectum, vel intermedium, vel (vt vulgò) subalternum dicere possumus: cuius rei exemplum vsitatum ex summis & infimis substantiis apponemus.

1.	1. Substantia
Genus summū ab Indiuiduis remotissimum.	Corporē Incorporeā
2.	2. Corpus
Genus intermedium.	Animatum Inanimatū
3.	3. Corpus animatū
Genus & species intermedia.	Sentiens Non sentiens
4.	4. Animal
Genus & species intermedia.	Rationis particeps Rationis expertus
5.	5. Homo.
Species infima & proxima.	
6.	6. Socrates, Aristides.
Individuum.	

Sed profer exemplum aliquod ad Iuris civilis, & vitæ communis vsum pertinens. Exemplum ex libris nostris hoc esto.

RES quarum commercium est: aliæ

Corporales Incorporales.

Corporaliū

Animatæ Inanimatæ.

Animæ

Animatarum

Rationales

Irrationales

Rationalium

Sermus

Ancilla

Sermorum

Stichus, Dams, Pamphilus.

Quotuplex est Genus? Disciplina causa
triplex fingitur: Summum, quod Græci γενικότ
τατον, id est latissimum ac fusissimum nomi-
nant. medium quod (vt diximus) ὑπαλλυλον,
& subalternum appellant: ac postremo infi-
mum, quod iidem ειδικότατον vocant.

Quod est Summum Genus? Quo nullum
neque antiquitate, neque amplitudine maius
est, longissimæque omnium a sensibus abest.
Itaque cum species esse non possit, de omni-
bus sub se subiectis enuntiatur. veluti apud
Philosophos Substantia: apud Iurisperitos,
Res que in superioribus figuris supremum lo-
cum obtinent.

Quod est Medium? Quod inter superius
atque inferius interiectum, huic genus, illi spe-
cies est. veluti, Corpus. itaque cum Re colla-
tum, species est: cum animatis, genus. Sic Pa-
ter inter auum & filium ita interiectus est, vt
illi sit filius, huic pater.

Quod est infimum? Quod angustissimum
est, neque ullum in se aliud complectitur. vt

Animal respectu Hominis est infimum : at respectu Auis est medium : Nam Auis genus est inferius, cui diuersæ species subsunt : vt Aquila, Columba, Coruus.

Quoniam quid esset species suprâ demonstratû est, quæro quotuplex est Species? Vulgò in scholis ex Porphyrij sententia duplex numeratur : quarum prior infima dicitur, quæ de multis numero tantûm differentibus, id est indiuiduis ac singularibus rebus enuntiatur; quæque verè ac propriè Species est: vt pote nullâ sub se speciè habēs, sed indiuiduis proxima, vt apud Philosophos Homo. Altera dicitur Media, quæ cû superioribus collata, species est: cum inferioribus, generis gradum obtinet: quod modò Genus subalternum appellauimus. Nam sæpenumero id accidit, vt vna res alteri sit genus, alteri species. veluti, Animal respectu corporis (vt modò diximus) species est : respectu piscis, genus. Homo respectu animalis species est : respectu liberorû & seruorum est genus. Piscis respectu animalis, species est : respectu Murænarum, genus. Item Homo respectu animalis, species est: respectu Gallorum, Germanorum, Italicorum, genus. Item vt respectu Pygmæorum, aut Gigantum. Itaque quoniam species duas hasce partes in animi notione sustinet, iccirco notionem ipsius, non vnâ, sed duplicem esse oportet. nam cû genus est, latior ac fusior notio est; cû species, arctior atq; angustior.

Sed

Sed Stoicorum sententia triplex Species constituitur. nam (vt Diogenes Laertius in Zenonis vita testatur) ἰδιὸν ἰδιότατον Zeno appellabat, quæ cum sit species, speciem non habet: hoc est, quod Aristoteles indiuiduum appellat: veluti Socratem, aut Pamphilum. quam rationem Iurisperiti (vt dixi) secuti sunt.

Vtrorū igitur verior sententia est? Non nostrum inter vos (dicebat ille) tantas componere lites. Sed inter Speciem & Indiuiduum notari hoc discrimen potest: quòd illa, notione & intelligentia comprehenditur: hoc, percipitur sensu, qui rationis expertus est. Denique Speciei proprietates pluribus conueniunt; Indiuidui proprietates in nullum aliud conueniunt. nam Rationis particeps dicitur de pluribus. Hic fundus, vel Socrates de vno tantum. ac nullam quidem indiuiduorum notionem ac scientiam in animis nostris à natura impressam, Plato censebat. Itaque disputationem quæ à Generibus ad imas species perducta erat, sisti atque inhiberi iubebat: neque ad indiuidua progredi: quoniam & erant infinita, & scientia nulla comprehendere poterat. quam ob rem ne definiri quidem possunt, vt posterius intelliges. Sed cum Iurisperiti corpora omnia in partes non modò corporatas, quibus totum interit, verum etiam in intellectas, per quas totum non interit, diuiderent, propterea Indiuidua hæc non nominarunt, sed Species, quæ plures notiones habere pos-

sent. nam cū Dauus aut Bucephalus plurium dominorum esse possint, necesse est plurium dominiorum plures notiones in vna eadēque re notari. veluti si seruus duorum communis aliquid acquirat, singulis, pro qua parte domini sunt, acquirit. l. 5, D. de stip. ser. qua de causa duorum seruorum personam sustinere dicitur. L. 1, §. communis, eod,

Quomodo ex genere constituitur species? Per differētiā, quæ est forma rei, & causa propter quam quæque res est id quod est. Verū id perpetuum non est, tanta enim differentiarum ignoratio est, vt sæpe species sui generis nomine appellentur. veluti apud Cæsarem, initio lib. 1. Gallorum alij sunt Belgæ, alij Aquitani, alij Galli. Interdum per particulam NON alteri speciei contradicentē designentur: veluti, Animalium aliud est rationale, aliud non rationale. Ius aliud est Scriptum, aliud non scriptum. Furtum aliud est manifestum, aliud nec manifestum.

Quid? differentia qualis notio est? Quæ sui adiūctione rem vniuersalē in species contrarias notata cuiusque qualitate distinguit. Itaque in quæstione Quale quidque sit, vsurpatur. veluti, Rationis particeps. nam &, si quærat, Homo quale sit animal, respondebitur, Rationis compos: & rursus, si quærat, quid à brutis differat, idem respondebitur. Denique differentia est forma rei, & causa propter quam res est id quod est. Sed de differē-

ferentiis postea cum ad diuisionem ventum erit, vberius exponemus.

Potésne hunc notionum & intelligentiarú ordinem aliquanto dilucidius exponere? Ex Platonis certè & Aristotelis doctrina, planissimè id possumus. Iubent enim poni Calliam procul ad nos longo interuallo venientem. Ea species extrinsecus oblata sensibus continuo generis vniuersi notitiam in animo informat. primùm enim corpus esse intelligimus. mox, vbi propius accessit, animal. tum hominem: ad extremum Calliam. Sic, qui in statione sunt, & procul aliquem venientem intuentur, primùm corpus esse animaduertunt. secundò ex cursu animal esse iudicant. Tertiò, equitem. quartò ex colore, amicum vel hostem. postremò, Titium, vel Sempronium. Atque hi sunt nimirum, de quibus superius diximus, notionum & intelligentiarú gradus.

Supereft vna quæstio. Genus & Species vtrum prius ac posterius sunt, anne simul? Genus propterea specie prius est, quoniam (vt superius diximus) consecutio essentiæ reciproca tionem non admittit. nam si est equus, est animal: at non cōtinuò si est animal, etiam est equus. Sic qui magnificus, idem continuò liberalis: qui autem liberalis, idem non continuò magnificus.

De Toto & partibus.

CAP. VII.



QUID est Totum? Notio, quæ rei cuiusque partes inter se cōpactas & cōpositas complectitur. Non enim separatæ partes quamuis omnes totum efficiunt, sed compactæ & sua forma constantes. Physicorum autē ratione Totum est, cui nulla pars deest.

Quotuplex est Totum? Philosophorū disputatione multiplex. sed ad huius institutionis vsum quintuplici eius partitione contenti esse possumus: quarum hæc prima est, vt aliud sit integrum, *ὅλον*, quod corporatum est, sensūque percipitur, & cerni tangique potest: veluti corpus hominis, aut domus, aut nauis: aliud Vniuersale, *τὸ καθόλου*, quod quasi genus animo & intelligentia cōprehenditur: vt Respublica, familia, hereditas, dos, peculiū, mundus muliebris. Itémque artes omnes, vt Medicina, Arithmetica, Rhetorica: quam ipsam propterea Cicero partitione, non diuisione explicauit.

Quæ est altera? Totum, aliud est continuū, quod vel vnius naturæ est, vt homo, fundus, equus, statua: vel ex pluribus compactum: vt domus, nauis, sphaera: aliud deiunctum, veluti, Populus, grex, armentum, exercitus, familia. I. rerum mixtura, 30, D. de vsurpat.

Quæ est tertia? Totum aliud est perfectū, quod per se constat, neque alterius pars esse debet: veluti domus, arbor, nauis. aliud imperfectum, quod per se non constat, sed alterius

rius

rius pars esse debet: veluti fundamentum per se & quatenus fundamentum est, totum est: attamen non ita natura sua comparatum est, vt sit totum, & per se constet: sed vt domus pars sit. Sic Ramus, quatenus ramus est, totū est: at natura sua pars esse arboris debet. Itē vt puppis, vt prora, vt sentina, partes esse nauis debent. eodēque modo & manus, & oculus, & auris, corporis humani sunt partes, neque per se constant. Scitum est autem quod Aristoteles libro Politicorum primo scribit, *πάντα τῷ ἐργῷ ὡρίζαι, ἢ τῇ δυνάμει*. omnes ex sui muneris functione & efficientia æstimari, ac definiri. Itaque partem eam demum verè ac propriè dicendam esse, quæ in Toto est, suoque munere fungitur. Auulsam autem ac separatam, dici tantū abusione & communione vocabuli, quam *ὑμενυμίαν* appellat. Itaque manum & pedem tum demum verè dici, cū suo munere funguntur. Vbi autem separata sunt, nihilo magis esse partes Totius, quàm cū lapidea manus aut ænea, manus dicitur. Pars enim Totius pars dicitur, non totum partis totum. Itaque fundamentum dicitur domus fundamentum: & Tectum, domus tectum: nō contrā. quod idem scribit lib. 4. Metheorōn.

Quæ est quarta? Rerum aliæ sunt, vi ipsa tantū: quod Græci *τῇ δυνάμει* dicunt: aliæ re ipsa, quod illi *τῇ ἐνέργειᾳ*. nos illas absolutas appellare possumus: has informes, siue informatas, siue etiā inchoatas. Vulgus dicit aliud

esse actu, aliud potestate:

Quæ sunt absolutæ? Quæ naturæ suæ perfectionem, & quasi maturitatem quandam adeptæ sunt: quoniam in iis forma iam & finis inest, suisque omnibus numeris & partibus expletæ sunt. vt vinum, frumentum, oleum.

Quæ sunt informes? Quæ vim in se nascendi & existendi continent, verum in spe tantum atque expectatione sunt. In iis enim efficiens tantum & materia est: veluti, Ouum quod à Gallina fouetur, vi & spe pullus est. Iuglans lactea, quæ arboris succo alitur, expectatione nux est: seges, frumentum: vix pendentes, vinum: oliuæ, oleum. partus nondum editus, homo non rectè dicitur: ait Papinianus in l. in Falcidia, 9, D. ad leg. Falcid.

Quæ est quinta diuisio? Totum aliud est naturale, quod natura non manu constat: vt Animal, Fūdus, Arbor. aliud artificiosum, quod hominis solertia atque arte confectum est. vt domus, naus, currus, statua. Eiusque diuisionis vsus proximè intelligetur.

Quæ est Partium distributio? Multiplex. sed illa primaria, vt aliæ sint principales, sine quibus constare res nō potest: velut in humano corpore, Caput, Humeri, Thorax. Aliæ minus principales, sine quibus res constat: vt auriculæ, crines, vngues, supercilia. Sic in Arbore, radix, truncus, rami, principales sunt partes: at folia, flores, baccae, minus principales. Item in naue, prora, puppis, & sentina, partes sunt

sunt principales. at de malo & artemone disputatur. malū nauis esse partem, artemonem autem non esse, Labeo ait : quia pleræque naues sine malo inutiles sunt: artemo autē magis additamentum, quàm pars nauis est. Sic multæ naues sine gubernaculo sunt: ac præsertim exiguæ: vt scaphæ, & scapharū similes.

Quæ est altera diuisio? Vt aliæ sint cognatæ, quas Græci *ὁμογενεῖς*, siue *ὁμοιομερεῖς* appellant: aliæ verò extraneæ, quas iidem *ἀνομοιομερεῖς*, & *ἐτερογενεῖς*, id est, alienigenas nominant:

Quæ sunt Cognatæ? Quæ ex eodem quasi genere ortæ, totius nomen retinent: veluti lapidis partes omnes lapidis nomen retinent: Item fundi partes omnes, fundus dicuntur. l. planè, 34. §. vltim. D. de legat. j. quoniam, fundum Varro vocat, quē possis mittere funda: vt est in vetere prouerbio.

Quæ sunt extraneæ? Quæ vel ex eodem capite ductæ, vel ei cohærentes, tamen quasi alienigenæ, variis nominibus appellantur. veluti, Arboris partes nullæ nomen Totius retinent, non magis quàm domus, aut nauis, aut corporis humani. Sic apud Iurisconsultos superficies omnis subiecti corporis pars est. vt vitis, vineæ: arbor, fundi: seges, arui: pictura, tabulæ: scriptura, membranæ: purpura, vestis. l. adeo, 7, §. cū in suo, & seq. & l. qua ratione, 9, D. de acq. rer. dom.

Quæ est tertia partium diuisio? Vt aliæ

sint corporales, quæ pondere, numero, mensura fiunt: & quæ oculis cerni tangique possunt. aliæ verò intellectæ, quæ animo tantum cerni atque intelligi possunt. Corporaliū exemplum est primū in vulgatis diuisionibus, cum ex vna re plures fiunt. nam quod pro diuiso nostrum est, id per se consideratum, iam non pars, sed totum est. l. rectè dicimus, 25, D. de verb. signific. deinde exemplum est in generibus, & operis. nam genus numero tantum diuiditur. veluti si qui seruos duos stipulatus, duos heredes reliquerit, singulis heredibus singuli serui debebuntur. & si viginti, singulis deni: & si centum, singulis quinquageni. l. in stipulationibus, 54, l. si centum, 117, D. de verb. oblig. Sic si decem operas stipulatus, duos heredes reliquerit, numero diuidentur operæ, & singulis quinque dierum operæ debebuntur. l. stipulationes non diuiduntur, 72, & l. in stipulationibus, 54, §. i. eod. l. libertus, 15, D. de oper. lib. Quod eodem modo de quantitativis dicetur, id est iis rebus quæ numero, pondere, & mensura constant. l. cum Stichus, 29, D. de solut. & liber. Intellectarum autem partium exemplum est, veluti cum apud Mathematicos orbis diuiditur in partem concavam & conuexam: aut apud Iurisconsultos, cum aliæ dicuntur partes pro Indiuiso, aliæ pro diuiso. vt cum duo vnus eiusdemque rei domini dicuntur. nam partes pro indiuiso, intellectu constant, & incertæ sunt, partes pro diui-

diuiso corporales sunt, id est corpore & facto constant, ac certę sunt. l. placet, 25, D. quib. mod. vsus fr. amitt. Seruus commutis sic omnium est (inquit Vlpianus) non quasi singulorum totus : sed pro partibus vtique indiuisis : vt intellectu magis partes habeat , quàm corpore. l. 5, D. de stip. seru.

Quid interest inter Totum & Genus? Genus, vniuersale est, & (vt ait Aristoteles) *ὅλως ὅλον*. Itaque & singulis suis formis inest, & de iisdem singulis dicitur. Totum vniuersale non est: nam neque in singulis partibus inest, neque ipsius nomen partibus singulis conuenit. Genus ex suis formis non constat. Totum suis partibus constat. Genus natura prius est formis, tempore posterius. Totum autem (vt mox dicemus) populari ratione suis partibus est posterius. Itaque generis interitu species intereunt. Toto perempto, partes tamen populari ratione non perimuntur. At contra, specie perempta, genus nō interit: partis principalis interitu, Totum interit.

Quid interest inter Species & Partes? Species quidem subsunt generi, iisque genus constat: & partes toti, iisque Totum consistit. Verum illarum numerus certus est, partium quandoque incertus. Species diuidendo non interit, sed in quoque indiuiduo permanet: partes autem secando intereunt. Illæ generis nomen recipiunt, hæ totius nomen non recipiunt. nam hominis pars homo non est:

ait Paul. l. si dictū, 56, §. in stipulat. D. de euiet.

Cedo mihi exemplum aliquod, in quo harum differentiarum vsus appareat. Sumamus ab eorum errore, qui Dialecticam aliam faciunt naturalem, aliam artificiosam: Ciceronis fortasse adducti exemplo, qui cum adolescentulus Rhetoricam artem scriberet, posuit, memoriam aliam esse naturalem, aliam artificiosam. Nā in eo error est, quod Memoriam aut Dialecticā Genus esse putarunt, cū reuera sit Totum: cuius hæ tres sunt partes, Natura, Ars, Exercitatio: quibus tanquā partibus omnis ea virtus constat. Quod si Dialectica aut Memoria, genus essent, primū arti soli, tanquam speciei suæ inessent: deinde arte posteriores essent, quorum vtrūque absurdum est. Præterea non duas tantū, sed tres species constitui oporteret: Naturalem, Artificiosam, & Exercitatoriam. Quod eodē modo de Architectura posterius in diuisione ostendemus.

Supereſt illa quæſtio: Totū & Partes, vtrum prius aut posterius ſint, an ſimul? Rectè admones: neque leuis momenti quæſtio illa eſt. Nā Ariſtoteles initio Politicorum ſcribit, ciuitatem quæ ex domibus conſtat, naturæ ordine prius eſſe quàm domum. τὸ γὰρ ὅλον πρότερον (inquit) ἀναγκαῖον ἐστὶ τῷ μέρους, ἀναιρούμενου γὰρ τοῦ ὅλου, οὐκ ἔστι πρὸς, εἰ δὲ χεῖρ, εἰ μὴ ὁμωνύμως. Totum neceſſe eſt prius eſſe, quàm partem. ſublato enim toto neque pes, neq; manus eſt, niſi ne-

si nominis communione: ut cum lapidea manus dicitur in statua. Idem tamen libro Topicorum sexto scribit, Totum & partes non esse idem: & si sint partes, nihil prohibere non esse Totum: atque interemptis partibus totum interire: interempto verò toto, non necesse esse partes interire. τὸ μέρων φθαρέναι, εὐθείρεσθαι τὸ ὅλον: τὸ δὲ ὅλου φθαρέντος, ἐκ ἀνάγκης καὶ τὰ μέρη ἐφθάρθαι.

Quidnam igitur in hac ambiguitate certi definiemus? Primum distinctio superior adhibenda est: ut aliud sit Totum naturale, veluti arbor, fundus, avis, equus: aliud artificiosum: veluti domus, navis, currus. si naturale totum est, verissimum est quod Aristoteles libro de Natura octavo scribit, Prius esse & naturæ, & temporis, & rationis ordine id quod perfectum est, eo quod est inchoatum: Sin autem artificiosum est, tum eiusdem Aristotelis monitu altera distinctio adhibenda est: utrum subtiliter ex artis ratione, an populariter ex sermonis consuetudine differatur. Nam quia subtili ratione ea demum pars verè proprièque dicitur, quæ suo munere fungitur: fungi autem suo munere nisi suo toti coherens non potest: certè Totum & Pars naturæ ac temporis ordine simul sint necesse est. nam ubi est domus, ibi necesse est esse tectum: & ubi tectum reuera tegens, ibi necesse est esse domum. ubi currus: ibi rota: & ubi rota reuera & actu voluens, ibi currus. Sin autè populariter loquamur, & ho-

monymia, id est communione nominis abutamur, tum verò Pars dicetur esse prior: Totū verò posterius. ut area, quam Iurisconsulti potissimam domus partem appellant, prior est ædificio: & fundus prior vitibus, aut arboribus, aut fruticibus.

De quatuor causarum generibus.

C A P. VIII.

DEINCEPS de quinta notione siue Affectione videam'. Quid est causa? Est id cuiusvi rei cuiusque aut actionis euentus exitū habuit. Simul enim eodēque tempore vtriusque ratio habenda est, Euentus & Causæ. Rem autem appello, veluti nauigium, aut rhedam quam faber efficit. Actionem verò, veluti nauigationem, aut rectionem.

Quæ sunt in causis tractandis consideranda? Primū vt Causa & Euentus tanquam inter se relata & respondentia perpetuò conferantur. Deinde vt in euentu & rerum & actionum ratio habeatur: postremò vt hæc eadem tum in iis quæ natura, tum ex iis quæ ex arte eueniunt, obseruentur.

Quotuplex est causa? Quadruplex. Efficiens, Sine qua non, Forma, & (quæ omnium principatū obtinet) Finis. sic Græci τῶν αἰτίων, alia ποιητικὰ faciunt, alia ὧν ἐκ ἀνευ, alia μορφὰς, siue εἶδη, alia τελικὰ.

Quæ

Quæ est Causa efficiens? Quæ motus eius principium attulit, per quem euentus exitum habuit. velut in re naturali, Sol causa est diei: Corpus in lumine, causa est umbræ. quæ de causa lunæ interpositus causa est defectio- nis solis: & terræ interpositus, causa defectio- nis lunæ. In artificio sutor causa est calcei, sculptor numi. In actione naturali, ignis cau- sa est ardoris, cruditas morbi: in artificiosa, Auriga causa est vectio- nis efficiens: & Guber- nator nauigationis.

Quæ est causa sine qua non? Quæ naturā efficiendi non habet, sed sine qua id quod fa- ciendum est effici non potest. Hanc Latini vul- gò materiā appellant: Græci *ύλη*. ad natura- rum quidem cognitionem, aptissimè: sed ad vsum Dialecticum, & actionum notationem, imperitissimè. Nam (vt Cicero in primo A- cademico scribit) de natura, inquit, ita dice- bant, vt eam diuiderent in res duas: vt altera esset efficiens, altera autem quasi huic se præ- bens, ex qua efficeretur aliquid. In eo quod efficeret, vim esse censebant: in eo autem quod efficeretur, materiam quandam. At vbi de a- ctionibus quæritur, longè alia ratio est.

Cedo vtrarumque exemplum. Primum o- mnium ponatur, (vt antè monuimus) euen- tus, tum deinde causa quærat. nam hæc na- tura quidem prior est: at ille consideratione. In rebus igitur naturalibus, Ouum materia est pulli: aqua est materia glaciei. In artificio-

sis, æs materia est statuæ: corium calcei. In actionibus verò naturalibus, causa incendiij sine qua non, est fomes: in artificialibus, instrumentum causa est sine qua non: vt nauigandi, nauis: vehendi, rheda: ambulandi, locus: accusandi, oratio.

Quæ est forma? Est naturalis cuiusque rei nota, per quam quæque vel res, vel actio, est id quod est, atq; ab altera discrepat. velut in rebus naturalibus, Ratio in homine, causa est & quod homo est, & quod differt à bellua. vita in arbore, causa est quod & arbor est, & differt à trunco. In artificiosis, volubilitas in cylindro: at in actionibus naturæ, veluti incendiij forma est, ardor. In artificiosis, motus mediocris forma est deambulationis: motus velox, forma est cursus. nam quæ sub eodem genere sunt, forma discrepant. Vsq; adeo autem verum est, formam esse per quam quæque res est id quod est, vt quauis corpus maneat, tamen si forma mutata sit, nō eadē esse res videatur. veluti si ex scypho massa facta sit. Itaq; qui ad exhibendum scyphū tenetur, massam exhibendo non liberatur. l. Iul. 9, §. si quis, D. ad exhib.

Quæ est finis? Propter quam quæque res & actio vel instituta, vel impedita est. Horum enim vtrunque in fine considerandum est: ac propterea vnum quodque eorum suam habet notam, vt, & ne. In rebus naturæ, veluti, Homo erectus est, vt cælum potius quam terram contempletur: vel, ne pecudum ritu perpetuò

petuò terram intueatur. In artificiosis, Nāvis instituitur, vt transmarinæ cōmoditates parentur:& ne iis carere homines cogantur. Deambulatur à cœna, vt cibus in imum stomachum deprimatur: &, ne cibus fluitet in ore ventriculi. Domus finis est, ne tempestatibus lædamur, & vt seruari supellex possit. Iam in actionibus naturæ: veluti, Sol terram ambit, vt mortalibus luceat: néve mortales perpetuò sint in tenebris. in artificiosis, exercitatio fuscipitur, vt valetudo cōseruetur, néve morbi contrahantur.

Quis est causarum ordo? Duplex omnino est, naturæ & considerationis. naturæ, is quem secuti sumus. nā cū efficiens mouendi principium sit, atque in eo vis insit efficiendi primaria, princeps ei debetur locus. Hunc sequitur causa sine qua non: mox species, qua quæque res ad exemplar in animo informatum fingitur. Postremò finis, quem constat esse bonum aliquod, cuius adipiscendi gratia res omnis efficitur. At ordo considerationis huic planè contrarius est: nam rei cuiusque contemplatio ex eo bono quod in fine inest, principium ducit: gradatimque ad ea quæ minus bona sunt, regreditur.

Quid? Materia corporis effecti, nōne prior est opifice? veluti, aurum annuli nōne prius est aurifice? & materia domus, quæ ex trabibus, calce & lateribus constat, nōne prius est naturæ ordine, quàm Architectus?

Nequaquam. Idque facile tum ex naturalibus, tū ex artificialibus rebus, & nouatis materiis intelligi potest. nam & vitriarius prior est, quàm vitrum: & pistor prior est farina: architectus naui prior est, quàm tabulæ: neque enim ita natæ tabulæ sunt, Atque ad hunc locum iocularis illa quæstio pertinet, de qua est apud Macrobiū: Ouūme prius fuerit, quàm Gallina. nam si natura perfecta creauit animalia, vt Philosophi quoque ipsi statuunt, & Religio nos nostra docuit: prius certè Gallinam fuisse, quàm ouum necesse est.

Cedo aliud exemplū. Materia domus sunt trabes, calx, lateres, aut lapides excisi. annon igitur materiarius, prior fuit quàm trabes? aut coctor, quàm lateres? aut cementarius, quàm calx? aut faber, quàm lapis excisus, aptus & quadratus?

De multiplici causarum efficientium genere.

C A P. I X.

QUAE est causarum diuisio? Prima efficientium diuisio est, vt aliæ sint absolutæ, perfectæ, & principales: aliæ adiuuantes, adiunctæ, & quasi sociæ. Illas Græci vocant αἰτία ἐνεργουμένη καθ' αὑτήν: has verò συνάτια, vel ὑπεργουμένη.

Quæ est absoluta? Quæ per se ac sua sponte vim habet efficiendi: velut, ignis per se ac vi sua incendit. Sol vi sua lucet, colorat, incendit.

cendit. hæc autem rursus bipartita est.

Quomodo? Vt alia sola in rerum natura efficiendi vim habeat; ideóque cum euentu reciprocetur. alia verò non sola in eo genere sit. veluti, Vbicunque ignis est, incendiū est: & vicissim vbicunque incendium, ibidem ignis est. Item; Vbicunque corpus in lumine est, ibi vmbra est, vicissimque vbicunque vmbra est, ibidem corpus in lumine est. Nihil est enim quod vel incendium efficiat, præter ignem: vel vmbra, præter corpus. At si aliud causæ genus est, non reciprocantur: veluti, Si calet, ad ignem sese calefecit. Potest enim ex febris calere. Sol vi sua colorat: sed nō quicunque coloratus est, continuò à Sole est. Sol capitis dolorem vi sua facit: at non vtique qui ex capite laborat, à Sole causam habuit. Alia enim præter Solem eam vim & efficientiā habent. sic, Non si mulier nō peperit, iccirco cū viro non concubuit.

Quæ est adiuuans? Quæ non per se ac vi sua efficit: sed efficiendi socia est. veluti, Exercitatio causa est eloquentiæ, non efficiens per se, sed adiuuans. Vinū febricitāti mortis causam affert: labor in corpore impuro morbi causam præbet. hæc verò vel propinqua est, vel remota.

Quæ est adiuuans propinqua? Quæ efficienter antecedit: vt illa, quam modò posui, labor in corpore vitioso.

Quæ est Remota? Hæc duplex est. Nam

aut consentanea est, aut aliena. Consentanea est, quæ naturam habet cum effectu ita congruentem, vt tamen hic & sequi, & non sequi potuerit: veluti, iurgium, aut inimicitia sæpe causa est cædis antecedens, non tamen necessaria. Collocutio sæpe causa est coniugij antecedens, sed non necessaria.

Quæ est Aliena? Quæ cum naturam habeat ab effectu dissentaneam, tamen propinquam causam commouit. Itaque imperitè & abusiue ex vulgi errore Causa nominatur: cū verius Opinata vel Pseudocausa dici possit: velut in illo, Veritas odium parit. Veritas enim ab odio alienissima, improbitatem quæ causa est adiuuans, & propinqua, commouit, irritauit, exciuit. Sic negligentia patrisfam, vulgò dicitur causa fuisse furi rem neglectam auferendi: & viator benè vestitus (inquit Cicero) causa grassatori fuisse dicitur, cur ab eo spoliaretur. Ex eodem genere illud Prouerbum est, Bonæ leges ex malis moribus procreantur. Itémque illa poëtarum iocularia & ab arte nostra longè abhorrentia, quæ Cicero in libro de Fato verius ad antecedentia retulit. veluti Hecuba Troianis causa interitus fuit, quòd Alexandrum genuit.

Vtinam ne in nemore Pelio securibus

Cæsa cecidisset abiecta ad terram trabes, &c.

Quæ est altera Causarum efficientium diuisio? Vt aliæ sint Præcreatrices, quæ essentiã & ortum significant: veluti superiores: aliæ

Perem-

Peremptrices, quæ interitum afferunt. Illæ γεννητικαὶ à Græcis, hæ φθαρτικαὶ dicuntur. Et rursus aliæ per se, vt Aqua ignem extinguit: aliæ cum adiunctione, vt Vinum febricitanti mortis causam affert.

Quæ est tertia Efficientium causarum diuisio? Vt aliæ in voluntate positæ sint, aliæ in fortuna, aliæ in necessitate, aliæ in imprudentia.

Quæ est voluntaria? Ea duplex est, aut Impulsua, aut Ratiocinatiua. Impulsuam Fortunatianus Rhetor & Iurisconsultus eam esse dicit, quam Græci ὁρεκτικῶς appellant, vt iram, odium. Ratiocinatiuam, quam iidem λογικῶς vocant, vt lucrum, hereditatem. Quibus verbis significat, impulsuam esse, quæ in impetu & perturbatione animi posita rationis expers est: qualis est ægritudo, iracundia, vinolætia, desperatio. Vt cum Ajax, vbi rescivit quæ per insaniam fecerat, gladio incubuit: aut cum Annibal, Themistocles, Cato Uticēsis, odio vitæ adducti, necem sibi consciuerunt.

Quam appellas Ratiocinatiuā? Quæ in ratione, consilio, & deliberatione posita, bonum aliquod tanquam finem propositum habet. Ita cum animus noster in duas distributus sit partes, quarum altera rationis est particeps, altera expers: ad hanc impulsua, ad illam ratiocinatiua referenda est: in eaque differentia, momentum plerunque maximum est. Atque hoc eodem modo Cicero libro de Inuēt.

II. vtrunque hanc causam explicauit.

Cedo exemplum. Ponatur lex, vt Tyrānicidæ præmium detur. Comprehēsus in adulterio à Tyranno, eum occidit. Quia Tyrannicida propriè est, qui liberandæ Reip. causa Tyrannum interfecit, præmium non debetur. causa enim occidendi non ratiocinatio fuit, sed impulsio. Ponatur altera lex: Parricida in culeum insuatur: Cùm Tyrannus regno pulsus arma in Remp. ferret, prælio commissus, filius qui pro Repub. pugnabat, patrē qui à Tyranno stabat, interfecit. Hic parricida nō est. Rationem enim habuit patriæ liberationem.

Quæ est fortuita? Cuius causa humanitus ignota est: veluti Piscatio causa fuit fortuita Milesiis aurei tripodis reperiendi. Et fossio scrobis fuit causa Timoni Misanthropo thesauri inueniendi: & apud Iurisconsultos pile à lusore percussa, & in nouaculam tonsoris adacta, causa fuit hominis iugulandi.

Quæ est causa ex necessitate efficiens? Cū quid alterius coactu, & vi aut metu factum est. vt si quis Potentioris imperio quempiam interfecerit. quo de genere illud est Laberij, qui Cæsaris coactu in scenam prodit.

Necessitas cuius aduersa impetum

Voluerunt multi effugere, pauci potuerunt:

Quò me detrusit penè extremis sensibus?

Quæ est causa ex imprudētia? Cùm quid neque consultò, neque casu, sed per errorem factum

factum est. veluti : Siquis publico in ludo iaculans prætereuntem transfixerit : aut putator, ramum arboris in trāseuntem deiecerit : aut qui amphoram instituerat, currēte rotam vrceum effecerit : aut aliquis per ebrietatem flagitium admiserit.

Quæ est quarta efficientium diuifio? Vt alia adesse, alia verò abesse dicatur : cuius vtriufque par eadēque in contrarium vis atque efficiencia est. quod enim præsens caussa, quoniam adest, efficit: eius contrarium absens, eo ipso quod abest, efficit.

Cedo exemplum. Vt Gubernator cūm adest, recti cursus tenendi, caussa est: sic idē cūm abest, naufragij caussa esse dicitur. Quod idem in medico, in custode, & similibus dici potest. Mors Hectoris caussa fuit amittendæ Troiæ: cūm eā viuus conseruaret. Sic fuga ducis ex prælio caussa est offensionis: cūm eiusdē præsentia victoriæ caussa fuisset. Itē, Negligentia præceptoris, caussa est inscitix puerorum: cūm eius diligentia eruditionis caussa esse potuisset. Sic accessus Solis, caussa est æstatis: recessus caussa hyemis.

Quotuplex est Caussa sine qua nō? Duplex. altera quieta, & tanquam stolidā : altera verò adiuuans.

Quæ est quieta? In rebus, materia: vt coriū calceolario: in actionibus, facultas, siue instrumentum. vt viatori, nauis, equus, rheda. Instrumenti autem nomine, ferramenta, locum,

tempus, & cetera generis eiusdem comprehendimus. Sic in Dialectica perdiscēda causa sine qua non, est acumen ingenij: in Iurisperdientia, memoria fidelis: Sic Mathematicę scientię cognitio causa est, sine qua non Aristotelis logica planè intelligitur. Itaque in ipsius vestibulo, rectè vetus illud inscribi posset, *ἐστὶς ἀγέτω μὲν τῆς ἐπιστήμης, εἰ σέβω*. Ex eodem genere illud est Ciceronis, Tuscul. I. Si Numa Pompilius auditor fuit Pythagorę, necesse est eodem tempore vtrunque vixisse. Et alibi: Si Sex. Roscius Romę patrem occidit, necesse est eum Romę fuisse.

Quę est adiuuans? Quę cū antecessit, facultatem & opportunitatē negotio prębuit. vt collocutio cū hoste, proditiōis causa est: cohortatio Imperatoris, causa est virtutis in militibus. monitio Pręceptoris, causa eruditionis in adolescentibus. itē diligentia, & exercitatio in arte Dialectica, ceterisque disciplinis percipiendis.

De Effectis.

C A P. X.



Quę sunt Effecta? Quę ex causarum concursu & quasi cōspiratione eueniunt. Itaque à Gręcis *αἰτιατά*, à nostris Euenta nominātur. De quibus est illud Ciceronis: Causarum cognitio cognitionem euentorum facit. Nōnulli autē *ἐκβάσεις*, id est exitus appellant: quod nihil

in iis tractetur, nisi quid ex quoque euenerit.

Quotuplex est Effectus? Quoniam effecta respondent causis, eaque inter se referuntur, adæquantur, & parem rationem habent, sequitur ut Affectorum eadem planè quæ causarum diuisio sit. Alia enim Effecta sunt causarum efficientium: alia causæ sine qua non: alia formæ: alia finis.

Quæ est altera diuisio? Ut effectorum alia sint procreantia, alia interimetia. Illa *ὑποστικ*, hæc *φθορα* nominantur. Prioris exempla sunt, velut in natura, flores, frondes, fruges. In artibus, opera effecta. Posterioris, velut in natura, deflorescere, arescere, defrondescere. in artibus, cædes, vastitates.

Quæ est alia? Ut euentorum alia naturalia sint, quæ naturalem causam arguunt. ut defectio Lunæ, arguit terræ interuentum: Tonitruum arguit ignis rextinctionem in nube: frondium lapsus, arguit humoris concretionem. alia voluntaria, quæ hominum iudicio & voluntate effecta sunt, ut opificum & artificum opera. alia fortuita, ut cum hostis vomitum Phærei Iasonis aperuit, quam sanare medici non potuerunt.

Quæ sunt Relata? Loco tu quidem quæris. sed quia Relata sunt ex oppositorum, siue contrariorum genere (situ enim & positione aduersantur: tametsi re & natura maximè consentanea sint) propterea satius videtur eorum explanationem ad contrariorum locum referuare.

DE Proprio igitur dicamus. Quid est
 Proprium? Vis & facultas rei cui-
 piam naturaliter, peculiariter, & in-
 separabiliter adhærescens. Græci τὸ
 ἴδιον appellant. veluti, Proprium hominis est,
 vt sit rationis, sermonis, ordinis & disciplinæ
 capax. Hoc solum animal natum est, (inquit
 Cicero) pudoris & verecundiæ particeps. Pro-
 prium piscium est, vt aquarum sint incolæ:
 volucrum, vt cœlo libero fruuntur: quadru-
 pedum, vt gradientur. Sic Animantium qua-
 rundam proprium est, vt sint cicures: aliarum,
 vt sint immanes: quarundam, vt sint soliuagæ;
 aliarum, vt congregatæ. Ridendi facultas ho-
 mini à natura peculiariter attributa est, sic vt
 neque alij vlli sit communis, neque adimi ei
 possit. Frugalitatis proprium est (inquit Ci-
 cero) motus animi appetentis regere & seda-
 re. Proprium stultitiæ, aliorum vitia cernere,
 obliuisci suorum. Proprium sapientis, nihil
 quod pœnitere possit facere. Sic proprietatis
 quæstionem idem esse dicit, In hominémne so-
 lum cadat, an etiam in belluas ægritudo. Plu-
 ra autem interdum eiusdem rei propria sunt:
 vt hominis, ratio, sermo, risus, verecundia, me-
 dicina, docilitas. Ignis lucere, calefacere, in
 sublime ferri.

Quotuplex est Proprium? Duplex. alterum
 verè proprium, quod speciei soli conuenit: vt
 homini,

homini ratione vti, loqui, mederi. cani, latratu: piscibus, aquatio. alterum quasi propriū, quod vtrique perpetuum est, sed non soli. vt cicurem esse, homini cōuenit, sed non soli. Ignis calefacit: at non solus. Illud reciprocatur cum subiecto: hoc non reciprocatur. nam si quid ridet, homo est: & si homo est, ridet. si quid latrat, canis est: & si canis est, latrat. At, non vt si est ignis, calefacit: iccirco si calefacit, continuo ignis est. Sol enim etiam calefacit. Si est piscis, natat. At non si natat, cōtinuò piscis est. nam & homo & bos & canis natare possunt. si est auis, volat. sed non si volat, continuo auis est: quidam enim pisces volant.

Quæ est altera Proprij diuisio? Aristoteles fecit quadripartitam, vt primum sit illud verè proprium, *κρυπτὸς ἴδιον*, quod vni speciei soli & toti, hoc est omnibus eius indiuiduis & semper conuenit: vt ridere. alterum, quod vni speciei tantū conuenit, sed non toti. veluti iustum esse, & Aristidis similem, soli conuenit homini, sed non omnibus: tertium, quod vniuersæ speciei cōuenit, at nō soli: vt bipedem esse. quartum, quod soli speciei conuenit, sed non semper: vt in senectute canescere. nam equi quoque canescunt.

De Antecedente.

CAP. XII.



VID est Antecedens? Quo vel posito, aliud quod ei cohæret, subsequitur: vel negato, non subsequitur. Græci

ἄπορρον μὲν appellant. veluti: Si est ver, estas subsequitur: si est aurora, dies. Ex cōtrario, Quod quis non habuit, non perdidit. Si non vixit postumus (inquit Crassus) nō est mortuus. Si amabat, non læsit sciens. Ex hoc genere sunt naturales affectiones, quæ à Græcis *σώφραι* nominantur. Si est mater, diligit filium. quod argumentum Salomon in illo nobili iudicio sequutus est. Item: Si filius est, parentem verebitur. Nam hæc consecutio naturæ ordine instituta est: & quia causam habet naturalē, non vitiosam, necessaria est. Sic Parentes suos liberos incolumes & beatos esse cupiunt: vicissimque liberi suos parentes.

Quotuplex est antecedens? Duplex. Alterum proprium, quod necessariò cohæret: alterum improprium, quod vel probabiliter tantum, vel fortuitò cohæret. Illa reciprocantur inter se, ac vicissim retròque commeant. hæc non reciprocantur.

Quæ sunt propria? Quæ inter se pariter & necessariò cohærent. veluti, Si viuit, morietur. &, si mortu' est, vixit. Si est aurora, lucebit sol. &, si Sol lucet, aurora antecessit. Si est ver, fuit hyems. &, si est hyems, ver consequetur.

Quæ sunt impropria? Quorum alterum necessariò cohæret, alterum probabiliter, aut fortuitò. Itaque hæc inter se non reciprocantur. veluti: Satio arguit arationē necessariò, aratio verò sationem probabiliter tantum. Exitum antecessit ingressus necessariò. At nō

si quis ingressus est, sequitur ut sit egressus. Propterea autem Antecedentia aut consequentia hæc dicuntur, non adiuncta, aut accidentia, quoniam eorum alterum proprium est. quod si neutrum est proprium, ad illum affectionum locum hoc totum referendum est.

Quid interest inter antecedens & causam? Causa & necessario & efficienter antecedit. Antecedens verò interdum necessario tantum, interdum aut probabiliter, aut fortuito tantum. non enim vis efficiendi in illo est. Itaque si Sol exortus est, dies est. quod ex causis sumitur. At si lucifer exortus est, dies orietur, quod ex Antecedentibus ducitur.

De Consequentibus.

CAP. XIII.


QUID est Consequens? Quod cum eo quod antecessit necessario cohæret. Græci ἀκόλουθον appellant: velut in causa Curiana, Si Postumus mortuus est, vixit. Quo in genere iocus est ille Parisiensium, Si mulierculæ visæ sunt è monachorum claustris egredi, prius introierant. Item priuantia omnia: Si amisit, habuerat. Si recuperavit, amiserat: si conualuit, agrotarat. Ex quo illud est Fabij Maximi qui Liuius Salinatori, qui Tarento amisso fugerat in arcem, multaque ex ea prælia præclara fecerat, glorianti atque dicenti: Mea opera Q. Fabi Tarentum recepisti. Certè (inquit) ridens: nam

nisi tu amisisses, ego nunquam recepissem.

Quid interest inter Causam, Principium, & Antecedens? Locus est insignis apud Polybium lib. III, in quo sapienter admonet, permagni omnibus in vitæ partibus interesse, notum esse discrimen inter Causam & Principium. Sed illa consideratio ad actiones, veluti ad rei militaris officia, de quibus eo loco agebat, tota pertinet. Causas igitur ait esse, in rebus omnibus primas. principia verò ultima causarum. Denique causas esse, quæ deliberationem antecedunt, vt consilia & rationationes. Principia verò idem appellat primas hominum actiones in rebus, quæ decreta & deliberata sunt. Sed Antecedentiū & Consequentiū ratio nihil ad hoc genus pertinet, quod totum consilij est, cū illa sint necessitatis.

De Adiunctis.

CAP. XIIII.

 A E sunt Adiuncta? Quæ probabiliter communi hominum opinione rei attribuuntur. Græci τὰ κοινῶς συμβεβηκότα, τὰ ὡς ὅτι τὸ πολὺ, τὰ μὴ ἀεὶ ἐπόμενα nominant: Id est plerunque & cōmuniter contingentia: veluti, Adiunctum est viris, vt sint barbati: quamuis id non omnibus contingat. Item Agricola cū florem oleæ videt, baccam quoque se visurum putat. Item, Tyrannis adiunctum est, vt violenta morte

te intereant:

Ad generum Cereris sine cæde & sanguine pauci

Descendunt Reges, & sicca morte Tyranni. Itē:

Iis qui facilè mētiuntur, adiunctum est, vt facilè peierent. Has Iurisperiti præsumptiones appellant. veluti cū Vlyssēs inuentus est in sylua cruentum telum tenens, quod ex Aiæ inimici corpore extraxerat, quo se ille interfecerat.

Quænam Adiunctorum diuisio est? Multiplex. nam alia ex naturæ habitu attribuuntur: veluti: attributū est iracundis, vt accepta contumelia commoueantur: quod in Aiæ animaduersum est. Item, mulieribus adiunctum est, vt sint auaræ: Ingeniosis adiunctum est, vt sint iracundi (vt ait Plato) & melancholici. Auaris, vt iusiurandum neglegant. Alia ex vitæ instituto: vt, Philosophis adiunctum est, vt pecuniâ neglegant: liberalibus, vt sint hospitales: Aulicis, vt sint vafri, palpatores, perfidiosi: militibus, vt sint gloriosi, rapaces, impij.

Quid? nunquid etiam ex naturæ ordine Adiuncta attribuuntur, Veluti, Si mater est, diligit filium: Si filius est, veretur patrem? Hoc plerisque certè omnibus video placuisse: sed, vt opinor, non satis cōsiderantibus illum esse naturæ ordinem necessarium; ac proinde ad Antecedentia & Consequentia referendū esse: quæ non communi opinione, sed naturæ lege atque ordine necessariò eueniunt. In quibus autem naturæ ordo non valet, ea pro

monstris habenda sunt. Sed quod de naturæ lege atque ordine dictum est, id ad vitia & deprauationem transferri non oportet. quippe quæ disciplina emendari possit. vt de Socrate, Stylpone, & aliis traditum est, qui cū mulierosi natura essent, studio tamen, & disciplina naturæ vitium edomuerant. Præstat igitur naturæ propensiones, ad antecedentia: deprauationes autem, ad adiuncta referri.

De Accidenti.

C A P, X V,

QUID est Accidens? Quod per se constare non potest, sed ita subiecto adherescit, vt cū accidēs sine hoc esse non possit, tamē hoc sine illo esse possit. veluti, Glacies, nix, grando, per se esse nō possunt. Ita autem in aqua insunt, vt neque sine aqua esse possint, & soluto gelu aqua nihilominus permaneat. potest igitur glacies & accedere & recedere, cū aquæ natura semper maneat. Sic diuitiæ & paupertas, ceteraque omnia quæ fortuita dicuntur, accidentia sunt. Eodēque in numero habenda censeo quæ rei principali sic adiuncta sunt, vt tamen pars eius non sint. veluti dos in matrimonio: pignus in mutuo: fideiussor in obligatione: Seruitus tum realis, tum personalis. nā omnia hæc neque per se, ac sine principali negotio constare possunt: & sine principalis interitu abesse possunt.

Quotu-

Quotuplex est Accidēs? Triplex. nam aliud est naturale, vt adolescentia, senectus, adun-
citas nati, aut finitas: aliud voluntariū, vt lege-
re, ambulare, currere. aliud fortuitum, vt pau-
pertas, diuitiæ, secunda vel aduersa nauigatio.

Quæ est altera diuisio Accidentis? Vt aliud sit separabile, quod & plerunque & facilè aut accedit, aut recedit: vt morbus in homine, fri-
gus in aqua. aliud inseparabile: quod vbi ac-
cessit, vix ac ne vix quidem diuelli potest: vt
nigror à veste tincta: lepra à corpore: cæci-
tas, surditas, claudicatio, canities. Quod au-
tem plerique omnes Dialectici accidens inse-
parabile definiunt, quod non re ipsa sed cogi-
tatione tantum diuelli potest: veluti cando-
rem ab odore: & nigrorem, à coruo: id ego,
quia natura insitum est, ad quasi proprium po-
tius, quàm ad accidens referendum arbitror.


Quid interest inter Proprium & Accidens? Illud insitum & naturale est: hoc fortuitum & aduentitium: illud vni tantum speciei cōuenit: accidens, multis. Illud semper, hoc non sem-
per. vt risus vni homini semper conuenit. mor-
bus multis aliis præter hominē cōuenit. Sic a-
tror Indo & Aethiopi conuenit. Itémq; cor-
uo, & carboni, & ebena. sed cui sic conuenit,
ab eo non auellitur.

Quid interest inter Proprium, Antecedens, Adiunctum, & Accidens? Proprium insitum est. Antecedens adhærescit necessariò. Adiun-
ctum attributum est probabiliter. Accidens

verò planè alienum & aduentitium est. Itaq; illa tria perpetua sunt, hoc verò fortuitum. & quo quidque illorum ordine posterius est, eo est à re ipsa disiunctius. Rursus neque Adiuncta, neque Accidentia, vnquam necessariò cohærent. At verò Antecedentiũ & Consequentium si minus vtrunque necessariò cohæret, certè alterutrum cohæret.

De Paribus.

CAP. XVI.

VÆ sunt Paria? Hæc Græci modò τὰ ἴσα, modò τὰ ὁμοίως ὑπάρχοντα nomināt. sunt autem (meo quidem iudicio) aliā propriè paria, aliā impropriè.

Quæ sunt propriè Paria? Quorum æqualitas pondere, numero & mensura percipitur. qua de caussa Pariatores & paria fecissè olim dicebantur qui tantundē impenderant, quantum acceperant. Parium autem comparatio, nec elationem habet (vt ait Cicero) nec submissionem; id est, nec magis, nec minus recipit, est enim æqualis.

Quibus modis paritas iudicatur? Sensu & ratione. Sēsu enim iudicatur paritas ex duorum collatione; vt duo bacilli inter se collati æqualitatem ostendunt. Hinc pares soni, pares sapores, & odores, & colores, & frigora, & calores, sensibus & collatione iudicantur. Ratione autem iudicantur paria per tertij alicuius

cuius extrinsecus assumpti conuenientiam & proportionem. Geometrarū enim hoc axioma est, Quæ in tertio aliquo paria sunt, etiam inter se paria sunt.

Quæ sunt improprie Paria? Quæ à quantitate ad qualitatem transferuntur, quasi mente & ratione appensa, numerata & dimensa essent. hanc autem comparationē quæ translationibus & abusionibus vocabulorum constat, meo iudicio, Rhetoricam appellare non incommodè possumus. veluti: noxiæ pœna par esto: id est æquè grauis: quasi eadem in vtraq; momenta sint. Itē si virtutes pares sunt inter se, paria esse etiam vitia necesse est. Item: Non minor est virtus, quàm quærere parta tueri. Numerata: veluti cū homines ætate pares dicuntur. Vnde illud vetus: Pares cum paribus facilè congregantur. Dimensa: veluti, mutuus animus in amicitia est, cū par voluntas accipitur & redditur: id est æquè magna. Atque hoc modo parua magnis adhibita proportionibus, sæpè rectissimè conferuntur.

De Similibus.

CAP. XVII.

QUÆ sunt Similia? Similia dicuntur quæ in eodem genere aut specie, eiusdem ferè qualitatis sunt. Proprium enim qualitatis est, vt ex ea simile aliquid, aut dissimile dicatur. Similitudo autē iisdem quibus paritas iudicatur mo-

dis:collatione,& conuenientia.Collatio sensu iudicatur. Conuenientia verò, ratione: hoc est, tertij alicuius proportionem. veluti, Sicut aspectus in oculo, sic mens in animo.nam vtrunque in hoc tertio conuenit,quòd prouidet.Sicut in mari tràquillitas, ita serenitas in aëre.nam vtrunque est quies vacuitásque ventorum. Varro autem simile sic definit: Simile est, quod res plerasque videtur habere easdẽ, quas illud cuius est simile. Itaque qui plura habent eadem,dicuntur similiores: vt vir viro similior est,quàm vir mulieri. quod plures habent easdem partes:& sic, Senex seni similior, quàm puerò. qui verò proximè accedunt ad id,vt omnia habeant eadem, vocàtur gemini, simillimi. Hæc Varro.

Quatnobrem in definitione addidisti Ferè? Quia mira huius affectionis ratio est.nam ceteræ omnes vsquequaque sunt id quod sunt. Similia verò, ex parte tantum: eademq; dissimilium ratio est.nam qua ex parte simile imperfectum est,dissimile est:vicissimque qua ex parte dissimile imperfectum est,simile est. unde natũ in scholis prouerbiũ, Similia & dissimilia perpetuò claudicāt. Quinetiã animaduerto eãdem vtrique definitionem cõuenire. cùm tamen posterius demonstraturũ simus,quæ eadẽ definitione continentur, eadem à Dialecticis nominari. Vitiosa igitur similitudo est, cùm qua ex parte aliquid simile esse dicitur, ea ipsa in parte dissimile est: tametsi vtique aliqua

liqua ex parte dissimile sit. Ac notandum illud est Ciceronis libro ad Heren. 4. Non res tota toti rei necesse est similis sit: sed ad ipsum ad quod conferetur similitudinē habeat oportet.

Quotuplex est Similitudo? Quemadmodum qualitas alia insita est, alia externa: sic similitudo alia externa est, quæ oculis & aspectu iudicatur: alia verò insita, quæ ex vi & potestate ei innata æstimatur. Ex utriusq; autem concursu tertia species conflatur, quæ mixta nominabitur.

Cedo exemplū Similitudinis externæ, & in rebus quæ in eodem genere sunt? Simia quàm similis turpissima bestia nobis? inquit Ennius. Homo igitur, & simia cū genere, tum etiam exteriori aliqua specie quadantenus inter se cōueniunt. Interiore verò quæ cuiusque rei naturalis nota est, hoc est mente, longissimè dissident. Sic numus probus & adulterinus, specie exteriori similes sunt: interiore verò, longè dissimiles. Sic Aesopus Therfici corpore fuit simillimus: animo dissimillimus.

Cedo alterum de specie. Vidēsne (inquit Cicero) ut in prouerbio sit ouorum inter se similitudo? tamen hoc accepimus, Deli fuisse cōplures saluis rebus illis, qui gallinas alere permultas quæstus causa solerent. hi cū ouū inspexerant, quæ id gallina peperisset, dicere solebant. sic mater geminos internoscit consuetudine oculorum. sic duo Seruilij gemini P. & Q. qui (ut idē ait) non cognoscebātur fo-

ris, at domi: non ab alienis, at à suis. sic illi apud Plautum gemini Menahemi, qui ne ab vxore quidem internoscebantur.

Cedo item aliud. Hercules & eius statua, non modò substantia conueniunt, corpora enim sunt: sed etiam eodem nomine continentur. qua de causa *ὁμώνυμα* (vt posterius cognosces) appellantur. Forma verò interiore, remotissimè discrepant.

Nunc de insita dicamus. Quod habes exemplum insitæ? Veluti, si gemina poma aut pira eiusdem sint succi, tametsi non eiusdem sint aut formæ, aut coloris. Sæpè gemina facie mala (inquit Varro) negant esse similia, si sapore sunt alio. sic equos eadem facie, negamus esse similes, si natione, aut ætate dissimiles sint. Item alio loco: Neque enim forma collata (inquit) quærédum solum, quid habeat in figura simile: sed etiam nonnunquam in eo, quem habeat effectum: Sic enim lana Gallicana & Appula videtur imperito similis propter speciē, cùm peritus Appulam emat pluris, quòd in vsu firmior sit.

Cedo exemplum mixtæ? Duo lapides magnetes (inquit Varro) utrùm inter se similes sint necne perspicere poteris, si minutū propè apposueris ferrum, quòd similes lapides similiter attrahant. Eodem modo duo poma, aut pira similia dicuntur, cùm eiusdem & coloris & succi sint: eodemque modo duo numi aurei æquè probi, sintne vsquequaque inter se
similes

similes adhibita lydia coticula perspici poterit.

Quæ est altera Similium diuifio? Vt alia propriè, alia impropriè similia sint. Propriè autem sic dicuntur, quæ (vt antè dixi) sub eodem genere aut specie, qualitatis eiusdem sunt.

Quæ sunt impropriè similia? Quæ cùm diuersi generis & qualitatis sint, tamen Rhetorica translatione concinnè inter se conferuntur: quale illud est Ciceronis: Memoria est germana literaturæ quodammodò, & in dissimili genere persimilis. Nam vt illa constat ex notis literarum, & ex eo in quo imprimuntur illæ notæ: sic confectio memoriæ tanquam cera locis vtitur, & in his imagines, vt literas collocat. Item illud: Vt ager quamuis fertilis sine cultura fructuosus esse non potest: sic sine doctrina animus. Vt agri non omnes frugiferi sunt qui coluntur, sic animi non omnes culti, fructum ferunt. Vt aurum igne, sic beneuolentia fidelis, periculo aliquo perspicitur. Eleganter (inquit Marcianus) Papyrius dicebat peculium simile esse homini: quoniam sicut homo, ita peculium nascitur, crescit, decrescit, moritur. l. peculium, 11, D. de pecul. Nā hæc omnia festinè & figuratè potius quàm verè Similia dicuntur. Itaque hanc Similitudinem Rhetoricam appellare possumus.



VID? Idem & Simile quia in re inter se vel conueniunt vel differunt? Aristoteles Idem tripartitò distribuit. Nam Eadem aliqua dici statuit, aut numero, aut specie, aut genere. Numero, quæ etiam si fortè nominibus differant, tamen re & indiuiduo idem sunt. veluti Pallas, & Minerua. nam si matéria & indiuiduo diuersa sunt, quamuis eadem nomine sint, tamè diuersa numerantur. vt si quis pro scypho, scyphum redderet, non idem, sed aliud pro alio redderet. specie, quæ cū numero diuersa sint, tamen vna specie continentur: vt in grege, oues: in familia, serui: in armento, boues. Genere, quæ cū specie diuersæ sint, tamen vno genere cōtinentur: vt seruus, bos, equus, aquila. Quanquam, vt superius diximus Iurisconsultos Speciem plerunque pro indiuiduo & certo corpore, Genus, pro specie ima & postrema vsurpare: ita plerunque Genere diuersa esse dicunt, quæ Dialectici Specie diuersa facerēt. veluti Dauus & Pamphilus apud Dialecticos specie idem sunt: numero tantum differunt. nam Hominum siue Seruorum communi specie continentur. At Iurisconsulti eosdem genere illos faciunt: specie, diuersos. Sic eas res quæ pondere, numero, mensura constant, dicunt in suo genere potius solationem recipere, quàm specie: pro, quàm ipso corpore mutuo dato, siue indiuiduo. l. 2, D. si cert. petat. Sed quod vnum numero est, (inquit

quit Aristoteles) id demum verè ac propriè Idem appellatur. Superiora enim duo similia potius,quàm eadem dicenda sunt. Quanquã si ad Platonis rationem hæc reuocetur quæstio,ne annulus quidem qui heri fuit,idem hodie dicetur : quoniam eo temporis spatio vetustior est.quinetiam nullum esse aiunt pilum (inquit Cicero) omnibus rebus talem qualis est pilus alius.

Quid? Plato quidnã igitur propriè Idẽ appellat? Quod sèper est simplex, & vniusmodi, & vno ac perpetuo statu continetur. Hanc(inquit Cicero) Ideam Plato appellat : nos rectè Speciem dicere possumus. Sensus autem omnes hebetes & tardos esse arbitratur , nec percipere vllò modo res eas quæ subiectæ sensibus viderentur. quæ essent aut ita parvæ , vt sub sensum cadere non possent: aut ita mobiles & concitatæ , vt nihil vnquam vnum esset constans, ne idem quidem : quia continenter laberentur & fluerent omnia. Item alio loco: Nihil Plato putabat esse verè, quod oriatur & intereat: idque solum esse , quod semper tale sit, qualem Ideam appellat ille, nos Speciem.

Sed ommissa idearum subtilitate , quidnam ad vsum vitæ communis Idem propriè appellabimus? Dupliciter respondeo. primùm (vt modò dixisti) ex communi vitæ consuetudine: deinde ex arte Dialectica. Ergo ex vso vitæ communis Idẽ propriè verèque dicitur, cuius & substantia & accidentia eadẽ manèt : vel in

rebus corporalibus, quorū eadē & materia & forma est, quæ prius fuit. nam alterius mutatio rem aliam ac diuersam efficit. De materia exemplum est in eo qui pro frumento, quod mutuum sumpsit, vinum reddit. Nam hic nō idem, sed aliud pro alio redderē intelligitur. l.2, D. si cert. pet. De forma, exemplum est in eo, qui pro scypho commodato massam ex eo fuso redderet. nam mutata forma, res mutatur. l. Iulianus, 9, §.2, D. ad exhibend. Quinetiam qui rem deteriore, & deprauatā offert, quam integram acceperat, non eandem rem reddere dicitur. l.3, §.3, D. commod.

Quid igitur si quis pro scypho, scyphum æquè bonū, & materia, & forma reddat, idē mne reddere intelligitur? Nequaquam. non magis, quàm si pro frumento, vino, vel oleo, tantundem æquè boni vini, olei, frumenti redderet: aut si pro numis aureis, alios eiusdem bonitatis vel aureos, vel argenteos. Itaque cū Regula iuris esset, ne aliud pro alio inuito creditori redderetur, contrā istius artis subtilitatem communis vtilitatis causā institutum est, vt in iis quæ pondere, numero, mensura constant, non tam corpus, quàm genus ipsum spectaretur. l. si is cui, 94, D. de solut. l. Titia, 87, D. de legat. 2. ac proinde vt quæ genere eadem essent, etiam si in specie atque indiuiduo differrent, tamen pro iisdem haberentur. l. cū Stichus, 29, D. de solut. vbi Vlpian. scribit, res istas vnā & communi specie contineri:
cū

cùm tamen stricta ratione Paulus scribat, specie nō easdem esse : & magis genere quàm specie functionem recipere. l. 2, D. de reb. cred.

Et ex arte Dialectica, quid propriè Idem appellabimus? Quod vna eadēque definitione continetur. Nam quæ definitione differūt, specie certè differunt. Itaque Cicero lib. de legib. I. disputat, homines omnes vnā atque eandem rem esse : quòd si qua in hominibus differentia sit, eam in numero esse, non in specie. Nihil (inquit) est vnum vni tam simile, tã par, quàm omnes inter nosmetipsos sumus. Quòd si deprauatio consuetudinum, si opinionum varietas, non imbecillitatem animorum torqueret & flecteret, quocunque cœpisset: sui nemo ipse tam similis esset, quàm omnes sunt omnium. Itaque quæcunque est hominis definitio, vna in omnes valet. quod argumenti satis est, nullam dissimilitudinem esse in genere : quæ si esset, non vna omnes definitio contineret.

De Rebus diuersis. CAP. XIX.

V I D E O ista: redeoque in memoriam eius diuisionis quam superius attigisti, cùm alias diceres esse res easdem, alias diuersas, siue differētes: pollicitusque es, subtilius te deinceps de ea, dicturum. Quænam igitur diuersæ res sunt? Quemadmodum eedem res dicuntur, vel ge-

nere, vel specie, vel numero: similiter diuersæ modis iisdem dicuntur: & rursus quemadmodum idem dicitur, cuius & materia & forma manet, sic aliud dicitur cum vel vtrunque vel alterutrum mutatum est.

Quæ sunt genere differentes? Res de quibus cum quæritur quid sint, tot generum nominibus, quot ipsæ numeratæ sunt, respondetur. veluti quid sunt, homo, ferrum, aqua, platanus? Respondetur animal, metallum, elementum, arbor. quod contra in eiusdem generis rebus fieri diximus. Atque hæc quidem definitio cum definitione generis Aristotelicæ reciprocatur.

Quæ sunt specie differentes? Res quæ sub vno genere eoque infimo, proprietate tamen inter se discrepant. nam proprietas quæque speciem efficit. Cum autem prima hominum ætate singulæ proprietates singulis nominibus designatæ essent: nunc tamen in tanta humanæ mentis caligine vt multarum proprietatum, sic nominum longè plurimorum ignoratio consecuta est. Exempli causa, Platanus, laurus, pinus, cupressus, quercus: non genere, sed proprietate, ac nomine inter se disincta sunt. Itē vt Leo, ceruus, equus, asinus, elephas, camelus. Propterea autem genus infimum diximus, vt veram & infimam speciem intelligeremus, quæ genus esse non potest. nam auis, piscis, quadrupes inferiorum respectu genus sunt: animalis respectu, species. quod iam superius dictum

dictum ac demonstratum est.

Quæ sunt numero differentes? Res singulares, quæ sub eodem & genere & specie tamen inter numerandum discernuntur: velut in grege: prima, secunda, tertia ouis: in armento, primus, secundus, tertius bos. Sed in hominum genere comparatum est, vt in quoque numero ac multitudine singuli nota quadam propria & peculiari designarentur. veluti nomine: vt C. Iulius. aut si commune cum aliis nomen esset, cognomine: vt C. Iulius Cæsar: aut si hoc quoque commune esset, tribus: C. Iulius Cæsar Quirina. item, Q. Seruius Sulpitius, Rufus, Lemonia. quod ex populi R. instituto sumptum exemplum est, vnde fingere sibi quisque simile aliquod poterit.

Et de materiæ aut formæ mutatione, quodnam exemplum affers? De vtroque exemplū esto in eo, qui pro frumento vinum reddit: l. 2, D. de reb. cred. de qualitate, velut in eo qui pro vino vetere nouum reddit. l. 3, eod. item in eo qui è ciue, peregrinus: è libero, seruus: aut contrà è seruo, liber factus est. nam hi alij homines appellantur, l. quoties, 4, D. de nouat. l. seruus, 27, D. de adim. legat. itē si res deposita deterior reddatur l. 1, §. si res, D. de pos. aut res debita deminuta iure aliquo soluatur. l. etiā, 27, D. de solut. aut ex domo factus sit hortus, aut ex loco domus, aut vinea. l. si fundus, 16, §. 2, D. de pignorib.

Sed quidnam interest inter Diuersa & Con-

traria? Quantum inter Genus & Speciem. nā quæ contraria sunt, quia specie differunt, certè diuersa sunt. Triplex autem ceteroqui differentia est. primùm enim verè & propriè cōtraria, dissentanea sunt: diuersa autem omnia dicuntur, etiam quæ consentanea sunt, & quæ quoquomodo inter se affecta, ac nō eadē sunt. Deinde cōtraria omnia sub eodē genere cōtinentur. Diuersa verò varij generis esse possunt. Tertiò contraria sunt quæ sub eodem genere longissimè & remotissimè disiuncta sunt. Diuersa, verò si sub eodem genere sunt, intermedia & interiecta sunt. veluti, Candidum & atrum contraria sunt: at Candidum & purpureum: rubrum aut ceruleum, diuersa sunt. Atque hæc quidem de contrariis generatim. De singulis autem sic habendum est. Relata non contraria sunt natura (vt superiùs diximus) sed situ & positione duntaxat. Itaque diuersa sunt propriè. Negantia verò & priuantia, diuersa dici non possunt. quia diuersa eodem tempore sunt. Illa simul esse non possunt. alterum enim ab altero pellitur. Quare sola aduersa diuersorum genere cōtinentur: quorum utrūque vno eodēque tēpore in rerū natura est. Verùm hæc sine contrariorum cognitione, qui locus iam proximè sequitur, intelligi non possunt. deinceps enim de affectionibus differendum est, in quibus Contraria primum locum obtinent.

De Contrariis.

C A P. XX.

Quæ

QUAE sunt Contraria? Quæ sub eodē genere ita inter se affecta sunt, vt in vnum idémq; subiectum eadē ratione, eodémque tempore cōcurrere nō possint. veluti, Virtus, vitium: atrox & candor. Ac veteres quidem Dialectici, atque in his Aristoteles, contraria intra duorum numerum paucitatémque reuocarunt: vt vnum vni duntaxat opponeretur. Quorum sententiam quidam mirificè amplexati sunt. Contrariáque ita definierūt: Opposita sunt quæ repugnāt vnum vni, sic vt neque alterum de altero, neque ambo de tertio dici possint. Quòd si ita est, certè contraria omnia paria sunt, neq; alterū altero magis cōtrariū dici potest. Quod tamē Aristoteles ipse lib. Ethicorum II. cap. VII. falsum esse ostendit, vbi hanc regulam tradit: Quo quæque sub eodem genere longius inter se disiuncta sunt, eò magis inter se contraria sunt. veluti, Auaritiæ liberalitas, contraria est. magis autem Prodigalitas. Ignauiae contraria est fortitudo. magis autem Audacia. Tantū autem ea quæ longissimè remota sunt, inter se distant, quantum defectio distat ab exuperantia. Sic donare & non donare contraria sunt. Item, vt Donare & Carere aut Egere. Sed donare, & eripere longè magis contraria sunt. Sic Amare, non amare, odisse. In eodémque genere illa sunt, Nasci, viuere, mori. Ortus, essentia, interitus. Amare, non amare, odisse.

Quæ est Contrariorum diuísio? Re & na-

tura tripertita est. Eorum enim alia sunt aduerfa, alia priuantia, alia negantia. At si figurā, situm, & oppositionem spectemus, in hunc numerum ea quoque adscribētur, quæ cum alio conferuntur. vt Duplum, Simplum: Pater & Filius: quæ vulgò Relata nominantur. Itaque Aristoteles non dixit τῶν ἐναντίων alia esse ἀντικείμενα, alia τὰ πρόστι, alia σερητικά, alia δοποφαικά: quod nonnulli falsò tradiderunt: sed hoc modo: λέγεται γὰρ ἕτερον ἑτέρῳ ἀντικείμεναι τρισχῶς. ἢ ὡς τὰ πρόστι, ἢ ὡς τὰ ἐναντία, ἢ ὡς σέρησις, καὶ ἑξῆς, ἢ ὡς κατάφαισις, καὶ δοποφαισις.

Quomodo igitur Relata in contrariis numerantur? Quia sunt inter se situ quidem & figura opposita: vt, Pater Filius, Dominus, Sernus: Donare, Recipere: sed notione & vi ipsa tanta inter ea necessitudo. atque amicitia est, vt alterum ab altero sustineatur: alterum alterius respectu sit id quod est: neutrum altero prius sit, sed vtrunque natura simul. Ac propterea verè in consentaneorum numerum referri possunt. Et si autem in idem subiectum simul eodémque tempore cadere possunt, nō tamen eadē ratione conueniunt. nam Aeneas (verbi gratia) pater & filius verè dicitur, eodémque tempore: sed non eodem respectu & ratione. nam Ascanij respectu, pater est: Anchisæ verò, filius.

Quæ sunt Aduerfa? Quæ in eodem genere plurimū inter se differunt. vel hoc modo, Quæ ita inter se infesta sunt, vt pariter alterum ab altero

altero abhorreat : veluti, donare, eripere : defectio, exuperantia : graue, leue : atrum, candidum : rectum, inflexum : virtus, vitiũ. Par enim vtriusque in vtrunque vis atque potestas est : pariter alterum ab altero abhorret : pariter inter se naturali odio dispellunt. quinetiam quo propius admouentur, eò magis pugnantiam declarant : vt Aristoteles scribit in Rhetoricis, *παράλληλα τὰ ἐναντία μάλιστα φαίνεται* : Aduersa proximè opposita maximè apparent. veluti cùm Aesopus (vt in eius vita scribitur) inter duos formosos pueros venalis ab hero expositus est.

Quæ sunt Relata? Græci τὰ πρόστι hæc appellant : quorum ea vis atque affectio est, vt mutuò respondeant, seseque inuicem tueantur. vt dominus, seruus : paterfa. filiusfa. donare, recipere : locare, cõducere. Quauis enim situ & positione (vt modò dixi) aduersasint, notione tamen par vtriusque in vtrunque naturalis amicitia ac necessitudo est. Itaque semper inter se reciprocantur : neque alterũ altero natura prius est : sed vtrunque simul sunt naturæ ordine. Quapropter non prius donatio intelligitur quàm acceptio sit : neque prius locatio, quàm conductio.

Quid? Nonne plures serui vni domino, plures liberi vni parenti, pater item & mater, qui duo numero sunt, filio & filia qui totidem numero sunt, opponi possunt?

Quid igitur est, quod superiùs dixisti, con-

traria bina esse tantummodo, & vnū vni duntaxat opponi? Facilis solutio est. vnum enim specie, non numero intelligitur: hoc est, vna notio alteri de eodem genere distractæ, vel potius contractæ opponitur. Itaque quantumuis multi sint liberi: vt in fabulis Priami, vel Danai quinquaginta: tamen vna omnes liberorum notione continentur. Pater autem & mater, cū filio & filiæ opponuntur (veluti cū Varro sic scribit: Vt est filius ad patrem, sic filia ad matrem) non bina, sed quaterna contraria sunt: ac proinde nō vna oppositio, sed duæ: non duo respectus & affectiones: sed quatuor. Qua de causā non rationē, sed proportionem illam Varro nominatim appellat.

Quæ sunt Priuantia? Quæ ita inter se affecta sunt, vt vnum tantum alterius pellēdi vim habeat. veluti, visus & cæcitas: dies & nox: honor & infamia: habere & carere: vestitus nuditas, vita & mors: valetudo & morbus. Quorum posterius duntaxat tollendi atque extinguendi prioris facultatem habet, illud cedendi tantummodo. Itaque nisi sit, quod cedendi vim habeat, non est quod habeat priuandi. Priuatio enim est, eius rei defectio in subiecto, quæ natura inesse in illo debuit. qua de causā neque infantes muti, calui, aut edentuli dicuntur, antequam per ætatem aut loqui, aut crines, & dentes habere possint: neque cæci catuli, ante diem nonum: neque talpa cæca: neque cornua perdidisse (vt in pro-
uerbio

uerbio est) qui non habuit. priuatio verò non modò in habitus ademptione & detractiōe, verùm etiam in eiusdem inductiōe & restitutiōe intelligitur. veluti, nudus, tectus: amissio, recuperatio: exilium, restitutio: morbus, valetudo: rudis, edoctus.

Quæ sunt Aïetia & negãtia? Quæ ita inter se affecta atque infesta sunt, vt tamen alterũ alterius vicissitudinem ferre possit. deniq; quorũ alterum subiecto habitum non detrahit, sed denegat. Eorum autem alia simplicia dicuntur, quæ nomine constant: vt Doctus, non doctus, indoctus: gratus, non gratus, ingratus: testatus, non testatus, intestatus. alia Copulata, quæ ex verbo constant: vt legere, non legere. ambulare, non ambulare. quæ propterea vulgò Contradicentia nominantur. vt, Illo tempore factum est: non illo tempore factum est. Illo loco, non illo loco.

Quid interest inter Priuationem & Negationem? Priuatio habitum fatetur, arguit, indicat, eũque subiecto detrahit. negatio verò habitum inficiatur, non adimit. quod qui nõ animaduertunt, imperitè duo illa genera confundunt.

Cedo exemplum. Indoctus, imò doctus, in eo homine priuantia sunt, qui antea rudis, nunc eruditus est. nam doctrina ignorantie priuatio est. At doctus, imò indoctus, in eo negantia sunt, qui nihil vnquam didicit. sic impolitum argentũ, imò politum, ad priuan-

tia, refertur. Politum, imò impolitū ad negantia. Sic nitidus, maculosus, priuantia sunt. Nitidus non nitidus, negantia. Sic formosus, deformatus, priuantia sunt. At formosus, deformatis, negantia sunt. vestitus, imò nudus, negantia sunt: vestitus, nudatus, priuantia. Eadem insequentium ratio est: Armatus, inermis, dearmatus. crescere, non crescere, decrescere. florescere, non florescere, deflorescere. sæuire, non sæuire, desæuire. frondescere, non frondescere, defrondescere.

Cedo alia exempla. Habere & non habere, negantia sunt. At habere & carere priuantia. Triste enim est, (ait Cicero) nomen ipsum carenti, quia subiicitur hæc vis: habuit, non habet. desiderat, requirit, indiget. Sic Pater & Orbus negantia sunt, si liberos nunquam habuit. Priuantia, si iis orbatus est.

Ecquanam igitur nota quatuor hæc inter se oppositorum genera internoscuntur? In aduersis & relatis, par contrarij vtriusque in vtrunque vis ac natura est. verum aduersa inter se infesta sunt: priuantia verò amica & necessaria. Rursus in priuantibus & negantibus vna tantum ex parte pugna est, sed in priuantibus subiectum depellitur: in his negatur. præterea quæ aduersa sunt, eodem tempore in rerum natura sunt, mutuoque idipsum de sese profitentur. at neque priuantia, neque negantia eodem tempore sunt.

Cedo exemplum. Annon plerique omnes
Diale-

Dialectici referūt in numerum aduersorum, valetudinem & morbum: diem & noctem? Atqui inter Philosophos constat, morbum nihil aliud esse, quàm priuationem valetudinis, & noctem diei: nam corpus terrę soli oppositum vmbra efficit. Cicero ipse in Topicis Sapientiã & stultitiã, bonitatem & malitiã inter aduersorum exempla posuit. At Boëtius homo acutissimus, & in hoc disciplinæ genere omnium iudicio singularis, rectè admonuit, stultitiã esse priuationem sapientiæ: malitiã bonitatis. sic multi inter aduersorum exēpla referunt calorem & frigus: humorem & siccitatem: cū tamen à Physicis, disputetur frigus priuationem esse caloris, & siccitatem humoris.

De Medio in contrariis.

CAP. XXI.

QUAE est altera Cōtrariorum summa diuisio? Vulgaris diuisio est huiusmodi, vt quædam tertium, siue medium, recipiant, quædã non recipiãt. nã in Aduersis, Relatis & Priuatis, sunt quæ recipiãt: sunt & quæ nō recipiãt. In aientibus autem & negantibus, nulla mediū recipiunt.

Cedo exemplum de aduersis. In Aduersis hæc medium recipiunt: Candidum & atrum recipiunt fuscum, purpureum, viride, & alia nonnulla. Pulcher & deformis statam formã.

Diuitiæ & Paupertas mediocritatem. At illa non recipiunt, Rectum & inflexum: Grauitas & leuitas: Status, motus: Vigilare & dormire. Omnis enuntiatio (inquiunt Dialectici) vel vera est, vel falsa. Omnis linea vel recta est, vel inflexa. Mulier aut amat, aut odit. nihil est tertium. In eodem genere sunt, Sacrum, profanum. Publicum, priuatum. Ciuis, Peregrinus. Maritus, cœlebs. Pater, orbus. Inter bellum & pacem medium nihil est: ait Cicero. nam induciarum, ita breue tempus est, vt earum ratio nō ducatur. Imperium cupientibus, nihil medium inter summa, aut præcipitia: inquit Tacitus lib. xviij.

Cedo exemplum de Relatis. Inter pauca & multa, longum & breue, est mediocritas. Inter velocitatem & tarditatem, lenta festinatio. Inter seruum & dominum est addictus. At inter patrem & filium, focerum & generum, nihil interiectum est.

Cedo exemplum de Priuantibus. Inter diem & noctem, diluculum & crepusculum interiectum est: vt inter calidum & frigidum, est tepidum. Inter visum & cæcitatem, lippitudo. Inter sanitatem & morbum Medicorum sententia aliquis status est interiectus. Inter vitam & mortem, Platonis sententia est, ἡ ἐξ αἴφνης φύσις, vt in Parmenide loquitur: id est, momentum dissolutionis: quod tamen Iurisconsulti, vitæ attribuunt. At inter par & impar, humidum & siccum nihil interiectum est.

Quid?

Quid? Aientia & Negantia cur tertium nō recipiunt? Quoniam cū ceterorum contrariorum ea natura sit, vt alterum alterius habitum & essentiam fateatur: hæc sola contrarij sui habitum non fatentur. Itaque ex omnibus contrariis, hæc summè contraria nominantur. non quo aduersa non magis inter se infestassint, magisque inuicem abhorreant. nam hæc quoque Negantia sæpe aduersorum intermedia sunt. sed quia nihil inter Aientia & Negantia potest medium intercedere. veluti, donare & eripere aduersa sunt, magisque inter se abhorrent, quàm donare & non donare. cū hoc posterius inter illa interiectum sit. Amicus & hostis aduersa sunt. inter quæ Non amicus aut Non hostis posset intercedere.

Quæ est altera Contrariorum diuisio? Eorū animaduerto esse quædam eiusmodi, vt aut vtrunque esse possit, aut alterutrum esse necesse sit, aut neutrum esse possit, aut denique vtrunque simul & neutrum esse possit.

Cedo exemplum eorum quorum vtrunque simul, non autem neutrum verum esse potest. Nullum animal est (inquit Proculus Iurisconsultus) quod nec faciat, nec patiatur. At potest simul & facere & pati. Sic Pater & filius idem diuerso respectu esse potest: Gener & Socer: duplum & dimidium. Eiúsque doctrinæ vsus posterius in coniunctiuis syllogismis apparebit. Vitiosa enim hæc conclusio est: Non & patitur animal & agit. Salamandra non & flam-

mam alit, & restinguit.

Cedo exemplum eorum, quorum esse alterutrum necesse est. Status, Motus: Actio, perpeſſio: Levis, grauis: Par, impar: Coelebs, maritus. Hinc illa ſunt: Aut amat, aut odit mulier. nihil eſt tertium. Militi inſitum eſt, aut vincere, aut emori. nihil eſt tertium. huius autē doctrinæ uſus cū alias ad res magnus eſt, tum verò ad illud, quòd ſyllogiſmi diſiunctiui, de quibus poſterius diſſeremus, ex huius generis contrariis conficiuntur. veluti, Aut uigilat, aut dormit. Vigilat autem, non dormit igitur.

Cedo exemplum eorum quorum neutrum eſſe poteſt? Vt nemo & ſedere & ambulare ſimul poteſt (inquit idem Iuriſconſultus) ita poteſt aliquis neutrum: velut is qui accumbit. Item Planities neque mons, neque vallis eſt. Tepidum neque calidum, neque frigidum eſt. Mediocris neque diues, neq; pauper eſt. Vxor ſtata forma, neque pulchra, neque deformis eſt. Sic habitus eſt mediocris inter Sanitatem & Morbum. Mediocritas inter multū & parū.

Cedo exemplum eorum quorum & vtrunque & neutrum ſimul eſſe poteſt. Lippitudo inter viſum & cæcitatem ita interieſta eſt, vt & vtrunque & neutrum ſit. Diluculum & crepuſculum ita inter diem & noctem, vt & vtrunque & neutrum ſint. Induciæ inter bellum & pacem. Ambidexter inter dextra & ſiniſtra rectè vtentem. Animantes ancipites in-

ter terrenas & aquatiles. Hermaphroditus inter marem & fœminam.

De Repugnantibus. CAP. XXII.

QUONIAM de Cōtrariis dixisti, deinceps de Repugnantibus videamus. Quæ sunt Repugnātia? Quæ non ex aduerso, sed quasi ex transuerso inter se opponuntur. Itaque disparata non incommode à nonnullis appellātur, quæ si comparata sint, quæ directò inter se opponuntur. Repugnātium enim alterum vnum est è duobus contrariis: alterum verò non aliud contrarium, sed alterius contrarij consequens. quasi si duo gladiatores antagonistæ inter se commissi essent: quorum vterque auxiliariū siue *συνμαχόν* haberet: & alter è gladiatoribus alterius auxiliatorem feriret. Denique Repugnans dicitur, quod contrarij est consequens. veluti Valetudo & morbus. Bonitas coloris & pallor.

Ecquænam Repugnantium inueniendorū ratio est? Cū inter Antecedens & Cōsequēs negatio interiicitur, continuò ex consecutione Repugnancia efficitur. Ponantur primū duo cōtraria: Amicus, Hostis. tū subiiciantur eorundem consequentia: Iuuādu, Lēdēdu: quæ inter se quoq; contraria sunt. Cōtrariōrū enim (vt ait Cic.) cōtraria sunt cōsequētia. deinde amicus cū verbo lādendus cōmittatur:

aut inimicus cum verbo iuuāndus: Repugnantiā existet, hoc modo: Nō & amicus est, & malè meretur: Non & inimicus est, & benè meretur.

Amicus

Hostis



Iuuandus

Lædendus

De Disparibus.

CAP. XXIII.



UAE sunt Disparia? Que cū eiusdem naturæ sint, tamen propter elationem aut submissionē, id est, propter magis aut minus inæqualia sunt. Maius enim & minus in iis demū quæ generis eiusdem sunt, propriè verèque quæruntur. veluti Homo homine, & Bos boue, maior minorve dicitur: non Homo maior boue, vel camelo. μέϊζον (inquit Cedrenus) κ̅ι̅ ἐλαττον̅ ὅπ̅ι̅ τῆς ὁμοσιῶν ζητεῖται κ̅ι̅ κρίνεται. ἑτεροῦσια δὲ ἀλλήλοις συγκρίνεσθαι ἔδύναται. quod tamē propriè strictèque intelligēdum est. cū impropriè atque abusiue Comparatio etiam inter alterius generis res vsurpetur. vt cū quæritur, an omnis stella maior sit terra: an vrus maior sit boue, & lūpus cane. Vt autem Parium duæ sunt species: ita disparium quædā propriè sic dicuntur, quæ sensibus percipiuntur. veluti impares in libra lances: quædam impropriè, quæ ad animum & rationem translata sunt: veluti dispares mores disparia

paria studia sequuntur.

Quid appellas Elationem & Submissionem? Cùm ex comparatis alterum maius, alterum minus est. propriè quidem quantitate, vt modò dictum est. impropriè verò, qualitate, vt ex pondere hoc modo: Grauior pœna est, quàm noxia. Præstabilior est gloria, quàm pecunia. Ex numero: veluti, Varro doctior est Cicerone, quia plura didicit. Ex mensura: veluti, Maior est victoria C. Cæsaris, quàm C. Marij. Ex hoc genere illæ sunt Rhetorum contentiones: velut apud Ciceronem Verrina I I I. Non enim furem, sed ereptorē: non adulterum, sed expugnatorem pudicitia: non sacrilegum, sed hostem sacrorū religionumque: nō sicarium, sed crudelissimum carnificem ciuium sociorūque in vestrum iudicium adduximus.

Quid interest inter Cōtraria & Disparia? Contraria sunt, quorū vnum vni tantum: Disparia, quorum vnum pluribus opponitur. Item Contraria ex toto inter se pugnant: disparia verò ex parte tātum: id est, (vt modò dicebamus) ex elatione & summissione. cuius rei exempla sunt in virtutibus & vitiis sanè insignia.

Quomodo inter virtutes & vitia disparitas ostenditur? Philosophi veteres animaduertunt, virtutem inter elationem & submissionem consistere: hoc est, inter nimium & parum: quasi cùm libra pari vtrunque pon-

dere examinatur. Itaque cū duo virtutis extremavitiōsa essent, rectē Horatius scripsisse creditur, Virtus est medium vitiorum vtrinquē redactum. Horum autem extremorum alterum virtuti contrarium est, eaque pugnantia per se elucet: alterum dispar: quæ disparitas obscura est, quia virtutem fallaciter imitans eam adulterat.

Cedo exemplum. Plutarchus in Camillo hæc inter se opponit, *δεισιδαιμονίαν & ὀλιγορίαν τῶν θεῶν. ἢ δὲ εὐλαβεία* (inquit) *καὶ τὸ μηδὲν ἄγαν, αἰεῖσιν*. Sic auaritia & prodigalitas vitia sunt aduersissima. Interponatur liberalitas, contraria erit auaritiæ: dispar prodigalitati. Rursus interponatur frugalitas, siue parsimonia: contraria erit prodigalitati, dispar auaritiæ. Sic audacia & metus, duo vitia contraria sunt. his interiecta fortitudo est, quæ metui contraria est, audacię dispar. Rursus interponatur cautio: audaciæ cōtraria est, metui dispar. Ex eodem genere illa sunt, quæ ex Ciceronis Partitionibus proferemus: Nā & prudentiam (inquit) malitia, & temperantiam immanitas in voluptatibus aspernandis, & magnitudinem animi superbia in animis extollendis, & despicientia in contemnendis honoribus, & liberalitatem effusio, & fortitudinē audacia imitatur. & patiētiam duritia immanis, & iustitiam acerbitas, & religionem superstitio, & lenitatē mollitia animi, & verecundiam timiditas, & illam disputandi prudentiā concertatio

certatio captatioque verborum, & hanc oratoriã vim inanis quãdã profluentia loquẽdi.

De Dissimilibus.

CAP. XXIIII.

QUAE sunt Dissimilia? Superiùs dictum est, eandem esse similitudinem & dissimilitudinem definitionem: propterea quòd similia & dissimilia non ex toto dicuntur, sed ex parte tantum. nihil enim simile est quod idem ex parte non sit dissimile: vicissimque nihil dissimile est, quod idem non aliqua ex parte sit simile.

Quomodo dissimilitudo rerum internoscitur? Ex qualitatis aut insitæ aut externæ differentia: de qua superiùs in similitudinis tractatione disseruimus. Itémque ex diuersorum generum aut formarum demonstratione. nam ut aquarum varietas ex diuersis fontibus cognoscitur, sic rerum differentia ex variorum generum & formarum demonstratione.

Cedo exemplum de genere. Sumamus hoc familiare: Duo equi specie similes sunt, at natione dissimiles: quæ plerunque (ut ait Varro) pretium efficit. sic hinnulus dissimilis est mulo: quia mulus ex asino & equa est: hinnulus ex equo & asina. Formarum autem dissimilitudo in eo medio existit, quod superiùs dicebamus interdum interiectum esse inter duo aduersa. veluti, inter ignem & aquam, quæ propriè aduersa sunt, interiectus est aër, qui neu-

tri extremo contrarius est, sed dissimilis.

Cedo aliud exemplum. Candor & attror aduersa sunt. at quinque colores intermedij, croceus, puniceus, purpureus, viridis, ceruleus, neutri è duobus extremis aduersi sunt: sed diuersi, & (vt de coloribus propriè verèque dicitur) varij. Item dulcis & amarus, duo saporibus contrarij sunt: quorù illi quinque (eodem auctore) sunt intermedij: austerus, acerbus, aridus, acutus, salsus: qui neutri extremorum contrarij sunt, sed dissimiles.

Quomodo tractatur ea demòstratio? Non vt sacrificij, sic consilij dies expectandus est. Alia est enim sacrificij caussa, quod expectari potest: alia còsiliij, quod interdum ex re & tempore sumi oportet. Non quemadmodum in palestra qui tēdas candentes accipit, celerior est in cursu continuò quàm ille qui tradit: ita melior Imperator nouus qui accipit exercitum, quàm ille qui decedit: propterea quòd defatigatus cursor integro faciem: hic peritus imperator imperito exercitum tradit. Non vt equis veteribus, teneros anteponere sòlemus, sic amici noui veteribus sunt anteponendi: non enim amicitiarum esse debent, sicut aliarum rerum, fatietates: veterrima quæque esse suauissima debent. nouitates tamē non repudiandæ: vetustas autem suo loco conseruetur.

Quid interest inter Disparia & dissimilia? Superius dictū est, Paria aut disparia, quantitate: Similia aut dissimilia, qualitate estimari:

Qua-

Quapropter in quibus ponderis, numeri, aut mensuræ ratio habetur (diximus autem hæc ad mentem & animum transferri) in iis est disparitas. in quibus autem forma spectatur, dissimilitudo.

De Dictione, & varijs ipsius diuisionibus.

CAP. XXV.

AGESIS, deinceps ad verba & dictiones accedamus. Sed primū omnium velim, nisi molestum est, iterum mihi planius explices, an non tota de dictionibus, verbis, vocibus, nominibus, vocabulis, aduerbiis, participijs tractatio Grammaticorū potius, quàm Dialecticorum propria sit? Grāmatici artis suæ principia ferè à Dialecticis sumpserunt. quemadmodum Diogenes Laertius, cū alijs multis locis; tum verò in Zenone dilucidè ostendit. Grammaticorū enim opera tum demū vsui esse cœpit, cū corrūpi sermo cœptus est. quapropter & Quintilianus & idem Laertius à philosophis, ac maximè Stoicis, plurimas orationis partes constitutas scribunt. quinetiam Plato in Cratylo perspicuè statuit, Dialectici opus esse, aptè & cōmodè nomina rebus imponere: eaque imposita interpretari. Vbi enim diuisa in partes quæstio est, tum singulæ partes suis nominibus primū designandæ, pōst definitione explicandæ sunt. *πάντα γὰρ τὰ πρῶτα*

ματὰ δὲ τῆς ἐν λόγοις θεωρίας ὁράται: vt Stoici (auctore Laertio) dicere solebant. Iam verò longè alia Dialecticorum, alia Grammaticorum de verbis & oratione disputatio est: quemadmodum superiùs dictum est: & deinceps ex huius institutionis progressu intelliges.

Quotuplex est Dictio Dialectica? Dialectica dictio est aut nomen, aut verbū, aut aduerbium: ex quo quantum à Grammatica differat, cuius septem numerantur species, facillè intellectu est. Nam neque præpositio aut interiectio vim in illa ullam habent: & participium ac pronomen nominis locū obtinent. Quamuis autem omnis oratio dialectica minimum ex duobus nominibus & verbo *E S T* constet, tamen interdum aduerbium loci vel temporis alterum in ea momentum obtinet. vt Homines olim erant meliores; Homines nunc sunt deteriores, quàm olim.

Quæ est altera diuisio? Hæc bipartita est, vt alia propria dictio sit, alia communis. Propriâ est, certa & rata cuiusque rei nota, quæ alteri non conuenit. videlicet, cùm singulæ res singulis nominibus appellantur. veluti: aër, ignis, aqua, terra. Communis est, quæ pluribus conuenit, vt concio, fraus, palma, familia. atque ex hac communitate ambiguitas nascitur, quam Poetæ Græci ἀμφιλογίαν nominarūt, & Noctis filiam, dixerunt: eandem Græci philosophi modò ἀμφιβολίαν, modò ἀμφιβολογίαν appellant. Iuris communionem explicant nostri

stri in l. pen. & ult. D. de iustit. & iur.

Quid? Ambiguitatis verborum tractatio cur potius ad Dialecticos, quam ad Grammaticos pertinet? Quia soli Dialectici vitæ ambiguitatis artem tradunt, & Sophistis opponuntur, quorum instrumentum omne in ambiguitate & amphibolia positum est. Nam & multæ similes res dissimilibus verbis, & multæ rursus dissimiles similibus notatæ sunt. Ita quæ Cicero lib. de Orat. II, Ambiguorum (inquit) verborum complura genera sunt, quæ mihi videntur melius nosse, qui Dialectici appellantur.

Velim igitur aliquanto dilucidius bipartitam illam dictionis diuisionem explices. Rerum omnium aliæ ratione & nomine inter se conueniunt: (Rationem autem appello quam Aristoteles λόγον τῆς οὐσίας nominat, id est definitionem qua quid res sit tantum, non etiā qualis res sit exponitur) vt bos & equus: quorum vterque & definitur & appellatur animal. hæc Dialectici συνώνυμα nomināt. aliæ & ratione & nomine inter se differunt, vt equus, argētum, quorum aliud animal est, aliud nō animal est, sed metallū. Aliæ ratione conueniunt, nomine discrepant. de quibus hoc Ciceronis exemplum ex Tuscul. I. I. exponemus. Sed ratio (inquit) vna omnium est ægritudinum, plura nomina. Nam & inuidere ægritudinis est, & emulari, & obrectare, & misereri, angere, lugere. hæc omnia definiunt Stoici, eaque verba quæ

dixi singularum rerum sunt: non (vt videntur) easdem res significant: sed aliquid differunt. Postremò aliæ nomine conueniūt, non ratione: vt Fraus fallaciam significat, & delictum & pœnam. Palma cōmune nomen est manus, arboris, baccæ, victoriæ. Hæc Dialectici ὁμώνυμα nominant. sed de synonymis & homonymis paulo vberius differendum est.

De Synonymis, Homonymis & Paronymis.

CAP. XXVI.

QUOT V P L E X igitur est dictionū cōmunitas? Duplex. quarum altera est in vniuersa dictione, quæ à Dialecticis nominatur Synonymia & Homonymia: altera in parte, quæ ab iisdem Paronymia dicitur.

Quæ sunt Synonyma? Synonimorum sunt alia Dialectica, alia Grammatica. Dialectica sunt, quæ generis alicuius superioris & nomē & rationē communem habēt: vt Bos & equus ex sui generis communione & nomen & rationem & definitionem essentiālem (de quā postērius intelliges) cōmunē obtinent. Nam vtrūque dicitur animal: sed tamen in qualitātē differunt.

Quæ sunt Synonyma Grammatica? Plura vnius eiusdēque rei vocabula: vel, quæ re inter se conueniunt, sono tantūm discrepant. quia

quia sæpe (vt modò dixi) cùm vna res pluribus nominibus, tum etiam similes dissimilibus appellatur. veluti vestis, vestimentū: ensis, gladius: dialectica, logica: Prostrauit, afflixit, perculit, euertit. Sic apud Iurisconsultos, Pactum pactio, conuentum, conuentio, pactum conuentum. Gramatici hæc eadem & πολυώνυμα & ἰσοδυναμοῦν & nominant.

Quid? Dialectici ecquonam igitur nomine appellant, quæ ratione conueniunt, nomine discrepant, quam superiùs tertiam ambiguerum speciem faciebas? Hanc speciem Dialectici negligunt. quia vbi de notione conuenit, de voce nasci quæstio non potest. nam si cui ius est enssem gestare, dubium nemini est, quin eidem gladium gestare liceat.

Quæ sunt homonyma? Homonyma dialectica dicuntur, quorum idem nomen, sed diuersa vel species est, vel genus. Specie autem modò specialissimam, hoc est primam substantiam intelligo. Specie igitur & substantia differunt, quæ tamen nomē vnū & commune habent. vt Alexāder Magnus, & Alexāder Cæsar: & duo Gracchi, & duo Cicerones, & omnes denique vel agnati, vel ceteri, qui eodem nomine sunt. vt duo Sempronij: in l. si fuerit, 10. d. de reb. dub. aut duo Titij: in l. quoties, 54. d. de vsuf. Si duo (inquit Iulianus) eiusdem nominis fuerint, & ita scriptum fuerit, Titijs vsumfructū alternis annis do lego: nisi consenserint vter eorum prior vtatur, inuicem sibi impediunt.

Genere autem differunt, cū eodem nomine sunt. veluti Hercules, & eius signum, siue imago. Nam Hercules animal est, signū inanimatum. Hinc nata cōsuetudo, vt Deorum signa, dij appellarentur. Vt Verrina II: Deum denique nullum Siculis, qui ei paulo magis affabre atque antiquo artificio factus videretur, reliquit. Sic equus Agamēnonis, & equus Troianus. Equuleus pro equo tenello, & pro tormēti genere. Scriptor historiæ, pro Thucydide & pro librario. Testamentū falsum, testamentum tamen dicitur (inquit Paulus) & modius iniquus, modius. l. Paulus, 221, D. de ver. signif. l. 2, D. quemad. test. aper. Ex eodem genere est, quod Valerius scribit de Daphita, qui cū Apollinis illudendi causa quæsisset, an equum inuenire posset, cū tamen nullum amisisset: responsum tulit; equum inuenturum, sed quo deiectus periret, aliquanto pōst in Regem Attalum incidit, qui eum de saxo, cui nomē erat Equus, præcipitari iussit. Sic Philippus Macedo admonitus oraculo, vt quadrigas caueret, toto regno disiungi currus iussit: sed Pausanię gladio cuius capulus quadrigas cēlatas habebat, interfectus est. Ad hoc autē genus pertinent, & verborū ambiguitas, & metonymia.

Quæ sunt verba ambigua? Quæ in vtraque partem significatione ambigua dicuntur. veluti formidolosus, qui formidat, & formidatur: inuidiosus, qui inuidet, & cui inuidetur. infestus, qui malum infert, & cui infertur. ce-

teraque

teraque generis eiusdem, quæ Gellius cōmemorat lib. ix. ca. xii. & lib. xv. cap. xiii. Sic cū in iure ciuili prouerbiū esset Filiofa. credi nō licere: Scæuola monuit, non ad verba referendum esse, sed ad numerationem. nam Credendi verbum erat ambiguum.

Quæ est metonymia? Est nominis pro nomine positio: id est, mutatio alieni verbi, quod proprii loco subiicitur. verbū enim pro verbo summutatur: eoque nomine generatim complectimur quā Rhetores modò μεταφοράν, modò υπαλλαγών, modò κατὰ χρῆσιν, modò ἀλλήγορίαν appellant: vt benè morata ciuitas, orba Resp. parricida pro eo qui matrē aut fratrem interfecit. sic gemma quæ propriè de lapillo dicitur, trāslatè de vitibus vsurpatur. Sic fratris nomine soror appellatur in l. tres fratr. 35, D. de pact. l. Lucius, 93, §. quæsitū, D. de lega. 3. Sic qui chirographū legat, actionē ipsā legasse intelligitur. l. qui chirographū, 59, D. de legat. 3.

Quæ sunt homonyma Grammatica? Quæ res plures vno complectuntur nomine: quapropter & πολύσημα dicuntur. Cū enim plures sint res quàm dictiones, propter verborū penuriam ea cōmunitas inducta est. vt Cōcio (inquit Gellius) dicitur pro loco, vnde verba sunt, pro cœtu populi audientis, & pro ipsa oratione. Ciuitas (inquit idem) pro oppido, pro multitudine hominum, & pro iure ciuiū, Fraus, pro delicto, pœna, deceptione. Ex eadē ratione Varro de Analogia scribens, homony

miam esse ait nominis communionem, vt in voce Argus, quæ Latinè hominem, Græcè oppidū significat. Item in voce Meto, quæ & meto, metonis, & meto metis efficit.

Quæ sunt Paronyma? Hæc cognominata propriè dicere possumus, quæ ab eadem inflexa voce rationem inter se communem habēt. veluti anima. vnde sunt (vt ait Cicero) animus, animare, animans, animal, animatus, animosus. Item honos, honestus, honestas, honoratus, honorabilis, honorificus. Equus, eques, equestris, equitare, equitatus, equitatio. Hæc Græci σύντομα quoque nomināt, quæ orta ab vno variè commutātur: vt rectè Cicero definit, melius fortasse quàm appellauit. nā latinè Cōiugata nominat, quæ propriè sunt σύντομα & ἀμείβομα.

Quæ est altera Dictionum diuisio? Vt aliæ sint simplices, aliæ multiplices, aliæ dubiæ. & rursus simplicium aliæ sint voce & notione simul simplices, aliæ voce tantum simplices, at notione multiplices.

Quæ sunt verè & perfectè simplices? Eæ quas superius Proprias appellauimus, quæ vna tantum voce & notione constant: vt ignis, aër, aqua, terra. Hic enim & vna vox est, & vna tantum res significatur.

Quæ sunt voce simplices, notione multiplices? Quæ vel genere, vel toto constant: genere, vt quæ suprà homonyma, & synonyma diximus. Totum autem vel diuiduum est, vel in-
diuiduum

diuiduum. Diuiduū, veluti Ciuitas, Senatus, Exercitus, Grex. nam vna voce multæ res significantur. Indiuuiduum, veluti quæ mediæ & ancipites appellantur. hoc est, quæ duas contrarias recipere notiones possunt. veluti dolus: nam & bonus & malus dolus est. Item, Tempestas, valetudo, facinus, gratia, industria, venenum. quæ omnia cōtrariam notionem recipiunt. Item quæ simul & indiuiduè plures res significant: vt Eques cuius notione homo, & Equus indiuiduè intelliguntur. Sic Nautæ verbo, homo & nauis indiuiduè concipiuntur. Item vt Latomi vocabulo, homo, lapis, & incisio. quod eodem modo in Cerdone, fabro, sartore, fullone, sutore & tinctore, ceterisque opificibus intelligendum est.

Quæ sunt multiplices? Quæ ex pluribus compositæ, & quasi conflatae sunt. veluti ex duobus integris, subterfugere, & supersedere. ex integro & corrupto, beneuolus, Tyrannicida, sacrilegus. ex corrupto & integro, noctiuagus, armipotens. ex duobus corruptis, veneficus, parricida, pedisequus.

Quæ sunt dubiæ? Quæ vtrius generis sint, simplicisne an multiplices, ambigitur: veluti, Postliminium, an ex Pòst & Limen: Testamentum ex testatio & mens: Aeditimus, ex æde & tuendo. Sacellum vtrum à sacro deminutum, an ex sacro & sella iunctū. Auarus vtrum simplex, vt Amarus: an iunctum ex auidus & ære.

CAP. XXVII.



Q UO T sunt affectiones, siue λόγος, & comparationes verborum? Totidem quot superiùs rei ad disputandum propositæ esse diximus. Itaque ordinem prorsus eundem in iis exponendis, sequemur: ac primùm de genere & specie.

Quod est cuiusque dictionis genus? Quod in quæstione quid est de quaque respōdetur, semper autem superior de inferiore dicitur, ac pronuntiatur. veluti, Quid est gladius? est telum. quid platanus? est arbor.

Quid? Nōne hoc idem & eodem modo superiùs de rebus ipsis dixisti? Rectè interrogas. Sed sic habendum est. de re loqui & agere inter nos, nisi nomine ipsius pronuntiato, non possumus: non magis quàm sine calculis ratiocinari. ex quo intelligitur, inter rem & ipsius vocabulum quandam quasi concretionem existere. Hanc concretionem Dialectica dirimit, ac diducit: vt separatim & res & dictiones quasi auulsæ atque abstractæ considerentur. Liberæ enim sunt cogitationes nostræ (inquit in Miloniana Cicero) & quæ volunt sic intuentur, vt ea cernimus quæ videmus. veluti, si quis annuli signū in cera impressum per se & quasi abstractum consideraret: aut in orbe partem cōuexam à concava distingueret. Hanc autem animi notio separatam considerationem


rationem efficit, de qua superius dictum est. Itaque vocabuli significationem Cicero multis locis notionem appellat.

Cedo exemplum. Substantiam superius appellauimus, non corpus (quod tamen sensuum iudicio verè & propriè subsistit) sed notam, qua genus rerum omnium, quæ per se subsistunt, demonstratur.

Quot sunt dictionum omnium genera? Aristoteles eadem acie mentis, qua (vt Cicero scribit) rerum omnium vim naturamque viderat, decem esse dictionum omnium animaduertit prima ac summa genera, & veluti capita, quibus tanquam notis atque indicibus dictionum omnium naturæ, vires, significationes, & differentiæ demonstrantur qua de causa categorias illas nominauit, quasi dicamus attributiones. quoniam quicquid alicui attribuitur, quicquid de quopiam dicitur, enuntiatur, prædicatur, id ex earum categoriarum aliqua sumitur. nam (vt ait Aristoteles lib. Analyt. prior. i. cap. 21.) cum dicimus aliquid de alio dici, id ex aliqua categoriarum dici intelligendum est.

De Categoriis, unde attributa dicuntur.

CAP. XXVIII.

 VAE sunt illæ decem attributionum notæ? Substantia, quãtitas, qualitas, relatio, actio, passio, locus, tempus, situs, habitus. Et si autem vna eadẽm-

que res duarum esse Categoriarum non potest, interdum tamē accidit, vt vario respectu, id est secundum aliud atque aliud vna eadē que species duarum ac plurium esse possit.

Cur hæ notæ Categoriæ nominantur? Quia de omnibus aliis dicuntur, cū de illis nihil aliud dici ac pronuntiari possit. quicquid enim (vt modò ex Aristotele diximus) de altero dicitur, quicquid alteri in oratione attribuitur, id ex alicuius categoriæ ordinibus sumatur necesse est. veluti, quid est Platanus? est arbor, quæ substantiæ subiecta est. quid est linea? est longitudo. Decem quid sunt? sunt numerus, quæ ex quantitate sumptæ sunt. Itē quid est candor, aut atror? est color: ex qualitate. Vt autem *προσηγορία*, quam Quintilianus appellationem interpretatur: sic *κατηγορία*, *καὶ τὸ κατὰ γορεύεσθαι* ficta videtur: quasi summa & prima dictio, cui ceteræ omnes subiectæ ac substratæ sunt.

Quid est Substantia? Est nota quæ voces earum rerum omnium, quæ substantiæ nomine continetur, cōprehendit. Nunc enim Substantiā (vt modò dixi) non tanquam *οὐσίαν*: id est rem, corpus, naturā, essentiam, quærimus: sed tanquam earum rerum omnium quæ sunt eius generis indicem & appellationem summam.

Expone istud, si potes, planius. Ad hanc Categoriā non tam corpora ipsa pertinent (quorum in cognitione & natura peruestiganda omnis

da omnis Physicorum ars consumitur) quàm dictiones, quibus vel ipsa corpora appellantur, vel eorum qualitates designantur. veluti Pygmæus homo, non tã pertinet ad hanc Dialecticam Categoriam, quàm hominis vocabulum: cùm quæritur an Pygmæo hominis nomen conueniat. De qualitate, veluti, Sapiens, eloquens, medicus, orator. quanquam ipsæ qualitates per se & quasi abstractæ consideratæ, alterius Categorix sunt. neque enim aut res aut substantiæ aut corpora sunt: neque dictiones, corpora aut substantias declarantes, sed eorum qualitatem significantes: quas tamen ad Substantiæ Categoriam pertinere, Cicero in Oratore ad Brutum planissimè ostendit. Eius enim vsus hic est verus, an Sapientis aut Eloquentis nomen Socrati conueniat. Similiter autem omnes corporum qualitates in hoc genere reponendæ sunt: veluti Aeger, claudus, cæcus, luscus, improbus, sceleratus. Itémque artificum nomina, vt medicus, faber, pictor, sculptor, scriptor, arator: ceteraque qualitatem corporis aliquam significantia. Denique, vt rem vno verbo cõplectar, omnia nomina, quæ Grammatici tum substantiua, tum adiectiua nominant, ad hanc Categoriam pertinent.

Quæ est substantiæ proprietas? Primùm, vt contraria recipere in se possit. Homo enim ex indocto, doctus: ex calido frigidus fieri potest. deinde vt nec elationem nec summissio-

nem recipiat. Homo enim magis aut minus esse homo non potest. Itaque nanus tam homo est, quàm gigas. scapha tã nauis est, quàm triremis. l. vlt. D. de inst. vel inst.

Quid est quantitas? Est nota earum dictio num quibus vel numerus, vel magnitudo pronuntiatur. Quantitas autem aut deiuncta est, quæ vel multitudo vel numerus appellatur: aut continua, quæ magnitudo dicitur. Quantitatis autem hoc proprium est, vt ex ea æquale aliquid aut inæquale nominetur.

Quid est qualitas? Nota earum dictionũ quibus qualis quæque res sit, declaratur: veluti Candor, atrox, valetudo, imbecillitas: Sapiẽtia, stultitiã: quæ omnia per se considerantur. At Candidus, ater, sapiens, eloquens, quæ de subiecto (puta) Socrate dicuntur, nec tamen in eo insunt, neque per se considerari possunt, ad substantiam pertinent. Huius autem Categoriæ hoc proprium est, vt ex ea quædam vel similia, vel dissimilia dicantur.

Quid est relatio? Nota earum dictionum quæ inter se conferuntur, atque inuicem affectę sunt: quarum hoc proprium est, vt semper inter se reciprocentur, neutra sit prior altera, sed vtræque simul sit naturæ ordine. veluti Pater, filius: maritus, vxor: socer, gener.

Quid est actio? Nota earum dictionum, quibus quæcunque geruntur, agũtur, aut fiũt, significantur: veluti Secare, vrere, currere. In quo notandum est, quoniam contraria in eodem

dem genere reponenda sunt, in hunc eundem ordinem referenda esse quæ ad quietem & cessationem pertinent. veluti negotium, otium: Bellum, pax: currere, consistere: turbare, sedare: mouere, sistere, quiescere.

Quid est Passio? Nota earum dictionum, quibus quæcunque patiendi accidunt, designantur. veluti Secari, vri, calefieri.

Quid est Locus? Nota earum dictionum, quibus ubi quidque sit, demonstratur. veluti intra, extra, supra, infra, ante, post, domi, foris, ruri, peregri. At ubi de dictionibus non agitur, Locus est (inquit Varro) ubi quid locatum esse potest, ubi quicquam consistit.

Quid est Tempus? Nota earum dictionum, quibus pars temporis aliqua demonstratur. veluti annus, mensis, dies, hora, momētum: ut heri, cras, hodie, postridie, mane, vesperi.

Quid est Situs? Nota earum dictionum, quibus quemadmodum quodque corpus positum est, demonstratur. veluti sedere, stare, iacere, rectum, prouum, curuum, supinum esse.

Quid est Habitus? Nota earum dictionum, quibus genus vestitus indicatur. veluti togatus, sagatus, palliatus, prætextatus, paludatus, tunicatus, penulatus.

Cedo mihi familiare aliquod exemplum, quo Categoriæ omnes vna enuntiatione comprehensæ sint. Goliathus gigas ingens, robustus, hostis irruens in Dauidem, interfectus inter duas acies sub meridiem iacuit armatus.

Horum enim decem nominum quę Goliatho attributa sunt, nullum est quod nō ab reliquis omnibus categoria & genere discrepet. vt nec in illo: Hector, vir magnus, fortis, bellator, pugnans, interfectus ad Troiam ęstate occubuit chlamydatos.

De vi & usu Categoriarum.

CAP. XXIX.



VID? Nōne Categorię sunt ordo rerum omnium per genera, species & differentias compositus? Categoriarum disciplina, neque ad res, neque ad rerum ordinem describendum pertinet: quemadmodum vulgō in scholis traditur. sed ad dictiones tantum, & attributiones, & vocabula: vt eorum summa genera illis tanquam certis notis cognosci possint. quoniam (vt superius ex Aristotele docuimus) quicquid de alio dicitur id ex aliqua Categoria sumi, eique attribui oportet. τὸ ὃ ὑπάρχειν τὸδε πρὸς δε, καὶ τὸ ἀληθεύειν τὸδε καὶ τῷδε, τοσαύτως ληπτόν, ὅσα καὶ αἱ κατηγορίαι διήρκεται. lib. prior. Analyt. I. cap. 26. Caput autē Dialecticę artis est, vt qua ratione aliud de alio dici & pronuntiari possit, demonstret. Itaque dictio num declinatione Categorias immutari constat: cū tamen ob inflexionem verbi res non immutetur. veluti Iustus, est substantia. Iustitia, est qualitas. Eques substantia est, Equitatus

tus, qualitas: Equitatio, actio. Scribere, actio est: Scriptor substantia: Scriptura qualitas: Scriptor actio. Longus est substantia. longitudo, quantitas.

Quisnam igitur præcipuus Categoriarum est usus? Omnis de verbis quæstio in eo versatur, an aliud de alio dici, aut non dici possit. Quod autem de altero dicitur, id aut superius est, aut par ei, de quo quæritur. quia de superiore certè dici inferius nõ potest. Ad hunc usum Categoriæ pertinent. verborum enim genera demonstrant, ex quibus quodnam attributum sumi possit, hoc est, quodnam altero vel superius vel inferius, vel par sit: quid item summum, infimum, aut subalternum sit, intelligitur.

Quæstiones de attributis vniúscuius Categoriæ sunt, an plurium? Quæstiones quædam ad vnam tantum Categoriā pertinent: veluti, An Gigas sit homo, solius substantiæ est. An bellum gerendum sit, solius actionis. Quædam ad plures: vt, An infans dum in vtero est, sit homo: substantiæ est, & temporis. An bellum in Britannia sit gerendum, & hyeme? actionis, loci & temporis. Vtrum terra stet, an moueatur, substantiæ, actionis & perpeffionis.

Sed vbi de verbis & vocabulis tantum agebatur, quid erat opus tam altè ista è Philosophorum disciplinis eruere, quasi de natura rerum, & mundo, atque vniuersitatis opificio instituta esset disputatio? Primum quia nisi co-

gnitis attributionum generibus, atq; ordinibus, perspicere non potest, quid de quoque dici aut nō dici possit. deinde auctorem huius rei habemus Aristotelem, atque omnes qui ab eo sunt, Peripateticos, qui suas ætates in hisce disciplinis exercendis contriuerunt. Quòd si Græcorum nihil nos mouet auctoritas, audiamus M. Varronem, Latinorum omnium facile doctissimum, qui de latinis vocibus disputare ingressus, lib. de Lingua lat. IIII, ita scribit: Pythagoras Samius ait, omnium rerum initia esse bina: vt status & motus: quod stat aut agitur, corpus: vbi agitur, locus: dum agitur, tēpus: quod est in agitu, actio. Quadripartitò magis sic apparebit: corpus est, vt cursor: locus, stadium quā currit: tempus, hora quā currit: actio, cursio. Qua re fit, vt ideo omnia ferè sint quadripartita, & ea externa, quòd neque vnquam tempus, quin fuerit motus: eius enim interuallum, tempus: neque motus, vbi non locus & corpus, quod alterum est, quod mouetur: alterum vbi: neque vbi sit agitatus, non actio ibi. Igitur initiorum quadri-ga locus, & corpus, tēpus, & actio. Quare quatuor genera prima rerū, totidem verborum. de his locis, & his rebus quæ in his videntur, in hoc libro summatim ponam. Totidem igitur Varro verbis vtitur.

Superest vnica de Categoriis quæstio. Cū Varro institutam de vocabulis disputationē tam altè ex naturæ principiis ad Physicorum exemplum

exemplum repetat, cur tu igitur superius ubi de Rebus dixisti, non tamen istas rerum notas & genera summa exposuisti? Ratio in promptu est. quia tractatio de generibus, vi & natura rerum, Physicorum (ut antè dixi) propria est. At Dialectica in ea re una occupata est, ut ex cuiusque rei dictionis affectu & ratione doceat quemadmodum alterum de altero aptè dici & enuntiari possit: hoc est, quod cuique verbum conueniat aut non conueniat. Itaque proposita quæstione, si quid ambiguum est, continuo utriusque verbi quod in quæstione positum est, definitio adhibenda est. Adhiberi autem definitio non potest, nisi utriusque genere perspecto. Itaque Cicero Tuscul. 5, cum hanc quæstionem posuisset, An omnes boni semper beati sint: continuo sic infert: Quos dicam bonos, perspicuum est. Omnibus enim virtutibus instructos, & ornatos, tum sapientes, tum viros bonos dicimus. Videamus qui dicendi sunt beati. Equidem hos existimo, qui sunt in bonis: nullo adiuncto malo. nec vlla alia huic verbo, cum beatum dicimus, subiecta notio est. Sic lib. de Finib. 2. Quærimus (inquit) finem bonorum. Possumusne scire hoc quale sit, nisi contulerimus inter nos quid finis, quid etiam sit ipsum bonum?

Reditus ad affectiones dictionum.

CAP. XXX,

G 4



QUOD est Genus dictionis? Quod de multis subiectis dictionibus, in questione quid sint, responderi potest. veluti, Animal de rebus omnibus animatis, Corpus de corporeis, Sentiens de sentiētibus. vt Genus de suis formis aptè responderetur. Item vt Aqua de aqueis, & Terra de terrenis, & Lignum de ligneis.

Quid est Totum dictionis? Quod partibus, id est, pluribus vocibus constat, aut pronuntiatis: veluti Subterfugere, Beneuolus, Tyrānicida: aut intellectu: veluti, Eques aut Nauta: quibus verbis homo & equus, homo & nauis intelliguntur. Nam vtrarumque partiū ea natura est, vt totum partiendo intereat. neque enim homo per se eques est, neque nauta.

Et causam in dictionibus quānam appellas? Vetus est Philosophorum quæstio, quæ à Platone in Cratilo luculenter explicatur, vtrum vocabula sint natura, an instituto. ἢ φύσιν, ἢ θέσιν. Quarum igitur dictionum materia gnota est, earum etiam causā ignota est: cuius modi multo maximam partem vocabulorum esse, Socrates in eo dialogo demonstrat. tametsi Stoici, artis dialecticæ professores summi, omnium prope verborum origines peruestigare soleant.

Cedo exemplum de cognitis. Audeamus (inquit Cicero) imitari Stoicos, qui studiōse exquirūt, vnde verba sint ducta: credamūque quia fiat, quod dictum est, appellatā fidem. Sic

Manius

Manius dictus putatur, qui mane natus est: Lucius, qui luce: Postumus qui post patris mortem: Proculus, qui patre procul absente. Item ex sono: Strepere, murmurare, boare, rugire, hinnire. Item ex habitu, Frontones, Claudij, Capitones, Rufi.

Qua disciplina dictionū causæ & origines peruestigantur? Ea (inquit Varro) quam Philoſophi ἐτυμολογίαν, id est notationem appellāt: quæ (vt idem ait) demōstrat à qua re, & in qua re vocabulum sit impositum. Itaque à qua re sit pertinacia cūm queritur, ostenditur esse à pertendendo. in qua re sit impositum, dicitur, cūm demonstratur in quo non debet pertendi & pertenditur, pertinaciā esse: quod in quo oporteat manere, si eo perstat, perseuerantia sit. Item alio loco: Docet (inquit) Etymologia non omnium verborum posse dici causas. vt quare ad medendum, medicina. Itaque Cicero in Academicis: Verborum (inquit) explicatio probabitur: id est, qua de causa quæque essent, & nominarentur, quod Etymologiam appellarunt. Sed tamen video veteres omnes Etymologiam non modò in causis, verum etiam in proprietate vocabulorum collocare, & notare.

Quis est Effectus verborum? Qui ex causarum concursu nascitur. hic autem in vita cōmuni, longè maximus est. Nam vnico verbulo maximis de rebus obligamur. vt in stipulationibus, si quis Spondeo dixerit, maximis se in-

terdum de pecuniis obligat. Sic in testamento si quis Heres esto, vel Lego dixerit, maximas pecunias alienat. Sic verborum suorum Effecta Magi prædicant: cum ex carminum suorum euentis de vi verborum arguunt. Neque ab hoc loco aliena sunt bona nomina, quæ veteres notabant. Et Cicero in primo de Diuinat. Cum Imperator (inquit) exercitum, Censor populum lustraret, bonis nominibus, qui hostias ducerent, eligebatur: quod item in delectu Consules obseruant, vt primus miles fiat bono nomine.

Quid appellas Proprium dictionis? Proprium dictionis, est vis vocabuli certa & natua, & penè (vt ait Cicero) cum ipsa re nata: veluti Vagire proprium est infantium: plangere fœminarum: ululare canum: hinnire equorum: rudere, a sinorû: rugire leonum. Sic Orbus propriè dicitur, qui caret oculis. translate qui liberis, aut qui parentibus, aut qui alia re chara priuatus est. Oracula (inquit Cicero) ex eo ipso appellata sunt, quia inest in his deorum oratio. Sic de Finib. II. Varietas in disparibus coloribus propriè dicitur, sed transferitur in plura disparia. Morbus propriè dicitur in corpore: morbosos tamen veteres dicebant iracundos. Propriè (inquit Cicero) vt Aegrotatio in corpore, sic Aegritudo in animo nomen habet, non secundum à dolore. Et alibi: Vnde istud tam ἀνυπον, valetudini fideliter inferuendo? cui verbo domicilium est proprium

in

in officio: migrationes in alienū multæ. Nam & doctrina, & domus, & ars, & ager etiam fidelis dici potest: ut sit, quomodo Theophrasto placet, verecunda translatio. Proprietati enim opponitur trāslatio, quæ est tanquā mutatio, cum quod nō habeas, aliunde sumis: ut cum gemmare vites, & lætæ segetes dicuntur.

Quid est antecedens aut cōsequens dictionis? Quod Grammatici prīmītiūm & deriuatiūm, Dialectici *παράνομα*, id est, cognominata nominant. Ut homo, humanus, homūcio, homunculus, humanè, humaniter, humanitas, humanitus. Aeger, egrotus, ægritudo, ægrotatio. Hinc illud Terētij: Homo sum, humani à me nihil alienum puto. Et illa vulgata: Si Consul est, cōsulat Reip. Si Rex est, regat, non euertat Remp. Quoniam verbum confidendi laudis est (inquit Cicero) sit etiam confidens: quod tamen mala consuetudine loquendi, in vitio ponitur. Item: Inuidia (inquit idē) tum est, cum inuidetur: ab inuidendo autem inuidētia rectè dici potest, ut fugiamus ambigū nomen inuidiæ: quod verbum ductū est à nimis intuēdo fortunam alterius. Ex eodem genere illud est eiusdem: Non enim pudēdo, sed non faciendo id quod non decet (id est impudenter) impudentiæ nomē effugere debemus. Itē illa quæstio: An sicarius dicatur tantū qui fica percussit, non etiam qui gladio. Est autem regula hoc loco seruanda, ut antecedentia & consequentia verborum non tam ex sono vo-

cis,quàm ex notione æstimentur . Nulla enim coniugationis vis est, inter fortem & fortunã, neque inter legem , legatum testamentarium, & legationem:neque inter liberum & librum: inter hominem bellum,& bellatorem,inter iustitiam & iustitium.Sic non si equus est, continuo erit equitatio.at si eques sit,hæc erit:& vicissim si hæc,etiam illa.

Quid est adiunctum vocabuli? Quod aliqui propter nominis rationẽ probabiliter attribuitur: veluti , quia Ciceronis nomen est Tullius, probabile videri putauit se à Tullo Rege originem duxisse.Sic Plato iccirco Theagis nomen laudat in puero , ac parentibus suadet vt præclara nomina suis liberis imponant.Sic Orator Iulius lib de Orat.II.Numiũ diuiforem illudens facetẽ dicebat, vt Neoptolemum ad Troiam,sic illum in campo Martio nomen inuenisse: quasi qui numos diuideret. Sic Aristoteles scribit in Rhetoricis, Thrasybulum audaci consilio hominem appellatum: & Draconis leges quòd duriores videbantur, non hominis leges fuisse,sed Draconis.& iure Venerẽ Aphroditem nominatã,quòd Aphrosynes , id est,dementiæ dea esset. Sic in Phoenissis Euripidis,nomen Polynicis vt argumentum morũ frater incessit,inquit Fabius.Nam, vt in prouerbio est, Conueniunt rebus nomina sæpe suis . Cicero Philipp. x i: Caninium Cimbrum, Lysidici filium, Lysidicum ipsum, qui omnia iura dissoluit. Et in Oratore, Theophrastus,

phrastus, inquit, diuinitate loquendi nomen inuenit.

Quod est accidens dictionis? Cùm casu factum est, vt nomen alicui impositum ei conueniat. vt si quis equorum studiosus Philippus dicatur. veluti in athleta Nicostrato vsuuenit, qui certando & luctando quotidie coronabatur. Item in Verre qui Siciliam euerit. Huc enim allusiones atque etiam omina pertinet. Cicero Verrina IIII: O præclare coniectum à vulgo in illam prouinciam omne communis famæ, atque sermonis: cùm ex istius nomine, quid in prouincia facturus esset, perridiculi homines augurabatur. Item in eadem: O Verrea præclara! quò enim accessisti, quò non attuleris tecum istum diem? Etenim quam tu domum, quam urbem adiisti, quod fanum denique, quod non euersum atque extersum reliqueris? Quare appellentur sanè ista Verrea, quæ non ex nomine, sed ex moribus naturæque tua constituta esse videantur. Ex eodẽ genere illa est Liuij disputatio lib. III: Fuere qui interpretarentur eadem hac Horatia lege, Cõsulibus quoque & Prætoribus, quia eisdẽ auspiciis quibus Consules crearẽtur, cautum esse. Iudicem enim Consulem appellari. quæ refellitur interpretatio: quòd his temporibus nondum Consulem, Iudicem: sed Prætorẽ appellari mos fuerit.

Quæ dicuntur pares dictiones? Quæ rem vnã pluribus vocabulis declarant. vt Ensis,

gladius, Logica, Dialectica: Pactio, conuentio, quæ (vt superius dictum est) Dialectici πολυώνυμα, Grammatici συνώνυμα. & ἰσοδυναμοῦντα nominant. vt sepe, crebro, subinde, plerunque, identidem: olim, pridem, dudum, antiquitus.

Quæ dicuntur similes? Quod rogant (inquit Varro) ex qua parte oporteat simile esse verbum: à voce, an à significatione: respondeamus, à voce. Sed hæc Varro de Analogia scribēs. Nam in Dialectica similes sunt dictiones quæ notione & voce inter se conueniunt, vi tamen ex parte dissident, veluti Vallis & Vallus: Aestus, æstas: inuidia, & inuidentia. Seruitus, & Seruitium. Prohibere & inhibere. Demus operam Quirites, ne Patres Cōscripti, circumscripti putentur. In quo illud animaduertendum est, ne dictionum similitudo tam ex sono & voce, quàm ex notione æstimentur. velut Lepus, lepos, & lupus. Item Suis & Suis (inquit alio loco Varro) similia indiligenti videri possunt: cū alterum Suem, alterum sue-re significet. Scitum est autē quod Varro Grammaticè hæc tractans, Similia (inquit) esse vocibus & syllabis confitemur. Dissimilia esse partibus orationis videmus. Nam Dialecticus non partibus orationis dixisset, sed qualitate, notione, vi & potestate. quoniam (vt superius ex Aristotele diximus) ex qualitate omnis vel similitudo vel dissimilitudo æstimatur.

Quæ sunt quæ dicuntur dictiones aduersæ? Quas Græci ἀντίθετα nominant, quæ vim habent

bent inter se infestam atque contrariam: vt in frà, suprà: sursum, deorsum: totum, nihil: vterque, neuter: Omnis, nemo. Item Beneficium, maleficiũ: Beneuolentia, maleuolentia. Quoniam misericordia (inquit Cicero) ægritudo est ex alterius rebus aduersis: sic inuidentia ægritudo ex alterius rebus secundis.

Quæ sunt Relatæ? Quæ inter se conferuntur, & sub eâdem rationem cadunt: veluti duplum, simplum: cras, heri: hodie, pridie, postridie, perendie. Item cetera omnia rerum relatarum vocabula: dummodo meminerimus, quod iam sæpe diximus, ea seorsum ab ipsis rebus, & tanquam auulsa & abstracta cõsiderari oportere. Nam in his vocabulis, Pater, filius, Dominus, seruus, Patronus, cliens, si rem & (vt Dialectici loquuntur) subiectum consideremus, neque ad rerum, neque ad dictionum relationem pertinebunt: sed ad Substantiam.

Quæ sunt Priuantes? Quæ quod altera rei attribuit, id altera ei detrahit. vt semper, nunquam: vbique, nusquam. Consul, consularis, vel exconsul. Prætor, prætorius, vel exprætor. heres, exheres: ciuis, exul: coniux, vidua. Diuortium (inquiunt Iurisconsulti) propterea non dicitur in sponsa, quia diuertere dicitur quæ à cõmuni habitatione discessit: sponsa autem nondum communem habitationem habuit. Vt frugalitas (inquit Cicero) dicitur à fruge: quia nihil melius è terra oritur: ita


nequitia ab eo, quod nec quicquam est in tali homine: ex quo idem nihili dicitur.

Quæ sunt Aientes & Negantes? Quarum quod ait altera, id altera inficiatur. veluti, furtum manifestum, furtum nec manifestum. scire, nescire. legere, negligere. otium, negotiū. gnarus, ignarus. sanitas, insania.

Quæ sunt Repugnantes? Quarum altera aduersa est, altera aduersæ alterius consequens. vt Beneuolentia, maleficio. Amicum esse & malè mereri. Non & deorsum suo pondere atomi feruntur, & paululum declinant.

Quæ sunt Disparēs? Propriè quæ ponderis, numeri, aut mensuræ inæqualitatem significant. vt As, semis: pondo, dupōdius: medimnus, modius: bini, terni: quartarius, sextarius: Non enim hic vasa (quæ ad Substantiam pertinet) neque eorum mensuram, quæ ad Geometras: sed mensurarum vocabula per se, & tanquam abstracta consideramus.

Quæ sunt dissimiles? Quæ ex eodem ductæ genere, qualitate inter se partim conueniunt, partim dissident. vt Gallus natione: Gallicus ex Gallia: Atheniensis, Atticus: Hispanus, Hispaniensis. Corinthium æs, Corinthiaca vasa. Sic apud Iurisconsultos aliud est Seruum esse, aliud seruire: aliud in libertate, aliud liberum esse. aliud Prætorē esse, aliud Prætura fungi. aliud est mentiri, aliud mendacium dicere, inquit Gellius lib. II. cap. II.



INSTITUTIONIS DIALECTICAE LIBER II.

De Triplici Methodo. CAP. I.

ACTENVS primam Dialecticæ artis partem videmur absoluisse. deinceps ad diuisionē accedamus. sed vtri prior debetur locus, diuisioni, an definitioni? Huic quæstioni responderi commodè antequam de Methodo, & docendi ratione differuerimus, satis non potest. Nam ad huius artis cognitionem ea præmunitio est opus.

Quid est Methodus? Ars quæ quemadmodum disciplina omnis redigi in artem & certam rationem possit, demonstrat. hoc est, quemadmodum ex iis rebus, quarum ars nōdum est, effici ars possit.

Quid est Ars? Antonius apud Ciceronem lib. de Orat. II, sic definit: Ars est, quæ cognitis penitusque perspectis, & in vnum exitum spectantibus, & nunquam fallentibus rebus continetur. Aristoteles autem, Artem dicit esse rei per suas causas cognitionem, quæ aliter se habere non possunt. Apud Lucianum verò

fic definitur: σύστημα ἐγκαταλήψεων ἐγγεγραμμένων
 μένων πρόστι τέλος εὐχρηστον τῷ ἐν τῷ βίῳ. Est coa-
 ceruatio multarum de vna re perceptionum
 vsu & exercitatione collectarum ad finem ali-
 quem vitæ vtilem accommodata. Ars enim
 (vt ait Cicero lib. Acad. III.) quæ potest esse,
 nisi quæ non ex vna aut ex duabus, sed ex mul-
 tis animi perceptionibus constat? quam si
 subtraxeris, quæ distingues artificē ab inscio?

Quis est huius discipline vsus? Vt qua de
 causâ, quòque ordine quicque in præcipien-
 do tradatur, notari atque animaduerti possit.

Quodnam Methodi fundamētum est? Fi-
 nis eius disciplinæ, cuius ars instituitur. Suus
 enim cuique arti finis est propositus: vt me-
 dicinæ, valetudo: architecturæ, domus: rei
 militari, victoria: Rhetoricæ, persuasio. Quare
 primū omnium constituendum est, quis sit
 eius quā tractes disciplinæ finis: hoc est, quod
 bonum, quò spectare ac referri omnia oport-
 eat: vt ad eum quasi viæ & progressiones om-
 nes dirigantur.

Quotuplex est Methodus? Triplex. Analy-
 sis, Synthesis & Diæresis. id est dissolutio, con-
 positio, & diuisio. Sed analysis ad inuentionē,
 synthesis & diæresis ad explicationem perti-
 nent.

Quid est Analysis? Est Methodus quæ fi-
 nem in sua principia per ea quæ intermedia
 sunt, resoluit: hoc est, viâ & ratio quæ à fine
 retexendo ad media, à mediis ad indiuidua,
 quæ

quæ cuiusque rei minutissimæ partes sunt, progreditur. Hæc autem (vt dixi) ad artium inuentionem pertinet. nam vbi finis artis cōstitutus est, tum quibus ad eam modis perueniri possit, excogitatur.

Quid est Synthesis? Est methodus, quæ à principiis per media paulatim ad finem progreditur. vel hoc modo: Synthesis est, multarū singularum rerum consimiliū in vnam aliquā notionem, & rursus huius & aliarum generis eiusdem in aliam communem notionem tantisper cōtinuata coaceruatio, dum ad sum mum genus perueniatur. Itaque ratio hæc superiori planè contraria est. quod enim in deliberando primū fuërat, id in agendo est postremum. Siue autem Totum integrum sit, à partibus progressio sit: siue vniuersum, à formis & speciebus. Atque Aristoteles quidē lib. Ethicorum primo scribit, Platonem studiosè quæsisse, ac dubitasse vtra methodus præstaret, eāne quæ à principiis ad finem progrediretur: an quæ ad principia perduceret. veluti cū in curriculo præmia proponuntur iis qui à carceribus ad calces, & cōtrā à calce ad carceres decurrerint. In Politicis autem, posteaquam ostendit ex familiis vicinitatem, ex vicinitatibus ciuitatem constare, ordine de singulis explicat.

Cedo familiare aliquod exemplum. Nōne qui ædificandi artem inuenerunt, primū de tecto cogitarunt, quod tempestatis vitandæ

caussa subirent : tum deinde quia per se stare tectum non poterat, de parietibus : ac postremo de fundamentis, quibus parietes niterentur. At in agendo, primum omnium fundamenta iaciuntur: tum parietes extruuntur: ad extremum tectum imponitur. Ita ex fundamento, pariete, & tecto domus componi dicitur: cum ex inuentione tecti, paries : ex parietis, fundamentum ortum sit.

Cedo item aliud. Quoniam Grammaticæ finis est propositus, rectè loqui: prima deliberatio est, de orationis probitate : secunda, de verbis, quibus constat oratio : tertia de syllabis, earumque pronuntiatione. At in arte tradenda prima de literis præcepta sunt: secunda, de syllabis : tertia, de dictionibus : postrema, de oratione.

Quid est diæresis? Methodus distributionis quæ à primo & summo genere instituta, eousque per genera intermedia producit, dum ad species infimas perueniatur. Itaque primo loco, qua de re agatur proponit, ac definit: tum deinde partes ipsius singulas diuidendo, nominando, definiendo, & notandis cuiusque proprietatibus exponit. Partium enim singularum nomina singulis definitionibus & proprietatibus aperienda sunt : quandoquidem omnis, (vt ait Aristoteles) scientia per definitionem aperitur. propterea quòd idem est scire, & per definitionem intelligere. Itaque diæresis partes sunt quatuor : propositio,
tio,

tio, diuifio, nominatio, & definitio. Sic Grammatica in arte tradenda primùm proponitur eſſe ars rectè loquendi, & ſcribendi: tum deinde diuiditur in literam, ſyllabam, diſtinctionem, & orationem. Nam diuidendo ſimul nominantur partes. Rurſus literæ diuiduntur in uocales & cōſonantes: hæc rurſus in mutas, & ſemi uocales. Syllabæ poſtea diuiduntur in longas, & breues: diſtinctiones in nomina, uerba, ceteraſque orationis partes. Oratio verò in planam & figuratam. Singulis autem partibus ſua definitio, & proprietatis cuiuſq; declaratio adhibetur.

Cedo aliquod huius tertię Methodi exemplum. ab antiquo aliquo ſcriptore uſurpatū. Extat longè apertiſſimum in eo libello quem ex hac methodo Cicero Partitiones inſcripſit, ubi Rhetoricam artem à ſummo ad minutiffimas quaſque partes paulatim partiendo expoſuit. Sed nuſquàm hæc methodus luculentius explicatur, quàm apud eundem lib. de Orat. i. ubi Craſſus ita loquitur: Omnia ferè quę ſunt concluda nunc artibus, diſperſa & diſſipata quondam fuerunt, ut in Muſicis numeri & uoces & modi. in Geometria, lineamēta, formæ, interualla, magnitudines. in Aſtrologia, cœli conuerſio, ortus, obitus, motuſque ſyderum. In Grammaticis, poëtarum pertractatio, hiftoriarum cognitio, uerborum interpretatio, pronuntiandi quidam ſonus. in hac denique ipſa ratione dicendi excogitare, ornare, diſpo

nere, meminisse, agere, ignota quondam omnibus & diffusa latè videbantur. Adhibita igitur est ars quædam extrinsecus, ex alio genere quodam, quod sibi totum Philosophi assument, quæ rem dissolutam diuulsamque conglutina-ret, & ratione quadam constringeret. Sit ergo in iure civili finis hic, legitimæ atque vfitatē in rebus causisq; ciuium equalitatis conseruatio. Tum sunt notanda genera, & ad certum numerum, paucitatēque reuocanda. Genus autem est, id quod sui similes communione quadam, specie autem differentes, duas aut plures complectitur partes. Partes autem sunt, quæ generibus iis, ex quibus emanant, subiiciuntur: omniāque quæ sunt vel generum, vel partium nomina, definitionibus, quam vim habeant, est exprimendū. Est enim definitio earum rerum, quæ sunt eius rei proprię quam definire volumus, breuis & circumscripta quædam explicatio. Hisce ego rebus exempla adiungerem, nisi apud quos hæc haberetur oratio, cernerem. nunc complectar, quod proposui, breui. Si enim aut mihi facere licuerit, quod iam diu cogito, aut alius quispiam, aut me impedito occuparit, aut mortuo effecerit, vt primum omne ius ciuile in genera digerat, quæ per pauca sunt: deinde eorum generum quasi quædam membra dispartiat, tum propriā cuiusque vim definitione declarret, perfectam artem iuris ciuilis habebitis; magis magnam atque vberem, quàm difficilem

lem & obscuram.

Cedo item aliud exemplū. Sumatur ex eiusdem libro de Finib. II. Omnis in quærendo, quæ via quadam, & ratione habetur, oratio, præscribere primū debet (vt quibusdam in formulis ea res agatur) vt inter quos differitur conueniat, quid sit id, de quo differatur. hoc positum in Phædro à Platone, probauit Epicurus, sensitque in omni disputatione, id fieri oportere. sed quod proximum fuit, non vidit: negat enim definiri rē placere: sine quo fieri interdum non potest, vt inter eos qui ambigunt, conueniat quid sit, id de quo agatur. velut in hoc ipso de quo nūc disputamus. querimus enim finem bonorum possimūsne scire hoc quale sit, nisi contulerimus inter nos, cū finem bonorum dixerimus, quid finis, quid etiam sit ipsum bonum? Eodēque insignis ille locus pertinet, ex lib. de Orat. I. vbi Crassus ita loquitur: Sin autem ea quæ obseruata sunt in vsu ac ratione dicendi, hæc ab hominibus callidis animaduersa ac notata, verbis designata, generibus illustrata, partibus distributa sunt, non intelligo, &c. Itēque ille alter ex lib. de Orat. II. vbi Antonius ita loquitur: Ego verò (inquit) pergā, & id faciam quod in principio fieri in omnibus disputationibus oportere censeo: vt quid illud sit, de quo disputetur, explanetur. ne vagari & errare cogatur oratio, si ij qui inter se dissenserint, non idem esse illud de quo agitur, intelligēt. Nam si for-

tè quæreretur, quæ esset ars Imperatoris: constituendum putarem, principio quis esset Imperator. qui cùm esset cõstitutus administrator quidam belli gerendi: tum adiungeremus de exercitu, de castris, de agminibus, de signorum collationibus, de oppidorum oppugnationibus, de commeatu, de insidiis faciendis, atque vitandis, de reliquis rebus, quæ essent propriæ belli administrandi. quarum qui essent animo & scientia compotes, eos esse Imperatores dicerem. vterèque exemplis Africanorum, & Maximorum: Epaminondã atque Annibalem atque eius generis homines nominarem.

De Dialogorum & Dialecticorum Methodo.

CAP. II.

TENE o ista. Sed quæro ecquamnam harum methodorum trium veteres illi Dialectici suis in dialogis teneant. nam eorum institutum nosse, permagni (vt video) ad Dialecticę cognitionē interest. Cicero lib. de Finib. I. I. scribit, primū Sophistarum omnium Gorgiam Leontinum, ausum esse in conuentu quæstionem poscere, id est iubere dicere qua de re quis audire vellet. Tum deinde Academicos instituisse, vt qui Philosophum audire vellent, primū dicerēt quid sentirent. veluti, Malum mihi videtur esse mors. Voluptas mihi videtur esse summum bonum

bonum. Quod cum dixissent, ille contrà: sic tamen, ut qui audiebant, quoad possent, defenderent sententiam suam. Apud Stoicos verò, & Peripateticos, atque etiam ad extremum apud Academicos, eum qui quæsiuit aliquid tacere solitum. vbi enim qui audire vult, ita dixit, Voluptas mihi videtur esse summum bonum: perpetua oratione cōtrà disputabatur. At lib. Tusc. I. scribit veterem & Socraticam rationem differendi hanc fuisse, ut cum is qui audire vellet dixisset quid sibi videretur, tum Philosophus cōtradiceret. At lib. de Fin. v. scribit, ab Aristotele principe de singulis rebus in vtrunque partem dicendi exercitationem esse institutā: ut non cōtra omnia semper diceret: & tamen ut in omnibus rebus quicquid ex vtraque parte dici posset, exprimeret.

Quid? ipse Aristoteles de suo instituto & docendi ratione quid scribit? Multis in Logicæ suæ locis profitetur, se ita suos discipulos instituisse, ut in vtrāque partem parati essent: ut siue Etiam, siue Non aduersarius responderet, tum cui, E T I A M responsum esset, refelleret: cui verò, N O N, confirmaret: contrāque aduersarius ipse quoque pro sua parte disputaret, eāque tueretur. Itaque libro de Captionibus sophisticis extremo testatur suum hoc inuentum esse, ut facultatē traderet differēdi de quaque re proposita, ex iis quæ essent in re proposita quā maximè probabilia. vnde sine dubio illa Dialecticę definitio sumpta est: ut

fit ars probabiliter in vtranque partē de qua-
que re proposita differendi.

Sed definitionis & diuisionis quodnam a-
pud disputatores illos veteres institutū fuit?
Omnium quidē commune fuisse video, vt pri-
mū inter se constituerent quid esset illud de
quo disputādum esset. tum deinde vt illud vel
definirent, vel diuiderent. (neque enim ma-
gnopere vtrum prius, an posterius facerent, la-
borabant) vt illa dialogorum ratio magis ad
methodum diuisionis, quā ad alias duas ac-
cedere videretur. Sed definiendi verbo video
Ciceronem dupliciter esse vsū. primū pro
eo quod modō dicebam, constituere & pone-
re, qua de re disputandum esset. veluti, Malum
mihi videtur esse mors. deinde pro breui & di-
lucida controuersæ rei explicatione. Nam in
lib. de Off. i. sic scribit, Omnis quæ à ratione
suscipitur de aliqua re institutio, debet à defi-
nitione proficisci: vt intelligatur quid sit id, de
quo disputetur. At in lib. de Finib. i. i. perspi-
cuè demonstrat, definitionē eo loco vsurpatā,
pro enuntiato ad disputandum proposito. O-
mnis (inquit) in quærendo, quæ via quadam &
ratione habetur oratio, præscribere primū
debet, vt inter quos differitur, cōueniat quid
sit id, de quo disseratur. Hoc positum in Phæ-
dro à Platone, probauit Epicurus, sensitque
in omni disputatione id fieri oportere: sed
quod proximū fuit, non vidit. negat enim de-
finiri rem placere: sine quo fieri interdum non
potest,

potest, vt inter eos, qui ambigunt conueniat, quid sit id de quo agatur. Locus autem Platonis quē Cicero protulit, perspicuē hoc ipsum ostendit *πρὸς πάντας, ὅπῃ, μία ἀρχὴ τοῖς μέλλουσιν καλῶς βουλεύεσθαι, εἰδέναι δεῖ πρὸς ἅν ἢ, ἢ βέλῃ: ἢ ἅπαντος ἀμαρτάνειν ἀνάγκη.*

Et de Aristotele, quid habes dicere? Primū in lib. de interpretatione ita scribit: *Τί ὅτι ἐκ ἐρωτησῆς ὅτι διαλεκτική. δεῖ γὰρ δεδόσθαι ἐκ τῆς ἐρωτήσεως εἰλεσθαι, ὁπότερον βέλῃται τῆς ἀντιφάσεως μῶριον ὑποβλέψασθαι, ἀλλὰ δεῖ τὸν ἐρωτῶντα, προσδιορίζεσθαι, πότερον τόδε ἐστὶν ὁ ἀνθρώπος, ἢ ὑτόδε.* id est: Quid est, non est quaestio Dialectica. oportet enim dari ex interrogatione optionem, vtram velit contradictionis partem declarare. Sed oportet interrogantem definire, vtrum homo sit hoc, an illud. Deinde lib. Analyt. priorū primo: *Δεῖ γὰρ τὰς προτάσεις πρὸς ἕκαστον τῶν ὅτων ἐκλαμβάνειν, ὑπὸ τιθέμενον αὐτὸ πρῶτον καὶ τὸς ὁρισμὸς, ὅσα ἴδωται τῷ πράγματι.* Id est: Oportet propositiones de horum vnoquoque ita sumere: subiiciente primū id de quo agitur, deinde definitiones, tum omnes rei proprietates. Post lib. Topic. v i i i. cū dixisset facilem differendi rationem non esse, nisi prius intelligatur, quid sit id de quo disputatio instituitur: maximēque id principiis artium contingere, quibus cetera probantur, tum ita infert: *ἀλλ' ἀναγκαῖον ὁρισμῷ τῶν τοιούτων ἕκαστον γνωρίζειν.* id est, definitione vnumquodq; eorū necessariō aperiendum est. quoniam autem formula,

quid est, nō est anceps, propterea paucis antē versibus monuit quæstionem definitionis ita proponendam esse: Homo estne animal rationis particeps, an non? Quod eodem modo in libro de interpretatione admonuerat, eo loco quem superius protulimus.

Potēsne harum rerum omnium exemplum aliquod ex veterum libris proferre? Sumatur Ciceronis illa disputatio quæ est sub initium lib. Tuscul. quarti: vbi & quæstio ponitur, & post quæstionem diuisio singularum partium definitur. planissimèque vetus istud de quo iam diximus institutum obseruatur.

De artis & libelli huius Methodo.

CAP. III.



ECQUAMNAM igitur Methodum in hac Dialecticæ artis institutione sequemur? Analyticam. cuius in meditando hic ordo est: primū vt finem nobis Dialecticæ proponamus eum, quem superius diximus, Demonstrationem: id est veri & falsi diiudicationem: tum vt è sex consequentibus quod fini proximum est, proximè consideremus: hoc est, primo loco rationis conclusionem, siue argumentationum formulas: secundò vim & firmamentum argumentorum, ex quibus quid quodque valeat, intelligitur: tertio enuntiationes, quibus argumenta constant: quartò partis cuiusque nomen, &

& definitionem: quintò eiusdem materiæ cōfusæ distributionem : postremò affectionem rerum & vocabulorum, ex quibus Enūtiationes constant. Et quoniam longius à fine regredi non possumus, ab eo artem nostram componere instituemus. Id autem operis nostri fundamentum iam antè iactum est, cū ab eo quod vltimum inuenimus, exorsi sumus: nimirum ab affectionibus. Deinceps igitur de diuisione, tum de definitione, de argumento, & de argumentatione disseremus. Nam etsi in omni methodo, primū (vt modò diximus) locum obtinet definitio, tamen in hac arte tradenda, priora sunt diuisionis præcepta, quàm definitionis. quia definitio eo instrumento conficitur, quod in diuisionis arte traditur: nimirum genere, partitione, & differentia. deinde chaos cuiusque quæstionis isto modo, certissimè distingui, atque in ordinem redigi potest. Idemque video Ciceronem & in Officiis & in Tusc. quarta fecisse.

Quodnam appellas chaos quæstionum? Quia proposita quæstione protinus vniuersi generis confusio, & quasi chaos quoddam animo & menti obiicitur. Quare vt in opificio mundi, cū esset confusa naturarum moles, primū lux est adhibita: tum singulæ materiæ secretæ ac definitæ sunt: dein vnaquæque suū in locum actāquam sedem ordine collocata: pòst earum omnium vsus atque fructus hominibus concessus est: similiter proposita quæ-

stione principio rationum notitia tanquam lucerna in tenebris adhibenda est, atque ita dispersæ ac dissipatæ quæstionis partes (de quibus superius ex Cicerone dicebamus) sub oculos subiiciendæ sunt: earumque certa genera notanda: id est, nominibus suis appellanda, atque ad angustum numerum paucitatemque reuocanda sunt. Tum singulæ quæstionis partes distinguendæ, atque in ordinem distribuendæ. post singulæ partes definitionibus, & argumentatione tractandæ, ex quibus operis totius fructus, utilitasque percipitur. At quoniam finis omnis Dialecticæ in ratiocinatione & syllogismo positus est, quod verbum à ratiocinatoribus sumptum esse constat, venit mihi in mentem totam huius artis structuram ratiocinationibus calculatorum similem facere.

Quomodo? Quoniam qui societatem aliquot annos exercuerunt, cum de ea dirimenda cogitant, primum omnium finem sibi rationum distractionem proponunt. deinde numerationem, quam ego argumentationibus comparo. post numerandi artem, ut quid quisque numerus valeat, intelligatur. tum calculos, qui enuntiationibus aptissimè conferuntur. Inde temporum quibus societas fuit, aut negotiationum diuisarum titulum siue definitionem: post eiusdem temporis, earundemque rerum partitionem. Et quoniam regredi ulterius non possunt, ab eo incipiunt, quod ultimum

mum inuenerāt: ac tum deinde ab hoc postremo gradatim progredientes ad id quod sibi finem statuerant, hoc est, rationum distractionem, perueniunt.

De Diuisione.

CAP. IIII.

DEINCEPS igitur de Diuisione disseramus: Quid est Diuisio? Diuisio summo genere est, partiū quæstionis ad disputandum propositæ distributio. sed eius species duæ sunt, quarum prior propriè dispositio dicitur, altera generis sui nomine diuisio appellatur.

Quid est dispositio? Prima maiorum partium distributio, per quam summa quæstionis genera, non solum ordine, sed etiam momento quodam, per exiguo numero, notantur. Est enim quasi operis futuri designatio, atque (vt pictores loquuntur,) rudis quædam informatio: vt cū in Officiis Cicero ita scribit, Omnis de officio duplex est quæstio: vnum genus est, quod pertinet ad finem bonorum, alterum ad institutionem vitæ communis. Atque etiam alia diuisio est officij: nam & medium quoddā officium dicitur & perfectum. Sed nullum eius rei vel dilucidius vel luculentius exemplū statui potest: quàm ex initio Partitionum Ciceronis: vbi summatim omnem dicēdi doctrinam tripartitò distribuit, in vim orationis, orationem, & quæstionem: quarum singulas po-

sterius subtiliter explicat.

Quid est diuisio? Notio quæ rem vniuersam in cognatas partes singulas adhibita cuiusque differentia distinguit. Nam omnis res vniuersalis per adiunctionem differentiæ in singularem contrahitur.

Quod est officiû diuisionis? Vt & species à suo genere distrahat, & eas distractas adhibita differētia inter se opponat. Eius autem artis cûm maximis in disciplinis omnibus est vsus: tum verò laus planè singularis. Nam Socrates in Phædro Platonis profitetur, siquē nactus esset diuidēdi peritû, eius se quasi Dei aliquius vestigia secuturû. τῆτον διάκω (inquit) κα-
δόπισε μεθ' ἰχθυον, ὥστε θεοῖο. Atque ad eum locum alluisse Ciceronem arbitror in lib. 1. de Oratore, cûm in illo Antonius ait, Crassû semper in dicendo sibi videri Deû, cuius vestigia Cæsar & Catulus adolescentes persequi cupiant: in hoc autem, Qui ordo (inquit) Antonio Catulus, tibi placet, & quæ dispositio argumētorum: in qua tu mihi semper Deus videri soles.

Quid interest inter differentiam & diuisionem? Superius dictum est, differentia species insigniri, vt secernātur. Hoc igitur inter diuisionem & differētiam interest, quòd in rebus insignitis interest inter instrumentum & signum. nam exempli causa, quod in iudendis numis materia est: id in hac re est species: quod illic instrumentum: hîc, diuisio: quod illic signum, siue nota publica: hîc, differētia.

Quo-

Quotuplex differentia est? Quoniam diuifio & differentia ita inter fe affectæ sunt, vt instrumentum & signum: sequitur, vt diuifionum ac differentiarum eadem planè distributio fit: & quod de illis, idem de his dicatur.

De multiplici Diuifionum genere.

CAP. V.

QUOTUPLEX igitur Diuifionum ac differentiarum distributio est? Earum tot ferè genera sunt, quot superiùs affectionum locos exposuimus. Nam (vt antè monuimus) ex iis locis tanquam thesauris Diuifionum & definitionum materia omnis eruitur. Itaq; remotis genere, specie toto & partibus: reliquos omnes locos ordine, si voles, persequi possumus. Quatuor autem illos propterea remouemus, quia Genus communis omnium diuifionum materia est. Species autem, quæ quidem infima est, iccirco nõ diuiditur, quia indiuidua tantum complectitur: quæ (vt iam persèpe diximus) infinita, caduca, & fluxa sunt. quæ verò infinita sunt, percurri animo non possunt. ad totum autem & partes, non diuifio (vt paulo antè diximus) sed partitio adhibetur.

Quæ est diuifio generis? Hæc vniuersalis est, & fusa per omnes locos. Itaque reliquæ omnes sumi ex locis dicuntur: at hæc sumi ex generis loco dici nõ potest. Generis igitur di-

uisio est, quæ Genus aliquod in certas & finitas species distribuit, quarum singulæ generis nomē retinent: siue illud summum sit, siue medium, siue infimū. Summum: veluti, Corpus aliud est animatum, aliud inanimatum. Medium: veluti, Animal aliud est rationale, aliud irrationale. Infimū: veluti, Homo alius est Galus, alius Germanus, alius Italus. Hæc autem distributio duplex, dicitur à Græcis διῆσις, & υποδιῆσις: à Latinis, Diuisio & Subdiuisio. Omnes autem illæ species distributæ, summi sui generis, quod est corpus, nomen retinent.

Quotuplex generis diuisio est? Duplex. Nā altera certā cuique speciei ex sua differētia notā attribuit: altera propter differentiæ ignorance & nominum penuriam non attribuit: sed vel contrariam speciem ex contradictionis particula notat, vel sui generis nomine appellat.

Cedo exemplum contradictionis. Superiùs vbi de differentia disseruimus, hæc vulgata protulimus: Animal aliud est rationale, aliud irrationale. Rerum aliæ sunt corporales, aliæ incorporales. Ius aliud scriptum, aliud nō scriptum. Furtum aliud manifestum, aliud nec manifestum.

Cedo exemplū speciei, quæ pro differentia generis nomen obtinet. Fruges commune nomen est & terræ & arborum. Baccæ tamen de arboribus propriè: de terra fruges dicuntur, vt apud Ciceronem in Catone Maiore. Tanquam

quam in arborum baccis, terręque frugibus. Sic apud Cæsarem: Gallorum alij dicuntur Belgæ, alij Aquitani, alij propriè Galli. Sic apud Iuriscōsultos Cognatio quędam propriè dicitur Agnatio, eorum videlicet qui per patrem coniunguntur: quędam tantummodo Cognatio, eorum qui per matrem. Solétque hæc species voce & nota illa Tantūmodo plerūque designari. Vt apud Ciceronem in Topicis. Genus est vxor. Eius sunt duę formę: vna matrumfa. hæ sunt quę in manum conueniunt. altera earum quę tantummodo vxores habentur. Scitum est autem illud eiusdem eodémque loco: Species à genere, quoad suū, id est ipsius, nomen retinet, nunquam sciungitur. Sic Aristoteles initio Topicorum Proprij duas dicit esse species: vnam, quę rei vim & naturam declarat, quę Definitio dicitur: alteram, quę non declarat, & communi nomine Proprium vocatur. Et lib. Politicorum III, cūm Reip. tres esse species dixisset, vnam quę vnius dominatu regeretur, quę Monarchia diceretur: alterā, quę paucorum, quę Aristocratia: tum verò tertiam subiunxit, quę populi imperio ac potestate contineretur: quę communi nomine Resp. Gręcè πολιτεία dicitur. Eodémque modo Iurisconsulti doni duas species constituunt: vnam, quę cum causā fit, quę propriè Munus appellatur: alteram quę sine causā, quę generis nomine Donum vocatur. Sed vsum huius differentiæ posterius ex lo

cis argumentorum cognosces.

Quæ est diuifio ex cauffa Efficiente? Quæ genus in species ex cauffarum efficientium varietate diuidit. veluti, Arborum alię fpõte nascuntur (ait Plinius) alię ex femine, alię ex traduca. Animalium aliud ex parente, aliud à sole, aliud ex putredine nascitur.

Quæ est ex Materia? Quæ genus in species pro cuiusq; materię varietate distribuit: veluti, Metallorum aliud est aurum, aliud argentum, aliud æs, aliud ferrum. Prædium aliud est vrbanum, aliud rusticum. nam vrbanum (inquiunt Iurisperiti) non locus facit, sed materia. Vasorum quædam sunt ærea, quædam lignea, quædam vitrea, quædam fictilia.

Quæ est ex Forma? Quæ genus in species ex formarum varietate distribuit: veluti, nauium aliæ sunt constrata, aliæ aperte, alię turritæ, aliæ rostrata, aliæ biremes, alię triremes, aliæ quadriremes. Linearum alia recta est, alia obliqua.

Cedo exemplum ex fine. Nauium aliæ sunt actuarię, alię piscatorię, alię onerarię, alię speculatorię. Seruorum alij sunt atrienses, alij dispensatores, alij topiarij, alij amanuenses, alij scriptores. Vasorum alia sunt vinaria, quædam escaria, quædam aquaria, quædam vnguentaria.

Quæ est diuifio ex effectis? Quæ genus in species pro effectorum varietate dispertit. veluti herbarum quædam calefaciendi vim habent, quædam

quædam refrigerandi. aër alius est salubris, alius pestilens.

Quæ est diuisio ex Proprio? Quæ genus in species pro cuiusque proprietate partitur. veluti, Beluarum aliæ sunt volatiles, aliæ terrenæ, aliæ natatiles. Item, aliæ cantant, aliæ latrant, aliæ hinniunt, aliæ vlulant, aliæ rudent, aliæ rugiunt. Item aliæ sunt cicures, aliæ feræ.

Quæ est diuisio ex Antecedente? Locus ex antecedente necessario cum illo ex consequente coniungendus est. Nam diuisio hæc alias species antecedentes constituit, alias consequentes. veluti, Aetas hominis diuiditur in pueritiam, adolescentiam, iuuentutē, & senectutem. Illa autē anni partitio est potius quàm diuisio. Annus diuiditur in ver, æstatem, autumnum, & hyemen.

Quæ est diuisio ex Adiunctis? Quæ genus pro adiunctorum varietate distribuit. vt, Senū alij sunt creduli, alij suspiciosi, alij iracundi, alij inertes, alij loquaces. vel hoc modo: Senū alij faciliè lippitudinem contrahunt, alij podagram, alij in surditatem facilius incidunt, alij in delirium.

Quæ est diuisio ex Accidenti? Quæ genus in species pro accidentium varietate distinguit. veluti, Equorum alij sunt gradarij, alij asturcones, alij veredi, alij succussatores. Flores alij sunt hyberni, alij verni, alij æstiu, alij autumnales.

Quæ est diuisio ex Comparatione? Quæ ge-

nus ex formarum aut paritate aut imparitate distribuit. veluti, Magistratum alij sunt maiores, alij minores. Item, alij sunt maiorum, alij minorum gentium. Militum alij sunt præpositi, alij gregarij.

Quæ est diuisio ex Similitudine? Quæ in distribuendo varias similitudines aucupatur: veluti apud Ciceronem in ea pro Sex. Roscio: Simillima est accusatorum ratio. Alij vestrum anseres sunt, qui tantummodo clamant, nocere non possunt: alij canes, qui & latrare & morderere possunt. Et Tuscul. v. Vt in ludis Olympiis alij corporibus exercitatis gloriam & nobilitatem coronę petunt, alij emendi aut vendendi quæstu ducuntur, alij visendi causa veniunt: sic in vita quidam glorię seruiunt, alij pecuniis, alij rerum naturam studiosè intuentur. Item, Hominum alij sunt tanquam apes, vt patresfamilias. naui atque industrij: alij tanquam fuci, qui alieno labore victitant.

Quæ est diuisio ex Aduersis? Quæ genus in maximè dissidentes atque infestas species distribuit. veluti, Elementorum aliud est calidum, aliud frigidum, aliud leue, aliud graue, aliud humidum, aliud siccum. Enuntiationum alię sunt verę, alię falsę.

Quæ est diuisio ex Relatis? Quæ species inter se relatas exponit. vt, Hominum alij sunt patresfamilias. alij filijfamilias. alij tutores, alij pupilli: alij domini, alij serui.

Quæ est diuisio ex Priuantibus? Quæ genus

nus in eas species distribuit, quarum aliæ habitum, aliæ priuationem significēt. veluti, Hominum alij sunt sapiētes, alij stulti. alij valentes, alij imbecilli. Instrumentorum (inquit Aristoteles in Politicis) alia sunt animata, vt serui: alia inanimata, vt securis, aut dolabra.

Quæ est diuisio ex Aientibus & Negātibus? Quæ genus in eas species diuidit, quarum alię affirmēt, aliæ negent: veluti, Furtum aliud est manifestum, aliud nec manifestum. Animal aliud est rationale, aliud irrationale. Ius aliud scriptum, aliud non scriptum. Res aliæ corporeæ, aliæ incorporeæ.

Quæ est diuisio ex Repugnantibus? Quæ species ita distribuit, vt vna contrarium ostēdat, altera alterius contrarij consequens. veluti, Rerum quædā bonæ sunt, quædam fugiendæ. Ciuium alij sunt vtilēs Reip. alij ciuitate exterminandi. Nam fugiendum consequens est mali: & Eiiciendum inutilis.

Quæ est diuisio ex Disparibus? Quæ disparēs species constituit. veluti, Genus aliud est summum, aliud medium, aliud infimum. Capitis diminutio alia est maxima, alia media, alia minima. Elementorum aliud est graue, aliud leue. Aetas apud Romanos alia erat iuniorum, vsque annum x l v: alia seniorum. Officium (inquit Cicero) aliud medium est, aliud perfectum.

Quæ est diuisio ex Dissimilibus? Quæ in quaque specie dissimilitudinē aliquam cō-

stituit. veluti, Vitiorum quædam fortitudini
dissimilia sunt, quædam iustitiæ, quædā tem-
perantiæ, quædam prudentiæ.

De arte & præceptis Diuidendi.

CAP. VI.



VO T sunt Diuisionum præcepta? V-
num & summum diuisionis præce-
ptum est, quo cetera omnia continen-
tur: vt vis vniuersi generis in species
cognatas diducatur. Sed perspicuitatis caus-
sa quatuor exponenda sunt. primum, vt cognatæ
species ab vno eodémque genere distrahan-
tur. alterum, vt inter se ex aduerso & tanquā
è regione respōdeant: id est semper ex aliquo
contrariorum genere sint. tertiū, vt ne vel spe-
cies generi, vel genus speciei exequetur. quar-
tum, ne qua species vel redundet, vel præter-
mittatur: sed paria specierum & generis vni-
uersi momenta sint.

Quid est cognatas species diduci? Est non
modò ex eodē affectuum loco, sed etiā ex eo-
dem genere omnes partes inter se cognatas,
ac non aliunde ascitas proponi. Sic enim Ze-
no (vt Laertius testatur) διήρησιν definiebat: ἢ
ἐκ τὰ ἀποστέχῃ εἶδη τομῶν. vt si quis Herculeorū
genus, verbi gratia, diuideret in eos demum,
qui eodem sanguine prognati essent, neque a-
lienos vllos admisceret. nam genus est id de-
mum, quod de pluribus communione quadā
inter

inter se coniunctis, & continentibus, dicitur: vt superius docuimus. veluti, Quicquid in deliberationem cadit, id vel honestum est, vel turpe. Nam si quis ita diuideret, id vel honestum est, vel vtile, ex altero genere speciem fumeret. Caput igitur diuisionis est, vt cognatę species ex eodem genere ducantur: quasi cū riuuli ex eodem fonte & capite derinantur.

Quid est species ex aliquo genere contrariorum esse? Non est id quidē dubium, quin species ex eadem animi notione distractę inter se contrarię sint. nam vna posita, continuō altera ē regione occurrit. Itaque quę ex eodē genere, quasi ex altera parte, diuidendo respondent, simul natura esse dicuntur: neutrum autē prius, aut posterius. ex quo accidit (quē admodum posterius intelliges) vt quod vni speciei propriē conceditur, id alteri denegatur. Atque hęc nimirum illa est *διχοτομία*, siue bipartita sectio, quam veteres tantopere commendarunt, atque in primis Plato: qui in dialogo de Regno statuit, diuisionem aut ad eam paucitatem, aut certē ad quā proximū licebit numerū accommodandā esse. tametsi Aristoteles sæpenumero testetur, rei naturam ferre id non semper posse. nam (vt superius dictū est) in contrariis sæpe intermedia reperiuntur: vt necesse sit, multo plures species duabus exponere.

Cedo exemplū. Elementorū aliud est ignis, aliud aqua, aliud aer, aliud terra. nā dux prio-

res qualitates è regione inter se aduersantur. Ignis enim est calidus & siccus : aqua frigida & humida . at cetera duo ab utroque participant. Sed tamen nullum eorum vel natura, vel tēpore prius est: sed omnia natura simul sunt & ortu, & tempore. Philosophia (inquit Cicero) in tres partes est distributa, in naturæ obscuritatem, in differendi subtilitatem, in vitā atque mores. Bonorum (inquit Aristoteles) alia sunt animi, alia corporis, alia externa . Itē: Metallorum aliud est ferrum, aliud aurum , aliud argentū, aliud æs . Bestiarum aliæ sunt volucres, aliæ terrenæ, alię natatiles. Nullū horū altero prius est: sed simul natura sunt. Sic Hominum alij sunt magni, vt gigantes : alij breues, vt nani: alij mediocres. Itē alij sunt Indi, alij Britanni, quāmplurimi interiecti. Colorū alius est albus, alius niger, alius ceruleus, alius ruber, alius viridis, alius purpureus: qui ab utroque aduerso participant, & ex aliis permixtis constant.

Quid est speciem generi exæquare? Est partem speciei pro specie, id est partem subdiuisionis in diuisione ponere. veluti, Gallorū alij sunt Aquitani, alij Celtæ, alij Belgæ, alij Hedui. nam Hedui sub Celtarū specie continentur. Item, si quis dicat, Hominum alij sunt liberi, alij serui, alij liberti. Nam liberti species est eius generis, quod est liberi. Ita species suo generi adæquatur. Tria sunt (ait Cicero lib. de Orat. 1. 1.) genera, quæ in controuersia cadere possunt

possunt: quid sit, quale sit, & quomodo nomine tur. Nam illud quod quidā Græci adiungunt, rectēne factum sit, totum in eo est, quod quale sit, quæritur. Simile vitium est, cū apud Iurisconsultos Res ita diuiduntur, vt aliæ dicantur corporales, aliæ incorporales, alię immobiles. vel alię mobiles, alię immobiles, alię incorporales. l. 1, §, cum autem, C. de rei vx. act. l. 2, & l. 3, C. de quad. præscript. quanquam id breuitatis causa fieri intelligitur: vt cū Vlp, ait Conventionum tres esse species: publicas priuatas, legitimas, & iurifgentium. l. 5, D. de pact.

Quid est Genus speciei exequare? Est genus pro specie ponere: id est, in diuidendo genere verbum aliquod æquè latum vt genus ipsum, aut etiā latius vsurpare. veluti Liberorū alij sunt ingenui, alij liberti, alij patres fa. vel sic: Hominum alij sunt docti, alij indocti, alij philosophi.

Quomodo paria specierum & generis momenta efficiuntur? Cū neque species vlla præter generis vniuersitatem additur, neque vlla prætermittitur. Nam vt diuisio generis vniuersi vim omnem explicare debet, sic etiam nullam omittere. Abesse autem poterit hoc modo: Bonorū alia sunt animi, alia corporis. deest enim tertia species, quæ est fortunæ. Redundabit autem si quis addiderit, Alia externa: vel, Alia naturæ.

De Partitione Totius. CAP. VII.

QUONIAM de Diuisione dixisti, deinceps de Partitione disseram'. Quid est Partitio? Est Totius in partes vel singulas, vel plerasq; distributio. Nā si certę ac finitę sunt, omnes enumerādę sunt. At non est vitiosum (ait Cicero) in re infinita nonnihil prætēmittere. Scitum est autem illud Platonis in Phædro, cauendū esse in partiendo, ne coquorum imperitorum ritu ossa frangantur: cū artus & membra prius diuidenda sint: ac tum deinde singulorum membrorum articulos seiungi oporteat.

Quęnam est ars Partitionis? Eadem ferē quę diuisionis: dummodo partium (vt antē dixi) finitus sit numerus. Itaque quę notio diuisionem, eadem quoque Partitionem efficit: nimirum differētia: qua quęque pars tanquam certa & propria nota insignitur.

Vnde Partium differentię sumuntur? Alię ex forma, alię ex materia. Ex forma, veluti, domus apud Philosophos partitur in fundamētum, parietes, cōtignationem & tectum. apud Iurisconsultos, tantū in solum & superficiem. l. solum, 49, D. de rei vindic. l. domo, 21, D. de pignorat. act. l. Sabinus, :o, D. de cont. empt. Ex materia sic: domus partitur in lapides, trabes, cæmenta, & tegulas. Item, Corpus hominis partitur in caput, pectus, vētrem, & tibias: aut partitur in ossa, carnem, sanguinem & neruos.

Quid

Quid interest inter Diuisionem & Partitionem? Diuisio adhibetur ad genus. Partitio ad totum. Illius differentiæ semper generis nomen retinent. Partes verò totius nomen non retinent. Eorum tamen hoc commune est, quòd & partes diuiduntur in species, & species vicissim in partes: cum aut illæ generis vim obtinent, aut hæ totius.

Cedo exemplum. Sumatur ex eo libello quem hoc ipso Partitionū nomine Cicero appellauit. Nam primo loco Rhetoricam tanquam totum proposuit. tum eius tres fecit partes: vim oratoris, orationem, & quæstionem. deinde vbi ad quæstionem ventum est, eius non partes, sed species distribuit. Quæstio (inquit) alia finita est, alia infinita.

Cedo aliud exemplum. Domus partitur in fundamentum, parietes, contignationem, tectum. tectum autem aliud est planum, aliud fastigiatum.

Sed quæ cautio est ne vel diuisionem pro partitione, vel hanc pro illa vsurpemus? Si distractæ partes vniuersi nomen retinent, diuisio est: sin minus, partitio. eiúsque rei exemplum superius in affectione partium ex Dialecticæ & Memorię partitione ostendimus, in naturalem & artificiosam. nunc etiam ex Architecturæ partitione à Vitruuio tradita sumere possumus. non enim dixit aliam esse naturalem, aliam artificiosam. Sed hoc modo: Nascitur ex fabrica & ratiocinatione. Fabrica

est continuata vsus meditatio, quæ manibus perficitur. Ratiocinatio quæ res fabricatas ratione proportionis demonstrat. Sic Aristoteles in Politicis scribit, Mercaturæ tres esse partes, non species: nauigationem, inuectionem, & negotiationem.


Quoniam diuisionis & partitionis præcepta exposuisti, velim eius distributionis rationem exponas, qua principio huius artis in Dialectica partiēda es vsus. Id verò superius in Methodo exponenda præstitimus, cum artis huius Analysin; & quasi operis totius formam, & designationē proposuimus: & ratiocinatorum similitudine vsi sumus. Sed quoniam plerique diuisionem & definitionem nō summas Dialecticæ artis partes constituunt, sed quasi Partium subdiuisionem faciunt, neque de iis nisi cum ad argumentorum locos ventum est disputant: quasi argumentationis tantū partes essent (quod non immerito quispian à Cicerone in Topicis factum existimaret) confirmandum est, diuisionem & definitionem argumētationis partes propterea dici non posse, quoniam & per hanc, illæ duæ probātur: & per illas duas, hæc tractatur. Totum autem neque ad partes confirmādas adhibetur, neque partes ad Totum tractandum, sed tertium quippiam extrinsecus assumptū. Quod cum ita sit, perspicuum est, tres illas esse pari ferè momento Dialecticæ artis partes: ac falsò duas illas huius tertiæ partes numerari

rari. Sed quod de illarum mutua probatione & tractatione breuiter attingi, deinceps cū eò ventum erit planius dabitur exponendi locus.

Quid verò? Cuiusmodi peruulgatam illam Dialecticæ partitionem esse censes, cū ita distribuitur: Dialecticæ partes duæ sunt, inuentio & dispositio? Vitium huius partitionis perspicuum est in eo, quod pars subpartitionis in partitione ponitur. nam cū veteres (in his Cicero) hanc distributionem posuerunt, nequaquam summam artis totius partitionem esse voluerunt: sed quartæ partis, quæ Argumentatio est, subpartitionem: quod postea dilucidius intelliges.

De vocabulis Definitionis & Enuntiationis.

CAP. VIII.

VID sequitur nunc? Vt de Enuntiatione & Definitione dicamus: quarum, si vocabuli notionem spectemus, par eadēque vis, natura, & ratio est. Quanquam enim omnis definitio enuntiatio est, tamen ea demum enuntiatio hoc proprio definitionis nomine signata est, quæ inter Enuntiationes principatum obtinet. propterea autem princeps & Regina Enuntiationum omnium definitio est, quia sola veram propriamque reciprocationem & cōuersionem recipit, cū ceteræ aut non recipiāt.

omnino, aut impropriam & abusuam recipiant. quemadmodum posterius ex conuersionum disciplina cognosces. Itaque vt iustitia est virtus, quæ suum cuique tribuit: ita virtus quæ suum cuique tribuit, est iustitia.

Quid est Enuntiatio? Enuntiatio generali nomine est oratio, quæ aliud de alio quoquo modo pronuntiat: siue indicandi modo: veluti, Titius est heres meus: siue imperandi, Titius heres meus esto: siue optandi, Vtinam Titius hæres meus esset: siue coniungendi, si Titius heres meus sit. Itaque nullæ in hominum vita verius hoc nomine appellandæ sunt, quàm quæ legum scita & sanctiones continent. veluti, Salus populi suprema lex esto. Periurij pœna diuina, exitium: humana, dedecus esto. Quod eodem modo de regulis & præceptis artium intelligendum est, quæ Græci ἀξιωματικὰ nominant. veluti, Omnes anguli recti inter se sunt æquales. Quæ tertio alicui paria sunt, etiam inter se paria sunt. Si æqualibus addantur æqualia, omnia erunt æqualia. Si æqualibus detrahantur æqualia, reliqua erunt æqualia. sed alia est Enuntiatio communis, alia dialectica.

Quæ est Enuntiatio Dialectica? Est oratio quæ aliud de alio pronuntians, verum falsumve aliquid complectitur. nam (vt Cicero in Lucullo scribit) fundamentum omnis Dialecticæ est, quicquid enuntietur aut verum esse, aut falsum. veluti, Voluptas est bonum, Voluptas

luptas est malum. Virtus sola expetenda est. Dolor est summum malum. Itaque ex multis Enuntiationum modis nulla est ad disputandum & conclusiones componendas apta, nisi quæ indicandi modo concepta est. Hæc enim sola verū falsūve aliquid pronuntiat. Idque intelligi licet primum ex illa Dialecticorum consuetudine, de qua superius diximus: ut in circulis & conuentu ponerent, qua de re disputari vellent. veluti, Malum mihi videtur esse mors. Voluptas mihi videtur esse summū bonum. deinde ex eo quòd Syllogismi quibus cōcludendæ rationis artificium continetur, nullis aliis Enuntiationibus cōfici & exponi possunt, nisi quæ indicandi modo conceptæ sunt. Positiones autem illas, hoc est sententias quæ ad disputandū positæ *ῥέσεις* appellātur à Græcis, definitionis nomine appellari superius ex aliquot Ciceronis locis probauimus.

Et de regulis, quodnam habes testimoniū? Extat in Cluētiana Ciceronis apertissimum, vbi quam vulgo Regulam dicimus, Definitionis nomine perspicuè appellat. Denique (inquit) illa definitio iudiciorū quæ nobis à maioribus tradita est, retineatur. ut in iudiciis & sine inuidia culpa plectatur, & sine culpa inuidia ponatur. Item in Lucullo, cū ita scripsisset: Fundamentum Dialecticæ est, quicquid enuntiatur aut verum esse, aut falsum: paucis versibus interiectis sic infert: Vbi est illa definitio, Effatum esse id, quod aut verum, aut fal-

sum est? Hinc illud vulgatum apud Iuriscōsul-
tos: Omnis in iure definitio periculosa est:
quod iidem Græcè sic conuertunt πᾶς μορμικὸς
κανὼν σαθρὸς ὄσιν. Eodémque pertinet, quod
ἀφορισμὸς Græci artium summa præcepta &
regulas appellant: cùm Galenus ἀφορισμὸν de-
finiat, ὅπερ διὰ βραχυτάτων ἀπαντᾷ τὰ τῷ πράγμα-
τι ἴδια περιορίζει.

De Subiecto & Attributo.

CAP. IX.

EX quibus constat Enuntiatio? Ex
iisdem partibus, ex quibus à Grā-
maticis dicitur oratio cōstare: sed
quæ minima est, aut ex nomine &
verbo, vt Socrates ambulat: aut ex duobus no-
minibus, & verbo inter ea interiecto, vt Homo
est beatus. Homo est miser. Morsest terribilis.
Morsest expetenda. Enuntiationem autem
Peripatetici ἀπόφασις, Stoici ἀξίωμα, nonnulli
ἐπαγγελίαν appellarūt: propterea quòd mentis
interpres & quasi internuntia quædam est o-
ratio.

Quomodo definitur ἀξίωμα? Græci (in-
quit Gellius) ita definiunt: λεκτὸν αὐτοτελὲς ἀπό-
φαντον ὅσον ἐφ' ἑαυτῷ: id est, dictum per se con-
stans, & quantum in ipso est, enuntians. Quam
definitionem Chrysippo Laertius in vita Ze-
nonis attribuit. Cicero modò Effatum, mo-
dò Enuntiationem, modò Pronuntiatum, mo-
dò etiam Pronuntiationem appellat. M. Var-

ro modò profatum, modò proloquium: atque ita definit: Proloquium est sententia in qua nihil desideratur. vt, Cēsar Tyrannidē occupauit. Scipio Numantiā deleuit. Aristoteles autem hoc modo: Quæ aliquid vel ait, vel negat, pro ratione & varietate temporum: id est, pro vt tempora distincta sunt. Affirmat enim aut negat, aliquid vel esse, vel fuisse, vel futurū esse.

De vtra igitur definitione prius dicemus? De Enuntiatione: id quæ duabus de causis. primū quoniā (vt paulò antè posui) Dialecticorum ratio ita ferebat, vt primo loco sententia disputabilis proponeretur: tum vt eius sententiæ vtraque pars definiendo aperiretur: deinde quia definitio Enuntiatione, id est oratione perfecta conficitur.

Quot sunt partes Enuntiationis? Duę. Inferior, de qua aliquid dicitur, & superior, quæ de alio dicitur. Illam Gręci *ὑποκείμενον*, Latini subiectū appellant: hanc *κατηγορούμενον*, id est attributum. neque vlla Enūtiatio est, quæ pluribus constet partibus. quæ de causa, *ὅρος*, id est termini, vel extrema dicuntur: quorū illud minus appellatur, hoc maius. Subiectū est dictio, cui altera imposita conuenire aut non conuenire dicitur. Attributum, dictio quæ alteri imposita conuenire, vel non conuenire dicitur. *Κατηγορούμενον* autem hoc appellatur, quoniam (vt superius diximus) quicquid de altero dicitur, enuntiatur, prædicatur, id totum ex Categoriarū ordinibus sumitur. Veluti, virtus est

expetenda. Voluptas fugienda est.

Quid? Suntne igitur Enuntiationis partes substantiuū & adiectiuum? Sunt, qui hoc affirmant, ac statuunt, nihil apud Dialecticos aliud esse Subiectum & Attributum, quàm apud Grammaticos Substantiuum & Adiectiuum. quod sanè cuiusmodi sit, cōiectura assequi non possum. Sēpè enim vel ex duobus substantiuīs, vel ex duobus adiectiuīs enūtiatio conficitur. veluti, Iustitia est virtus. Laudabile est expetendum. Platanus est arbor. Expetendum est honestum.

Quid igitur propriè Subiectum appellas? Nomen habitum significans, cui aliud quodpiam in oratione imponitur: quasi cū in structura lapis lapidi superiniicitur. Ars enim Dialecticorū tota in eo (vt sēpe iam diximus) occupata est, vt quod cuique verbum alteri aptè & conuenienter imponi possit, demonstraret: quasi si verborum aceruus construatur. vnde frequentissimè Stoicorum disputationes Græcè *σπίρεις*, Latinè Aceruales (vt posterius intelliges) appellatæ sunt. veluti, Quod bonum est, expetendum est. quod expetendum, placens. quod placens, diligendum. quod diligendum, probandum. quod probandum, laudabile. quod laudabile, honestum. ergo quod bonum est, id etiam honestū est. Hic septem sunt Enuntiationes, in quibus quod in priore attributum fuerat, id in posteriore subiectū est.

Quid appellas Nomen habitum significās?

Quod

Quod subiectam rem aliquam complectitur, ac priuatio non est. Priuationis autem illę notę sunt, nihil, nemo, nullus. Nam cū ex negatione nihil constituatur, quę ex eiusmodi nominibus Enuntiationes conceptę sunt, necessariō in affirmationē conuertendę sunt: veluti, Nemo est iustior Aristide. Aristides iustior est omnibus. Omnia nemo potest. Vnus omnia efficere non potest. Nihil diuturnum est, in quo est aliquid extremum. Omne in quo est aliquid extremum, non est diuturnum. Nemo potest non beatus esse, qui totus aptus est ex sese. Omnis qui totus aptus est ex sese, necessariō est beatus. Nihil est dulcius otio literato. Otium literatum omnibus rebus est dulcius. Sed hac de re postea commodior incidet differendi locus.

Quid appellas Attributum? Idem prorsus, quod subiectum. nomen per quod habitus, nō priuatio, significatur. Non enim notione & de finitione differūt: sed ordine, & situ: quoniam alterum subiectum, alterum impositum est. Itaque sæpè (vt modò dixi) quod in prima Enuntiatione attributum est, id in secunda est subiectum. Quòd si nomine tantū & verbo inmutatio cōstet, veluti, Socrates philosophatur, Aristoteles disputat, tum ex vi & notione verbi nomen cum verbo est perspicuitatis causa est exprimendum: atque ita resolendum: Socrates est Philosophus, Aristoteles est disputans: Veritas odium parit: Veritas odij

caussa est. Cæsar vicit Pompeium: Cæsar fuit victor Pompeij.

Quid igitur de iis quæ de futuro aliquid dicunt, deque eo quod possit fieri, aut non possit: de quibus Cicero in libro de Fato questionem logicæ artis obscurissimam esse scribit? Sanè disputari posset, non verè & propriè illas Enuntiationes esse. primùm quia non sunt habitus: deinde quia Mediū, quod est quasi norma diiudicandæ conuenientiæ inter subiectū & attributum, de quo in Argumentationibus intelliges: adhiberi ad ea quæ non sunt, non potest. Sed quoniam rerū naturalium certus quidam ordo est à Deo constitutus, cuius propterea certus videtur euētus, vt in Solis & Lunæ defectionibus, quarum causæ naturales sunt: propterea satius est, illas Philosophorum argutias non attingere,

Diuisio Enuntiationum. CAP. X.

QUOTVPLEX est Enuntiatio? Duplex. vna quæ est simplex, quā Græci κατηγορικὴ vocāt: altera copulata, quā iidem συνθετικὴ appellāt.

Quæ est Simplex? Quæ de vno tantum, idque purè & absolutè vel affirmat, vel negat. veluti, Mors est horribilis, mors non est horribilis, Filius heres esto. Filius exheres esto.

Quæ est prima diuisio simplicis Enuntiationis? Vt alia sit affirmatiua, quæ vnum aliquid

liquid & de vno affirmat. vt, Olor est cādidus. altera negatiua, quæ vnū aliquid & de vno negat. vt Coruus non est candidus. Quæ in diuisione quanta vis sit, veteris poetæ versus ostendunt, quos propter elegantiam profereamus.

Est & non cuncti monosyllaba nota frequentant.

His depris, nihil est hominum quod sermo volutet.

Omnia in his, & ab his sunt omnia: siue negoti,

Siue otii quicquam est, seu turbe, siue quietis.

Si consentitur, mora nulla interuenit Est Est.

Si controuersa est dissensio subiiciet Non.

Quæ est secunda Diuisione? Vt alia sit vniuersalis, alia particularis, alia indefinita, alia singularis.

Quæ est vniuersalis? Quæ de omni subiecto ait quid, aut negat. Itaque notæ ipsius hæ sunt: Omnis, nullus: semper, nunquam. veluti, Omnis coruus est niger. Nullus coruus est cādidus. Semper verum dicendum est. Nunquā boni viri est mentiri. Omnia sunt hominum tenui pendentia filo. Græci autem notas illas modò συγκατηγορήματα nominant, quia sine adiunctione nihil significāt: modò ἀποσδιορίσματα, quia quemadmodum attributum subiecto cōueniat, definiunt, ac demonstrant.

Quodnam huius firmamentum ac præceptum est? Vt vera sit vniuersalis, necesse est singulas eius partes esse veras. vt eadem falsa sit, satis est vnicam ipsius partem esse falsam. veluti: Omnes apes sunt aculeatæ. Solus rex a-

culei expers , falsam enuntiationem efficit. Titius heres esto, si omnes mei liberi impuberes decesserint . Vnus pubes decessit , Titius heres nō erit. Id accidit (inquit Iulianus) quia significatio, id est , enuntiatio. *ὑποφάνσις*, sumitur ex vniuerso: in qua si aliquid falsum est, totam enūtiationem falsam efficit. l. si is qui, 13, d. de reb. dub. Et hinc natum est prouerbium, Qui omne dicit, nihil excipit. l. testatorem, 68. d. de legat. 3.

Quæ est Particularis? Quæ de subiecti parte ait quid, aut negat . Itaque notæ ipsius hæ sunt: Aliquis, quidam, non omnis, interdum, aliquādo, nonnunquam. vt Quidam homines sunt Gigātes, nonnulli, pumiliones. Vt non omne vinum , sic non omnis natura vetustate coacescit. Boni viri est aliquando mentiri. Aliqua pecunia soluta non est.

Quodnam huius firmamentū est? Vt particularis vera sit , satis est vel singularem esse veram : vt eadem falsa sit , necesse est singulas esse falsas. veluti: Quidā homines sunt sapientes. Solus Socrates veram orationem efficiet. quoniam, (vt Iulianus ait) cū significatio, id est, *ὑποφάνσις*, enuntiatio, non ex vniuerso , sed ex aliquo sumitur, si veri aliquid inde sit , verā efficit totam orationem. d. l. si is qui, d. de reb. dub. at falsum esse nō potest, nisi homines nulli sint sapientes.

Quæ est Indefinita? Quæ nulla vel totius, vel partis adiuncta nota , de subiecto aliquid
vel

vel affirmat, vel negat. vt, Voluptas est bonum. Dolor est malum. Pecunia soluta non est. Hæc autem in necessariis idem quod vniuersalis valet: vt, Homo est doctrinæ capax. Idem enim valet ac si additum esset, Omnis. At in fortuitis idem valet, quod particularis: quoniam vt ea vera sit, satis est veram esse particularem. veluti, Homo deambulat. Satis est enim si Socrates deambulet. Vnde ioculare illud Aesopi, qui iussus ab hero lentem coquere, granum lentis vnicum coxit. Notam autem appellamus etiam circumstantiam aut loci, aut personæ, aut tēporis. nam (vt ait Aristoteles libro Topicorum secundo extremo) τὸ ἀπλῶς ὅστιν, ὁ μὴ ἐνὸς τοῦτος ἐνὸς ἐρεῖς: id esse indefinitè & omnino dicitur, quod sine circumstantiæ adiectione dicitur. veluti, Colere religionem, honestū est, etiam loco nullo designato. At parentem immolare, honestum esse, indefinitè non dicitur: quamuis apud Tribalos laudi & gloriæ ducatur.

Cedo mihi coniunctum aliquod indefinitè & particularis exemplum: vt illarum vsum dispiciam. Veluti, si conuenerit vt fors annua bima trima die soluatur. deinde adiecta pactio sit, vt nisi pecunia sua quaque die soluatur, pignus vendere liceat. vel, Si qua pecunia sua die non soluatur. Nam inter illas hoc interest, quòd in illa vox Pecunia, indefinitè posita enuntiationem efficit vniuersalem: vt de summa vniuersa intelligatur. in hac pronomē

QU A definitè proprièq; positum enuntiatio-
nem efficit particularem: vt de partibus singu-
lis intelligatur. l. si necessarias, 8, §. si annua, D.
de pignerat. a&t.

Quodnam huius est firmamentum? Vt ve-
ra sit indefinita, satis est veram esse particula-
rem. Vt eadem falsa sit, necesse est singulas
esse falsas. veluti: Heres meus damnas esto da-
re aureos quinque. Plures instituti sunt. si vnus
dederit, satisfiet testatori. neque illi non satisf-
fiet, nisi nemo omnium dederit. l. si pluribus,
44, D. de legat. 2. l. si plures, 98, de leg. 3.

Quæ est singularis? Quæ de singulari, siue
indiuuiduo ait quid, aut negat. vt, Aristides est
iustus. Phalaris fuit Tyrannus. Quantū vnus
heres habebit, tantum Tithaso dari volo. Sæ-
pè tamen singularis pro vniuersali vsurpatur.
vt, Quantum heres meus habebit, tantum Ti-
thaso dari volo: id est, quantum omnes. l. si ita
relictum, 43, D. de legat. 2. Item, Heres meus
damnas esto dare aureos quinque. Omnes dā-
nati sunt. l. si plurib. 44, eod. l. si plures, 98. D.
de legat. 3.

Quod est huius firmamentum? Vt singula-
ris vera aut falsa sit, satis est indiuiduū ipsum
quo de agitur verū aut falsum esse. in quo du-
bitandi causa nulla est.

Quæ est Tertia diuisio? Vt alia sit Enun-
tiatio necessaria, alia contingens, alia impos-
sibilis. vel hoc modo, Alia necessariò vera, quæ-
dam necessariò falsa, quædam fortuita.

Quæ

Quæ est Necessaria? Cuius subiectum & attributum ita inter se necessario cohærent, vt disiungi non possint. veluti, Nemo potest non beatissimus esse, qui totus aptus est ex sese. Necesse est ligneam materiam vri flamma. necesse est hominem aliquo tempore interire.

Quæ est Impossibilis? Cuius extrema ita inter se abhorret, vt cõiungi nisi absurdè non possint: veluti, Arbor est Platanus: Paries est domus. Homo digito cælum attigit. Ignis est frigidus. nã cum aut inferiora de superiorib', aut dissentanea de dissentaneis dicuntur, tum absurda & impossibilis enuntiatio nascitur.

Quæ est Contingēs? Cuius extrema ita inter se affecta sunt, vt casu & coniungi, & disiungi possint. itaq; à Græcis ἐνδεχόμενα nominantur: veluti, Figulus inuidet figulo. Iracundus accepta cõtumelia cõmouetur. Maior pars vincit meliorem. Mulier prægna tres pariet. nã in ventre, incerta re, terni concepti numerantur. l. sed & si, 28, §. vlt. D. de iudic. Sed in argumentorum tractatione planius hæc intelligentur.

Quæ est quarta diuisio? Hęc modificatoria est, & vulgò modalis appellatur: cum illius generis Enuntiationes non simpliciter & absolute, sed adiuncta modi siue generis illius nota proferuntur. Modi autem sunt, Necesse est, oportet, fortasse, fieri potest, possibile est, impossibile est. Enuntiationum igitur aliæ hoc modo, aliæ illo, vel illo modo proferuntur. Ea-

rúmque hæc vis est, vt quid necessariò fortuito ve accidat, demonstret : & semper de futuro pronuntiatur. veluti, Fieri potest, vt tergemini nascantur. l. 3, D. si pars heredit. Fieri non potest, vt mortuus conditionem impleat. Nō prius certum est nō dedisse, quàm sit mortuus. l. ita stipulatus, 115, D. de verb. oblig. Ac de hoc genere mirificæ Philosophorum contentiones fuerunt. nam Academici Enuntiationes omnes quæ de futuro aliquid dicebant, veras esse aut falsas putabant. Stoici nec veras, nec falsas, sed veras & falsas esse posse. Non enim rerum naturam intuendam, in qua omnia certa essent, cū futura vtique fierent: sed nostram inscientiam aspici debere. d. l. sed etsi, De iudic. Nonnulli disputabāt id demum fieri posse, quod verum futurum esset: quod non esset, fieri nō posse. veluti, Cras mori. Si verum est, eueniet. Sin falsum, non eueniet. Quinetiam negationis adiectæ translatio momentum discriminis ostendit. veluti, Non impossibile est Troiam à Græcis capi. Impossibile est Troiam à Græcis non capi.

Quæ est quinta diuisio? Alia directæ est, quæ iusto & naturali verborum ordine concepta est. veluti, Deus cōsulit rebus humanis. Formæ dignitas aut morbo deflorescit, aut vetustate: alia conuersa, alia traiecta.

Quæ est conuersa? Quæ id quod directè, sicuti natura fert, dictum erat, idem quasi sursum versus retróque pronuntiat: velut, in Labio:

bio : Cùm iudicaueris , diligere oportet : non cùm dilexeris , iudicare . Et alibi : Esse oportet , vt viuas : non viuere , vt edas . Magistratus est lex loquens : lex , magistratus mutus . Si poema , loquens pictura est : pictura , tacitum poema debet esse . Seruus (inquit Aristoteles) est instrumentum animatum : instrumentum , seruus inanimus . Quia stultus es , ea re taces : non quia taces , ea re stultus es . Sic , Homo non est conditus vt cœlum & solem contempletur : sed cœlum & sol & astra condita sunt , vt homini luceant . Ex eodem genere illud fuit Pasquilli ioculare , quod animi causa subscribe-
mus .

Pauperibus sua dat gratis , nec munera curat .

Curia Papalis , quod modo percipimus .

Laus tua , non tua fraus , virtus non copia rerum

Scandere te fecit hoc decus eximium .

Hic Deus omnipotens faciat te viuere longo

Tempore , nec labilis sit tua conditio .

Quæ est Traiecta ? Quæ præpostero vel dictionum , vel sententiæ ordine concepta est . Hanc Cicero permistam & intercisam appellat in Partitionibus . veluti , Humanis Deus rebus consulit . Deflorescit formæ dignitas aut morbo , aut vetustate . Aut morbo aut vetustate formæ dignitas deflorescit . Item illud : Crescentem sequitur cura pecuniam . Instabilis in omnes plurimum fortuna valet . Nam in oratione non modò verba , sed etiam eorū no-

tio ita inuerſa eſt, vt quod ſubiectũ videatur, ſit attributum:& contrà, quod attributum, id ſubiectum ſit. Sic, Nihil eſt præſtabilius virtute, pro Virtus eſt præſtabilior rebus omnibus.

Quorſum hæc diuiſio? Quia cùm in propoſita quæſtione naturalis & verborum & ſententiæ ordo eſt, nomina quæ verbum antecedunt, ſubiecti locum obtinent: quæ verò ſequuntur, attributi. At ſi conuerſus ordo eſt, ad naturalem ita reuocandus eſt, vt hoc ipſum appareat: quãuis res naturæ ordine prior ſit.

Cedo exemplum. In hac Enũtiatione, Vmbra ſequitur corpus, quamuis Corpus notatione prius ſit, vt Cauſſa notatione & intelligentia prior eſt Efectu: tamen vmbra in quæſtione prius eſt extremum, poſterius eſt quod ſubiecto attribuitur. Itaque ſic inuertenda eſt: Corpus in luce eſt cauſſa efficiens vmbrae. Sic in illa: Crescentem ſequitur cura pecuniam: Pecunia, etſi natura prior eſt, tamen non eſt ſubiectum, vt quibuſdam placuiſſe video. Reuocanda enim eſt oratio ad ordinem naturalem, & ponenda quæſtio, An curæ conueniat, quod ei attribuitur. Pecunia crescens eſt cauſſa curarum & ſollicitudinum.

Deinceps de copulata videamus. Quid eſt Copulata Enuntiatio? Quæ neque de vno, neque purè & abſolutè, ſed de pluribus vel ſub conditione, vel diſiunctiuè, vel coniunctiuè affirmat aut negat. veluti, Si ſol lucet, dies eſt

est. Aut dies est, aut nox est. Et sol lucet, & dies est. Si mihi filius nascatur, heres esto. Aut Titius heres esto, aut Mæuius. quæ institutionis & substitutionis vis est. Et Titius & Mæuius heredes sunt.

Quæ est Conditionalis? Quæ per notam cōditionis elata, de nulla parte purè affirmat, sed vel antecedens ex consequenti, vel consequens ex antecedenti pollicetur. Notæ autem conditionis sunt Si, vel Nisi. veluti: Si dies est, sol lucet. Si sol lucet, dies est. Nisi dies est, sol non lucet. Nisi sol lucet, dies non est.

Si fortuna volet, fies de Rhetore Consul.

Si volet hac eadem, fies de Consule Rhetor. Sed conditionalis alia rursus est simplex, quæ simplicem adiunctionem habet, vt ea quam modò exposuimus, altera mixta.

Quod est firmamentum istius enuntiationis? Vt verum sit antecedens, necesse est consequens verum esse: vicissimque vt hoc sit, illud esse necesse est.

Quæ est Cōditionalis mixta? Quæ adiunctionem habet, aut ex coniunctiua, aut ex disiunctiua. veluti: Si stertit, & cubat, & dormit. Si ciuis est, aut natus est, aut factus. Si filius factus est, aut natura, aut adoptione est.

Quæ est Enuntiatio disiunctiua? Quæ per disiunctionis notā concepta de incerta parte affirmat. Notæ autē disiunctionis sunt, Aut & Vel. veluti, Aut dies est, aut nox est. Aut amat, aut odit mulier. nā disiunctiua dicuntur, quo-

rum posito vno necesse est tolli alterum : item sublato altero poni alterum. l. hæc verba, 124, D. de verb. signif. Gellius *διεzeugμένον ἀξίωμα* Græcè, Latine disiunctum proloquium appellat.

Quid est Disiunctio? Quæ vel per diuisionem, genus in species, vel per partitionem, totum in partes distribuit. Duplex autem disiunctio est : vna duarum partium : veluti, Aut vigilat, aut dormit : altera plurium : veluti, Beluæ sunt aut aëriæ, aut terrenæ, aut aquatiles.

Quæ est natura disiuncti pronuntiati. Ut vna pars vera, vniuersam orationem veram efficiat. nam cum disiunctiua sit particularis (vt Iulianus docet in l. si is qui, 13, §. vtrum, D. de reb. dub.) satis constat subcontrarias simul veras esse posse. veluti, Aliquis homo est albus. Non omnis homo est niger. Quauis igitur quidam sint nigri, vera tamen erit enuntiatio, Homines aut sunt albi, aut nigri. Itaque iussus illud aut illud dare, alterutrum dando liberatur. l. cum pupillus, 78, D. de cond. & demonstr. l. 5, D. de cond. instit. Gellius autem copiosius rem sic explicat: Omnia (inquit) quæ disiunguntur, pugnantia esse inter sese oportet: eorumque opposita, *ἀντικείμενα*. Græci dicunt, ea quoque ipsa inter sese aduersa esse. Ex omnibus quæ disiunguntur, vnum esse verum debet: falsa cetera. Quod si aut nihil omnium verum, aut omnia, plurave quam vnum, vera erunt: aut quæ disiuncta sunt, non pugnabunt:

aut

aut quę opposita eorum sunt, contraria inter se non erunt: tūc id disiunctū mendacium est, & appellatur *ἡ διαζευγμένον*: sicuti hoc est, in quo quę opposita, non sunt contraria: aut curris, aut stas, aut ambulas. Nam ipsa quidē inter se aduersa sunt, sed opposita eorum non repugnant. Non ambulare enim, & non stare, & non currere, contraria inter sese non sunt: quoniam contraria ea dicuntur quę simul vera esse non queunt. Possis enim simul eodēque tempore, neque ambulare, neque stare, neque currere.

Quę est Coniunctiua? Quę per coniunctionis notam cōcepta, de partibus omnibus aliquid aut affirmat, aut negat. Notę autem coniunctionis sunt, Et, Nec. veluti, Cicero & eloquens fuit, & bonus ciuis. Cicero nec bellicosus fuit, nec magnanimus.

Quod est firmamētū istius? Vt cōiunctiua vera sit, singulas partes veras esse oportet. vt eadē falsa sit, vnicā falsam esse satis est. Hęc enim vniuersalis est: vt Iulianus scribit in l. si is qui, 13, §. vtrū D. de reb. dub. Quare cui legatum est si & illud & illud fecerit, vtrunque facere cogitur. l. si quis ita, 129, D. de verb. signif. Gellius hanc enuntiationem scribit à Græcis nominari *συμπεπλεγμένον ἄξίωμα*: id est, cōiunctum vel copulatum. veluti, Scipio bis Consul fuit, & triumphauit, & Censura functus est, & collega in Censura Mummij fuit. Eius autē hoc esse proprium, vt si vnum est mendaciū, etiam

si cetera vera sint, totum esse mendacium dicatur, nā si ad ea omnia quæ de Scipione illo vera dixi (inquit) addidero, Et Annibalem in Africa superauit, quod est falsum: vniuersa quoque illa quæ coniunctè dicta sunt, propter hoc vnum quod falsum accesserit, vera non erunt.

De Comparatione Enuntiationum per contradictionem.

CAP. XI.

HACTENVS de Enuntiationibus per se consideratis satis videtur dictum. deinceps de ipsarum inter se ratione & affectione disseramus.

Quot modis Enūtiationes inter se cōparantur? Tribus. per cōtradictionē, per pariationē, & per cōuersionē: ex quibus vtrū inter se conueniant, an dissideant intelligitur. Has Græci vocant ἀντιθέσιν, ἰσοδυαμίαν, & ἀντιστροφὴν.

Quid est Contradictio? Vnius eiusdemque rei affirmatio & negatio. vel, Oratio quæ idem de eodem & affirmat, & negat.

Quotuplex est Contradictio? Quadruplex. aut enim contrariæ sunt enuntiationes, aut subcontrariæ, aut subalternæ, aut disparatæ. Græcè sic: ἐναντίαι, ὑπεναντίαι, ὑπάλληλαι, δὲ ποσάτι καί. quarum figuram Græci in quadrato sic constituunt.

Omne

Omne verbum
est ambiguum.

Contrariæ
ἐναντία.

Nullum verbum
est ambiguum.

Contradictæ
ἐναντία

ἐναντία

Subalternæ
ἐπὶ ἀλλήλαι.

Subalternæ
ἐπὶ ἀλλήλαι.

ἐναντία

per diametrum

Aliquod verbum
est ambiguum.

Subcontrariæ
ὑποεναντία

Nō omne verbū
est ambiguum.

Quæ sunt Cōtrariæ? Duæ vniuersales, quarum quod affirmat altera, idem ipsum de eodem altera negat. Itaque veræ simul esse non possunt: at falsæ possunt. veluti, Omnis homo est beatus. Nullus homo est beatus. Vtraque falsa est.

Quæ sunt Subcontrariæ? Duæ particulares, quarum quod altera affirmat, id altera de eodem negat. Hæ falsæ simul esse non possunt: at veræ possunt. Aliquis homo est beatus. Non omnis homo est beatus.

Quæ sunt Subalternæ? Duæ de eodem E-

nuntiationes, quarum vna vniuersalis est, altera particularis. cū tamen vtraque vel affirmatiua sit, vel negatiua. veluti, Omnis homo est miser. Quidam homo est miser. Nullus homo est beatus. Non omnis homo est beatus. Itaque si vera vniuersalis est, erit & particularis vera: at non continuò, si hæc vera est, illa erit: veluti, Quidam homines sunt cæci. Omnes homines sunt cæci. Subalternæ autem dicuntur, quia sunt ὑπαλληλα, id est, quoniam altera alteri subiecta est.

Quæ sunt Contradicentes? Quarum vna vniuersalis affirmatiua est, altera particularis negatiua. vel contrà, quarum vna vniuersalis negatiua, & altera particularis affirmatiua est. hæc autem adeo inter se pugnant, vt simul neque veræ, neque falsæ esse possint. veluti, Omnes homines sunt miseri: Quidam homines non sunt miseri. vel contrà: Nulli homines sunt atri: Quidam homines sunt atri. ac scitum est quod in quadrato superiore Dialectici notant, in solis diagonicis enuntiationibus contradictionem esse. Est autem διαγώνιος, quæ & Diameter dicitur, linea quæ in quadrato ab angulis ad angulos ea parte ducitur, qua longissimè quadratum patet.

Quid? Oppositionis, quæ nā præcepta sunt? Vt in re, vocabulo & tempore eodem, oppositio committatur. Nam si in iis varietas est, committi non potest. In re, veluti: Cato sibi mortem consciuit. Cato sibi mortem non consciuit

uit. Prius de Vticēsi verum est: alterum autem de Censorino. Item Aethiops est niger: Aethiops non est niger. Non cōmittuntur, si alterum de cute, alterū de dentibus enūtiatur. In vocabulo, veluti, Scriptor huius hystorię est eloquentissimus: idem scriptor est infantissimus. Non cōmittuntur si prius de auctore, alterum de librario pronuncietur. In tempore, veluti Clodius illo die visus est Romę. Clodius illo die visus est Interamnę. non cōmittuntur si diei fiat partitio: non magis quā in illo: Cęsar interfect' est Idibus Martiis. Cęsar Idibus Martiis non est interfectus. Nam manē nondum interfectus erat.

De Pariatione.

CAP. XII.

QUAE est Pariatio? Est duarum enuntiationum quę inter se dissident, cōciliatio. Hęc (vt dixi) ἰσοδυναμία Gręci vocant, vulgus Aequipollentiam: nos Pariationem ex accepti & expensi rationibus non incommodē appellari posse putauimus: quoniā tum in quātitate, tum in qualitate ea comparatio fit. Quantitas autem de vniuersalibus, & particularibus dicitur: Qualitas de affirmatiuis & negatiuis.

Quot modis Pariatio conficitur? Duobus: adiunctione negationis, & verborum conuersione. Sed negatio interdum vna est, interdū gemina. Itaque de vtriusque vi separatim exponendum est.

Quotuplex est vis vnius Negantię? Qua-

druplex. Nam aut totum partémve ponit: aut totum partémve tollit. Itaque modos omnes Enuntiationum conturbat, quia ex varietate situs & positionis potestas eius variatur.

Cedo exemplum de Parte per negantiã posita. Sumamus huiusmodi: Homo est bipes: Non homo est bipes: híc negantia partem ponit: quia declarat aliud quippiam esse bipes, præter hominem, vt aues. Ergo ad illam indefinitam enuntiationem: Homo est bipes, partem addit: Etiã quod non homo est, bipes est. Sic Homines natant, Non homines natant: id est, etiam non homines. Item: Ciuis est liber: non ciuis est etiã liber. Reges sunt beati. Non Reges sunt etiam beati. hostis est peregrinus. non hostis est etiam peregrinus.

Cedo exemplum de Toto per negantiã posito. Sumatur huiusmodi: Homo est animal docile: Homo est animal non docile. Canis est cicur: Canis est non cicur. Omnes Elephanti sunt feroces. Omnes Elephanti sunt non feroces. Híc negantia propterea Totum ponere dicitur, quia nouum attributum & superioris contrarium inducit: id est, nouam qualitatem subiecto attribuit.

Cedo exemplum de Negantiã quæ partem tollit. Ponatur huiusmodi: Omnis homo est albus: Non omnis homo est albus: vel, Omnis homo non est albus. Híc negantia partē propterea detrahare dicitur, quoniam ex vniuersali enuntiatione particularem efficit.

Cedo

Cedo exemplum de Negantia, quæ Totum tollit. Ponatur huiusmodi: Homo est animal docile. Homo nō est animal docile. Balbus est musicus. Balbus non est musicus. Leo est ferox. Leo non est ferox. Hic Negantia perspicuè est ἀπόφανσις τινὸς ἀπὸ τινος (vt Aristoteles loquitur) ac propriè vim suam exerit. Totum enim attributum remouet atque auertit à subiecto.

Quomodo Negantia modos Enuntiationis variat? Quoniam ex affirmatiuis negatiuas, ex negatiuis affirmatiuas, & ex vniuersalibus particulares efficit: veluti, Homo est animal sociale. Homo non est animal sociale. Ex aiente & negante effecta est. At cūm dicimus, Nulli homines sunt atri: Nonnulli homines sunt atri: ex negante cōficimus affirmantem. Quòd si dicamus, Omnis homo est albus: Nō omnis homo est albus: ex vniuersali particularem efficiamus.

Quo pacto varius negantiæ situs vim ipsius variat? Quia cūm vis eius propria & naturalis hæc sit, vt auertat & remoueat, sæpe tamen ex ratione positionis & situs ponēdi atque inducendi vim obtinet. veluti, Homo est bipes, Non homo est bipes. Homo natat, Non homo natat. Hæc negantiæ præpositio vim affirmationis quādam ei attribuit, ac facit vt aliquid ab ea ponatur atque inducatur, quod præter hominem bipes sit, aut natet. vt canis, equus. Item, negantiæ post verbum ε s τ collocatio

vim affirmationis ei tribuit: vt Græci loquuntur ἐκ μεταθέσεως. veluti, Concubina est non iusta vxor. Spurius est non iustus filius. Crudelitas est non virtus. Prudentia est nihil temerè credere. Ex eodem genere illa sunt: Agricola non plantat, pro, Est non plantans: cùm arat. Studiosus non legit: pro, Est non legens: cùm scribit. Sic Cato in otio est, non otiosus. Christiani locupletes (inquit Paulus) debent esse vt non locupletes: quod valet, inopes. Ex eodẽ quoque genere illa sunt: Nulli homines sunt nigri: nonnulli homines sunt nigri. Genus enim hominum inducitur, quod nigrum esse affirmatur. Item: Quidam homines sunt claudi: Quidam homines non sunt claudi. Nihil superiori posterior adimit: sed cùm ex toto cum illa congruat, affirmationis locum obtinet.

Quotuplex est vis geminæ negationis. Triplex. nam aut totum tollit, quippe quæ totum inficiatur: aut totũ partemve ponit, cùm aut totum aut partem duntaxat affirmat. Partis enim tollendæ vim non habet: quia particularem negatiuam efficere non potest.

Cedo exemplum de Toto per geminam negantiã sublato. Per geminam negantiã Totum tollitur, cùm vniuersalis negatiua cõcipitur: veluti, Non homo nõ ridet. Non miles, nõ beligeratur. Non liber, non est ciuis. Non ciuis, non agit lege. Non Senator, non admittitur in curiam. Valet enim idem quod vniuersalis

nega-

negatiua huiusmodi: Nullus nō senator in curiam admittitur.

Cedo exemplum de Toto per geminam negantiam inducto. Cū geminata negatione vniuersalis affirmatiua conficitur. veluti, Nemo non est improbus. Nemo est non improbus. Nullus ciuis non est liber. Nullus ciuis est non liber. Nullus leo non est ferox. nullus leo est non ferox. Nulla gemma non est lucida. nulla gemma est non lucida. Nam hæc idem valet atque illa, Omnis gemma est lucida.

Cedo exemplū de parte per geminam negantiam posita. Cū geminata negatione vniuersalis in affirmationem particularem conuertitur. veluti, Nulli sunt Centauri. Nōnulli sunt Cētauri. Nusquā sunt Pygmæi: Non nusquam sunt Pygmæi. Nemo senator est maculosus. Non nemo Senator est maculosus.

Quamobrem gemina negantia partis tollendæ vim non obtinet? Quia secunda negatio particulari negatiuæ adhibita, vniuersalem affirmatiuam efficit. veluti, Quidam Senatores non sunt diuites. non quidam Senatores non sunt diuites. Quidā Tyranni non sunt interficiendi. non quidam Tyranni non sunt interficiendi. Nam idem valet atque illa, Omnes Tyranni sunt interficiendi.

De Conuersione.

CAP. XIII.

QUID est Conuersio? Est attributi in subiectum, & vicissim subiecti in attributum commutatio. Itaque singularis eius vis ac præstantia in eo cernitur, quòd cum ars dialectica in eo potissimum versetur, vt ostēdat qua ratione aliud de alio dici atque enuntiari possit: tum verò Cōuersionis disciplina demonstrat, quemadmodum duo diuersa de vno, id est subiectum de attributo, & attributum de subiecto prædicari possit: simulque de duobus in Enuntiatione positis utrū sit subiectum, aut attributum. Hæc à Græcis ἀντιστροφή quasi ἰσοςτροφή nominatur: quasi quis dicat vicissitudinem, aut reciprocationē: cum id quod directè dictum est, inuertitur, & idem quasi sursum versus retròque dicitur. veluti, nulla voluptas est bona. nihil quod bonum sit, est voluptas. Hoc enim ex Aristotele vulgò traditur exemplum. Deinde, quoniam superiùs diximus, subiectum nunquam esse priuationem, si negatiua concepta enuntiatio sit, demonstrat quomodo ita commutari possit, vt aliquid in subiecto insit. veluti, Nihil est præstabilius virtute. Virtus est præstabilior omni re. Nullum honestū est non vtile. Omne honestum est vtile. Nulla crudelitas est virtus. Omnis crudelitas est vitiū. Nulla voluptas est bonum. Omnis voluptas est malum. Nihil est insipiente fortunato intolerabilius. Insipiēs fortunatus omnibus hominibus est intolerabilior.

Quo-

Quotuplex conuersio est? Duplex. Propria & impropria. Propria est, cum & subiectum de attributo, & attributum de subiecto, quasi idem de eodem pronuntiatur. Itaque vnius tantum generis Enuntiationum propria hæc conuersio videtur: eius videlicet, quæ idem de eodem enūtiat. vt superius diximus, Contradictionem esse, cum idem de eodem & affirmatur & negatur. Nam quæ sunt eadem, necessariò inter se recipiuntur, vicissimque commeant: veluti, Vt bis bina sunt quatuor, sic quatuor sunt bis bina: & vt quater quinque sunt viginti, sic viginti sunt quinquies quater. Quo argumento Genus & species cunctæ, Totum item & partes coniunctæ inter se recipiuntur: ac proinde etiam definitum & definitio: quia definitio (vt paulo post intelliges) nihil aliud est, quam singularum partium inuolutarum euolutio. Itaque vt Rhetorica est facultas copiosè loquendi, ita facultas copiosè loquendi, est Rhetorica. Dolor, ægritudo crucians. Aegritudo crucians, dolor.

Quænam eius disciplinæ præceptio & formula tradi potest? Vt omnis enuntiatio vniuersalis quæ de paribus pronuntiat, siue affirmatiua, siue negatiua sit, recipiatur hoc modo: Quicumque habet bis bina, idem habet quatuor: & vicissim qui quatuor, idem habet bis bina. In quo est mœror, in eo est ægritudo flebilis: in quo est ægritudo flebilis, in eo est mœror. Et ex contrario: in quo

non est angor, in eo non est ægritudo premēs: & in quo non est ægritudo premens, in eo nō est angor. In his exemplis idem de eodem dicitur: quemadmodum in contradictione factum est. Definitum enim & definitio re sunt paria: verborum solo numero differunt.

Quæ est impropria Conuersio? Quæ non idem de eodem enuntiat, sed alterum alterius æquè vel consentaneum vel dissentaneum esse declarat. veluti: Omne honestum est vtile. & vicissim, Omne vtile est honestum. Nihil honestum, quod non vtile. Nihil vtile, quod non honestum. Item: Omnis sapiens est diues: Omnis diues est sapiens. Nemo diues nisi sapiens: & nemo sapiens, nisi diues. Vtraq; est, vt paulò post intelliges, argumentatio ex antecedentibus & consequentibus. Nam vt honestas antecedens utilitatis est, sic sapiētia diuitiarum. Eiusdémque generis illud est: Magistratus est Lex loquens: Lex est magistratus mutus.

Quænam eius rei præcepta Aristoteles tradidit? Omnis quæ de hoc genere est Aristotelis disputatio, ad improprias pertinet. Itaque non eodem libro hanc, quo contradictionem tractauit, vt cum eò perueneris, intelliges. Primum autem eius præceptum est huiusmodi: Omnis enuntiatio quæ vniuersalis negatiua est, necessariam conuersionem efficit: veluti, Nulla voluptas est bona. Nihil quod bonum sit, est voluptas. Sed nihil mirum est, si hæc nō reciprocentur, cum ex repugnantium numero

ro sint. Acquē autem absurdum est de Repugnantium conuersione disputare, ac de Contrariorum. veluti, Vt nulla virtus vitium est, sic nullum vitium est virtus. de quo sanus nemo dubitarit.

Cedo aliud exemplum. Simillima ratio est eorum quę passim in scholis proferuntur. Nulla crudelitas est virtus. Nulla virtus est crudelitas. Nullum iustum malum est. Nullum malum iustum est. Nam hæc omnia ex Repugnantium habitu & affectione sumpta sunt. sic, Nullum animal est cordis expers: Nullum cordis expers est animal. Apertissima est argumentatio ex Toto ad Partem affirmatiuē: & vicissim à Partibus ad Totum negatiuē. Nam Cor præcipua pars est Animalis, vt Rota vehiculi: de quo si sic dicerem, Vt nullum vehiculum rota vacuum est, sic nullum rota vacuum est vehiculum: absurdissimē argumentationē ex Toto & Partibus ad Enuntiationis naturā & habitum trāsferrem.

Quod est alterum Aristotelis præceptum? Vt Enuntiatio vniuersalis affirmatiua recipiatur illa quidem, sed in parte tantum, nō vniuersē. veluti: Si voluptas omnis est bona, quoddam bonum est voluptas. Sed ex generis & speciei habitu hæc conuersio ducitur: & perspicuē, non ad Enuntiationum naturam, sed ad locos argumentorum pertinet: in quibus traditur, Cui conuenit genus, eidem conuenire speciem. sed cui conuenit species, eidem ge

nus ex parte tantum conuenire. Eadem ratio est illius, Si omne iustum bonum est, quoddam bonum, iustum est. Si omnis homo est animal, quoddam animal est homo.

Quod est Tertium? Vt Enuntiatio particularis affirmatiua necessariò reciprocetur. veluti, Si quædam voluptas est bona, quoddam bonum est voluptas. Est enim hæc non Enuntiationis natura, sed Argumentatio ex genere & specie superiori simillima. non secus atque illæ in scholis vsitatæ: Si quædam fortitudo virtus est, quædam virtus est fortitudo. Si quoddam iustum bonum est, quoddam bonum iustum est. Si quidam amor est obscænus, quiddam obscænum est amor. quasi verò alterum de altero eodem modo prædicetur, quomodo Attributum de subiecto prædicari dicitur.

Quid? Nonne superius dixisti, Affectiones quasdam reciprocationem admittere? Dixi. sed hoc nihil ad hanc nostram subiecti in attributū, aut attributū in subiectum vicissitudinē. quæ est eiusmodi, vt cum quæritur, quid sit Subiectū, aptè respondeatur Attributū: & vicissim hoc de illo. At in illis reciprocatio nihil aliud est quàm vnus ad alteram affectio, relatio, habitus. veluti, Vt pater dicitur pater filij: sic filius dicitur filius patris. At neque qui pater est, dicitur filius: neque hic, ille. Sic discendi facultas est hominis proprium. sed neque homo præcisè definitur doctrinæ capax: neque doctrinæ capax homo. Proprium enim nō est
totum

totum, sed pars duntaxat. Itaque doctrinæ capax non adæquat vocabulum homo: sed cōiunctè definitur Animal doctrinæ capax. Sic rectè dicetur: Si sol lucet, dies est. Si dies est, sol lucet. Sed non natura Enuntiationis reciprocantis illa est, verū argumentatio ex causis & effectis. Et quamvis vrgeri possit, hæc inter se conuerti: Vt lux solis, est dies: sic dies, est lux solis: tamen perspicuum est, hanc esse definitionem, & definitum: sed eam non verā & solidam, sed ex causis & effectis adumbratam: de quarum vtrique nunc est differendi locus.

De vera & propria Definitione.

CAP. XIII.

QUONIAM igitur de priore Enuntiationum genere satis dixisti, deinceps de ea dicamus, quam principem & Reginam omnium superius appellasti.

Quid est Definitio? Oratio (inquit Cicero) quæ id quod definitur explicat quid sit. Et alibi, Oratio quæ quid sit id de quo agitur explicat quàm breuissimè. Item, Oratio quæ complicatam animi notionem euoluit. Item, quæ inuolutæ rei notionem aperit. Item, quæ quasi inuolutum euoluit, id de quo quæritur. Item, quæ inuolutam animi notionem explicat. Itē, est quasi patefactio rerum operarū,

cum quid quidque sit, aperitur. Item, quæ aperit notionem nostram quam habemus, de re definienda rectam atque inuolutam. Itaque sæpe ab Aristotele dicuntur omnes scientiæ ex definitione oriri. *πάντα αἰτιάζονται* (inquit) *δι' ὁρίσμεν γίνονται.*

Quæ est materia Definitionis? Quoniam definitio mentis & rationis opus est, ratio autem & scientia in rebus singulis non versatur, in quibus sensus occupati sunt: sequitur ut definitio ad species tantum aut certè ad ea genera quæ intermedia sunt, adhiberi possit: *ἀλλ' οὐδ' ἔστι πᾶς ὁρος καθόλου*, inquit Aristoteles. Individuorum verò & singularum rerum nulla definitio est. quippe cum earum (ut modò dixi) scientia nulla sit. nulla autem idcirco scientia est, quia & infinite & fluxe atque caducæ sunt. Itaq; quæ de Socrate fingi definitio potest, eadem etiam in omnes homines valet. Summa autem genera idcirco definiri non possunt, quia quæque res (ut mox intelliges) ex suo genere definitur.

Quotuplex definitio est? Prima diuisio hæc est, ut alia sit rei, alia dictionis. nam cum definitio sit oratio, quæ declarat *τί ἐστι*, sequitur (inquit Aristoteles) ut etiam sit oratio demonstrans, quid nomē significet: aut *λόγος ἕτερος ὀνοματώδης*: id est altera oratio nomen explicans: cuiusmodi est qua docetur quæ sit vis & significatio verbi Triangulum: quam tamen ad notationem propius quàm ad definitionem pertinere,

tinere, satis alio loco demonstratum est.

Quæ est altera definitionis diuision? Hæc bipartita quoque est: vt altera sit solida (quæ à Græcis *ὑποκείμενη*, vulgò Essentialis dicitur: quæ de causa sola substantia, nullum accidens definiri potest) altera adumbrata, quæ ab illis *συμβεβηκός* dicitur, à nostris accidentalis.

Quæ est solida definitio? Aristoteles sic explicat, *ὅστις ὁ ὅρος μὴ λόγος ὁ τὸ, τί λέγειν σημαίνων*. quod Boëtius ita cōuertit. Est oratio quid sit, esse significans. fortasse planius ita poterit: Oratio quæ demonstrat, quid sit esse hoc. Quod ab illo acutissimè dictum sic accipiendū est, quasi dixisset: Oratio respondens ad quæstionem quid sit esse hoc. Nam qui quærit quid sit, vī ipsa quærere videtur, quid sit esse hoc. Quærere autem quid sit esse hoc, nihil aliud est, quàm quærere cur ita res sit. Itaque (vt idem alio loco docuit) definitio quæ docet quid res sit, & ea quæ docet causam cur res sit, eadem est. nosse enim quid sit, & cur res sit, idem sunt.

Cedo exemplum. Sumatur illud ipsum quo Aristoteles vtitur: Quid est Eclipsis lunæ? Defectio luminis ex terræ interpositu. Quamobrem luna deficit? quia lumen eius terræ interiectu obscuratur. Item, Quid est Tonitru? Est restructio ignis innube. Cur tonat? quoniam ignis in nube oppressus extinguitur.

Quin tu igitur planius Aristotelis definitionē explicas? Definitio est oratio, quæ quid sit, & quale sit id de quo ambigitur, propriè,

apertè, ac breuiter enuntiat. Neque enim ex sola essentia satis intelligitur, quid sit esse hoc, vel cur ita sit: sed qualitas insuper exponenda est. Itaque veteres eam veram esse definitionē dixerunt, quæ ex genere & differentia constaret: quoniam genus respondetur ad quæstionem quid est: differentia verò ad quæstionem quale est. Ea verò demum differētia sunt, quæ definitione differunt. Scitū est enim illud Aristotelis, neque diuersarū rerum vnā definitionem, neque vnius rei diuersas definitiones, esse posse. ὅτε γὰρ ἐν αὐτοῖν, ὅτε δύο τῇ αὐτῇ ὁρῶντες δύναται εἶναι. Denique genus non est tota speciei substantia. non enim solum genus sine differentia speciem format, vt neque sola differentia sine genere: sed tamē interdum accidit, vt qualitates aliunde quàm ex differentijs exponendæ sint: cum aut vera qualitas ignota est, aut non sufficit. tum igitur aut proprietates aut accidentia, aut causas, pro supplemento adhibemus.

Quid? Definitionis quæ ratio est, & quæ via? Non dubium est (inquit Cicero) quin definitio genere declaretur, & proprietate quadam, aut etiam communium frequētia (id est multitudine) ex quibus proprium quid sit, eluceat. Genus igitur primū quærendum est, dein quæ in eo genere aliorum erunt communia definitionē circumscribenda sunt, vt quasi definita regio sit, quæ terminis septa teneatur. Nā quæ definitione conueniunt, i. quorū eadem

dem definitio est, eadem omnino sunt. Itaque quia Cicero in libro de Fato Logicam definit artem differendi, aliis autem locis Dialecticā totidem verbis definit: rectè concludetur, Dialecticam & Logicam idē esse, ac solo vocis sono differre.

Vnde dicitur definitio? Quoniam id de quo ambigitur certis finibus, & quasi cancellis circumscribit, ut à reliquarum communitate disiungatur, & proprium efficiatur. Itaque à Græcis *ὁρος* & *ὁρίσματος* dicitur: quia definitio in disputationibus sic adhibetur, ut in agris & regionibus limites siue termini, aut sepes undique circumscriptæ. Nanque definitio, Geographorum & Agrimenforum propria est.

Cedo exemplū. In Geographia peruulgatum est huiusmodi. Italia est regio quæ terminatur & à septentrione & ab occasu, Alpiū iugis: ab ortu Adriaticō mari: à meridie, mari Siculo. Sicilia est insula, cincta à septentrione & occasu mari Thyrreno, à meridie Afro, ab ortu Adriatico. Sardinia, quæ ab ortu Thyrreno, à meridie Africo ab occasu & septentrione Sardo cingitur.

Cedo exemplum definitionis Dialecticæ. Homo est animal rationis particeps, mortale. Nam animal, genus: mortale, differētia est hominem ab Angelis separans. Rationale, item altera, eundē à belluis distinguens. Quod si ad sepimentū absolvendū substantiali differētia

non sufficit, tum supplementum (vt antè dixi) vel ex proprio, vel ex accidēti, vel ex vtroque sumendum est.

Cedo item aliud exemplum. Equus est animal quadrupes, quod collo & dorso domatur. Hæc Enuntiatio in asinos & mulos conuenit. Itaque quod sèpimento deest, ex proprietate sumendum erit: Hinniendi vim habens.

Cedo exemplum ex Accidenti. Pygmæus est homo perexiguæ staturæ. Hæc Enuntiatio etiam in Nanos & Pumiliones valet. Itaque ex accidenti supplementum quærendum est: Qui in vltimis Indiæ finibus nascitur: vel, Qui dorsis hircorum insidens, cum gruibus belligeratur. Item ex cōtrario: Gigas est homo ingenti corporis magnitudine. Hoc idem Germanis Cæsar tribuit. supplementum ergo ex Accidenti petendum est: præter vsitatam naturæ consuetudinem.

Cedo exemplū ex vtroque. Asinus est animal quadrupes, quod collo & dorso domatur, rudendi vim habens. Hæc definitio etiā in mulos conuenit. Quorum autem eadem definitio est, eadem iudicantur.

Quid igitur si ex accidenti supplementum addatur: Quadrupes ve grandibus auriculis? At hoc ipsum in mulos quoque conueniet. Ad datur igitur illud, Fœcūdum. à communione recessum erit. illa autem quæ à nonnullis traditur: Animal solidis pedibus auritū & fœcundum

dum: si quidem auriti equi non sunt, propria fortasse iudicabitur.

Quomodo ex Causis supplementum quaeritur? Tyrannicida est percussor, qui Tyrannum interfecit: hoc idem in carnificem conuenit, qui traditum sibi Tyrannum interfecerit: aut in eum qui deprehensus ab eo in adulterio ipsum interfecerit. Ergo præter genus & imperfectam differentiam, causa adhibenda est, Qui cōsultò Tyrannum occidit, ut Remp. liberaret.

Quid? In genere asciscendo, ecquanam uti arte debebimus? Illa notionum disciplina ac serie, quam superius demonstrauius: quæ cum naturalem gradationem habeat, satis erit primam asciscere, neque altius à capite, repetere oportebit. Nam (ut Aristoteles in Topicis admonuit) qui proximum genus posuit, is etiam superiora omnia posuisse intelligitur. quādoquidem (inquit) in inferioribus ea quæ supra sunt, intelliguntur. vis autem & natura cuiusque rei cum proximo genere, coniuncta est.

Et in qualitate reperienda quam utemur arte? Sicuti sursum ad Categoriā ascendendo, essentia reperitur, sic vicissim deorsum descendendo reperitur qualitas. veluti, si quis de Muræna quaerat, qualis hæc substantia sit, respondebitur corporata. tum quale est corpus? animatum. quale animal? piscis. qualis piscis? muræna.

Quis est definiendi modus? Cùm ea sumuntur quæ sunt ei rei, quam definire volumus, cùm aliis communia: idque usque eò persequimur, dum proprium efficiatur, quod nullam in aliam rem transferri possit. sic enim Aristotelis præceptum, Latinè Cicero expressit: quod etiam Plato in Theæteto tradiderat. Exemplum autem superius exposuimus.

Quid? Nunquàmne genus prætermitti potest? Tum demùm omitti genus potest, cùm ex definitionis verbis satis intelligitur. Sed ea nō exacta & limata definitio est. veluti, Orator est qui quacunque de re copiosè differit. Subauditur enim, homo. Procurator est, qui aliena negotia mādatu domini administrat: pro, Est administrator negotiorum alienorum.

De Definitione adumbrata, siue minus propria.

C A P. X V.

QUAE est Definitio adumbrata? Quæ non solidam rei naturam ex genere & differentiis, sed extrinsecus notas ipsius quascdā demonstrat: quasi cùm pictores imaginem informāt. Itaque *σκιαγραφω* Plato in Theæteto appellat. alij etiam *τυπων, θεωρησιν, τωγραφω*. Latini autem Descriptionem nominant. Sed Boetius omnes eiusmodi descriptiones aptè Allusiones appellat.

Quænam illæ externæ notæ sunt? Quæ ex aliis affectionibus, quàm ex genere sumptæ sunt

sunt. Nam quæ per translationem & aliis ludicris modis fiunt, vt cùm Adolescentia definitur flos ætatis: Induciæ, feriæ belli: Peccare, trāsire lineas: nos eas Allusiones potius, quàm Definitiones appellamus.

Quæ est Definitio ex formis? In qua species omnes continentur, quæ sub eo genere sunt, quod definitur. velut apud Ciceronem: Iniuria est quæ aut pulsatione corpus, aut conuicio aures, aut aliqua turpitudine vitam alicuius violat. Item, Gloria est illustris ac peruagata multorum & magnorum vel in suos ciues, vel in patriam, vel in omne genus hominum fama meritorum. Item, Ineptus dicitur, qui aut tempus quid postulet, non videt: aut plura loquitur: aut se ostentat, aut eorū quibuscum est vel dignitatis, vel commodi rationem non habet: aut denique in aliquo genere aut inconcinnus, aut multus est. Item, Nothus est, qui vel ex concubina, vel ex meretrice, vel ex virgine, vel ex vidua honestæ existimationis, vel ex adultera, vel ex cognata susceptus est. Item, Sacrilegium est furripere aliquid sacri, aut ex sacro.

Quæ est definitio ex Toto & Partibus? Definitio per Partitionē fit (inquit Cicero) cùm res proposita quasi in membra discerpitur: id est cùm Totius partes enumerātur, ex quibus res definita constat. veluti: Domus est, quæ fundamento, parietibus, contignatione, & tecto constat. Orator est (inquit Cicero) qui quæcun

que res inciderit, quæ sit dictione explicanda, prudenter, & compositè & ornatè & memoriter dicat, cum quadam etiam actionis dignitate. Senator est, qui quibus rebus Reipu. utilitas paretur, augeaturque, tenet, iisque utitur. Dialectica est, quæ ex cuiusque rei & vocabuli affectione diuidendi, definiendi & argumentandi rationem commonstrat. Hic enim genus omissum est. Eodem pertinet definitiones quæ partium enumeratione & remotione fiunt, veluti: Plebs est (inquiunt Iuriconsulti) ceteri ciues sine senatoribus. Argentum factum (inquit Vlpianus) rectè quis ita definierit, quod neque in massa, neque in lamina, neque in signato, neque in suppellectili, neque in mundo, neque in ornamentis sit.

Quæ est definitio ex Causis? In qua pro genere & differentia causa vna pluresve ponuntur. veluti ex Efficiente: Sonus est collisio duorum corporum. Item, Dies est sol super terram, Lex est mens à cupiditatibus libera. Ex materia: Ira est ebullitio sanguinis. Vox est ictus sensibilis qui auditur quantum in ipso est. Dialectica est ars eius sermonis qui in interrogando & respondendo versatur, ut Stoici definiebant. Ex forma: Homo est, quod animo præditum, ratione utitur, Ex fine: Homo est, quod ad colendum in terris Deum, natus est. Domus est tectum, quo & frigor vis pellitur, & calor molestia sedantur Dialectica est ars vera & falsa diiudicandi: ut Zeno definiebat.

Quid

Quid? Definitio ex materia & forma simul nonnè solida & essentialis est: cùm & illæ formæ sine controuersia rei substantiã attingant: & quemadmodum superius ex Aristotele dixisti, definitio quid res sit, & cur res sit, idem sint? Ita vulgò traditur. sed non si Essentia demonstratur, continuò etiam qualitas exponitur: deinde plerunque aut genus aut differentia prætermittitur, aut certè non proximum genus.

Cedo exemplum. Glacies est aqua gelu cōcreta. hæc definitio est ex materia, forma & efficiente, in qua tamen genus non demonstratur: cùm aqua substantia sit, glacies accidens, glacies igitur est cōcretio aquæ congelatæ. sic Homo est corpus animatū. Hęc descriptio materiam quidem & formam demonstrat: sed & remotius genus asciuit, & differentiam prætermisit. Item vt illa Ciceronis in Academicis: Dialectica est oratio ratione conclusa. Et illa Aristotelis: Tonitru est restinctio ignis in nube, cùm paulò pòst plenius ita definiat: Est strepitus oppressi & extincti ignis in nube. Item illa, Nix est aqua congelata & concreta. Cænum terra humore temperata. nam neque cænum terra est (inquit idē) neque nix aqua.

Cedo aliud exemplum. Panis est farina aquæ mixta, & à pistore vescendi causâ cocta. Hęc descriptio & materiam & formam, & efficientem, & finem complectitur. at non genus neque differentiam. Vera enim hæc definitio

est, Panis est cibus ex farina & aqua coctus. Item : Ceruisia est aqua cum hordeo & lupulo decocta: cùm sit potus ex iis rebus confectus.

Cedo item aliud. Eloquentia (inquit Cicero) nihil aliud est, nisi copiosè loquens sapientia. Ex efficiente, materia & forma hæc definitio est. At illa ex genere: Est facultas sapienter & copiosè loquendi.

Quæ est definitio ex Effectis? Quæ ex eventu rem arguit. veluti: Pater est, qui filium procreauit. Rhetorica est, vis persuadendi, & animos auditorum in quam velis partem contorquendi. Homicida est, qui fecit quid sciens, per quod perire homini necesse esset: ait Fabius. Honestum est, ait Cicero, quod per seipsum possit iure laudari. Dialectica est (inquit idem) quæ efficit, ne cui falsò assentiamur, neve vnquam captiosa probabilitate fallamur.

De reliquis generibus definitionum.

C A P. X V I.



DVAE est Definitio ex Proprio? Hæc duplex est, quarum prior ad rem pertinet, altera ad notationem. Ad rem, veluti: Magnes est lapis, qui ferrum ad se allicit. Hæmatites lapis, qui sanguinem sistit. Homo est animal pudoris ac verecundiæ particeps. Adamas est gemma, quæ neque ferro, neque igne, neque vetustate consumitur. nã in his omnibus abest differentia. Atque ex

hoc

hoc genere omnes propè sunt definitiones apud Medicos, arborum, herbarum, & fruticum.

Quænam ex Notatione definitio est? Quæ vocabuli originem exponit per *ἔτυμολογίαν*, quam Cicero veriloquiū appellat: veluti, Seruus est qui seruitutem seruit. Sic enim veteres definebant. Item, Præuaricator est (inquit Cicero) qui in contrariis causis, quasi variè positus esse videtur. quoniam à varicibus nomen deductum est. Item, Philosophia est studium sapientiæ. Afsiduus dicitur ab ære dando, is qui locuples est. Quid est aliud tumultus (inquit Cicero) nisi perturbatio tanta, ut maior timor oriatur? unde etiam nomen ductum est Tumultus. Pratū est (inquit Vlpian.) in quo ad fructum percipiendum, falce duntaxat opus est, quasi paratum.

Cedo exemplum ex Antecedenti. Seruus est qui vel ex hostibus captus, vel pretio emptus est. Lata culpa est, non intelligere id quod omnes intelligunt. Postliminio reuersus dicitur, qui in bello ab hostibus captus fuerat. Bonum est (inquibat Cicero) quod natura est absolutum.

Cedo exemplum ex consequenti. Cicero in Partitionibus hoc exemplum profert: Præuaricator dicitur, qui cū accusator eliet, ab reo corruptus est. nam ea litera de accusatore dari solet iudici: hoc est notæ in tabella A. P. Accusator præuaricatus est. Ex eodem ge-

nere illa definitio est, Hereditas est successio in vniuersum ius defuncti. Prius enim ius est succedendi, quàm ipsa successio. Seruus est, qui si manumittatur, fiet libertinus. Addictus est, qui si libertatem accipiat, erit ingenuus.

Cedo exemplum ex Adiunctis. Pirata (inquit Cicero) non est ex perduellium numero definitus: sed communis hostis omnium. Tyrannus est, cuius manus contra omnes, & contra quem manus omnium.

Cedo exemplum ex Accidenti. Homo est animal bipes, implume, quod erectum ingreditur. Itaque cum hanc Plato definitionem protulisset, postridiè Diogenes, gallum gallinaeum implumem in conuentum attulit. Item illud: Homo est in quo pietas & impietas, probitas & improbitas inesse possunt.

Cedo exemplum ex paribus. Cicero ad Herennium hoc protulit: Modestia est in animo continens moderatio cupiditatum. At alibi: Iustitia est æquitas, ius vnicuique tribuens. Itē alibi: Amare nihil aliud est nisi eum ipsum diligere, quem ames, nulla vtilitate quæsitā. Itē: Par est quod in omnes æquabile est. Item: Par est tranquilla libertas. Atque hæc quidem omnia Ciceronis sunt. Illa autem Iurisconsultorum: Intestatus est non tantum qui testamentum non fecit, sed etiam cuius ex testamento hereditas adita non est. Paria enim sunt testamētum non fecisse, & irritum atque inane fecisse,

Cedo

Cedo exemplum ex Simili. Stulte quid est somnus, gelidæ nisi mortis imago? inquit Ovidius. Magistratus est lex loquens. Lex magistratus mutus. Ira furor brevis est. Tyrānus est, lupus rabiosè ouiculas dilanians. Amicus est alter idem.

Cedo exemplum de Contrariis. Cicero in Partitionibus hoc profert: Quoniam Accusator is dicitur verus, qui ab reo corruptus non est: prævaricator quoque dicatur is accusator, qui ab reo corruptus est. Item, Nothus est, qui iustus filius non est. Concubina est, quæ iusta vxor non est. Virtus est vitium fugere: & Sapientia prima stultitia caruisse. Purus locus est (inquit Vlpianus) qui neque sacer, neque sanctus, neque religiosus est.

Cedo exemplum ex Relatis. Pater est, cui est filius. Dominus est, cui serui subsunt. Imperator, cui exercitus paret.

Cedo exemplum ex Priuantibus. Securitas est vacuitas ægritudinis. Nox est defectio lucis. Voluptas est vacuitas doloris. Quoniā misericordia est (inquit Cicero) ægritudo ex alterius rebus aduersis: sit inuidia ægritudo ex alterius rebus secundis.

Cedo exemplum ex Aientibus & Negantibus. Virtus est quod in vitio non est. Laudabile est, quod vituperari non potest. Cuius est, qui peregrinus non est.

Cedo exemplum ex Repugnantibus. Natus est qui non mortuus editus est: inquit Iuriscō-


sultus. nam vt viuens mortui contrarium est, sic viuentis natus est consequens. Amicus est, qui non malè de quopiam meretur. Hostis est, qui non bene de quopiam meretur. Peregrinus est, cui honorum capiendorum ius nō est nam honores capere, ciuis est consequens.

Cedo exemplum ex disparibus. Virtus est medium vitiorum vtrique reductum : quod in habitu disparium exposuimus. Liberalitas est quæ inter auaritiam & prodigalitatem interiecta est.

Cedo exemplum ex Dissimili. Induciæ sunt (inquit Varro) pax castrensis paucorum dierum. Bellum enim manet, pugna cessat.

De præceptis Definitionis.

C A P. XVII.

 VOT sunt præcepta Definitionis Tria. Vt sit propria, breuis & aperta. Nam (vt Cicero scribit) Definitio est earum rerum quæ sunt eius rei propriæ quam definire volumus, breuis & circumscripta quædam explicatio. ac sæpe commemorandum est axioma illud Aristotelis in hoc genere præstantissimum: neque vnâ duarum rerum, neque vnus rei duas definitiones esse posse. ἔτε γὰρ ἓνα δυοῖν, ἔτε δύο τῷ αὐτῷ ὀρεῖ διωατόν ἐστι. Nam cum vnus rei vna natura sit, quæ definitione explicatur, rectissimè à Gale-
no scriptum est: ἐν ἑνὶ παμπόλλης ὁρισμὸς ποιεῖται

ἐνὸς πράγματος ἐν ταῖς φωναῖς μόνον ἢ ἐν τοῖς νοήμασι διαφέροντας. licet plures vnius rei definitiones conficere vocibus tantum differentes, non notionibus.

Quomodo propria efficitur Definitio? Cum ei soli quod definitur, peculiariter convenit, neque in aliud vllum transferri potest. Quorum enim eadem definitio est, hæc nimirum eadem sunt. Veteres hoc appellarunt Definitum & definitionem inter se conuerti, & reciprocar: cum de quo vnum dicitur, de eodem quoque alterum dici potest. quia neque definitio aliud est, quam definitum: neque definitum, aliud quam definitio. Itaque quod Zeno de Dialectica & Rhetorica dixit, cum illam pugno, hanc palmæ similem esse demonstrabat, idem de definito & definitione statuere possumus. Re namque sunt eadem, sed alterum inuolutum, alterum euolutum est. veluti: Quatuor sunt bis bina: & vicissim, Bis bina sunt quatuor. Quatuor sunt tanquam pugnus: Bis bina sunt tanquam manus diducta & dilatata.

Cedo item aliud. Aemulatio est ægritudo, ex eo quod alter potiatur eo, quod ille ipse concupierit. Hæc Enuntiatio etiam alterius speciei communis est, quæ est Obtrectatio. Itaque non reciprocantur inter se. Non enim quicquid est ægritudo, id continuo est æmulatio. Addendum est igitur, Cum eo ipse careat. Sic Equus est quadrupes, qui dorso & collo domatur. commune mulorum, asinorum, ele-

phantorum & Camelorum. Adde, Et hinnienti vim habet: reciprocabitur. quia quicquid erit quadrupes eiusmodi, erit equus. & vicissim quicquid erit equus, erit huiusmodi quadrupes. Sic illa definitio, Diuination est earum rerum prædictio & præsentio quæ sunt fortuitæ: reprehenditur apud Ciceronem lib. de Diuin. I. quia & medici & imperatoris & gubernatoris est præsentio rerum fortuitarum. Sic definitio illa generis ex schola Stoicorum à Laertio tradita, Genus est plurium notionum collectio: minus plena videtur. Deest enim Communium, aut Cognatarum: vt superius in Generis definitione diximus.

Quomodo brevis efficitur definitio? Cùm ita pressa & angusta est, vt nullum in ea verbū otiosum, aut redundans appareat. Stulta est tamen breuitatis affectatio (vt Aristoteles in Rhetoricis monuit) nisi quantū satis est adhibeatur. nam & breuitas est (ait Cicero) cū tantum verborum est, quantum necesse est. Id autem fiet si & è proximo finitimum genus petatur (nam proximo sumpto, inquit Aristoteles, satis constat, superiora antecedere) & vbi satis processum erit, ibi consistatur, neque ulterius prodeatur.

Cedo exemplum ex Genere. Vt si Equus non definiatur, corpus animatum, sed animal. Iustitia non habitus animi, sed virtus.

Cedo exemplum ex Productione. Homo est animal rationis particeps, natum ad disciplinam.

plinam. Nam hoc Proprio sublato, plena erit definitio, reique naturam omnem complectetur. Equus est (inquit Quintilianus) animal, mortale, irrationale, hinnies. Nam Quadrupes quæ dorso & collo domatur, erat prescius. Sic idem ita Dialecticam definit: Est rei propositæ propria, dilucida, & breuiter comprehensa verbis Enuntiatio. Nam cum Enuntiatio nihil aliud sit, quam verborum comprehensio, duo illa verba superuacanea sunt. Sic Equus est (inquit idem) animal mortale, irrationale, hinniens: nam & altius genus repetitum est, & quadrupedum prætermissa differentia.

Quomodo aperta efficitur Definitio? Cû inuoluta rei notio sic euoluitur, vt nihil non apertum atque explicatum remaneat. Nam cum definitio cognoscendæ rei causâ tradatur, vt ad breuitatem nihil redundare oportet, sic ad perspicuitatem nihil deesse. Itaque dilucida & illustris definitio tum efficitur, cum definitio & definitum pariter inter se respondent, & alterum alteri sic adequatur, vt paria in vtranque partem momenta sint. Vitium autem admittitur, cum aut obscura interpretatio ponitur, aut minus quam necesse est, adhibetur. quod tum fit, cum pro totius definitione partis definitio ponitur.

Cedo exemplum obscuritatis in definiendo vitandæ. Sumatur illud Pacuij, apud quem cum quæsitum esset, quid esset Testudo, respon-

detur, Quadrupes, tardigrada, agrestis, humilis, aspera, capite breui, ceruice anguina, aspectu truci, Eviscerata, inanima, cum animali sono. vel illud : Quid est Cochlea? est bestia terrigena, herbigrada, domi porta, & sanguine cassa.

Cedo exemplum Partis pro Toto definitæ. Aristoteles hoc profert : Grammatica est ars bene scribendi: addendū est enim (inquit ille) & legendi. Ex hoc genere illa vulgata est Dialectica est ars bene differēdi, & vera ac falsa diiudicādi. Sic enim Cicero de Oratore II. definit. At hæc definitio eius est solius partis propria, quæ ad componendam argumenti conclusionem pertinet, idest ad iudicium & dispositionē: quod Cicero libro de Fini. I. III. his ostendit verbis: Cūque duæ sint artes, quibus perfectè ratio & oratio compleatur, vna inueniendi, altera differendi, &c. Differendi autem verbum Stoicorum Dialecticæ proprium fuisse videtur: qui (vt posterius intelliges) longa verborum serie & cōtinuatione argumentationes suas texebant ac retexebant quam formam Soritem, id est aceruum appellabant. quanquam rectè differendi artem Cicero dixisse Latinè videtur, pro eo quod Græci dicere solebāt τὴν ὁρμητικὴν ὁρμῆς διαλέγεσθαι. Sed rursus idem in Topicis Artem diligenter differendi generatim ad vtrāque Argumentationis partem retulit. Cū omnis ratio diligens differendi (inquit) duas habeat partes: vnam

nam inueniendi, alteram iudicandi.

Cedo aliud exemplū. Aemulatio est ægritudo ex eo quod alter potiatur eo quod ille ipse concupierit: Nam hæc in obtrectationē cōuenit definitio. Itaque nondum satis explicatum est quod erat inuolutum. Addendum igitur, Cū ipso careat. Sacrilegium est surripere aliquid sacri. Nondum satis explicatum est. deest enim, Aut ex sacro. Ex eodem genere illa Ciceronis in Partitionibus: Argumentum est probabile inuentum ad faciendam fidem. Nam in lib. de Inuēt. II. plenius definierat, inuentum aliquam in rem probabile, aut necessarium.

De materia Dialectica. CAP. XVIII.

MULTA S verò & varias definitionum formas exposuisti: sed tamen ad certum affectuum numerum accommodatas. Quid deinceps sequitur? Superest ut de Argumentatione disseramus. Sed antequàm longius abeamus, monendus mihi videris, vitandam eorum esse opinionem, qui scripserunt definitionem & diuisionem esse opus Physici, & eius scientiæ proprium, quæ prima rerum principia tradit. à quo definiendi & diuidendi artem Dialectica mutuatur. Quasi verò Theologi aut Iurisconsulti artis suæ diuisiones ac definitiones ex Physicorum disciplinis hauriant. Intelligendum est igitur, Dia-

lecticam non aut materiam vllam esse, aut certum aliquod habere ac definitum genus, in quo solo versetur, atque occupata sit: sed instrumentum esse, quo artium omnium materia ordine ac ratione certa tractentur. qua de causa *ἑρμῆων* à Græcis appellatur. quoniam neque Theologi, neque Physici, neque Medici, neque Iurisperiti, neque aliarum artium professores suas disciplinas sine illius adiumento tractare possunt. Quod ex Grammaticæ artis similitudine intelliges. Nam vt illa nullam sibi propriam habet subiectam materiam, sed ceteris disciplinis omnibus orationem atque aptam verborum consecutionem suppeditat, sine qua mutæ omnino essent: ita Dialectica non in vna aliqua re versatur, sed artibus reliquis omnibus instrumenta suppeditat: quibus vel confusa diuidere, vel infinita definire, vel ambigua diiudicare possint.


Teneo ista: viderisque eandem fere materiae infinitatem Dialecticæ tribuere, quam L. Crassus Rhetoricæ tribuit apud Ciceronem in lib. de Orat. i. vbi disputat Oratoris opus se omni de re, quæcūque sit proposita, ornate copiosèque dicere. vt siue Physicus de natura, siue Architectus de ædificando, siue Medicus de curandis morbis, siue Astrologus de syderibus, siue Iurisperitus de ciuili iure disputet, si modò id ornate copiosèque faciat, verborum quidem proprietatem à Grammatica, ornatum verò & splendorem orationis à Rhetorica

Rhetorica mutuentur. Atque ut de nostra hac
dicamus, ordinem ac certam ratio-
nem à Dialectica rectè accipies:
quare licet iam ad cetera
quæ consequuntur,
pergamus.

FINIS II. LIBRI.

N 3





INSTITVTIONIS

DIALECTICAE

LIB. III.

De argumento, & Argumentatione.

CAP. I.



Vid est Argumentatio? Regula qua vera & falsa diiudicatur. Est enim ratio qua vtrum vera an falsa enuntiatio sit, id est vtrum attributum in enuntiatione subiecto cōueniat, an non conueniat, ostenditur: quasi cūm adhibita lydia coticula aurum ab ære, probus numus ab adulterino discernitur.

Quotuplex est Argumentatio? Prima & summa diuisio est huiusmodi: Argumentatio altera est simplex, quæ vna ratiocinatiua enuntiatione constat. Ratiocinatiuam appello, quæ implicatam in se rationē complectitur. veluti: Quia spiritum ducit, viuit. Si lac habet, peperit. altera composita, quæ ex pluribus Enuntiatiseuidentem rationem demonstrantibus coniuncta est. veluti: Qui spiritū ducit, viuit. Hic spiritum ducit. viuit igitur. Sic enim Cicero libro de Inuentione primo scribit. Argumentatio

mentatio nomine vno duas res significat: ideo quod & inuentum aliquam in rem probabile aut necessarium, Argumentatio vocatur. & eius inuenti artificiosa expolitio. quando igitur proferent aliquid huiusmodi: Quoniam peperit, cum viro concubuit: inuentum proferent, non expolitionem. Et aliquantò post, Simplex autem conclusio reprehenditur, si id quod sequitur, non videatur necessariò cum eo quod antecessit, cohærere. nam hoc quidē, Si spiritum ducit, viuit: Si dies est, lucet: eiusmodi est, vt cum priore necessariò posterius cohærere videatur, &c. Sic Antonius lib. de Orat. 11. Nam & omne quod eloquimur, sic, vt aut esse dicamus, id, aut non esse: & si simpliciter dictum sit, suscipiūt Dialectici, vt iudicēt, verūne sit an falsum. &, si coniunctè sit elatum, & adiuncta sint alia, iudicent rectēne adiuncta sint, & verāne sit summa vniuscuiusque rationis. Sed distinguendi & vitandæ ambiguitatis causa placuit illam priorem Argumentum, hanc Argumentationem appellari.

Quomodo? Quoniam idem in Topicis & Partitionibus scribit: Argumentum esse probabile inuentum ad faciendam fidem: vel rationem, quæ rei dubiæ facit fidem. Argumentationem autem esse argumēti expositionem, tractationem, cōclusionem, expolitionem. Aristoteles ἀπόδειξις, hoc est demonstrationem, appellat: opinor, quia supressam & inuolutā: in argumento rationem demonstrat, patefa-

cit, & in lucem profert, vt euidenter eluceat. Itaque quoties aliqua earum particularū quibus ratio exponitur, in oratione sumitur: veluti, Quia, quoniam, cū, quando, quādoquidem: toties argumentum vsurpatum intelligitur. item, cū particula Si, apponitur. nam in veris Enuntiationibus, Si pro Quia (vt in proverbio est) positum intelligitur.

Velim hæc aliquanto planius adhibita definitione & certa aliqua regula exponas. Esto igitur argumentum omnis enuntiatio, quæ rationis vnius firmamento nititur. Argumentatio verò enuntiatio duplex: quæ non modò ratione, sed etiam rationis ratione constat. meministi enim illud Ciceronis: Cuius rationis ratio reddi non potest, ei rationi ratio non est fidem habere. Vnius autem rationis in vnica & simplici enuntiatione quinque notæ sunt: Quia, Cū, Si, Aut nō Aut, Non & Non. veluti: Quia Callicles homo est, necessariò animal est. Hac autem nota omnes eiusdē generis rationales particule comprehenduntur. veluti, Quando, quandoquidem, quoniam & similes. Item, Cū Callicles sit homo, necesse est esse animal. Si Callicles est homo, necessariò animal est. Aut Callicles homo non est, aut certè est animal. Non & Callicles homo est, & animal non est.

Cedo exemplum Argumentationis. Quia Callicles homo est, necessariò animal est. quicquid enim homo est, necessariò animal est. Si
Calli-

Callicles ratione utitur, animal est. quicquid enim ratione utitur, idē est homo. Cicero autem Argumentationem ita definit, Rationem quæ ex rebus perceptis id quod nō percipiebatur adducit. Multis autem locis conclusionis componendæ rationem appellat: vel orationem ratione cōclusam: vel necessariam aut probabilem consecutionem.

Quæ est secunda diuīsiō Argumentationis? Hæc, Aristotelis sententia, quadruplex est. διδασκαλική, quæ ad docendū & demonstrandum accommodata est, & constat ex propriis cuiusque discipline principiis. δυαλεκτική, quæ vtranque contradictionis partem ex probabilibus concludit. πειραστική, quæ ad alterum tētandū instituta est, & ex iis quæ aduersario probantur concludit. & ἐριστική, id est cōtentiosa, quæ ex iis quæ probabilia vidētur, nec sunt, concludit: quæ tota Sophistarum & impostorum propria est. Trium autem superiorū eadem propemodum ars atque disciplina est, quæ in Dialectica traditur. quare de Dialectica & Sophistica tantū differemus.

De Materia, Fine & partibus Argumentationis.

CAP. II.

QUOTVPLEX est Argumētatio Dialectica? Duplex. Altera necessaria, quæ id quod vult efficit necessariò: altera probabilis, quæ nihil necessariò,

sed probabiliter tantum concludit. Sed quæ necessaria est, ea vel Ratiocinatio est, quæ à Græcis συλλόγισμος appellatur: vel inductio, quæ ab iisdē ἐπαγωγή. quæ verò nihil necessariò concludit, totaque est (meo quidem iudicio) Rhetorica, ea vel exemplo, vel sententia constat: quorum illud à Græcis παράδειγμα, hoc ἐνθύμημα nominatur.

Quæ est materia Argumentationis? Quadruplex. illud quæstionis genus de quo superius commemorauimus an sit, quid sit, quale sit, & quæ eius causa sit. Iam verò (eodem auctore Aristotele) quicquid in disputationem cadit, in eo vel generis, vel definitionis, vel proprii, vel accidentis quæstio versatur. Speciei apud Dialecticos quæstio nulla est, quia Species de indiuiduis dicitur, quorum iccirco nulla scientia est, quia (vt superius diximus) infinita fluxa & caduca sunt. Differentia autē, quia generis naturā imitatur, ad generis quæstionem accommodanda est. Ergo si quæstio est, An sit, aut an ita sit, generis ac differentię quæstio est: ac prior ad resolutionem, id est, Analysis, posterior ad diuisionem pertinet: si quid sit, definitionis: si cur ita sit, proprii. Accidentis autem quæstiones ad res externas & fortuitas pertinet, quæ & accidere & decedere possunt, vt suo loco dictum est.

Quamobrem quatuor tantum quæstionum genera constituuntur? quia quicquid de alio quæritur, id est quæritur an alteri conueniat,
id

id vel superius est, ac magis vniuersum eo de quo quæritur: vel certè par eidem. dici enim superius de inferiore non potest. Si superius atque amplius est, generis quæstio est, cùm de rei natura ambigitur: si minus, accidentis. si par est, tunc vel proprii est, vel definitionis. Nam si conuenire rei nulli alteri potest, vel definitio est, vel proprium: si potest, vel genus est, vel accidens.

Quæ est altera quæstionum diuisio? Vt alia sit infinita, quæ generatim aliquid sine vlla circūstantia interrogat. veluti: An Dialectica sit utilis: An eloquentia sit expetenda: alia finita, quæ de negotio certa aliqua circūstantia definito proponitur. veluti, An Dialectica historico sit utilis. An Bellū hyeme sit gerendum, & in Britannia.

Quis est finis Argumentationis? Quæstionis explicatio. instrumentum autem explicandæ quæstionis est (vt sæpe iam dixi) ratio cur attributum subiecto cōuenire vel affirmetur, vel negetur. Hæc enim ratio duo quæstionis extrema necessariò inter se vel connectit, vel disparat. Itaque quoniam ad vtriusque vel conuenientiam vel discrepantiam diiudicandam, quasi Arbitrarius honorarius adhibetur, Medium appellatur. vt Argumentatio vera ea sit, quæ ea de quibus ambigitur, vtrum inter se conueniant an dissideant, necessariò vel conuenire vel dissidere ostendit ex eo, quod illa in tertio aliquo, vel conueniunt, vel dissi-

sunt, illustrantur. qua de causâ passim argumētatio definitur ratio, quæ ex perspicuis dubia illustrat.

Ecquænam igitur de Medio axiomata & summæ leges ac regulæ tradi possunt? Nos ad illius Mathematici axiomatis normâ has quatuor direximus. I. Cui conuenit mediû, eidem, quod medio cohæret, necessariò conuenit. II. Quod medio cohæret, ei cui mediû cõuenit, necessariò cõuenit. III. Quod medio non conuenit, ei cui medium conuenit, non conueniet. IIII. Cui medium non conuenit, ei quod medio conuenit, non conueniet.

Cedo istarum regularum familiare aliquod exemplum. Esto hoc familiarissimum, ac penè puerile: sed tamen aptissimum. Ponantur in tabula gemini annuli inter se conferti & catenati. proximè alterutrum, magnes. nunquid verum erit, quod modò dicebamus: Cui magneti is annulus qui iam medius est cõueniet, eidem is qui illi cohæret necessariò cõueniet. Simillima est argumētationis ratio. ponatur enim quæstio an Callicles sit animal. Tû quia Callicles est subiectum, animal attributum: Callicles in imo, animal in summo scribatur. Medium interponatur, Homo. Tum ratio ita ineatur: Si Medium, quod homo est, Callicli cõuenit, etiam id quod medio cohæret, nimirum animal, conueniet.

Cedo aliud exemplum. Retineatur eadem

& quæstio, & verborum trium collocatio directa. malè nanque alij duos terminos in plano collocāt, vt medium inter eos interponāt. Nam subiectum à Græcis dicitur *ὑποκείμενον*, non autem *ἀντικείμενον*. Scribātur ergo, Callicles, homo, animal. nōne tria hæc eādē inter se rationem habent, quam habēt illi numeri 1. 2. 3? sunt enim indiuiduum, species & genus. Quod igitur notio communis valet in illis numeris, vt in maiore summa minor infit, & pars in toto: idem quoque in illa valeat. vt si vnum est in duobus, duo in tribus, necessariò vnum erit in tribus. eodem modo, si Callicles in homine, homo in animali sit, Calliclem quoque in animali esse concludatur. Atque hoc nimirum est quod superiùs diximus, quæcunque de aliquo dicuntur, ea vel superiora esse, vel paria.

Cedo exemplum de Pari. Ponatur quæstio, An Pygmæus sit homo. Medium interponatur hominis proprium, vt Rationis particeps. Tū ratio ita ineatur: Si Pygmæus rationis est particeps, quicquid autem rationis est particeps, idem est homo, certè Pygmæus homo est. Cui enim proprium conuenit, ei etiam illud cuius id erat proprium, necessariò conuenit.

De Acervali Stoicorum Conclusionē.

CAP. II II.

Q V I D



QUID igitur si longior illa verborum catena sit, hoc est longa verborum series & continuatio, quasi catena ex multis annulis inter se cōfertis & contextis? Eadem omnino ratio futura est. Ac nimirum illa ipsa est Stoicorum propria differendi ratio consecutaria, de qua pleni sunt Philosophici Ciceronis libri: quam illi propterea Soritem (vt posteriùs dicemus) id est quasi verborum consequentium acervum ac struem appellabant. Synthesim quoque nominare possumus. Cicero quidem Consecutarium appellat. quod etsi Aristoteles secutus non est, eius tamen hanc magneti & catenæ nostræ regulam cōsentaneam initio artis suæ Logicæ tradidit: Quoties alterum de altero vt de subiecto dicitur, quæcunque de prædicato dicuntur, ea omnia de subiecto quoque dicuntur. ac paulò pòst breuius: ὅσα κτ' τῆ κατηγορουμένου λέγεται, ὅσα τὰ ἐπὶ τῆ υποκειμένου ῥηθῆσονται.

Cedo aliquod longæ istius catenæ ac synthesis exemplum. Sumatur illa Ciceronis ex Tusc. 5. Omne bonum lætabile est: quod lætabile, id prædicandum: quod prædicandum, id gloriosum: quod gloriosum, id laudabile: quod laudabile, id honestum: Ergo quod bonum, honestum. Nam ista ratiocinatione firmamentum illud nostrum comprobatur: Cui magneti annulus vnus cohæret, ei etiam omnes alij qui vnà cum illo conferti sunt, cohærebunt: id est, Cui medium conuenit, eidem omnia

quæ medio cohærent, siue genus, siue species, siue totum, siue pars, siue proprium, siue aliud affectus aliquis consentaneus conueniet.

Quidnam igitur inter Aristotelicâ & Stoicam argumentandi formam interfuit? Hoc nimirum, quod Stoici in disputando, synthefin: Peripatetici verò, analyfin obseruarunt. Nam Stoici semper ab imo incipiētes, quam quasi ædificationis totius basim constituebāt, quasi gradibus sursum versus progrediebantur. vnde illud Ciceronis: Iam argumenti ratione conclusi caput esse faciūt ea, quæ perspicua dicunt. deinde ordinem sequuntur: tū quod verum sit in singulis: extrema conclusio est. Aristoteles verò maiorem Medij rationē ducebat, & semper ab eo in quo momentum omne positum est, initium faciebat.

Cedo exemplum. Sumatur ex Cicerone, cuius animaduerto longè plures plurēque Stoicas esse argumētationes, quàm Aristotelicas. Is igitur lib. de Fin. iii. ita cōcludit: Quod est bonū, omne laudabile est. quod autem laudabile est, omne honestum est. bonum igitur quod est, honestum est. hæc vera est Synthefis, ab imo, & tanquam basi ad summum fastigiū progrediens. At illa propriè Analysis, cuius à medio tanquam momento, initium nascitur: Quod est laudabile, est honestum. Quod bonum, est laudabile. Ergo quod bonum est, honestum est. Sed de Medij collocatione plus satis. Posterius enim proprius nobis constitu-

tus est de ea differendi locus. Tantum harum progressionum figuram hinc describemus, ut earum imaginem animo conceptam memoria tenere possis.

Stoica synthesis: quæ est progressio ab imo:

$\left. \begin{array}{l} \text{Honestum} \quad 4 \\ \text{2 Laudabile} \quad 3 \\ \text{1 Bonum} \end{array} \right\}$

Item:

$\left. \begin{array}{l} \text{Animal} \quad 4 \\ \text{2 Homo} \quad 3 \\ \text{1 Callicles} \end{array} \right\}$

Aristotelica Analysis à summo progressiens.

$\left. \begin{array}{l} \text{2 Honestum} \\ \text{1 Laudabile} \quad 4 \\ \text{Bonum} \quad 3 \end{array} \right\}$

$\left. \begin{array}{l} \text{2 Animal} \\ \text{1 Homo} \quad 4 \\ \text{Callicles} \quad 3 \end{array} \right\}$

In quibus argumentationibus Medium adhibetur.

C A P. V.

QUID? Medium in omnibusne questionibus & argumentationibus adhibetur? Nequaquam. sed in iis demum questionibus, quæ mente & ratione explicantur: non iis quæ sensibus diiudicantur. Medium enim (ut modò dixi) nihil aliud est, quàm rationis & notionis quæ in hominis mente insita, & mente percepta est, expositio. Itaque Mediū natura prius & notius est eo, quod in questione ponitur. At questio-

nes quæ sensibus iudicantur, nullam in mente notionem, & quasi regulam ante perceptam habent. Quarum autem rerû positum in sensibus iudiciû est, ad eas argumētatio non adhibetur: sed ex posterioribus omnes iudicātur.

Cedo exemplum. Sumatur aliquod facillimum, & penè puerile. Esto posita quæstio: An ubicunque est arbor, ibi sit radix. Medium est in hac quæstione regula, quæ animi notione comprehenditur: Toto concessio partes conceduntur. Si est arbor, etiam radix subest. Item, Posito proprio etiam id cuius propriû est, poni intelligitur. Si sermo hic auditur, necessariò hîc sunt homines. Si lapis iste ferrum allicit, necessariò est magnes.

Cedo exemplum de quæstione sine Medio. Ponatur quæstio, An imperiû aliquod sit sempiternum. Assyriorum imperiû concidit. Persarû imperium concidit. Medorû item. Græcorum item. Romanorû item. Nullum igitur imperium est sempiternû. Sic Religionē Christianam extinguerē non potuerūt superstitiones commentitiæ: non yllæ Imperatorû & Regum opes: non Philosophorû doctissimorum disputationes & argutiæ: non tyrānorum seque crudelitas. nullę igitur humanæ vires deleare Religionem Christianam potuerunt.

Quænam argumentationes Medio adhibito tractantur? Syllogismus & Enthymema. Sorites verò, inductio & exemplû medio non concluduntur.

De locis siue sedibus Medij Dialectici.

CAP. VI.

MIRAM profectò Medij istius vim prædicas. Sed vnde tandē, cū vsus venerit, eius sumendi nobis facultas erit? Ex iisdem Affectuū thesauris, ex quibus diuisionis & enuntiationis materiam sumpsimus. Iis enim adhibitis intelligitur, quemadmodum quæstionis cuiusque subiectum & attributum inter se affecta sint: & conueniantne inter se, an dissideāt. nam quæcunque & quacunque de re poni quæstio potest, eam necesse est per Regulas ex illis locis sumptas diiudicari. & quæcunque & quacunque de re concipi Enuntiatio potest, eam necesse est per illas Regulas vel confirmari vel refutari. Atque ob eam causam τόποι, siue loci, à Dialecticis appellantur, quasi sedes, ex quibus omnium quæstionū argumenta promuntur. Quæ eadem de causâ Argumentorum fontes à Cicerone appellantur: adeo vt vna eademque enuntiatio per illos duos & viginti locos vel confirmari vel infirmari possit.

Quæ est diuisio locorum? Aristotelis partitio illa est (inquit Quintilianus) vt alij sint insiti in eo, de quo ambigitur, qui artificiales sunt: nimirum habitus illi, de quibus differendum est: alij assumpti, qui extrinsecus, & non ex arte depromuntur. veluti, Tabulæ, testimo-

nia, pacta, conuenta, quæstiones, leges, senatus consulta. Sed hæc nihil ad Dialecticam. Sensibus enim iudicantur, qui rationis sunt expertes. Itaque diuisionem hanc nusquam in logicis libris tradidit Aristoteles, sed in Rhetoricis dūtaxat: vnde, si vsus venerit, deprometur.

Quot in partes tota hæc de Argumentatione doctrina distribuitur? Duas: in artem inueniendi & concludendi: quarum illā Græci *ἑπικλῶ*, vel *ὠρετικλῶ*: hæc *κρητικλῶ*, vel *ἀναλυτικλῶ* appellant. Earum autē qui auctores fuerint, Cicero in Topicis, sed præcipuè in lib. de Finib. 4. demonstrat: Cūque duæ sint artes (inquit) quibus perfectè ratio & oratio compleatur, vna inueniendi, altera differēdi: hanc posteriorem & Stoici & Peripatetici: priorem autem illi egregiè tradiderunt: hi omninò ne attigerunt quidem. Nam è quibus locis quasi thesauris argumēta depromerentur, vestri ne suspicati quidem sunt: superiores autem artificio & via tradiderunt. Sic Antonius lib. de Orat. I I. In hac (inquit) Stoici Diogenis arte Dialectica nullum est præceptum, quomodo verum inueniatur, sed tantum est quomodo iudicetur. Hic nos igitur Stoicus iste nihil adiuuat: quoniam quemadmodum inueniam quid dicam, non docet. Quare istam artem totam dimittamus, quæ in excogitandis argumentis muta nimium est: in iudicandis, nimium loquax. Critolaum puto plus huic studio prodesse. Erat enim ab Aristotele. ac paulò
antè

antè eodem libro Catulus locorum inuentionem Aristoteli apertissimè tribuit.

Quid est ars Inueniendi? Quæ quid quisque affectus ad disputandum valeat, aut non valeat, ostendit. Non enim satis est locos affectuum digito monstrasse, nisi quæ cuiusque vis & facultas sit, quam in partem valeat, & qualis eorum sit vsus, demonstretur. vt medico non satis est magnam aliquam bonorum simplicium (vt vulgò loquuntur) copiam indicasse, nisi quæ cuiusque vis & proprietas sit, & quemadmodum iis vti conueniat, demōstret.

Quid est ars Iudicandi? Quæ quemadmodū quæque affectio in argumētatione accommodanda sit, declarat.

Quænam igitur Medij inueniendi ars est? Notatio proprietatis cuiusque loci atque argumenti, quæ longo vsu & exercitatione percepta certis regulis comprehensa est. vt cum ex obseruatione proprietatis cuiusque stirpis longa experiētia notatæ & perceptæ, certæ regulæ colliguntur, quæ literis mandatæ facilem ad cōdiscendū viam præbent. Nam quæ multis eiusdem generis morbis profuisse stirps animaduersa est, eam omnibus consimilibus profuturam inducitur.

De Firmamentis, quæ vulgò Maxima appellantur.

CAP. VII.

O 3



QUID Simile in locis Dialecticis? Ex multis eiusdem generis, id est eodem ex loco ductis argumentis animaduversum est, vim & proprietatem eo loco quandā inesse, quæ certis regulis, & quasi legibus comprehensæ sunt. has nonnulli Maximas propositiones, alij Elementa, quidam Locos communes appellarūt. nos vitæ ambiguitatis causâ Firmamēta nominare voluimus, quòd iis solis quasi fundamentis argumentatio sustineatur, quæ iis subductis corrueret. qua de causâ Cicero in libris Oratoriis eam rationem qua sola causâ nititur, & sine qua stare non potest, passim eodem Firmamēti nomine appellauit.

Cedo aliquod exemplum. Superiùs dictū est, ex innumerabilibus indiuiduis quæ sensu percipiuntur, generis notionem animo concipi: quam *ιδέα* Græci appellant: vt cum ex multis natantibus animalibus generalis piscis notio concipitur. Eadem harum notionum, & regularum generalium ratio est. Nam si quis totius puta gregis aut armenti dominus est, eum singulorum quoque capitum esse dominum: & qui naues totam conduxit, eum nauis malum, & transtra & remos, & gubernaculum conduxisse: & cui totus fundus est venditus, ei arbores quoque esse venditas. cui totius frumenti aceruus donatus est, eidem singulos modios esse donatos. Ex infinitis eiusdem modi particularibus, singularibus, indiuiduis,

duis, tãdem similitum inductione (quæ species quædam argumentationis est) generalis hæc regula concepta est : Quod toti conuenit, id parti cuique conuenit. Cuique totum conuenit, ei pars quęque conuenit. Itaque cū quęreretur, An ei cūi domus oppignerata esset, incensa domo, penitusque sublata superficie, area tamē oppignerata maneret: eo firmamento adhibito respondebitur, manere. Eius autem notionis (vt ita dicam) igniculus in hominis mente propemodum sopitus hoc præceptorum genere acceditur, vt ad Dialecticæ artis vsum luceat: nimirum vt cur quidque hoc vel illo modo concludatur, intelligatur. Continet enim, (vt Aristoteles loquitur) τὸ διότι.

Suntne certa & rata hæc firmamēta omnia? Non tam profectò quàm cōmunes notiones, aut Mathematicorum theoremata, siue præcepta. Sed tamen non iccirco prætermittenda sunt. non enim regulæ vllæ tã vniuersales sunt, quin exceptione aliqua vitientur: vt Iurisconsulti longo vsu periti tradiderunt. sed vt Anaxagoras dicere solebat nomina rebus imponi, non vt vsquequaque, sed vt maxima ex parte valeant: sic Regulæ non omni ex parte, sed ex maiore & potiore æstimādæ sunt. Itaque haud scio maiórne sit eorū amētia, qui regulas illas propterea omittēdas censent, an impudētia, qui scribere ausi sunt, nullam earum ab Aristotele mentionem esse factam: cuius in Topicis tam sæpe inculcatæ & decantatę sunt. vt faciliè

appareat, damnatum ab iis Aristotelem, qui eius libros nunquam aspexerant.

Quotuplex singulorum locorum firmamentum est? Omnium ferè locorum triplex est. primum est essentia, quam οὐσίαν Græci dicunt, qua respōdetur ad quæstionem an sit. sic enim esse in rerum natura, quod quæritur, ex alterius comparatione confirmatur. binorū quippe inter se collatio vtriusque essentiam ostendit. Alterum est conuenientia, quam Græci ἀναλογίαν, Latini proportionem nomināt: qua respondetur vel ad quæstionem, quale sit: vel quæ eius causa sit. Tertium est reciprocationis, quam iidem ἀντιστροφὴ dicunt. Primum in binis tantum affectionibus versatur, alterum in ternis aut quaternis: tertium in vtrisque.

De quadruplici locorum quæstione.

C A P. VIII.

V I D E O ista: sed quæro nōne quæstio an sit, potius ad Physicos, & naturæ indagatores, quàm ad Dialecticos pertinet, qui solam verborū consecutionem inquirunt? Dialectici non nudam verborum consecutionem exquirunt: sed consecutionem rerum & verborum in eloquendo. Itaque quicquid tota philosophia quæri & dubitari potest, quicquid denique vllō in genere cadere in disquisitionem potest, id omne

à Dialecticæ artis instrumento diiudicatur. quod vel ex eo licet intelligi, quia quicquid vlllo in genere demonstratur, id Medio demonstratur: neque vlla alia est certa probandi ratio. Medium autē solius artis Dialecticæ proprium instrumentum est: quo si qua alia ars vti volet, id ab illa mutuetur, oportet.

Cedo aliquod exemplum de quæstione An sit. Ponatur quæstio inter Philosophos peruulgata, An sit Deus. Tum si quis hoc concludat modo: Quia hæc rerum vniuersitas, hic astorum cursus, cœli temperatio, terrarum fecunditas, hæc rerum vicissitudo, tot iam seculorū ætatibus rata permanet: apparet esse Deū, qui hæc regat & gubernet: an non perspicuum est, medium ex loco ab Effectis sumptum esse, vt causā tanta ista opera efficiens arguatur. non secus atque illud argumentum, quod ex fulminibus, tempestatibus, vastitate, & pestilentia, bellis aut externis aut ciuilibus, & manifestis irati Dei effectis depromitur. Rursus cū Plinius ex eo arguat esse hippocentauros, quia in principatu Claudij Cæsaris vnum vidit in melle ex Aegypto allatum: nunquid perspicuè medium demonstrationis sumit ex similibus. nam si vnus allatus est, alij erant consimiles. quemadmodum nostris temporibus cū ex orbis noui regionibus Reges adducti sunt, ex Relatis concludebamus, quia Reges sunt, ciues etiam eorum ditioni, atque imperio subiectos fuisse. Sic cū Augustinus disputat fuisse

se Gigantes, ex eo quòd dentem vidit quatuordecim librarum pòdere: nònne & ex partibus pròportione ad totum, & ex similium comparatione concludit?

Sed cùm omnis Dialectica quæstio posita in eo sit, vt intelligatur an attributũ subiecto in oratione conueniat, quidnã hîc vel subiectũ vel attributum est? Natura rerum Subiectũ est, id quod esse vel dicitur, vel negatur attributum. Itaque ad eam quæstionem Cicero lib. de Orat. 3. exemplum hoc accommodat: Sítne in humano genere sapientia: id est conueniátne humano generi. Similiter cùm quæritur, An sint Centauri, aut Blemia, aut Pygmæi: vi ipsa quæri videtur, Conueniátne istud naturæ rerum, an non.

Cedo exemplum de quæstione quid sit. Dictum est superius, definitionem nõ mòdo demonstrationis ministram esse, atque ad eius perspicuitatem adhiberi: verùm etiam à demonstratione probari ac iudicari. Definitionis autem medium est vel genus & differètia, in plerisque: vel, in nonnullis caussa, quoniã nosse quid sit, & quæ caussa sit (vt ex Aristotele superius dictum est) idem omnino est. Sic igitur cùm dicimus Rhetoricam esse artẽ copiosè loquendi, attributum subiecto nomini ex medij conuenientia concludimus, quia genus & species aptissimè conueniunt. Sic Tonitru est strepitus ignis in nube restincti, quia caussa effectui respondet,

Cedo

Cedo exemplū de quæstione quale sit? Veluti, si quærat^{ur} an hic lapis sit Magnes, adhibito minuto ferro argumentatio ab effectis sumetur. itémque in lapide Aëthite, qui κλεπ-τέλεγχος dicitur, si furem deprehendat. & remora si nauem remoretur: ceterisq^{ue} generis eiusdem innumerabilibus.

Cedo exemplum de quæstione, Cur ita sit? Huius tot sunt exempla quot posterius in loco ex effectis enumerabimus. veluti, Cur sit tonitru? Quia ignis in nube oppressus extinguitur,

De Proportionē. CAP. IX.



QUOD est Proportio? Superiùs dictum est, primum opus Dialecticæ esse notationem λόγου, & rationis, quam bina quæque generis eiusdē habent inter se: qua de causā separatim dicuntur analogā. vt quatuor & quatuor pares sunt numeri. quatuor & duo sunt impares. duo cubiti pares: cubitus & pes, impares. At plurium pro cuiusque portione comparatio, analogia dicitur: & à Latinis proportio: quæ (vt ait Varro) in omnibus eiusdem generis rebus locum habet: & ab Euclide definitur rationum similitudo. Magnitudines autē eandem habentes rationem, proportionales. hāc vulgò in scholis Proportionalitatē appellant. Eius etiam in Architectura & operibus omnibus vis permagna est: vt partes inter se & cum

toto respondeant. Itaque Vitruuius: Proportio, inquit, 'est ratæ partis membrorum in omni opere totiûsque commodulatio : id est, partium cum toto pro rata parte consensio. vt in corpore humano, proportio est apta cõpositio membrorum, quæ tum interit, cû pectus est cubitorum, reliquum corpus duorû palmarum.

Cedo exemplum. Vt octo se habêt ad quatuor, sic quatuor ad duo: & duo ad vnû. Quã rationem (inquit Varro) in ærẽ habet as ad semissem, eandem habet in argento libella ad sembellam. Sicut est ad vnum victoriatum denarius: sic ad alterum victoriatum alter denarius. Vt est filius ad patrem, sic filia ad matrem. Vt est in temporibus meridies ad diem, sic media nox ad noctem. his enim Varro exemplis vtitur.

Quid interest inter Rationem & Proportionem? Ratio est duarum inter se quantitatum comparatio. Proportio verò minimû est trium: quarum quæ media est, quãto vnã superat, tanto ab altera superatur. veluti I. II. III. quorum medius vt primum vno superat, sic à postremo superatur. Item III. V. VII. quorum medius vt binario primum exsuperat, sic à postremo superatur. Ac scitum est illud Aristotelis in Ethicis : Aequale id esse, quod medium est inter id quod superat, & id quod superatur. vt si decem nimium multa sint: quo verò non satis: tum sex capiãtur pro
rei

rei medio. quia medium hoc sicut quaternario vnum extremum superat, sic eodem quaternario ab altero superatur.

Cedo aliquod Geometricæ proportionis exemplum. Ponatur in A. gemma. In B. filex. Pòst ducatur altera linea, & in C. ponantur centum aurei. in D. obolus. Tum ita ratio ineatur. Vt est A. ad B. sic C. ad D. Deinde si vt A. est ad B. ita C. ad D. necessariò A. est ad C. sicut B. ad D. postremò vt est Totù ad Totù, ita altera pars totius ad alterà alterius. veluti, vt est A C ad B D, ita A ad B & C ad D. Nā (vt ait in Ethicis Aristoteles) Geometrica proportio est, in qua sicut tota cum totis, sic vtraque cum vtrisque conferuntur.

De Reciprocatione. CAP. X.



QUID est Reciprocatio? Affectio locorū eiusmodi, vt si cōsentanei sint, vno concessio vel negato, alterū concedatur, vel negetur: si dissentanei, contrà vno posito, vel sublato, alterum ponatur, vel tollatur. Nam in eos demum locos reciprocatio conuenit, quorum paria in vtrunque partem momenta sunt. quorum naturæ ordine neutrum altero prius aut posterius est, sed vtrunque simul. veluti, Proprium & species: causa & effectus. At genus cum specie non reciprocatur: nec totum cum parte. quoniam illa priora sunt naturæ ordine, vt suo loco diximus. Huius autem disciplinæ maximus

contra Sophistas est vsus , quemadmodum in Elenchis sophisticis Aristoteles docuit.

Cedo exemplum. Reciprocatur hæc inter se: Si sol lucet , dies est : & si dies est, sol lucet. Si quid ridet, homo est: & si homo est, ridet. At illa non reciprocantur ; Si quis habet febrem, calet. At non, si quis calet, continuò habet febrem. Si pluit, madefacta terra est. At non si madefacta terra est, pluit. Si peperit, cum viro concubuit. At non si cõcubuit, continuò verũ est parituram . Ex hoc genere illud est festiuũ Iphicratis , quod ab Aristotele commemoratur lib. Rhetor. 2. nam cùm filium haberet statura magnum : ætate verò puerũ : Aediles autem propter magnitudinem cum ad onera ciuitatis compelleret: Si magnos, inquit, pueros existimatis viros esse: necesse est vt viros paruos, pueros esse decernatis.

De loco generis.

CAP. XI.

DEINCEPS igitur de singulis locis videamus. Quod est firmamentũ loci à genere, cùm quæritur an sit species? Primum est huiusmodi: Posito genere vniuerso , quæuis continuò ponitur species. Nam qui omne dicit (vt in pro- uerbio est) nihil excipit. Locus igitur ex genere vniuerso ad quauis speciem probandã valet. nam semper in generalibus specialia in-
sunt:

sunt: vt est in regula iuris ciuilis: veluti: Si omnis arbor in illo fundo est, est etiam plantanus. Si omnes ciues in vrbe sunt, sunt etiam fenatores. Sequitur II. Sublato genere vniuerso, quæuis continuò species tollitur: Nam hic quoque locus ad speciem refellendam valet. Si nulla in hoc fundo arbor est, ne laurus quidem. Si telum in armauentario nullum est, ne fustis quidem. Sequitur III. Concesso genere indefinito, non continuò certa species conceditur. Locus enim ex genere indefinito ad probandam certam speciem non valet: quoniam (vt in Enuntiationibus dictum est) vt indefinita Enuntiatio vera sit, fatis est veram esse vel particularem, vel singularem. Indefinitè autem, siue ἀπλῶς, id est simpliciter & omnino enūtiari ea diximus, quæ sine circumspecta vlla, hoc est, siue temporis, loci, aut personæ adiectione pronuntiātur. Non valebit igitur hoc modo: Si est arbor, est laurus. Si est animal, est homo. Si est telum, est gladius. Sequitur IIII. Negato genere indefinito, quæuis species negatur. quasi indefinita negatio vniuersalis negationem efficiat. itaque locus hic ad refutandum valet. nam à quo genus abest, necesse est formam abesse. veluti, Quod nō est arbor, vtique non est laurus. Quod non est animal, non homo. Quod omnino non est, id nec ex parte, nec interdum, nec vsquam est: inquit Aristoteles. Sequitur V. Posito genere indefinito, species incerta ponitur. Nam iccirco

locus hic ad confirmandum valet : quoniam vt vera indefinita sit, satis est particularem aut singularem esse veram. Tractatur autē hic locus per diuisionem specierum hoc modo : Si sunt Centauri, aut sunt expertes rationis, aut participes. Si est Phoenix, aut est mas, aut fœmina. Quod indefinitè & omnino est, id aut ex parte est, aut interdum, aut vsquam.

Quod est firmamentum loci à genere, cū de speciei conuenientia queritur ? Quod generi vniuerso cōuenit, omni speciei quæ suum ac proprium nomen non habeat, conuenit : vicissimque cui genus omne cōuenit, ei species omnes quæ proprium ac separatū nomen non habent, non cōueniunt. Magna enim cautio adhibenda hoc loco est, de qua in speciei Affectu dictum est : quasdam esse species, quæ generis nomen retinent, quasdam quæ suū proprium & à genere separatū nomen adeptæ sunt. Cuius distinctionis ac differentia cū tantum in vsu momentum sit, mirum est nullam in scholis mentionem fieri. Prius autē vulgaris firmamēti exempla proponemus. Id est huiusmodi : Quod omni generi conuenit, omni speciei conuenit. Locus enim ex conuenientia generis vniuersi propter vim proportionis ad cuiusvis speciei conuenientiam probandam valet. Nā (vt ait Cicero lib. de Orat. III.) Quod in genere vniuerso probatum est, id in parte probetur necesse est. Veluti, Si omnis arbor vere florescit, etiam platanus florescit. Et-
enim

enim quam habet rationem omnis arbor ad ver, eandem habet platanus pro sua portione. Sic omnium rerum satietas vitæ facit satietatem: ait idem in Catone maiore. Ex illo genere iocus est ille Cascellij Iuriscōsulti, qui cū Aediles edixissent, ne quis præbente ludos Vatinio aliquid præter pomum mitteret, consultus per eos dies, an nux pinea pomum esset, respondit: Si in Vatinium missurus es, pomū est. Si omnia quæ sunt (inquit Cicero) mutabilia sunt, nullū corpus esse potest nō mutabile. mutabilia autē sunt illa ex quibus omnia constant. omne igitur corpus mutabile est. Et huc pertinet Regula Iuriscōsultorū: Cui genus debetur, eidē species debetur. de qua in l. siquid, 47, §. 1, D. de legat. 3.

Cedo planius aliquod exemplū de proportionē. Sumantur illa quæ tamen Aristoteles ad locum ex maiore retulit. Si voluptas bonū est, maior voluptas est maius bonum. Si iniuriam facere malum est, maiorē iniuriam facere maius malum est. Nam certē maius & minus generis species sunt. Ex eodem genere illud est Ciceronis: In quo fallit eos quod audierunt, dicendo homines vt dicant efficere solere. verē enim illud dicitur, Peruersē vt dicant homines, peruersē dicendo facillimē consequi. Sic enim locum illum corrigendum arbitror.

Age: quis est nouæ illius distinctionis vsus? Species à genere (inquit Cicero in Topicis) quoad suum nomen retinet non seiungitur.

Quod sic interpretor : quasi dixisset , Quoad ipsius generis nomen retinet . Sic enim aliis quoque locis Suum pro Ipsius vsurpauit . Hoc cum ita sit, illud quoque sequitur , specie quæ proprium & separatū à genere nomen habet, à suo genere seiungi: cuius præceptionis vis ex eo ipso quod à Cicerone tractatur exemplo intelligetur . Quoniā (inquit) argentū omne mulieri legatum est, non potest ei pecunia quæ numerata domi relicta est , nō esse legata . numerata enim pecunia (inquit) nomen argenti retinet . hoc Cicero ex sui temporis cōsuetudine & sermone vsitato cōstituit . Itaq; & apud Plautū, & apud Terentiū, Argenti nomine pecuniā quoque numeratā appellari videmus . Multis autē pōst annis Vlpian . Iurisconsultus ita locutus est, An cui argentum omne legatum est, ei nūmi quoque legati esse videantur , quæritur : & ego puto non cōtineri . non facile enim quisquam argenti numero nummos cōputat .


Cedo aliud exemplum . Supellectilis legato , eas res contineri puto (inquit Alphenus) quæ ad vsum communē patrisfæ . paratæ essent, quæ nomen sui generis separatum non haberēt . (vulgo enim corruptè legitur Separatim) quare quæ ad artificij genus aliquod pertinebunt, neque ad communem vsum patrisfæ . accommodatæ essent, supellectilis nō esse : sed nec pugillares, & codices in supellectili sunt .

Cedo aliquod planius & familiarius . Ponatur legatum esse omnibus cognatis : non dubium

dubium est, quin agnatis nihil debeatur. Forma enim à genere, si proprium nomen habet, seiungitur. Sic lex Pompeij, vt qui Pontica matre natus est, ciuis sit Ponticus: ad spurios (inquit Vlpianus) qui separatum nomē habent, & iam materna origine censentur, nihil pertinet. Sequitur II. Quod generi vniuerso non conuenit, nulli speciei conuenit. vel potius isto modo: Quod generi vniuerso repugnat, id ab vnaquaque specie dissidet. valet enim hic locus ad refellendam speciei conuenientiam. veluti, Si homo est animal, quod non est animal, id non est homo. Si nulli homines ante mortem beati sunt, ne Reges quidem. Si malum in sapientem non cadit, dolor autem cadit, dolor non est malum. vt in lib. de Finib. II. Qui in summo malo est, iste cū in eo est, nō est beatus. Sapiens autem semper beatus est: & est aliquando in dolore. Non est igitur summum malū dolor. Sequitur III. Quod generi indefinito cōuenit, non cōtinuò certæ speciei conuenit. Itaque nihil ad confirmādum valet. cuius rei causā superiūs exposuimus. veluti Non si arbor frugifera est, cōtinuò etiā tamarix frugifera est. Nō si homo indefinitè legat^r est, continuò optimus debetur, ait Cassius. Sequitur IIII. Quod generi indefinito non conuenit, nulli speciei conuenit. Itaque locus hic ad refutandam speciei conuenientiam valebit. veluti, Si pisces non sunt cicures, ne murena quidem. Si homines non sunt ante mortem

beati, ne Reges quidem. Sequitur V. Quod generi indefinito conuenit, continuò etiam speciei incertæ conuenit. Cuius rei causa superius explicata est. Tractatur autem hic locus per disunctionem specierum: hoc modo: Si Philosophi sapientes sunt, necesse est aut Stoicos, aut Academicos, aut Peripaticos, aut Epicureos fuisse. Si ciuis est, aut natus, aut factus est.

De loco Speciei. C A P. XII.

 VAE sunt firmamenta ex Specie, cum quaeritur, An sit genus? Primum est huiusmodi: Posita vna specie, non continuò ponitur genus vniuersum. Plus enim in genere vniuerso est, quam in specie. Itaque locus ex specie ad genus vniuersum probandum non valet. veluti: Si in illo agro cupressus est, est omnis arbor. Sequitur II. Posita vna specie, continuò ponitur genus indefinitum: quoniam vt vera indefinita sit, satis est verã esse particularem. Itaque locus ex specie ad genus indefinitum probandum valet: veluti, Si Platanus est, est arbor. Si murena est, piscis est. Si gladius est, telum est. Sequitur III. Sublata vna specie, neutrum genus ideo tollitur. plus enim in genere vniuerso remanet. Itaque locus ex vna specie ad refellendum genus non valet. Non enim quadrat: Si non est cupressus, non est arbor, aut nulla est arbor. Si non est iustitia, non est virtus. Potest enim esse fortitudo,

do, constantia, continentia. Sequitur IIII. Positis formis omnibus cōtinuò succedit genus, non tātūm indefinitum, sed etiam vniuersum. Valet enim hic locus & ad confirmandum & ad refutādum. Tractatur autem hic locus per cōiunctionem: veluti, Si & aues sunt, & pisces, & quadrupedes, omnis generis belluæ sunt. Si sunt Senatores, equites, & plebeij: sunt omnes ciues. Sequitur V. Remotis formis singulis, cōtinuò vtrunque remouetur genus. valet enim ad refutandum: & per remotionem tractatur, cū species omnes quæ generi subiectę sunt, remouentur. Si in eo loco neque mortale est, neque immortale, animal non est. Si neque natus est, neque factus ciuis, nullus est ciuis.

Quæ sunt firmamenta loci ex specie, cū de generis conuenientia quæritur? Primum est huiusmodi: Quod vni speciei conuenit, non continuò generi vniuerso conuenit. veluti: Si homo doctrine capax est, non continuò animal omne discipline capax est. Quod legatum est Fabiæ matrifa. si ea simpliciter vxor est, neque in manum conuenit, nihil debetur. Sequitur II. Quod vni speciei conuenit, etiam indefinito generi cōuenit. Si smaragdus est viridis, gemma est viridis. Si Platanus florescit verè, arbor vere florescit. Nam particularis verè efficit indefinitam veram. in quo videndum est diligenter, ne indefinita dicantur, quæ necessariam circumstantiæ adiectionem habent. veluti, Apud Tribalos laudi & gloriæ ducitur,

patrem immolare. Ergo patrem immolare honestum est. non valet. Nam & si quod aliqua ex parte est, aut alicubi, aut interdum, id certè omnino est: vicissimque quod omnino nō est, id nec aliqua ex parte, nec interdum, nec usquam est: tamē id demum esse omnino & absolute, & infinite, & simpliciter dicitur, quod sine vlla circumstantiæ adiectione necessaria pronuntiatur. Nam (vt ait Aristoteles secundo Topico extremo) τὸ ἀπλῶς εἶναι, ὁ μὴ εὐθὺς φροσσιζέντος ἐρεῖς. Sequitur III. Quod vni speciei non conuenit, non continuò generi indefinito non conuenit, Non enim reciprocatio est. veluti: Si homo est animal, quod non est animal, id non est homo. Sed non si quid non sit homo, id continuò sequitur non esse animal. Ex eo quod prohibet, lex Iulia damnatam adulterii mulierem testimonium dicere, colligitur etiam mulieres testimonij in iudicio dicendi ius habere. Sic, Si salix non est frugifera, non continuò arbores sunt infrugiferae. Et si autē disputari posset, videri hæc inter se pugnantia, quia contrariorū (vt postea dicemus) contraria sunt consequentia: tamen intelligendum est, differentiæ causam in negatione esse positam, quæ cum priuatio sit, affirmatione, quæ habitus est, semper est deterior: neque parē cum illa vim habet. Sequitur IIII. Quod vnicuique speciei cōuenit, vtrique generi cōuenit. qui locus per enumerationem & affirmationem formarum tractatur: de qua posterius

rius

rius differemus. Si & rationis particeps & rationis expers mortale est, omne animal mortale est. Sequitur V. Quod nulli speciei conuenit, generi non conuenit. Qui locus per Enumerationem formarum tractatur. Si Archias neque natus, neque factus est ciuis, non est ciuis.

Restat vt de Reciprocatione videamus. Quæ sunt regulæ Reciprocationis inter genus & speciem? Omnes ex superiore disputatione & colligi & confirmari possunt. Itaque regulas enumerare contenti ab earum exemplis supersedebimus. Prima est huiusmodi: Vt posito genere vniuerso quæuis succedit species: ita positis formis omnibus, continuò succedit genus. Sequitur II. Vt sublato genere vniuerso, quæuis continuò species tollitur: sic remotis formis omnibus, continuò remouetur genus. Sequitur III. Vt quod generi vniuerso posito conuenit, omni speciei conuenit: ita quod singulis formis conuenit, generi conuenit. Sequitur IIII. Vt quod generi vniuerso non conuenit, nulli speciei conuenit: ita quod nulli speciei conuenit generi non conuenit. Sequitur V. Non vt posito genere vniuerso, quæuis succedit species: ita quauis posita specie, continuò succedit genus. Sequitur VI. Non vt sublato genere vniuerso quæuis continuò species tollitur: ita sublata vna specie, continuò genus tollitur. Sequitur VII. Non vt quod generi vniuersè posito conuenit, omni

speciei conuenit, ita quod vni formæ cōuenit, continuò generi conuenit. Sequitur VIII. Non vt quod generi vniuerso non conuenit, nulli speciei conuenit: ita quod vni alicui speciei non conuenit, continuò generi non conuenit.

Quid sequitur nunc? Vt de specie & de indiuiduo differamus. Sed quoniam eadem speciei ad indiuiduum ratio est, quæ generis ad speciem: vicissimque eadem indiuidui ad speciem, quæ speciei ad genus: propterea subtilior horum disputatio superuacaneæ videtur. Itaque in quæstionibus de Specie & indiuiduo iisdem vti firmamentis licebit, quæ superius exposita sunt. Veluti: Si quærat^{ur} an Callicles sit animal, Firmamentum hoc adhibebitur: Quia quod speciei conuenit, indiuiduo conuenit: si animal homini conuenit, etiã Callicli, qui homo est, conueniet. Contrà si quærat^{ur} an Callicles sit lapis, eodẽ adhibito firmamento concluditur: quia quod speciei repugnat, etiam indiuiduo repugnat: si lapis homini non conuenit, etiam Callicli, qui homo est, non conueniet. Quare proximum est, vt ad locum de Toto transeamus.

De loco Totius. C A P. X I I I.



Q U O D est firmamentum loci ex Toto, cum quæritur an sint partes? Ponatur hoc I. Toto concessio conceduntur partes principales, Totum enim
 sine

sine principalibus partibus non consistit: siue illud naturale sit, siue artificiosum. Itaque locus ex Toto ad probandas principales partes valet. veluti: Si est arbor, est etiam truncus, & radix, & rami. Si est currus, etiam rota est. Si naus est, etiam puppis est, & prora, & sentina. Eiusdémque loci est illud: Posito toto, nihil extrinsecus relinquitur. nam qui omne dicit, nihil excipit. vt in illo Aesopi ridiculo, qui cum venalis conseruus interrogatus quid sciret, respondisset se scire omnia: post eadē de re interrogatus, respondit se nihil scire: quòd alter omnia se scire dixisset. Sequitur II. Posito toto, non cōtinuò partes minus principales ponuntur. quia totum sine iis potest consistere. Itaque locus ex toto non valet ad probandam partem minus principalem. veluti: Si est, arbor, sunt etiam folia, aut flores. Si est naus est & artemo. Nam (vt superius ex Labeone diximus) artemo pars naus non numeratur, nisi nō necessaria. l. malū, 242, D. de verb. signi. Sequitur III. Sublato toto, subtili ratione partes continuò tollūtur: populari verò ratione, propter homonymiam non tolluntur. Sic enim superius in affectionum tractatu distinguendum esse ostendimus ex Aristotele, qui libro Politicorum primo statuit, eas demū verè ac propriè partes dici, quæ munere suo funguntur, & sunt in actu. separatas verò, abusiue & impropriè tantum sic appellari. Quare cum id demum fundamentum dicatur, quo sustine

tur domus, euerſa domo fundamentum ſubtili & limata ratione nullum eſt : vt nec tectum, quod non tegit: nec rota, quæ nō voluitur: nec remus, qui non impellitur . Sed vitæ communis ratio neceſſariam homonymiam induxit: vt etiam ſublata ſuperficie area pars domus dicatur: & rota nominetur, quæ non voluitur: & remus, qui nō impellitur. Amiculum apud mercatorē, quamuis non amiciat: & toga quāuis non tegat : & ramus, quamuis ex arbore exciſus.

Quod eſt firmamentum loci ex Toto, cū de conuenientia quæritur? Primum eſt huiusmodi: Quod Toti conuenit, partibus coniunctis pro rata conuenit : diſiunctis non conuenit. Itaque ad probandam partium concretarum conuenientiam valet. veluti: Si nauis nauigat, & prora & puppis, & malus, & gubernaculum, & tranſtra, & remi, & anchora pro rata parte nauigant. At diſiunctæ nullo modo : vnde illa Iuriſconſultorum regula: Cuius eſt totū, eius ſunt partes. Si domus oppignerata eſt, eſt etiam area. Cui legatus eſt annulus, eidem gemma quoque legata eſt. Qui fur eſt totius, fur eſt ſingularum partiū. Quæ de tota re vindicanda dicta ſunt, eadem & de tota parte intelligenda ſunt. Cui pater ſe in adoptionem dedit, eidem quoque filius datus intelligitur. Totius enim nomine non modò continuum corpus, ſed etiam deiunctum intelligimus : veluti familia : vt ſuperius in Totius

tius affectu dictum est . Ex hoc eodem fonte ducta est vera illa & Christiano digna homine, Ciceronis argumentatio in lib. de nat. deor. II. extremo: Si Deus consulit omnibus hominibus, qui in orbe terrarum sunt, etiam iis consulit, qui eius partes tenent, Asiam, Africā, Europam. Si iis, etiā vniuersis qui Romæ sunt, & Athenis & Rhodi. Si vniuersis, etiam singulis. Sequitur II. Non si cui totum non conuenit, iccirco pars non conuenit. Itaque nihil ad refellendam partem, totius refutatio valet: veluti, Non si totus fundus meus non est, iccirco nulla eius pars mea est. Non si quis integrum bouem gestare, vt Milo Crotoniates, non poterit, continuo partem eius non poterit. Non si quis vniuersum exercitum regere non poterit, iccirco partem eius non poterit. Non si vas aliquod totum illud frumentum capere non potuit, iccirco partem eius aliquam non poterit.

De loco Partium.

CAP. XIII.



QVOD est firmamētum loci ex Partibus, cūm quæritur An sit Totum? Locus hic bipartitò tractatur. Aut enim ex parte vna, aut ex pluribus, & rursus ex omnibus aut coniunctis, aut disiunctis, argumentamur. Primum est huiusmodi: Posita parte, siue necessaria sit, siue redundans, non continuo ponitur Totum. Itaque

locus ex partibus nullo modo valet ad probandum Totum. nam siue vna pars est, siue plures tātū, siue omnes disiunctæ, nihil prohibet non esse totum. Totum enim & partes non idem sunt, vt ait Aristoteles in Topicis. Non igitur si est truncus, continuò est arbor: non si est truncus, & ramus, continuò est arbor. Sic, Nō si est & truncus & radix, & hæc inter se disiuncta sint, continuò est arbor. Nō si trabes sunt, & cementa, & lapides, & tegulæ, continuò domus est: nisi forma cōiuncta sint. Separatis enim corporibus ex quibus ædes constant, vniuersitas ædium intelligi non potest. l. eū qui. 23, D. de vsurpat. Sequitur II. Positis partibus omnibus compositis; totum cōceditur. Disertè autem addendum fuit Compositis. Non enim partibus omnibus positis (vt modò diximus) si compositio, id est forma desit, Totum continuò sequitur, Itaque, bona venia quorundam hominum eruditorum dictum sit, non valet hoc argumentum: Si & radix est, & caudex, & cortex, & frōdes, & rami, arbor est. Possunt enim esse omnia euulsa & ruta cæsa, cum tamen arbor non sit. Hoc autē argumentum partiū enumeratione tractatur, de qua posterius differemus. veluti: Si & inuenire & disponere, & memoria tenere, & eloqui potest, orator est. Si & leges, & edicta, & senatusconsulta, & constitutiones, & responsa prudentum, & consuetudinem ciuitatis tenet, ius ciuile vniuersum tenet. Sequitur III, Sublata

lata parte, si ea principalis est, Totum tollitur: si minus principalis, non continuò tollitur. nam locus ex parte principali ad refellendum Totum valet: ex minus principali, non valet: veluti: Si rota non est, non est currus. At non si non est artemo, continuò non est naus.

Quod est firmamentum loci ex partibus, cum de Totius cōuenientia quæritur? Primū est huiusmodi: Quod parti coniunctæ conuenit, vbi proportio seruatur, etiam toti conuenit. Itaque ex partis ratione de totius ratione argumentum sumitur, hoc est, de quantitate & qualitate: cuius argumenti vis omnis in proportionē sita est: vt cum ex vngue, leonis magnitudo æstimatur: quo argumento Phidias vsus dicitur, cum inspecto vngue leonem integrum effinxit. Itémque Pythagoras, qui Herculis magnitudinē ex eo stadio, quod Hercules suis pedibus admensus erat, æstimauit. veluti: Si rota est volubilis, totus currus pro rata est volubilis. Si velum vento pellitur, tota naus pro rata pellitur. Ex hoc genere illud est ex lib. Ciceronis de nat. deo. 2. Nullius sensu carentis pars aliqua potest esse sentiens. Mundi autem partes sentientes sunt. non igitur caret sensu mundus. Et lib. 3. Si ea intereunt, ex quibus constat omne animal, nullum est animal sempiternum. Et lib. de Orat. I. Mirari desinamus, quæ causa sit eloquentiū paucitatis: cum ex illis rebus vniuersis eloquentia constet, quibus in singulis elaborare permagnū

gnum est. At si proportio nulla est, nulla conuenientia est. Itaque non si Aethiopis dentes sunt candidi, iccirco Aethiops est candidus. non si contignatio domus lignea est, iccirco domus est lignea. Sequitur II. Quod parti dis-iunctæ conuenit, non iccirco toti pro rata cõ-uenit. Non si separatim quisque horum pue-rorum bene canit, iccirco coniuncti sympho-nia canere poterunt. nam plerunque voces coniunctæ discrepant. non si separatim quis-que horum equorum velox est ad cursum, ic-circo ad bigas aut quadrigas apti sunt. Non si rota separata volui potest, iccirco reliqua pars currus voluetur. Sequitur III. Quod parti coniunctæ non conuenit, vbi proportio est, toti pro rata non conuenit. Si tunicæ virilis manica puero non conuenit, nec tota tunica conueniet. Sequitur IIII. Quod parti dis-iunctæ non conuenit vbi proportio nulla est, non iccirco toti non conuenit. veluti: non si prora aut transtrum separatum non fluctuat, iccir-cò coniunctū non fluctuabit. nō si solus equi-tatus vincere non potuit, iccirco cum exerci-tu coniunctus vincere non poterit. Sed in his omnibus (vt antè dixi) magna proportionis ratio adhibenda est.

Quæ sunt firmamēta Reciprocationis? Pri-mum est huiusmodi, Vt toto concessio partes principales conceduntur, sic concessis parti-bus omnibus compositis, totum conceditur. Sequitur II. Vt posito toto non cōtinuò par-

res redundantes ponuntur : sic posita parte aliqua non continuò totum conceditur. Sequitur III. Neque sublato toto, continuò partes tolluntur: neque sublata redundante parte, totum tollitur. nam necessaria quidem certè tollitur. Sequitur IIII. Vt quod toti conuenit, compositis partibus pro rata conuenit : ita quod parti coniunctæ conuenit, vbi proportioni locus est, etiam toti conuenit. Sequitur V. Vt cui Totum non cõuenit, vbi proportio est, partes non conueniunt : ita cui pars non conuenit, totum similiter non conueniet.

De loco Caussarum.

CAP. XV.

D V O D est firmamentum loci ex Causis, cū quæritur an sint Effecta? Quoniam effectus is demum dicitur, qui ex caussarum cõcursu nascitur, de eo tantum breuitatis causa præcipientur, neque singulas persequemur. Causarum autem cõcursum intelligimus, cū causæ sunt absolute vi sua efficientes. Primum igitur firmamentum sit huiusmodi I. Posita causa, ponitur Effectus. Secundum illud: II. Sublata causa, tollitur Effectus. Causa enim à suis effectis (vt ait Cicero) non seiungitur. Et, vt ait Aristoteles lib. Rhetor. 2. cap. 42 : Si causa est, etiam est id, cuius ea causa est: & si hoc non sit, ne illud quidem. Simul enim & causa & euenta sunt. *ἐὰν τι ὑπάρχη, ὅτι ἐστὶ, καὶ μὴ ὑπάρχη, ὅτι οὐκ*

ἵσιν. ἀλλὰ γὰρ τὸ ἀγῆστον καὶ ἔαγστον. καὶ ἀνευ αἰτίας, ἔδέν
 ἔστιν. Valet igitur locus ex causis, tum ad con-
 firmandum, tum ad refellendum effectum. ve-
 luti: Si sol lucet, dies est: si non lucet, dies non
 est. Cū conciliatrix amicitie virtutis opinio
 sit, difficile est amicitiam manere, si à virtute
 defeceris: ait in Lelio Cicero. Eodēque per-
 tinet regula, cuius magnus in disciplinis est v-
 sus: Cui causa sine qua non adimitur, ei res
 principalis adimitur. veluti: Quoniam illi acu-
 men defuit, Dialecticus esse non potuit. nam
 in Dialecticæ studio causa sine qua non, est
 acumen ingenij. vnde illud Ciceronis in Aca-
 demicis: Faciunt pueriliter. quo enim omnia
 iudicantur, sublato, reliqua se negant tollere.
 vt si quis quem oculis priuauerit, dicat, ea quæ
 cerni possent, non se ei ademisse. Hinc illud po-
 puli Rom. institutum, vt aqua & igni interdi-
 cerent iis, quibus ciuitatē verbo adimere no-
 lebāt. Hinc Iulianus Apostata cognominatus
 non se Christianæ religionis ministris conuē-
 tum habendorum potestatem eripere dice-
 bat, sed vsum rhedarū & vehiculorum adime-
 bat. Huc illud Iuriscōsultorū pertinet: Quod
 per se esse non potest, rapit secum in accessio-
 nis locum id, sine quo esse non potest.

Quod est firmamētum loci ex causis, cū
 cōuenientia quæritur? Hæc sunt huiusmodi.
 I. Cui conuenit causa, eidē etiam effectus cō-
 uenit: vicissimque, Quod causæ conuenit, ef-
 fectui conuenit. veluti: Si bona sapientia est
 bonos

bonos sapientes efficit. Item, Libidinosa & intemperans adolescentia effectum corpus tradit senectuti. Si quod generauit bonum est, etiam quod generatur, est bonum. Si quod corrumpit, bonum: malum, quod corrumpitur. Item de natur. deor. 3. Vt si omnis cera commutabilis esset, nihil esset cereū quod commutari non posset: item, nihil argentum, nihil æneum, si commutabilis esset natura argenti & æris: similiter si omnia quæ sunt, ex quibus cuncta constāt, mutabilia sunt, nullum corpus esse potest non mutabile. Sequitur II. Cui non conuenit causa vnica efficiens, eidem nec effectus conuenit. vicissimque quod causæ nō conuenit, nec effectui conuenit. veluti, Potest bonum cuiquam malo esse? Potestne quisquā in abundantia bonorum ipse esse non bonus? Item: Quicquam bonum est, quod non eum qui possidet, meliorem faciat? Huius autē generis est argumentatio ex causa sine qua non: quæ cū abest, poni effectus non potest. vnde illud Anacharsis ioculare, Quia vites apud Scytas nullę sunt, nullas esse tibicines: à quo illud Ciceronis non abhorret: quia ebriosus Muræna non sit, saltatorem non esse. Intempestiui conuiuij, amœni loci multarum deliciarum comes est extrema saltatio. Videndū autem erit diligenter quæ causæ potentur, aut negabuntur. quæ de re quoniam in affectuum explicatione differuimus, illinc assumentur, quæ ad hunc locum pertinebunt.

De locc effectorum. CAP. XVII.

QUOD est Firmamentum loci ex effectis, cum queritur an causæ subsint? Primum est huiusmodi: Posito effectu ea causæ ponitur, quæ sola & absolutè efficiens est. Itaque hic locus ad confirmandam causam valet. veluti: Si est incendiū, est ignis. Si dies est, sol lucet. Si peperit, cum viro concubuit. Si cinis est, fuit incendium. Sequitur II. Sublato effectu ea demum causæ tollitur, quæ sola & absolutè efficiens est. Itaque ad refellendam causam valet. Veluti: Si dies non est, sol nō lucet. Nihil enim est quod diem efficiat, præter solis lumen. Si est vmbra, corpus est in sole. At si aliud causarum genus sit, nihil valebit. veluti: Si non peperit, cum viro non concubuit. Si non est Dialecticus, non studuit, aut non præceptorem bonum habuit. Potest enim vtrunque habuisse, cum in illo vel acumen ingenij, vel diligentia desset.

Quod est Firmamentum de conuenientia? Esto hoc I. Cui conuenit effectus, ei causæ conuenit: vicissimque quod effectui congruit, etiam causæ cōgruit αὐτὸ γὰρ δὲ ὁ ὑπάρχει ἑκαστον, ἐμείνο μάλλον ὑπάρχει: inquit Aristoteles: quod vulgò sic effertur, Propter quod aliquid tale est, id quoq; magis tale est. Velut ex li. Cic. de fin. 2. Qui probari potest, vt is qui propter me aliquid gaudeat, plus, quàm ego ipse, gaudeat? Itē lib. de nat. Deor. 2. Nihil quod animi & rationis

tionis est expers, generare ex se potest animā-
tem compotēque rationis. mundus autem
generat animantes, compotēsque rationis.
Animans est igitur mundus, compósque ratio-
nis. Item: Si ex oliua modulatè canentes tibiæ
nascerentur, non dubitares quin esset in oliua
tibicinis quædam scientia. quid si plantani ti-
bias ferrent numerosē sonantes? Idem etiam
censeretur in platanis inesse musicam? Cur igi-
tur mundus non animans, sapiēnsque iudice-
tur, cū ex se procreet animātes atque sapiē-
tes? Sequitur II. superiori consentaneū: Qua-
lis effectus est, talis causa est. Eoque illud per-
tinet peruulgatum, Ex baccis arborē agnosci.
Item illud: Magistratus virum ostendit. Quod
est maius argumentum nihil prodesse philoso-
phiam (inquit Cicero Tuscul. 2.) quā quos-
dam perfectos philosophos turpiter viuere?
Atque huc, meo iudicio, locus ex adiectione
pertinet, quem Aristoteles appellat ἐκ τῆς ἀπο-
δείξεως: veluti: Siquidem alteri adiectū, id bo-
num efficit: etiam illud bonum esse necesse est.
Valet etiam ad proportionem hic locus: ut cu-
ius maior & præstantior est effectus, ea causa
maior & præstantior habeatur. Vnde illud Ci-
ceronis in lib. de natur. Deor. 3. Si aliquid est,
quod homo efficere non possit: qui id efficit,
melior est homine. Homo autem hæc quæ in
mundo sunt efficere non potest. qui potuit igi-
tu, is præstat homini. Homini autem præsta-
re quis possit, nisi Deus? Item illud in Philip.

XI. Vt maior est vis animi quàm corporis, sic sunt grauiora quæ cōcipiuntur animo, quàm illa quæ corpore. Seq. III. Cui effectus nō conuenit, ei causſa nō cōuenit: vicissimque quod effectui non conuenit, id causſæ non conuenit. Si fruges ex eo agro non nascuntur bonæ, nec bonus fundus est. Verum (vt superius monui) videndum est diligenter vt vel causſarum omniū sit concursus, vel certè causſa necessariò & absolutè efficiens: non autem socia & adiutrix. Vt illa *πρόθεσις*, de qua loquitur Aristoteles: Nō enim, inquit, si id quod additur, nō facit id cui adiunctū est bonū, propterea id nō bonū est. veluti: Non si discipulus indoctus abiit, iccircò præceptor fuit indoct⁹. nō enim præceptor eruditionis causſa fuit absolutè efficiēs. Ex eodem genere lubricū illud est argumentandi genus vulgò usurpatum: Vt res secundę Imperatori auctoritatē conciliāt, sic res aduersæ minuunt. Item illud Lucani:

-- *Quis iustius induat arma,*

Scire nefas: magno se iudice quisque tuetur.

Victrix causſa diis placuit, sed victa Catoni.

Non enim consilia ex euentis iudicanda sunt. Et quod Cæsar, Cicero veteresque omnes rerum euentis coacti toties inculcant, multum cum in omnibus rebus, tum in re militari fortunam valere: id nos de moderatore rerum omnium Deo verè affirmare possumus: vt non tam euenta, quàm auctorem spectemus.

Quæ sunt firmamenta Reciprocationis?

Primum

Primū est huiusmodi: Vt posita causa effectus sequitur : sic posito effectū causa absolutē efficiens ponitur. Sequitur II. Vt sublata causa, effectus tollitur: sic sublato effectū, causa absolutē efficiēs tollitur. Sequitur III. Vt cui causa conuenit, effectus conuenit: sic cui conuenit effectus, ei causa conuenit. Sequitur IIII. Vt cui non conuenit causa absolutē efficiens, ei effectus non conuenit: sic cui non conuenit effectus, nec causa conuenit. Quorum omnium exempla quibus mediocriter eruditus excogitare poterit.

De loco Relationis.

CAP. XVII.

QUOD est Firmamentum ex Relatione, cum quæritur, an alterū relatum sit? Vnum hoc erit: Vt posito vno Relatorum, alterū necessariō ponitur: ita negato vno, alterum necessariō negatur. Tanta enim inter hæc necessitudo à natura est, vt alterum esse sine altero non possit. atque adeo naturæ ordine alterum altero prius non sit. Itaque locus hic ad probandum & refellendum valet. Reciprocationem enim admittit, veluti in illa Socratis: qui cum à Melito accusaretur, quasi Deos esse negaret: primū ex illo percontatus est, an etiam Dæmonas esse inficiaretur: deinde negante Melito, sic intulit: Nōne dæmones ex diis nati sunt? Annuente illo: Si sunt deorū liberi, sunt dij, & si non sunt


dij, non sunt deorum liberi. Ex eodem genere illa sunt: Si est Imperator, est exercit⁹. Et si exercitus, est Imperator. vicissimque si non est Imperator, non est exercitus: si non est exercitus, non est Imperator. Si tu illi cognatus es, vicissim ille tibi. si nō ille tibi, nec tu illi. Hinc illud Crassi in Philippum: Si tibi ego Senator non sum, nec tu mihi Consul. Et libr. de natu. deor. 3. Age porro: Iouem & Neptunū Deum numeras. ergo etiam Orcus frater eorū Deus. Si nō est Orcus Deus, quid dicitis ergo de fratribus? Et si ij fratres sunt in numero Deorū, num de patre eorum Saturno negari potest? qui si est Deus, patrem quoque eius cœlū esse Deum confitendū est. Ex eodē genere illud est vetus, quia sine acceptione donatio nulla est. Mācinus qui à Numātinis acceptus nō est, nō fuit deditus. Vnde illa iuris regula, Non videtur data quæ eo tempore quo dantur accipiētis non fiunt.

Quod est Firmamentum de conueniētia? Sæpenumero dictum est, Relata nequaquā esse vi & natura contraria: sed figura tantū, & situ, & positione inter se opponi. Itaque longè alia relatorum, quàm contrariorum ratio & facultas est. Non enim si vnum contrarium vni ex relatis conuenit, eius contrarium alteri relato conueniet. vt, Non si pater est doctus, iccirco filius doctus nō est. Aut nō si dominus est robustus, iccirco seruus robustus non est. Firmamentum igitur hoc est, Quod vni relatorum

torum conuenit; alteri etiam necessariò conuenit:& vicissim, quod vni non conuenit, nec alteri conuenit. Si discere Dialecticam honestum est, docere honestum est. Et si hoc nō est, ne illud quidē. Si fœnori pecuniā accipere honestum est, dare honestum est. Et si dare fœnori equum non est, nec accipere rectum est. Si portorium locare honestum est, conducere quoque honestum est. Si non hoc, ne illud quidem. Ex hoc genere illud est Aristotelis libr. Rhetor. 2. Si tu iustè & honestè supplicio affectus es, ego iustè & honestè supplicio te affeci. Quod ad carnificum existimationem defendendam valet.

Quæ sunt firmamenta Reciprocationis? Relationis effectus naturalem reciprocationē habet: quæ in superioribus firmamentis necessariò exposita est. Itaque ad affectum locūque Proprij transeundum est.

De loco Proprij. C A P. XVIII.


 V O D est Firmamentum ex Proprio, ad id cuius proprium est? Locus hic tantum ad conuenientiam & reciprocationem pertinet. nam posito propriò, dubitari de subiectę speciei essentia non potest. Vnum autem hoc Firmamentum est: Vt posito proprio, species ponitur: sic sublato proprio, tollitur species: si modo verum illud proprium est, de quo in Affectuum præ-

ceptione differuimus Itaque locus ex Proprio ad speciem & confirmandam & refellendam valet. veluti: Si lapis hic ferrum allicit, est magnes. Si non allicit, non est magnes. Si à natura volandi vim habet, est auis. Si non habet, non est auis. Si hinniendi vim habet, est equus. Si non habet, non est equus. Si ratione utitur, est homo. Si non utitur, non est homo. Si est odor, est candidus. Si non est candidus, non est odor. Si est coruus, est niger. Si non est niger, non est coruus.

Quod est Firmamentum reciprocationis? In verè propriis, ut specie concessa proprium conceditur: sic proprio concessio, species sequitur. Itemque, Ut sublata specie tollitur proprium, sic sublato proprio, species tollitur. At in eo quod verè proprium non est, nulla reciprocatio est: quod quia in affectibus explicatum est, actum (quod prouerbio veramur) nō agemus.

De loco Antecedentis.

CAP. XIX.

uod est Firmamentum ex antecedente? Primum & secundum sunt huiusmodi: Ut necessario antecedente concessio, quod consequens est, subsequitur: sic negato antecedente, consequens tollitur. Sed videndum est diligenter, ut necessaria consequutio sit. Valet enim hic locus ad necessarium consequens & confirmandum & refel-

fellendum. Veluti: Si vesperi cœlum rubet, postridie sudum erit. Si Lucifer exortus est, mox solis ortus subsequetur. Si nondum ortus est, sol nondum propinquat. Si pleuritide correptus est, feбри vexabitur. Si non est natus postumus (inquibat orator Antonius) non est mortuus. Ex quo illud est in oratione pro Sylla: Neque enim princeps ad salutem esse potuissē, si esse alij comites noluisent. At si nulla necessaria inter Antecedens & Consequens cohærentia est, neutram in partem argumentum valet. veluti: Si aratio facta est, sementis fiet. Si arbores florescunt, ver propinquat. Interdum enim præmaturè arbores florescunt. Eadēque conuenientiæ ratio est. Nam si cui conuenit Antecedens, eidem necessarium cōsequens conueniet: & si cui illud non conueniet, ne hoc quidē. Vt in illo peruulgato: Qualem sementem feceris, ita & metes. Et pro Muræna: Nemo fere saltat sobrius, nisi forte insanit: neque in solitudine, neque in conuiuio moderato atque honesto. Intempestiui conuiuij, amœni loci, multarum deliciarum, comes est extrema saltatio. tñ mihi arripis id quod necesse est omnium vitiorum esse postremum. relinquis illa, quibus remotis hoc vitium omnino esse non potest. Itaque huc illa Iuris regula pertinet: Cū principalis causa non consistit, ne ea quidem quæ sequuntur locum habent. Ex eodem genere illud est: Quò quisque est ingeniosior, eò magis acutis disputationi-

bus delectatur: quò quisque tardior eò minus. Ex quo intelligi potest, quamobrem nōnulli Aristotelis lectione magis aut minus delectentur. Indidem illud est Ciceronis lib. de nat. Deor. 3. Si nullum corpus immortale est, nullum est corpus sempiternum. corpus autem immortale nullum est, ne indiuiduum quidem. nullum igitur sempiternum est. Item: Si omne animal dolorem capit, id accipiat etiā interitum necesse est. Atque hic quidem argumenti ex antecedentibus locus est, eaque firmamentorum formula. Cicero autem in Topicis septuplicem formam ac rationem horū trium locorum tractandorum exponit: Antecedentium, Consequentium, & Repugnantium: quæ ad locorum præceptionem nihil omnino pertinet: sed ad formas argumentationū, de quibus posterius differemus.

De loco Consequentis. CAP. XX.

QUOD est firmamentū ex consequente ad antecedens? Ponatur hoc I. Cōcesso necessario consequente, antecedens conceditur. Itaque locus ex consequente valet ad necessarium antecedēs confirmādum. Veluti: Si satio est, fuit aratio. Si reuertit, abierat. Sequitur II. Sublato consequente, necessarium antecedens tollitur. nā (vt Cicero de Finib. 4. scribit) cū consequens aliquod falsum est, illud cuius id consequens est

est non potest esse verum. Si nondum dies est, nondum Lucifer exortus est. Si excusso sacco patera non excidit, non fuerat imposita. Eodē illud pertinet ex oratione pro Sylla: Cuius vicarius qui velit esse, inueniri nemo potest: lōgè ab eo abest regni suspicio. Item illud ex lib. de nat. deor. 3. Si dij sunt, sunt etiam Nymphæ deæ. Si nymphæ, panisci etiam, & satyri. hi autem non sunt: ne nymphæ quidem deæ igitur. Item in lib. de Amicitia: Si curam fugimus, virtus fugienda est: quæ necesse est, vt cū aliqua cura res sibi contrarias aspernetur, atque oderit. Ex eodem genere sunt, quæ ex tēpore sumuntur. velut illud Ciceronis: Si Numma fuit auditor Pythagoræ, necesse est eo tempore illum fuisse, quo Pythagoras docuit: At aliquanto ante Pythagoram fuit, auditor igitur ipse esse non potuit. Item quæ ex loco: Si Sextus Roscius Romæ illo die patrem interfecit, Romæ certè illo die fuit. At illo die Ameriæ visus est. Si Clodius eo die Romæ in opertum Bonæ deæ ingressus est, illo die Romæ fuit. At illo die Interannæ visus est. Ex eodem genere sunt illa Iurisconsultorum: Cui quid propter aliud cōceditur, eidem illud ipsum concedatur necesse est. Quod vulgò sic effertur: Concesso fine, omnia quæ ad eum necessaria sunt, conceduntur. Veluti: Cui iurisdicção data est, ei quoque concessa esse videntur, sine quibus explicari iurisdicção non potest. Item, Quod per se esse non potest, rapit

secum in accessionis locum id sine quo esse non potest. Nam (vt ait Aristoteles in libro de cœlo) Propositis duobus extremis, si posterius sine priore conuenire non potest, prius autem conuenire non potest, certè nec posterius poterit. At si necessarium non est, non valebit. veluti: Si ratio non est, non fuit aratio. Si non rediit, non abierat. Potuit enim ibi manere, aut mori. Quod eodem modo de Conuenientia iudicandum est.

Quod est firmamentum reciprocationis? Primum est huiusmodi: Vt concessio antecedente, necessariò consequens succedit: ita cōcessio consequente, necessariò antecedens cōceditur. Sequitur II. Vt sublato necessario antecedente, consequens tollitur: ita sublato cōsequente necessario antecedens tollitur. Sequitur III. Vt cui antecedens conuenit, ei cōuenit consequens necessarium: ita cui hoc cōuenit, etiam illud conuenit. Sequitur IIII. Vt à quo necessarium antecedens dissidet, etiam consequens dissidet: sic à quo consequens dissidet, etiam antecedens dissidet. Quod cum ita sit, non dubito quin ad hunc locum aptissimè conueniant, quæ Aristoteles secūdo Topico extremo ad Aientia & negantia retulit, hoc modo: Si quod honestum est, id iucundū est: etiam si quid non sit iucundum, id honestū non est. At si quod iucundum non est, id non est honestum: certè quod honestum est, etiam iucundum est. Eodémque ex fonte ducta illa

Cice

Ciceronis acerrima disputatio est in Officiis. Si quod honestum est, idem est utile: quod utile non est, id honestum non est. Et si quod utile non est, id honestum non est: etiam quod honestum est, utile est.

De loco Adiunctorum. CAP. XXI.

QUOD est firmamentum ex adiunctis? Locus hic ad Rhetores potius, quam ad Dialecticos pertinet. Adiuncta enim esse ostēdimus, quæ plerunque quidem eueniunt, sed tamen nulla necessitate rem comitante. Itaque cum ad confirmandum hic locus infirmus est, tum verò ad refellendum infirmissimus: siue essentiam, siue conuenientiam, siue reciproca-tionem spectemus. veluti: Si est avarus, iusiurandum negligit. Si non est avarus, non negligit. Si negligit iusiurandum, est avarus. Si nō negligit, non est avarus. Si Tyrannus est, interficietur. Si non est Tyrannus, non interficietur. Si interficietur, est Tyrannus. Si non interficietur, non est Tyrannus. Quæ omnia leuia & infirma sunt. Ex hoc genere sunt, quas Præsumptiones Iurisconsulti appellant: velut illa Ciceronis ex lib. de Orat. 3. Si & ferro interfectus ille, & tu inimicus eius cum gladio cruento deprehensus es in illo ipso loco, & nemo præter te ibi visus est, & caussa nemini, & tu semper audax, quid est quod de facinore dubitare possimus?



QUOD est firmamentum ex Accidēte? Esto primum huiusmodi: Posito quocunque accidente, ponitur substantia. Posito verò accidente inseparabili, sequitur perpetuitas. Itaque vt locus de quocunque accidenti ad substantiam probandam valet: ita locus ex accidente inseparabili ad perpetuitatem probandam valet. Prioris exempla hæc sunt: Si dos est, etiam matrimonium est. Si est pignus, est principalis obligatio. Si glacies est, etiam aqua est. Quod pertinet ad quæstionem, an vsusfruct. legatus alicui quo ad filius testatoris pubescat, mortuo ante pubertatem puero extinguatur: quia si pupillus non est, pubertas intelligi non potest. l. ambiguitatem, 12, C. de vsufr. Itē ad illam, Cū Titius annorum triginta erit, illi dato centum. l. si ita scriptum, 16, D. de manumiss. test. Sic nemo post mortem liberari intelligitur. l. qui libertinus, 37, §. ult. D. de oper. libert. Posterioris exemplum est hoc: Si lepra aut podagra correptus est, nūquam curabitur: Si pannus atrore tinctus est, nūquam albescet. Ex separabili verò non valet: vt, Si ægrotat, non conualefcet. Si conualuit, non ægrotabit. Sequitur II. Negato accidenti, non continuò substantia negatur. Itaque locus ex accidente ad refellendam substantiam non valet, ne si inseparabilis quidem sit. Nam argumen-

gumentum illud, Si non est albus, nō est olor: Si non est niger, non est coruus: quia non fortuita & aduentitia sunt, ad Proprij locum referenda sunt.

Quod est firmamentū conuenientiæ? Quoniam accidens, nihil aliud est, quàm id quod fortuitò conuenit, nullus hic disputationi de conuenientia locus est. Reciprocationis autem hoc primum firmamentum est: Non vt posito antecedente, ponitur substantia: ita posita substantia, continuò succedit accidens. Potest enim & matrimonium sine dote, & mutuum sine pignore consistere. Sequitur II. Nō vt negato accidente substantia non tollitur, ita negata substantia, non tollitur accidens. Sublata enim substantia (vt iampridem superiùs dictum est) continuò tollitur accidens.

De loco Parium. CAP. XXIII.



Q U O D est firmamentum de Paribus? Primum hoc esto: Vt posito vno pari, alterum conceditur: ita negato vno, alterum negatur. Paritas enim ex Relatorum numero est: quorum eam esse naturam diximus, vt alterum sine altero esse non possit, sed vtrunque simul esse & incipiat & desinat. Itaque Reciprocationis nulla omninò dubitatio est. Quæ igitur duo in tertio aliquo pariter conueniunt, etiam inter se paria sunt. omnis enim huius loci vis proportio-

ne continetur. veluti: Si drachma decē assibus Romanis valuit: pares fuerunt drachma & denarius. Eaque ratione exterarū gentium mensuræ & pondera omnia inter se conferentur. Si duo nūmi vni momento pares sunt, etiā inter se sunt pares. Si duæ magnitudines tertiæ alicui, puta perticæ, sunt pares, etiam inter se sunt pares. Sequitur II. Quorum alterum tertio alicui par non est, ea inter se non sunt paria. Quod ex alterius collatione facillè intelligitur.

Quod est Firmamentum de conuenientia? Primum est hoc. I. Quod vni pari conuenit, etiam alteri conuenit. valeat æquitas (inquit Cicero) que in pari causa paria iura desiderat. Si parricida in culeum insuendus est, etiā matricida. par enim sceleribus paribus supplicium debetur. Si liberto impuberi patronus tutor esse debet, etiam filio impuberi pater tutor sit oportet. Si finem edicto Prætoris affuerunt Kalendæ Ianuarij, cur non initiū quoque nascitur à Kalendis Ianuarij. Nam Kalendæ Ianuarij vtrique extremo annui imperij conueniunt. Sequitur II. Quod vni pari non conuenit, alteri non conuenit. Veluti: Si hæc forma illi calceo non cōuenit, huic qui par illi est, non cōueniet. Sequitur III. Vt paria paribus, sic imparibus imparia conueniunt. Vnde illud præclarū Aristotelis, qui lib. Ethic. 5. scribit, contentiones, bella, inimicitias ex eo nasci, quod vel æqualibus nō æqualia: vel non æqualibus.

æqualibus æqualia tribuuntur. Ex eodem genere illud est Quintiliani: Quemadmodum vascula oris angusti superfusam humoris respuunt copiam, sensim autem instillantibus replentur: sic tenera puerorum ingenia grandia non percipiunt: modica & viribus suis apta commodius addiscūt. Atque hæc quidem hætenus de proportionem, quæ in tribus versatur. deinceps de quadruplici videamus.

Quod est Firmamentum Reciprocationis? Quod in ceteris omnibus paribus conuenit, etiam in vnum conueniat necesse est. Quo firmamento vis eius argumentationis, quæ Inductio appellatur, tota consistit. veluti: Summum imperium fuit apud Assyrios. Assyriorum potiti sunt Medi. Medos superauere Persæ. Persis Græci dominati sunt. Græcos Spartiatæ sub imperium suum redegerunt. Spartiatas superauere Thebani. Thebanorū potiti sunt Macedones. Macedonas Romani subegerunt. Romanos Gotti. Non dubium est igitur, quin Gottorum imperium non sit perpetuum futurum.

Quid sequitur nunc? Ordo quidem consentaneorum habituum postulabat, vt de comparatione minoris hoc loco diceremus: sed quia diuelli maioris & minoris comparationes nisi difficillimè non possunt, propterea satius est eam ad locum de disparibus reseruare: ac iam de Similitudine disserere.

R

De loco Similium. CAP. XXIIII.

QUOD est Firmamētum de Similibus?
 Vt paritas, sic etiam similitudo rerum, ex tertio aliquo foris ascito, cognoscitur. Itaque huius quoque loci vis omnis proportionem consistit. Primum igitur hoc esto: Quatenus duo in tertio aliquo conueniunt, eatenus inter se similia sunt. Nam posito vno simili, alterum ponitur. veluti, Si lapis ille qui ferrum allicit, est Magnes, hic qui ferrū similiter attrahit, eodem nomine est. Huc illud pertinet ridiculū de Nerone qui matrem Agrippinā interficiendā curarat.

Quis neget Aeneae magna de stirpe Neronem?

Sustulit hic matrem, sustulit ille patrem..

Tertium in quo Aeneas & Nero conueniunt est sublatio parentum. Cuius ex verbi ambiguitate luditur. Locatio & conductio ea re emptioni & venditioni similis est, quia ut hæc sine pretio, sic illa sine mercede constare non potest. In quo perspicua proportionis ratio est. Sequitur II. Quatenus duo in tertio aliquo non conueniunt, eatenus inter se similia non sunt. Nam ut in Affectuum doctrina diximus: Simile & dissimile nō vsquequaque, sed tantum ex parte dicuntur. Sed de dissimilibus inferius suo loco differemus.

Quod est Firmamentum de conuenientia? Primum est huiusmodi: Quod in vna re simili valet, etiam in ceteris valebit. veluti: Ut tutela,

tela, sic procuratio Reip. ad vtilitatem eorum qui commissi sunt, non ad eorum quibus commissa est, gerenda est: ait in Offic. Cicero. Vt remiges sine gubernatore, ita milites sine imperatore nihil valent: inquit idē apud Quint. li. 5. ca. 11. Vt ager quāuis fertilis, sine cultura fructuosus esse non potest: sic sine doctrina animus. apud eundē Tusc. 2. Item lib. de Natur. Deor. 3. Vt in iure ciuili, qui est de matre libera liber est, item iure naturæ qui de dea matre est, Deus sit necesse est. Sequitur II. Quod in re simili non valet, nec in ceteris valebit. veluti: Si quod medicamentū nihil in vnius morbo depellendo valuit, ne in alterius quidem consimili morbo valebit.

Quod est Firmamentum reciprocationis? Quod in ceteris rebus similibus valet, etiam in vna valeat necesse est. Nam ex hoc fonte ea nascitur argumētatio, quam inductionem appellant: quæ similitudini reciprocatur. Nam similitudo illa est, si socius fidem debet, debet etiam mandatarius, depositarius, tutor, & procurator. Illa autem inductio: Si socius, mādātarius, & depositarius fidem præstant, etiam procurator præstat. Sequitur II. Quod ceteris similibus non conuenit, etiam vni alicui non conuenit. veluti: Si quod medicamentū nihil in multorū morbis consimilibus depellendis valuit, nihil in huius consimili morbo valebit.

De loco Aduersorum.

CAP. XXV.

QUOD est Firmamentum ex aduersis, cum de essentia quæritur? Esto hoc I. Posito vno contrario, siue quod medium habeat, siue quod non habeat, alterum tollitur. Tantum enim ad refellendum hic locus valet. Veluti: Si stat, non mouetur. si mouetur, non stat. Si par est numerus, non est impar. Si impar, non est par. Mediati autem contrarij hoc exemplum est: si pulchra mulier est, non est deformis. Si diues est, non est pauper. quorum vtrunque reciprocatur. Sequitur II. Sublato contrario, quod medium non habeat, continuò alterum ponitur. Veluti: Si leuis non est, est grauis: & vicissim. Item: Si paritas non est, est imparitas: & vicissim. Item, Aut amat, aut odit mulier: nihil est tertium. Ergo, si non amat, odit: si non odit, amat. Sequitur III. Sublato contrario, quod medium habeat, non continuò alterum ponitur. Potest enim intermedium aliquod succedere. non si non est dies, continuò nox est: aut ex contrario. Potest enim esse vel diluculum, vel crepusculum. Non si non est attror, continuò est candor: aut vicissim. Potest enim esse color aliquis intermedius, vt fuscus, aut ceruleus.

Quod est Firmamentum de conuenientia? Huius loci præcepta de conuenientia & reciprocatione communia sunt. Aduersa enim simul sunt natura. Itaque simul ea duo tractabuntur

buntur. Primum igitur hoc esto. I. Quod vni contrario conuenit, alteri non cōuenit, sed potius eius contrarium. Nam contraria de contrariis dicta probabilia sunt: vt ait Aristoteles: & (vt Cicero scribit) Contrariis contraria conueniunt. Itēque alio loco: Omnium rerum in contrarias partes facultas ex iisdem suppeditatur locis. veluti: Si bonum liberi, misera orbitas. Si bonum patria, miserum exiliū. Si bonū valetudo, miserum morbus. Si bonū integritas corporis, misera debilitas. Si bonū, incolumis acies, misera cecitas: ait Cicero, de Finib. 5. Ex eodem genere illud est in Miloniana: Non fuisset iusta causa restituendi mei, nisi fuisset iniusta eiiciendi. Item illud Aristotelis in Rhetoricis, quod Quintilianus protulit: Si malorum causa bellum fuit, erit emendatio pax. Siqui imprudens nocuit, nullam poenam meretur: qui imprudens profuit (vt qui Phæreo Iasoni vomicam aperuit) præmium nullū meretur. Si mulieri adulterij damnatæ testimonij dictio adimitur, honestæ matrifida. conceditur. Si quem ex iudicum numero Prætor iudicare vetat, ceteris id concedit. Cicero pro Sylla: Neque verò quid mihi irascere, intelligere possum, si quòd eum defendo, quem tu accusas: cur tibi quoque ipse non succenseam, qui accuses eum, quem ego defendo? Inimicū (inquis) accuso meum. Et amicum ego defendo meum. Sequitur II. Quod vni contrario non conuenit, eius contrarium alteri contra-

rio non conuenit. Contrariorum enim contraria sunt cōſequentia: inquit Cicero: id eſt, Conſequentia contrariorum æquè ſunt inter ſe contraria, vt ipſa contraria. veluti: Si ebrietas turpis non eſt, ſobrietas non eſt honeſta. Si vitium non eſt fugiendum, virtus non eſt expetenda. Si præmiū bene meritis ciuibus non debetur, neque pœna malè meritis debetur. Ac præclara hæc conuenientiæ ratio eſt, quæ proportionem & analogiam oſtendit. Nam poſitis binis aduerſis, quam rationem habet prima pars primi ad primam ſecundi, eandē habet ſecunda pars primi ad ſecundam partem ſecundi. Itaque locus hic ex Contrariorū conuenientia & ad confirmandum & ad refellendū valet. veluti: Ponatur in A ſobrietas. in B temulētia. Subter altera ducatur linea: & in C ponatur honeſta. in D turpis. Tum ita ratio ineatur: Si vt A eſt ad B, ita C ad D: neceſſariò vt eſt A ad C: ita B ad D. Ex eodem genere illud eſt Stoicorum: Si virtutes pares ſunt inter ſe, paria etiam eſſe vitia neceſſe eſt. quòd ſi hæc paria non ſunt, ne illę quidem. Et ex hac eadē proportionem quæſtio illa explicabitur: An præmiū Tyrannicidę propoſitum ei debeatur, qui Tyrannum imprudens necarit. Si veniam meretur, qui imprudens nocuit: etiam meretur præmiū qui imprudens profuit. At nulla inter Veniam & Præmiū proportio eſt. ſunt enim diſparia. Sic igitur ad proportionem reuocanda res eſt: Vt veniam, id eſt nullam pœnam

nam meretur, qui imprudens nocuit: sic nullum præmium meretur, qui profuit imprudens. Nam positis binis aduersis quam rationem habet prima pars primi ad partem primam secundi, eandem habet secunda pars primi ad secundam partem secundi. Itaque locus hic & confirmandi & refellendi vim habet.

Cedo planius aliquod exemplum de Reciprocatione. Ponatur in A virtus: in B vitium. Subter altera ducatur linea, & in C ponantur expetenda, in D fugienda. Tum ita ratio incatur: Si ut est A ad B, ita est C ad D: necessario ut est A ad C: ita B ad D. Itaque si hoc fugiendum non est, ne illa quidem expetenda. Et si illa non expetenda, ne hoc quidem fugiendum. Si qui imprudens nocuit, nullam pœnam meretur (id est veniam) is qui profuit imprudens, nullum præmium meretur. Item, si qui imprudens nocuit, veniam meretur: iccirco qui imprudens profuit, præmium meretur. Nam præmium non est contrarium veniæ, sed nulla pœna, nullum præmium. Si virtutes pares sunt inter se, paria esse etiam vitia necesse est. Quod si hæc paria non sunt, ne illa quidem.

De loco Priuantium.

CAP. XXVI.



Q UOD est Firmamentum ex Priuantibus, cum de habitus essentia quaeritur? Primum est huiusmodi: Posita priuatione ut habitus tollitur, ita ali-

quādo affuisse arguitur. Nam locus hic ad habitum & confirmandum & refellendum valet. veluti, Si est nox, dies non est, nunc quidē, sed prius fuit. Si est morbus, valetudo non est, nunc quidem, sed prius fuit. Sequitur II. Sublato priuante quod medium non recipit, habitus cōceditur: sublato eo quod recipit, non conceditur. veluti: Si non est mors, est vita. At non sequitur, si non est calidum, est frigidum. potest enim esse tepidum. neque rursus, Si non est morbus, est valetudo. nam medicorū sententia quidam habitus interiectus est. Sequitur III. Negato habitu poni priuatio non potest. Itaq; nō potest videri defuisse habere, qui nunquam habuit: inquit Paulus Iurisconsultus. neque sponsa diuortium fecisse, quæ nunquam simul cum viro habitauit. neque quisquam plus iuris in alterum transferre, quā ipse habuit. neque rem amittere, quorū propria non fuit. In hoc genere illa Curiana causa est apud Ciceronem de postumo, qui cū natus non esset, mortuus dici non poterat. Sic in Paradox. Itaque pulsus ego ē ciuitate non sum, quæ tum nulla erat. accersitus in ciuitatem sum, cū esset in Rep. Consul, qui tū nullus fuerat: esset Senatus, qui tum occiderat.

Quod est Firmamentum de Conueniētia? Hic videndum est diligēter, vt præceptum de Conuenientia ad hunc locum accommodemus, quatenus priuatio spectatur, non quatenus est oppositio & ἀντιθεσις. Nam firmamentum

tum de oppositorum conuenientia propriè non pertinet, nisi ad locum aduersorum. Non enim vt contrariorum contraria sunt consequentia, sic priuantium consequentia sunt cōtraria. Nam in priuantibus non est æqua proportio. veluti, Visus & cecitas & priuātia sunt & opposita. At locus de conuenientia non est accommodādus tanquā ad opposita, sed tanquam ad priuantia. Nam si dicamus, Vt cecitas est malum, sic aspectus est bonum: rectè quidē argumētābimur: sed nō ex priuantibus verūm ex contrariis. Idque ex altero exemplo apparebit. Virgo & nupta priuantia sunt. At non si virgo casta est, iccirco nupta erit non casta. non si illa honesta, iccirco hæc inhonestā. Non si cœlibatus honestus est, iccirco coniugium inhonestum est. Priuātium enim consequentia non sunt inter se contraria: sed interdum consentanea. Et quamuis prima specie videantur, tamē illa pugnantia non est priuantium, sed contrariorum. Itaque locus ex Priuantibus nunquam ad contrariorum conuenientiam probandam valet. non enim in illo æqua proportio est. veluti, Vita & Mors priuantia sunt. Non autē si vita beata est, iccirco mors misera est. nec ex cōtrario, si mors misera est, iccirco vita est beata. multi enim & in vita & post vitam sunt miserrimi. Firmamentū igitur est huiusmodi. I. Cui priuatio conuenit eidem habitus non conuenit, nunc quidem, sed antea conuenisse arguitur. veluti: Siquid

amifisti, id non habes: nunc quidem: sed antea certè habuisti. Si in ciuitatem restitutus est, nunc quidem exul non est, sed certè prius fuit. Si conualuit, ægrotauit. Ex hoc genere illud est Ciceronis in lib. de nat. Deor. 3. Temperāria constat ex prætermittendis voluptatibus corporis, cui si locus in cælo est, est etiam voluptatibus. Sequitur II. Cui priuatio non cōuenit, eidem contrarium conuenire arguitur. veluti: Si non ægrotat, valet. Si non est cæcus, videt. Si non est surdus, audit.

Quod est Firmamentum de Reciprocatione? Esto hoc I. Non vt posita priuatione affuisse habitus arguitur, ita posito habitu affutura priuatio arguitur. Sequitur II. Vt negato priuante immediato, habitus conceditur: ita negato habitu, locus priuationi nullus est. Sequitur III. Non vt cui priuatio conuenit, eidem habitus antea conuenisse arguitur: ita cui habitus conuenit, in idem casura priuatio arguitur.

De loco Aientium & Negantium.

CAP. XXVII.



Q UOD est firmamentum de Aientibus & Negantibus? Argumentum hoc simul & essentiam & conuenientiam, & reciprocationem complectitur. Itaque primum erit huiusmodi: Vt posito aiente negans, sic posito negante aies tollitur.

Omnium

Omniū enim contrariorum hæc summè cōtraria sunt. Itaque medium non recipiunt: vt in affectuum præceptione diximus. veluti: Si quis legit, non potest dici nō legere. vicissimque, si quis non legit, dici non potest legere. Si quis diues est, non potest dici non diues: vicissimque si quis non est diues, dici diues non potest. non enim medium, quod est mediocritas, recipit. Sequitur II. Vt sublato negante, aiens conceditur: sic aiente sublato, negans conceditur. Ergo si quis non est indoctus, sequitur vt idē sit doctus: vicissimque si doctus non est, etiam indoctus est. Si quis non est ingratus, sequitur vt sit gratus: vicissimque si quis gratus non est, idem est ingratus. In hoc genere illud est Iurisconsultorum: Quem sine liberis esse dicere non possumus, hunc necesse est dicamus liberos habere: quanuis vnū tantum habeat. Aristoteles autem reciprocatōnis exemplum profert acutissimum: quod tamen ad antecedentis & consequentis locum pertinere superiùs diximus. Si quod honestū est, id laudabile est: etiam quod laudabile non est, id honestum non est. Et si quod laudabile non est, id honestum non est: etiam quod honestum est, id laudabile est. Si quod homo est, id animal est: etiam quod animal non est, homo non erit. Et si quod animal non est, homo non est, etiam quod homo est, necessariò animal est. Eodem modo: Si virtus est expetenda, etiam quod expetendum non est, virtus non

est : vicissimque quod virtus est , expetendum est.

De eadem Contrariorum disciplina.

CAP. XXVIII.



QUOD sequitur nunc? Ut de repugnantium loco differamus. sed prius peruulgatum illud axioma explicandum est quo traditur , Contrariorum artem ac disciplinam eandem esse. *ἡ δὲ ἐναντία ἐστὶ τῷ αὐτῷ ἐνσημειω.* Et alio loco, Contrariorum eandem vim ac potestatem esse.

Quotuplex contrariorum facultas est? Duplex. Efficiens, & (ut ita dicam) patiens.

Quæ est efficiens? Quæ parem in utroque contrario efficiendi causam ostendit. Itaque firmamentum ipsius non sic exponendum est, quasi contrariorum eadem potestas esset : sed hoc modo : Contrariorum par potestas atque efficientia est. non enim eadem illorum vis est, sed contraria. veluti: Si calor laxat, frigus astringit. si ignis exsiccat, aqua madefacit. si bellum exitiale est, pax est salutaris. Ut creditor aliud pro alio incommodo suo accipere : sic debitor aliud pro alio soluere non cogitur. Contrariorum enim contraria vis atque potestas est. Ut quod testator legato adiecit, legatario accrescit : sic quod detraxit, legatario decrescit. Et hoc est quod dici solet: Quod operatur propositum in proposito: idem opera-

operatur oppositum in opposito. l. si ex toto, 8. D. de legat. prim. l. ult. in fin. D. de legat. tert. Ex eodem genere illa est regula: Secundū naturam est commoda cuiusque rei eum sequi, quem sequuntur incommoda.

Quæ est Contrariorum facultas patiens? In qua hominum artes contrarios effectus pariunt. non enim in ipsis rebus vis illa inest, sed potius in hominibus, qui eas res tractant, & in quibus elaborant. Artes autem aliæ sunt cognitionis, aliæ actionis: quarum ambarum vnum idemque axioma illud est, Contrariorū eadem vis atque potestas est.

Cedo exemplum de cognitione. Aristoteles initio lib. Ethic. 5. scribit, quoniam eadem contrariorum est δύναμις: eum qui bonam corporis cōstitutionem norit, eadem facultate malam quoque cogniturum. Sic cuius musici est nosse fidium consonantiam: eiusdē est earundem dissonantiam intelligere. Cuius medici est nosse ex arteriæ pulsu, aut vrinæ colore bonam valetudinem, eiusdem est nosse morbum. Quæ igitur ars vnus contrarij cognoscendi, eadem alterius quoque intelligendi facultatē præbet. Cognoscendi enim contraria vna eadēque ars, scientia, & facultas est. Ex eodem genere illud quoque firmamentum est: Contrarij vnus qualitate cognita, simul alterius qualitas contraria esse intelligitur. Nam (vt superius dictum est) contraria contrariis conueniunt. Itaque cū vel è genere duæ spe-

cies vel è toto duæ partes diuifæ atque inter fe oppositæ funt , fi vni certa qualitas vel attribuatür, vel denegetur, fimul alteri contraria qualitas conuenire intelligitur. vnde illud Iurifconfultorum: Qui accusare poffunt, intelligemus, fi fcierimus, qui non poffunt. Item illud: Si cognouerimus quæ perfonæ alieno iuri fubiectæ funt, fimul intelligemus, quæ fui iuris funt. Sed non iccirco firmamentum ita concipiendum eft: Vno contrario cognito, fimul alterum cognofcitur. non enim contrarium fimul cognofcitur: fed eius qualitas alteri cõtraria. Ex eodem genere illa regula eft, Quod fub conditione iubetur, deficiente conditione non iuffum intelligitur. veluti: Si mater mea moritur, dato: Nifi moritur, ne dato. l. quibus, ii, §. 2, D. de cond. & demonftr. Sic qui fic legat: Pamphilus fi rationes reddiderit, liber efto: ita ftatuiffe intelligitur: Si nõ reddiderit, ne efto. Sic qui fic pacifcitur: Si filia in matrimonio fine liberis moriatur, dotē reddi: pacifci intelligitur, fi fupervitibus liberis moriatur, non reddi. l. inter focerum, 26, §. 1, D. de pact. dotal. Atque huc pertinet vis omnis exceptionum.

Ecquamnam Exceptionum vim appellas? Effectus exceptionis hic eft, vt cùm ex vniuerfo partem exemit, contrarias in feiunctis partibus conditiones demonftraret. Si exceptio facit ne liceat (inquit Cicero in ea pro Balbo) ibi neceffe eft licere, vbi non eft exceptum.

quam


quam enim relictis conditionem attribuit, eius contrariam in exemptis ostendit: vicissimque quam istis, eius contrariam illis. adeo ut etiam in partibus non exemptis suam conditionem illustrare & confirmare videatur. Et hoc est quod dici solet, Exceptio in casibus non exceptis regulam confirmat. l. Tribunus, 20, §. 1, D. de milit. test.

Cedo exemplum. Cum miles factus in testamento quod ante militiam fecerat, quædā delet, ius eorū quæ non deleuit militari privilegio confirmat. Eodémque illud pertinet, cum prætor vnum ex pluribus iudicare vetat, ceteris id permittit. l. cum prætor, 12, D. de iudic. Ex eo quod prohibet lex Iulia testimonium dicere mulierem adulterij condemnatam, colligitur etiam mulieres testimonij etiā in iudicio dicendi ius habere. l. ex eo, 18, D. de testib. Eodémque præterea regula illa referenda est, In toto iure generi per speciem derogatur. l. in toto, 80, D. de reg. iur. quæ tamen planius & fortasse verius ita conciperetur: Et pars toti derogat: & res singularis Vniuersitati. veluti, si cum Titio penum omne legatum esset, Mæuio postea vinum legetur: Mæuio vinum debebitur. l. 2, D. de tritic. vin. & si Titio fundi instrumentum vniuersum legatum sit, post mǎcipium quoddam Mæuio legetur, huic mancipium illud: illi reliquum omne debebitur. l. legatum, 24, §. 1, D. de adim. legat.

Cedo iam exemplum de Actione. Suma-

tur illud peruulgatum: Qui condemnare potest, is absoluendi quoque potestatem habet. Item, Eius est nolle, qui potest & velle. Vicissim autem, Qui adire hereditatem non potest, repudiare non potest. Item, Pater captiuus qui consentire filij nuptiis non potest, nec dissentire potest. Item, Eiusdem est artificis ex arte dissoluere, cuius est ex arte construere. Sic, Faber, qui domum aut nauem ædificauit, eandem ex arte dissoluet. & artifex qui horologiū confecit, idem arte dissoluet: quod artis imperitus non poterit.

De loco Repugnantium. CAP. XXIX.

 V O D est Firmamentum de Repugnantibus? Locus hic & essentiam & conuenientiam, & Reciprocationem simul complectitur. Primū autem est huiusmodi. I. Posito vno ex Repugnantibus, alterum tollitur. Valet enim idem quod illud, Cui vnum è Repugnantibus conuenit, ei repugnat conuenire alterum. Repugnans enim aliud nihil est, nisi aduersi vel consequens, vel antecedens. Itaque ad refellendum hic locus valebit. Si amicus est, non est lædendus. Si hostis est, non iuuāndus. Si mortuus editus est, non est natus. Si proba vxor est, non est exigēda. Si improba, non retinenda. Lēdendū enim est consequens aduersi, quod est Hostis: vt Exigendū, improbæ. Consequentia autem
contra

Contrariorum sunt etiam ipsa per se contraria. Sequitur II. Negato vno ex Repugnātibz, alterum succedit. Valet enim idem quod illud: Cui vnum è Repugnantibus non conuenit, eidem alterum quod quidem in eodem genere sit, necessariò conuenit. Itaque ad confirmandum & refellendum hic locus valet: Si nō est socius, lædendus est. Si est hostis, non est iuandus. Sic Cicero in Parad. Potes autem esse tu ciuis, propter quem aliquando ciuitas non fuit? Repugnant enim Ciuem esse, & Ciuitatē opprimere. hoc modo: Non & ciuitatem oppressisti, & idem es ciuis. Si honestum est, non est inutile. Si turpe, nō est vtile. Reciprocationis autem exemplum est huiusmodi: Vt non imaginaria venditio est, pretio accedente: sic non vera venditio est, pretio non accedente. Vt tyrannus non est, qui ciuium commodis consulit: sic Rex non est, qui non consulit. Vt impius non est, qui toto pectore Deum colit: ita pius non est, qui eum non colit.

De loco Disparium.

CAP. XXX.

QUOD est Firmamentum ex disparibus, cum de eorum essentia quæritur? Vt paritas rerum, sic etiā disparitas ex aliquo tertio intelligitur. Itaque primum Firmamentum hoc erit: Quæ in tertio aliquo disparia sunt, quorumque alterutrum dūtaxat dispar est, eadem in-


ter se disparia sunt. veluti: Si è duobus frumenti aceruis alterum medimno, alterũ modio conueniat, etiam inter se sunt dispares. Id quod ex illo Mathematicorum præcepto sumptum est: Si æqualium alterum tertio inæquale fuerit, etiam erit alterum. Sed de imparium essentia facilis ex Parium loco diiudicatio est.

Quod est firmamentum de conuenientia? Locus de conuenientia implicitam reciproca- tionem habet. Itaque vno firmamento v- tranque complectemur: Quod vni disparium conuenit, alteri non cõuenit. veluti: Si Gigan- ti toga quædam conuenit, pumilioni nõn con- ueniet. Si pro frumẽti medimno tot asses de- bẽtur, pro modio non tot debentur. Si Gigas & pumilio vinciendi sunt, illi catenis opus est: huic funiculus satis erit. Et eo pertinet re- gula Iuris, vt quẽmadmodum valere debet æ- quitas quæ in pari causã pariã iura deside- rat: sic ea valeat, quæ in causã dispari, dispa- ria iura constituit. Sequitur II. Quod vni dis- pari non conuenit, non continuò alteri eius dispari non conuenit. veluti: Non si toga par- uula Giganti non conueniet, iccirco pumi- lioni non conuenit. Sequitur III. Neque pa- ria disparibus, neque disparia paribus conue- niunt. Eoque illud Geometrarum præceptũ pertinet, Si inæqualibus æqualia vel addãtur, vel detrahantur, omnia erunt inæqualia. ve- luti: Si pari pœna furem & sacrilegum affice-
re

re iniquum est, dispari pœna duos eiusdem furti socios afficere iniquum est. Si par præmium forti & ignauo tribuere iniustum est, dispar eiusdem præclari facinoris sociis tribuere iniustum est. Locus autem de conuenientia duplex est. Nam quæ disparia sunt, aut maiora sunt, aut minora. Itaque duplex Comparatio nascitur: quarum altera ex maiore, altera ex minore appellatur.

De Comparatione Maioris & Minoris.

CAP. XXXI.

 V I D appellas Maius & Minus? Maius est, non quod Cicero, Quintilianus, & alij innumeri crediderunt, id quod præstantius, aut quod difficilius est: neque Minus id verè est, quod facilius & expeditius est: sed (quemadmodum Aristoteles & in Topicis & in Rhetoricis ad Theodectem docuit) Maius hîc appellatur, quod maiorem rationem habet ad aliquid, quod magis probabile est, quod verò propius est, quod maiore ratione conuenire posse videbatur. Minus autem, quod à vero & probabili disiunctius est, quodque minorem rationem habet ad aliquid: quod minore ratione alicui conuenire videbatur. Alioqui vis argumenti nulla prorsus existeret: vt ex firmamentis constabit. quorum hoc prius est, I: Quod in re maiore non valet, etiam in minore non

valet ἐὶς ὃ μᾶλλον εἰκὸς ὑπάρχειν, μὴ ὑπάρχει, ἐδὲ ὃ
 ἤτιόν. Nam si quæ (inquit Aristoteles) multo
 maiore ratione res aliqua conuenire potest, ei
 non conuenit, ne ei quidem conueniet, cui
 multo minus videtur posse conuenire. Itaque
 locus ex maiore tantum ad refellendum valet.
 vt rectè sine dubio sentiant, qui regulam in
 Topicis Ciceronis sic emendant: Quod in re
 maiore non valet, non valeat in minore. Ple-
 runque autem per has notas Nedum, vel
 Tantum abest, hoc argumentum tractatur, ve-
 lut apud Terentium: Satrapes si fiet, nūquam
 sufferre eius sumptus queat: nedum tu possis.
 In eodem genere illud est: Tantum abes à per-
 fectione maximorum operum, vt fundamenta
 quæ cogitas nondum ieceris. Item illud: Fa-
 miliam regere non potuit: tantum abest, vt
 Remp. possit. Quo argumento Paulus Apo-
 stolus utitur in eo qui familiæ suæ præesse nō
 poterat, tantum abest vt Ecclesiæ præesse pos-
 set. quod tamen ex minore sumptum nonnul-
 li falsò existimarunt. nam maiorem habet ra-
 tionem paterfa. ad suam familiam, quàm ad
 Ecclesiam aut Rempub. Ex hoc genere illud
 est Ciceronis lib. de Orat. i. Illa verò deriden-
 da arrogantia est, in minoribus nauigiis rudē
 esse se confiteri: quinquereemes autem, aut e-
 tiam maiores gubernare didicisse. Item: Ci-
 tius is qui duorum scalmorum nauiculam in
 portu euerterit, in Euxino ponto Argonauta-
 rum nauem gubernarit.

Quod

Quod est firmamentum ex comparatione minoris? Quod in minore valet, valeat in maiore. nam sicui minus conuenire videbatur, conuenit tamen: etiam ei conueniet, cui magis conuenire videbatur. *εἰ τὸ ἥττον ὑπάρχει, καὶ τὸ μᾶλλον ὑπάρχει.* Itaque locus hic tantum ad confirmandum valet. veluti: Si feræ partus suos diligunt, qua nos in liberos nostros indulgentia esse debemus? Nam minorem habet rationē fera rationis experts ad suos partus, quàm homo qui & rationis & doctrinæ est particeps ad suos liberos. Si singulas disciplinas percipere magnum est, quanto maius omnes? Si bellum pro patria susceptum pium & iustum est, quantò magis illud quod pro religione suscipitur? Qui mentiri aut fallere infuerit patrem, aut audebit, tanto magis audebit ceteros. Itaque rectè Cicero in lib. de Orat. 2. ex minore exemplum hoc profert:

-hic parue consuetudinis

Causa huius mortem fert tam familiariter.

Quid si ipse amasset? quid mihi hic faciet patri?

Sed ex maiore non rectè: Si bona exultimatio diuitiis præstat, & pecunia tantoperè expetitur, quanto gloria magis est expetenda? Nam ex minore hoc quoque exemplum esse ex eo intelligitur, quòd minorem habet rationem pecunia ad hominem, quàm gloria. Quod autem ibidem similitudini locum illum attribuit, Si feræ partus suos diligunt: perspicuè falsum & absurdum est. Idque est totidè pro-

pè verbis in Lælio. Quòd si hoc (inquit) apparet in bestiis, vt requirant atque appetant ad quas se applicēt, eiusdem generis animantes, quanto magis in homine fit natura, vt alterum acquirat, cuius animum ita cum suo commisceat, vt efficiat penè vnum ex duobus?

Quid? Regula illa peruulgata, vtro ex loco sumpta est? Non debet cui plus licet, quod minus est non licere. Ex comparatione minoris. Minus enim dicitur, quod minus conuenire & licere posse videbatur. At illud, Qui fidem in re parua non pręstitit, is in magna nō pręstabit: ex maioris comparatione sumptum est: id est eius quod magis conuenire videbatur.

De loco Dissimilium.

CAP. XXXII.



Q U O D est firmamentum de Dissimilibus? Vt rerum disparitas, sic etiam dissimilitudo ex tertio aliquo exquiritur. Itaque primum firmamentum est huiusmodi. I: Quæ in tertio aliquo dissimilia sunt, quorúmque item alterum duntaxat simile est, etiam inter se dissimilia sunt. Itaque locus hic ad probandam dissimilitudinem valet. veluti cūm quæritur, An asinus & mulus dissimiles sint: sic concludetur: Si asinus ex asino & asina, mulus ex asino & equa genitus est, sunt dissimiles. Itēque si quærat, An mulus & hinnulus sint dissimiles:

similes: sic licebit concludere. Si mulus & hinnulus genitores habent dissimiles, etiam inter se sunt dissimiles. mulus autem ex asino & equa, hinnulus ex equo & asina generatur.

Quod est firmamentum de Conuenientia? Idem quod de reciprocatione. Itaque vna eadem regula vtrunque concludemus. Quod vni dissimili conuenit, alteri non conuenit. veluti: Si lachrymæ mulieribus conueniunt, viris non conueniunt. Si viris arma conueniunt, mulieribus non conueniunt. Sequitur III. Quod vni dissimili non conuenit, non continuò alteri eius dissimili non conuenit. veluti: Non si lusiones senibus nō conueniūt, iccirco pueris non conueniunt. Non vt ex improbo patre probus filius nascitur, sic ab indocto præceptore doctus discipulus efficitur. Sequitur IIII: Neque similia dissimilibus, neque dissimilia similibus conueniunt. Si similem priuato & Consuli togam permitti iniquum est, etiam dissimilem duobus Consulibus attribuere iniquum est.

De loco Definitionis. CAP. XXXIII.

PERGE porro: ac deinceps de dictionū ratione & mutuis affectionibus disseramus. Nihil verò attinet eum laborem capere, cū rerum locis quiuus mediocri ingenio præditus faciliè de dictionum locis existinare pos-

fit. Quatuor tantum locorum specimen edemus, Generis, Totius, Causæ, & Antecedentis: quorum primus & secundus per definitionem, tertius per notationem, quartus per coniugationem tractatur.

Quid? non igitur separatos facis tres locos ex definitione, notatione, & coniugatis? Fieri quidem id vulgo in libris & scholis dialecticorum solet. Sed, ut opinor, ab iis qui non satis videntur animaduertisse, neque affectiones esse illas tres, neque argumenta, neque argumentationes: sed argumenti tantum tractandi formas, ut cum diximus argumenta ex partibus & formis per Partium enumerationem tractari: aut ea quæ ex Antecedentibus, consequentibus, & repugnantibus, iis tribus tractari modis, quos Cicero in Topicis exposuit. Absurdum enim esset, locos ex partibus & ex partium enumeratione, quasi diuersos separare: quemadmodum posterius intelliges. Harum verò trium rationem in præsentia satis erit ex sola definitione cognoscere.

Quomodo? Quia definitionem non esse affectum, vel hinc licet intelligatur, quod ea ex affectionum locis vel omnibus, vel plerisque (ut superius demonstratum est) conficitur. Iam argumentum non esse ex eo constat, primum quod cum definitio per argumentum probeatur, perspicuum est, aliud esse quod probatur, aliud medium per quod probatur. Deinde quod

quod singuli affectus argumenta singula sup-
 peditant: neque vllum vnum ex pluribus su-
 mitur. At definitio necessariò ex pluribus cõ-
 iunctis conficitur. veluti ex genere & specie
 per differentiam distracta, aut, si per diuisionem
 fit, ex genere & formis omnibus: si per
 Partitionem ex Toto & Partibus. Postremò de-
 finitionem dici argumentationem non posse,
 hinc perspicuum est, quòd vnica enuntiatio-
 ne definitio constat, cum argumentatio mini-
 mum ex tribus componatur.

Quænā igitur erroris peruulgāti causa est?
 Creditum est Ciceronis eam fuisse senten-
 tiam, cum tamē & in Topicis & in Partitioni-
 bus & in lib. de Oratore 3. nō dicat argumen-
 ta sumi ex definitione, neque definitionem in
 locis numeret: sed ad id totum de quo differi-
 tur, adhiberi. Si res tota (inquit) quæritur, de-
 finitione vniuersa vis explicanda est: quippe,
 cum vniuersa vis & notio vel subiecti, vel at-
 tributi, definiendo explicetur. Ex quo perspi-
 cuum est, locum qui vulgo Ex definitione ap-
 pellatur, esse, si subtilior definitio sit, vel ex ge-
 nere & formis, vel ex toto & partibus: sin ru-
 dius exposita est, ex aliquo reliquorum affe-
 ctuum sumptum esse.

Cedo aliquod exemplū. Ponatur illa quæ-
 stio, An Rhetorica sit laudabilis: dein ratioci-
 natio, Ars copiosè dicendi est laudabilis: Rhe-
 torica est ars copiosè dicendi: Ergo Rhetorica
 est laudabilis. Mediū perspicuè sumitur ex ge-

nere & specie per differentiam distracta : id est, ex genere & differentia. At si sic concludatur: Rhetorica est ars inueniendi, quæ ad persuadendum valet, eaque disponendi eloquendi & memoriter pronuntiandi : horum autem vnumquodque laudabile est : Rhetorica igitur laudabilis : si sic, inquam, concludamus, ex Toto & Partibus erit argumentatio. Definitio igitur non argumenti locus est, sed argumenti tractatio, vel argumenti tractandi forma.

Nullane igitur de Definitione firmamenta traduntur? Tradi certè possunt, sed non tanquam loci alicuius proprii, verum tanquã generis, aut totius. Veluti I: Cui conuenit definitio, eidẽ nomen conuenit: vicissimque quod definitioni conuenit, id nomini conuenit. Hoc enim perinde est, ac si dictum esset: Cui genus totumve conuenit, ei species parsve conuenit: vicissimque quod generi totius conuenit, id speciei partive conuenit. Valet autem ad confirmandum. veluti : Si iustitia est habitus rationi consentaneus, rectè virtus appellabitur. Si Dauidus seruitutem seruit, est seruus. Quoniam (inquit Cicero de Finib. 1.) cum priuamur dolore, ipsa liberatione ac vacuitate omnis molestiæ, gaudemus : omne autem id quo gaudemus, voluptas est: vt omne quo offendimur dolor: doloris omnis priuatio rectè nominata est voluptas. De conuersa autem conuenientia exemplum extat eiusdem in Topicis:

Si

Si Ius ciuile est æquitas constituta iis, qui eiusdem ciuitatis sunt, ad res suas obtinendas, eius autem æquitatis notitia est utilis: certè Iuris ciuilis cognitio est utilis.


Quod est secundum? Cui non conuenit definitio, eidem nec nomē conuenit. Valet enim ad refellendum. Cicero in Parad. Si nemo diues est, nisi qui exercitum alere potest suis fructibus, hoc proposito nunquam eris diues, antequam ex tuis possessionibus tantum reficias, vt ex eo tueri sex legiones possis. Iam fateris igitur non esse te diuitem, cui tātum desit, vt expleas id quod exoptas? In eodē genere illud est: Si neque sacrum, neque de sacro quicquam surripuit, non est sacrilegus. itēque illud Iuriscōsultorum: Si stipulatio est verborum conceptio, qua qui interrogatus est, daturum se respondet: neque mutus, neque surdus stipulari possunt.

Quæ est Regula de Reciprocatione? Vt cui nomen conuenit, eidem definitio conuenit: sic cui definitio conuenit, eidem nomen conuenit. Et contrā, cui vnum non conuenit, nec alterum conuenit. veluti: vt qui in vniuersum de functi ius successit, heres est: ita qui heres est, in defuncti ius omne successit.

Quoniam paulo antè dixisti definitionem Argumentatione & Syllogismo probari: quæro quænam definitionis probandæ ars est? Aristoteles duobus locis hanc tradit, vt non tota oratio pro extremis collocetur, sed eius ea

pars duntaxat, ad quam probatio pertinet. Nam cum definitio rei naturam explicet, si quis ea sola sumat, quæ de natura rei dici debent, definitionem cōficiet. veluti: Si quis (inquit) probare velit, Aquam esse humorem potabile, Aqua & potabilis pro extremis collocanda sunt: humor autem pro medio. Quod eodem modo in illis Ciceronis definitionibus ostendi potest. Odium est ira inueterata: Inimicitia est ira vlciscendi tempus obseruans: Discordia est ira acerbior, intimo odio & corde concepta: Indigentia libido inexplebilis. Nam cum intermedium nomen vtrique extremo conueniat, necessariò ambo extrema inter se conuenient.

De loco Notationis. CAP. XXXIIII.

 VONIAM superius quid Notatio esset definisti, quæro nunc quotuplex notatio est? Triplex: alia enim verborum est simplicium, alia iunctorum: & rursus simplicium, alia natiuorum, alia factorum. Itaque ad tres affectuum locos notatio pertinet, Causarum, Proprij, & Totius. Natiuorum, veluti: cum propria cuique vocabuli notio exquiritur. vt cum quæritur cur Vultus nullo in animante ponatur præter hominem: cur Morbus in corpore, Vitiū in animo ponatur: cur Rapiendi verbo vis insit: Furandi non insit. Factorum, vt, Fides dicitur, quia quod pro-

promissum est, fiat. Nequitia ab eo quod nequicquam est in tali homine. Coniunctorum verò : vt, An Tumultus nō dicitur, nisi cū timor multus est. Benè (inquit Cicero) maiores nostri accubationem epularem amicorum, quia vitæ coniunctionem haberet, conuiuium nominarunt. meliùs quàm Græci, qui hoc idem tum computationem tum concœnationem vocant.

Quænam de Notatione firmamenta ponemus? Eadem quæ de causæ aut proprii conuenientia posuimus. Itaque primum erit huiusmodi: Cui conuenit notatio, eidē nomen conuenit. Valet enim ad confirmandum. Si Reip. consulit, est Consul. Si ædes tuetur, est ædituus. Quoniam vidua dicta est sine duitate (ait Labeo) quemadmodū vecors & vefanus sine corde & sanitate : sequitur vt ea quoque mulier quæ virū nunquam habuit, vidua dici possit. Sequitur II: Cui notatio non conuenit, eidem nomen non conuenit. Valet enim ad refellendum. veluti : Si non est timor multus, non est tumultus. nisi consilium, ratio, & sententia essent in senibus (ait Cato apud Ciceronem) non summum consilium maiores nostri appellassent Senatum. Eiusmodi argumentū fuit Friderici Imperatoris aduersus Adrianum Papam de quo est in Radeuici historia : Si vrbis Romæ dominus non sum, Romanus Imperator nō sum. Cū diuina (inquit) ordinatione, ego Imperator Romanus & dicar, &

gnus putetur? cui tandem hic libero imperabit, qui non potest suis cupiditatibus imperare: cum ipse improbissimis dominis dedecori & turpitudini parere desierit. Item, Præclare dictum est, nisi sapientem liberum esse neminem. Quid est enim libertas? Potestas viuendi ut velis. quis igitur viuit ut vult, nisi profectò, qui recta sequitur?

Quod est firmamentum de conuenientia? Esto hoc I. Quod vni ex necessariis coniugatis conuenit, alteri conuenit. veluti: Si sapientia laudanda est, Socrates, qui sapiens est & sapienter viuit, laudandus est. Si ebrietas vituperanda est, etiam ebriosi vituperandi sunt. & si ebrij, etiam ebrietas. Si Regulus Tyrannidē in suos exercet, Tyrannus est. Si Reges Tyrannorum nomen oderunt, oderint Tyrannidē. & quod rectè fit (inquit Cicero) & honestè, & cū virtute, id benefieri verè dicitur: & quod rectum, & honestum, & cum virtute est, id solum opinor bonum. Sequitur II. Quod vni ex necessariis coniugatis non conuenit, alteri non conueniet. veluti: Si non continenter viuit, nō est continens. Si non est continens, non continenter viuit. Si non est laudanda crudelitas, nec crudeles laudandi sunt. At hoc non recipitur. Si fuit intestabilis, testamentū non fecit. Non si testamentum non fecit, fuit intestabilis.

Quid sequitur nunc? Vulgò exponi solent loci probationum inartificialium ex locis assumptis:

sumptis : vt ex testimonio , auctoritate , iure-
iurando ; præiudiciis , rumoribus , tabulis.
Sed hæc (vt superius monui) quæ non in ra-
tiocinatione , sed in sensibus posita sunt , & fa-
cti sunt non artis , nihil ad Dialecticam perti-
nent. Itaque ex Rhetorum disciplina , in qua
sola hæc Aristoteles tradidit , eruenda sunt.
Fides enim disputando non ex testibus , sed
ex argumentis eruitur. non enim tam au-
ctores in disputando , quàm ratio-
nis momenta quærenda sunt:
ait Cicero libro de
nat. Deor. I.

FINIS LIBRI TERTII.

T j





INSTITUTIONIS
DIALECTICAE
LIBER IIII.



De Analytice, siue arte iudicandi.

CAP. I.



QVONIAM de inuentione Medij Syllogistici satis dixisti, deinceps de ipsius collocatione videamus: quam iudicandi artem superius Analyticen appellabas. Sed primum quæro, quid est Analytice? Est ars, quæ medij ad vtrunque quæstionis extremum adhibendi rationem commonstrat.

Quisnam eius artis est vsus? Probatio cõsecutionis, qua pronuntiata omnia vel vt vera recipiuntur, vel vt falsa repudiantur. Nam vt in ædificiis, alius est faber, qui lapides lapidibus adiungit: alius peritus, cuius arbitrio effectum opus probatur: sic oratio verba verbis adiungit: sed Analyticæ artis probatio est, vtrum ea inter se rectè coniuncta sint, an secus.

De

De Syllogismo, & variis Syllogismi generibus.

CAP. II.

QUONIAM superiùs diuisionē argumentationis exposuisti, deinceps singulas eius species videamus: ac primùm de syllogismo. Quid est Syllogismus? Aristoteles duobus locis ita definit, συλλογισμός ὅστις λόγος ἐν ᾧ τεθέντων τινῶν ἑτερίν τι τῶν κειμένων ἐξ ἀνάγκης συμβαίνει, ὃν τῶν κειμένων. Gellius autem Latinè ita conuertit: Oratio in qua confessis quibusdam atque concessis, aliud quid, atque ea quæ concessa sunt, per ea quæ concessa sunt, necessariò conficitur. Sed Aristoteles initio priorum Analyticorum pro clausula ὃν τῶν κειμένων: hæc posuit πρὸ ταύτης ἑῃ. λέγω ὃν (subiungēs) πρὸ ταύτης ἑῃ, τὸ ὃν ταύτης συμβαίνειν. quoniā nullo externo eget extremo, vt necessaria fiat consecutio. Itaque planius hæc definitio cōuerti sic poterit: Est oratio, in qua quædam ita ponuntur, vt aliud quippiam diuersum ab iis quæ posita sunt iccirco efficiatur necessariò, quoniam ea ita sunt. quanquā eandem vtriusque vim esse, verbum ἐξ ἀνάγκης ostendit.

Quomodo? Quoniam non ad cōclusionē ea verba pertinent, sed ad necessariā mediij & extremorum coniunctionem. nam (vt idem alio loco declarat) quando medium necessariò cohæret, etiam conclusio necessariò sequitur. ὅταν τὸ μέσον ἐξ ἀνάγκης, καὶ τὸ συμπέρασμα ἐξ

ἀνάγκης. Non enim (vt alio item loco docuit) ex omnibus propositionibus veris Syllogismus efficitur: sed ex duabus necessariò consequentibus, & inter se non minus cohærentibus, quàm annuli in cathena conferti inter se cohærent. Oportet enim conclusionem ex superiorum propositionum consecutione exprimi: quemadmodum paulò pòst intelliges.

Vnde dicitur Syllogismus? Idem Aristoteles translatum esse verbum ostendit, ex calculatorum ratiocinationibus: cùm ait esse tanquam συλλογὴν ἢ ἐπαριθμῆσιν, hoc est collectionem summæ, quæ initis subductis: que rationibus conficitur: qua de causa ratiocinatio Latine à Cicerone appellatur. veluti, Callicli data sunt primùm quinque: post eidem septē data sunt: duodecim igitur ad summam data sunt. Quanquam in tam exiguis numeris frigidius exemplum est.

Quotuplex est Syllogismus? Duplex. Est enim (vt idem scribit) aut κατηγορητικὸς, aut ἐπιδεικτικὸς: id est, aut simplex, aut copulatus. Simplex est, qui ex puris enuntiatis constans, purè concluditur. veluti, Omnis arbor vere florescit. Platanus est arbor. Ergo vere florescit. Copulatus autem, qui non purè, sed vel per conditionem, vel per disunctionem, vel per coniunctionem cōcluditur. veluti: Si dies est, sol lucet. Item, aut dies est, aut nox est. Non & dies est, & nox est. Simplicem solum Aristoteles tractauit, quoniā ad demonstrationem omnem

omnem suam artem dirigit. Copulatū, Theophrastus, Eudemus, & Stoici cōplures, quemadmodum Boëtius testatur.

Quibus in rebus omne Syllogismi artificiū versatur? In ratiocinationis figura & modo. Est autem figura mediij collocādi forma. Modus autem, qui in enuntiatorum qualitate & quantitate cernitur.

Quot sunt huius artificij regulæ? Vulgò hæc quinque traduntur: quarum hæc I. est: Quod de omni dicitur, de singulis ei subiectis dicitur. vnde illud Ciceronis lib. de nat. deor. 3. Si omne animal mortale est, nullum est animal immortale. Et si omne animal secari ac diuidi potest, nullum est eorum indiuiduum. Et, si esset corpus aliquod immortale, non esset omne mutabile. Sequitur II. Quod dicitur de nullo, à singulis ei subiectis remouetur. Sequitur III. Ex solis negatiuis nihil concluditur: qua de causā propositionum alterutrā affirmatiuam esse oportet. IIII. autem est hæc. Ex solis particularibus nihil conficitur. quapropter propositionum alterutram vniuersalem esse oportet. Superest V. Conclusio semper ad deteriore[m] se partem applicat. nam si propositionum alterutra negatiua est, ipsa erit negatiua: si particularis, erit particularis.

De partibus Syllogismi, & vi conclusionis.

CAP. IIII.

T 3



Q U O T sunt Syllogismi partes? Superiùs dictũ est, ratiocinationem aliam fuisse Stoicorum propriam, aliam Peripateticorum. ac Stoici quidem syllogismi partes infinitæ sunt. tandiu enim verborum series textitur, dum is qui disserit, quod intendit, efficiat. Aristoteles autem primũ acutissimè perspexit, nullam in iis verã mediij vim apparere. nam id demum medium dici, quòd equè ab utroque extremo abest. deinde vim & necessitatem conclusionis nequaquam in illis longis verborum continuationibus ita esse perspicuam, ut in paucis. Quapropter Aristoteles ad eam quam potuit paucitatem ac breuitatẽ Syllogismi partes redegit: trẽsque tãtummodo effecit. quarũ prima Propositio, altera Assumptio, tertia Conclusio Latine appellatur. Græci verò πρό-
τασις, λήμμα, & συμπέρασμα nominant.

Quid est propositio? Superiùs dictum est, Analyfin Aristoteli in argumentando placuisse, contrariam ei synthesi, quam Stoici sequuti sunt. Itaque quod illi postremum collocabant, Aristoteles primum sumpsit. veluti (ut in peruulgato exemplo consistamus) si ponatur quæstio, an Callicles sit animal: medium adhibebitur ex specie, homo. ac tum ita ratio inibitur, non ut ab imo ad summum ascendamus: quemadmodum Stoici faciebant: Callicles est homo: homo est animal: ergo Callicles est animal. Sed primo loco medium summetur.

metur. De homine verò pronuntiatur animal, quippe genus de specie. hæc propositio est. deinde hoc modo: De Callicle verè pronuntiatur homo. quippe species de indiuiduo. vnde necessaria conclusio sequitur: Ergo animal verè de Callicle pronuntiabitur. Superiùs enim legem illam posuimus: Quod medio conuenit, ei quoque cui medium conuenit, necessariò conuenit. Conuenire autem dicuntur, quæ subiectorum attributa sunt.

Quamobrem secunda Enuntiatio dicitur assumptio? Quoniam in argumento pro iam concessio sumitur: vt cum dicimus: Si homo est animal, Callicles est animal. Illud pro concessio sumitur: Calliclem esse hominem. In quo illud obseruandum est, hoc inter Stoicum & Aristotelicum argumentum interesse, quòd quàm partem Stoici propositionem faciunt, eam Aristoteles assumptionem facit: vicissimque quàm illi assumptionem, hic propositionem. Nam in quæstione, An Callicles sit animal, Stoici sic disputant: Si Callicles homo est, Callicles est animal. vbi illud pro concessio sumunt: Omnis homo est animal. Aristoteles verò hoc modo: Si homo est animal: Callicles est animal. quasi iam concessum illud fuisset, Callicles est animal.

Quanam igitur est Conclusionis istius necessitas? Quia necesse est ex antecedentibus necessariis consecutionem effici necessariam. Quod Aristoteles in definitione dixerat, ἐξ α-


νάγκης. Necessestatem enim non ad conclusionem duntaxat (vt superius diximus) sed communiter ad propositionem & assumptionem retulit. vt planè demirer esse, qui cōtra definitionem Aristotelis illud obiiciunt: Venti incubere mari: Crebris micat ignibus æther: Denfi fundūtur ab æthere nimbi: Ergo tempestas est. Hic enim & veras esse propositiones, & necessariam consecutionem: neque tamen syllogismum existere. ac proinde falsum esse quod dictum est, Syllogismum esse, qui ex pluribus veris propositionibus efficitur. quasi verò Virgilianæ istæ propositiones eiusmodi sint, cuiusmodi Aristoteles posuit: nimirū necessitate ita inter se connexas, & cohærescentes, vt annuli in cathena cōserti adhærescunt. ὅταν τὸ μέσον ἐξ ἀνάγκης, καὶ τὸ συμπέρασμα ἐξ ἀνάγκης: & (vt alibi scribit) αἰεὶ γὰρ ἢ ὅλη, ἢ μέρος αἱ προτάσεις ἐξ ἑνὸς συλλόγισμος. Semper propositiones debent ita esse inter se affectæ, quasi aut totum, aut pars. Argumentum autem illud Virgilianum est ex causis efficientibus sumptum: sed non inter se consequentibus, ac necessario cohærentibus. nam vt venti mari incubuerint, tempestas effecta erit: quāuis neque nimbi, neque fulgura coniuncta sint.

Ecquonam igitur pacto Syllogismus ex illo Virgiliano exemplo concludi potest: Aestus maris nauē impellit. Ventorum impetus estū efficit. Ergo ventorum impetus navis iactationem efficit. Nam posita quæstione, An ventorum

torum impetus nauis iactationē efficiat, medióque interposito, Aestus maris: facillè concludetur, quod medio adhærescit, ei quoque cui medium conuenit, necessariò conuenire.

De tribus Syllogismorum Figuris.

CAP. IIII.

 VOT sunt Medij collocandí formæ? Tres. Nam aut inter duos quæstionis terminos interponitur, qui locus Medio maximè conuenit: aut supra vtrunque, aut sub vtroque. vnde tres Syllogismi figuræ ab Aristotele factæ sunt: prima ex loco Medij dignissimo: secunda ex eo qui minus dignus est: tertia ex infimo.

Quomodo medium inter vtrunque extremum interiicitur? Cum primo loco maius extremum de ipso dicitur: pòst ipsum de minore. Nam propositio fit ex medio & attributo: Assumptio ex subiecto & medio. vnde subiecti & attributi cōuenientia perspicitur. Scitum est autem, quod Aristoteles scribit, ex figuris omnibus hanc esse ad docendum accommodatissimā, & mathematicas omnes scientias, veluti Arithmeticā, & Geometriam, suas in hac figura demōstrationes concludere: propterea quòd omnes quæ causā rei fit, declarant. certissimum autem & exquisitissimū sciendi genus esse, per quod rei cuiusque causā intelligitur.

Cedo exemplum primæ figuræ. Esto posita quæstio, An sobrietas sit laudabilis, Sobrietas minus extremum est. laudabilis, maius. Adhibeatur medium ex genere minoris, Virtus. Tum ita disseratur.

Virtus est laudabilis

Sobrietas est virtus

Ergo sobrietas est laudabilis.

{	2 laudabilis	A
	1 virtus	4 } B
	Sobrietas	3 } C

Nam genus Subiecti quæsitum est, Virtus: quæ inter duo quæstionis extrema ita interiicitur, ut in propositione sit subiectum attributi, & in assumptione attributū subiecti. quod autem generi convenit, etiam speciei conveniat necesse est. Itaque ad hunc locū illud quoque pertinet: Quæ mulier lac habet, ea peperit. Hæc mulier lac habet. ergo peperit.

Quomodo Medium supra utrumque extremum collocatur? Cū de ambobus extremis pronuntiatur: id est, cū & in propositione & in assumptione utriusque extremi attributū est. veluti, Ponatur quæstio, an aliqua ebrietas sit laudabilis. Deinde sumatur Medium, ex repugnantibus attributi, nimirum Turpe.

Nihil quod dementat est laudabile

Omnis ebrietas est dementans

Nulla igitur ebrietas est laudabilis.

{	1	Laudabilis	B
	2	Dementās	4 } A
		Ebrietas	3 } C

In

In hac autem figura hoc perpetuum est, vt nulla ex ea colligi affirmatio possit.

Quomodo medium sub vtroque extremo collocatur? Cùm de Medio vtrunque extremum pronuntiatur. Cùm & in propositione & in assumptione Medium vtriusque extremi subiectum est. veluti, Ponatur quæstio, An aliqui homines sint atri. deinde sumatur Mediũ ex specie: nimirum, Aethiopes.

<i>Aethiopes sunt atri</i>	{	2 Atri	{	A
<i>Aliqui homines sunt Aethiopes</i>		1 Aethiopes		C
<i>Ergo aliqui homines sunt atri.</i>		Aliqui homi nes		B

Huius autem figuræ hoc proprium est, vt conclusio semper sit particularis. veluti,

Socrates est probus

Socrates est Philosophus

Ergo aliqui Philosophi sunt probi.

Possumusne, quoniam hæ Figuræ appellantur, & ex Mathematicorũ consuetudine sumptæ sunt, descriptionem earum aliquam ob oculos ponere? Licet verò, idque Aristotelis exemplo, qui cùm adolescentibus in mathematicis artibus eruditus Logicam traderet, accuratè istam figurarum & descriptionum consuetudinem seruauit.

Prima igitur figura
hæc esto.

Secunda hæc.

Tertia huiusmodi.

Si de B dicitur A, B autem de C. Certè de C dici- tur A.	Si de A nõ dicitur B. De C autè dicitur A. Certè de C non dici- tur B.	Si de C dicitur A De B autè dicitur C. Certè A dicitur de B.
---	---	--

Ita B, quæ medij nota est, in prima suum lo-
cum obtinet: in secunda summum, in tertia
infimum.

A.	B.	A.
B.	A.	C.
C.	C.	B.

De Modis prima figura. CAP. V.



QVO T sunt modi primæ figuræ? Qua-
tuor tantum modis variari prima
figura potest. qua de causâ quatuor
eiusmodi numerantur. quoniam au-
tem eorum modorû fluxa memoria est, iccir-
co adiuuandæ memoriæ causâ, vulgò in scho-
lis receptum est, vt quatuor primis vocalibus
hi quatuor designentur modi. nam A vniuersa-
lis affirmatiuæ nota est. E vniuersalis negatiuæ.
I particularis affirmatiuæ. O particularis ne-
gatiuæ. vnde ficta vocabula, *χαῖματᾶ, ἔχαψι,*
χαφίδι, τεχνικός. ἔχαψι, κάτεχε, μέτριον, ἄχολον:
ἅπανσι, σέναρος, ἰσάκις, ἀσνίδι, ὀμαλὸς, φείσος. Et la-
tini versiculi:

Barbara,

*Barbara, celarent, prima: darij, ferioque,
 Casare, camestres, festino, baroco, secunda:
 Tertia grande sonans dedit, darapti, felapton.
 Adiungens, disamis, datisi, bocardo, ferizon.*

Primæ autem figuræ hæc ratio est, vt Barbara valeat ad rem ex toto confirmandam: Celarent ad rem ex toto refellendam: Darij ad rem ex parte cõfirmandam: Ferio ad rem ex parte refellendam.

Age, quis est primus primæ figuræ modus? Cùm è propositione & assumptione vtraque & vniuersali, & affirmatiua, vniuersalis & affirmatiua conclusio cogitur. atque hoc quidem primo modo genus omne quæstionis tractari potest: sed cautio adhibenda est, vt propositio sit vniuersalis, & assumptio affirmatiua.

Bar	<i>Omne animal est mortale</i>	$\left\{ \begin{array}{l} 2 \\ 1 \end{array} \right. \cdot 4 \left\{ \begin{array}{l} 2 \\ 3 \end{array} \right.$
ba	<i>Omnis homo est animal</i>	
ra	<i>Ergo omnis homo est mortalis.</i>	

Quodnam huius syllogismi firmamentum est? Medium est ex genere ad speciem, cuius hoc firmamentum est: Quod generis proprium est, idem speciei quoque proprium est. Nam propositio proprij affectione continetur. Proprium enim animalium est mori. quod cùm de inanimatis dicitur, veluti de stirpibus, trãstãtè dicitur. assumptionem verò generis affectio sustinet.

Quis est secundus? Cùm è propositione vniuersali negatiua & assumptione vniuersali

affirmatiua conclusio vniuersalis negatiua cogitur: Semper enim (vt antè diximus) ad deteriore[m] se partem applicat conclusio. veluti,

Ce	<i>Nullus sapiens est auarus</i>	2	}	4
la	<i>Omnis Philosophus est sapiens</i>	1		
rent	<i>Ergo nullus Philosophus est auarus.</i>	3	}	3

Quod est huius Syllogismi firmamentum? Locus est ex genere ad speciem, cuius hoc firmamentum est. Quod generi repugnat, idem speciei quoque repugnat. Nam propositio repugnantium affectione continetur: assumptio generis.

Quis est tertius? Cùm è propositione vniuersali affirmatiua, & assumptione particulari affirmatiua, conclusio particularis affirmatiua cogitur. Semper enim (vt dixi) deteriore[m] partem conclusio sequitur. veluti,

Da	<i>Omne inutile est fugiendum</i>	}	2	}
ri	<i>Quaedam artes sunt inutiles</i>		1	
j	<i>Ergo quaedam artes sunt fugienda.</i>	}	4	}
			3	

Quodnam huius firmamentum est? Locus est ex genere ad speciem, cuius hoc firmamentum est: Quod generis est consequens, idem quoque speciei est consequens. Nam propositio consequentiũ ratione continetur: assumptio, generis.


Quis est quartus? Cùm ex proportionem vniuersali negatiua, assumptione particulari affirmatiua, conclusio particularis negatiua cogitur. veluti:

Fe	<i>Nullus sapiens mœrore conficitur</i>	2	}	
ri	<i>Quidam Philosophi sunt sapientes</i>	1	}	4
o	<i>Quidam igitur Philosophi mœrore non conficiuntur.</i>		}	3

Locus est ex genere ad speciem, cuius hoc firmamentum est: Quod generi repugnat, idē speciei repugnat. Nam propositio repugnantium ratione sustinetur: assumptio generis.

De quatuor secunda figura modis.

CAP. VI.

 VOT sunt Modi secūde figure? Quatuor: quorū primus est cū ex propositione vniuersali negatiua, & assumptione vniuersali affirmatiua, sequitur conclusio vniuersalis negatiua. veluti,

Cæ	<i>Nullus perturbatus ratione bene utitur</i>	2	}	
sa	<i>Omnis sapiens ratione bene utitur</i>	1	}	4
re	<i>Nullus ergo sapiens est perturbatus.</i>		}	3

Locus est ex proprio: cuius hoc firmamentum est, Quod proprio non conuenit, speciei non conuenit. Nam propositio repugnantium ratione animatur: assumptio proprij. Repugnāt autem sapientem esse, & non bene ratione vti.

Quis est secundus? Cū ex conuersis superioribus propositionibus conuersa conclusio efficitur. Sola enim propositionum inuersione à superiore discrepat. veluti,

Ca	<i>Omnis Tyrannus est crudelis</i>	{ 1	{ 2	{ 4
mes	<i>Nullus vir bonus est crudelis</i>			
tres	<i>Nullus vir bonus est Tyrannus.</i>			{ 3

Locus est ex Repugnantibus, cuius hoc firmamentum est: Quod vni Repugnantium conuenit, alteri non conuenit. Nam propositionem proprii affectio continet: assumptionem repugnantia.

Quis est Tertius? Cum ex propositione vniuersali negatiua, & assumptione particulari affirmatiua, sequitur conclusio particularis negatiua: veluti

Fe	<i>Nulli sapientes secum ipse dissident</i>	1	{	4
sti	<i>Quidam Philosophi secum ipsi dissident</i>	2		
no	<i>Quidam igitur Philosophi non sunt sapientes.</i>	3	{	

Locus est ex genere. cuius hoc firmamentum est, Quod generi repugnat, id speciei quoque repugnat. Nam propositio est ex repugnantibus: assumptio ex genere.


Quis est Quartus? Cum ex propositione vniuersali affirmatiua, & assumptione particulari negatiua, particularis negatiua conclusio sequitur. veluti,

Ba	<i>Omnis sapiens virtute contentus est</i>	{ 1	{ 2	{ 4
ro	<i>Quidam Philosophi virtute contenti non sunt</i>			
co	<i>Quidam igitur Philosophi sapientes non sunt.</i>	3	{	

Locus

Locus est ex Repugnantibus, cuius hoc firmamentum est. Quod vni conuenit, alteri non conuenit. propositio est ex proprio, assumptio ex repugnantibus.

De sex tertia figura Modis. CAP. VII.

 VOT sunt modi tertiæ figuræ? Sex. quorum primus est cum ex propositione & assumptione vniuersalibus affirmatiuis, particularis affirmatiua conclusio conficitur.

Da	<i>Omnes fœnatores sunt auari</i>	2	
rap	<i>Omnes fœnatores sunt pecuniosi</i>	1	3
ti	<i>Aliquis igitur pecuniosus est auarus.</i>	4	5

Locus est ex causâ sine qua non, cuius hoc firmamentum est: A quo abest causâ sine qua non, ab eo absit effectus necesse est. Propositio est ex proprio, assumptio ex causâ.

Quis est Secundus? Cum ex propositione vniuersali negatiua, & assumptione vniuersali affirmatiua, particularis & negatiua cõclusio sequitur. veluti,

Fe	<i>Nullus filius fa. est sui iuris</i>	2	
lap	<i>Omnis filius fa. est liber</i>	1	3
ton	<i>Ergo non omnis liber est sui iuris.</i>	4	5

Locus est ex specie ad genus, cuius hoc firmamentum est: Quod speciei conuenit, generi conuenit. Propositio est ex consequentibus: assumptio ex specie.

Quis est Tertius? Cum ex propositione particulari affirmatiua, assumptione vniuer-

fali affirmatiua particularis affirmatiua conclusio sequitur. veluti,

Di	<i>Aliquis fœnerator est improbus</i>	2	
fa	<i>Omnis fœnerator est pecuniosus</i>	1	3
mis	<i>Aliquis ergo pecuniosus est improbus.</i>		4

Locus est ex causa sine qua non: cuius idē firmamentum, est quod paulo antè commemorauimus. Propositio sumitur ex adiunctis: assumptio ex causa.

Quis est quartus? Cū ex propositione vniuersali affirmatiua, assumptione particulari affirmatiua, particularis affirmatiua cōclusio conficitur. qui modus à tertio sola propositionum dispositione discrepat. veluti,

Da	<i>Omnis fœnerator est improbus</i>	2	
ti	<i>Aliquis fœnerator est pecuniosus</i>	1	3
fi	<i>Ergo aliquis pecuniosus est improbus.</i>		4

Locus & firmamētum eiusdem modi quē proximè exposuimus.

Quis est quintus? Cū ex propositione particulari negatiua, assumptione vniuersali affirmatiua, particularis negatiua conclusio colligitur. veluti,

Bo	<i>Aliquis mercator non est improbus</i>	2	
car	<i>Omnis mercator est pecuniosus</i>	1	3
do	<i>Aliquis igitur pecuniosus non est improbus</i>		4

Locus est ex causa sine qua non. Propositio verò ex accidenti.

Quis est sextus? Cū ex propositione vniuersali

uersali negatiua, assumptione particulari affirmatiua, particularis negatiua conclusio efficitur. veluti:

Fe	<i>Nullus sapiens est improbus</i>	} 2	3 }
ri	<i>Aliquis sapiens est pecuniosus</i>		
son	<i>Non omnis igitur pecuniosus est improbus.</i>	4 }	

Locus est ex Accidenti: firmamentum propositionis ex Repugnantibus.

De Syllogismo copulato, & primum de figuris conditionalis.

CAP. VIII.

Quid sequitur nunc? Quoniam ad mediocrē Dialecticę cognitionem satis de puro & simplici Syllogismo dictum est, vt deinceps de hypothetico siue copulato differamus. Est autem Syllogismus copulatus, Oratio quę ex hypotheticę propositionis, parte altera, eıve opposita, partem alteram eıve oppositam cōcludit. Quoniam autē vis omnis huius syllogismi in superiore inest, neque tantus ipsius est vsus, vt eum Aristoteles tractatione sit dignatus (omnes enim suos syllogismos Aristoteles ex simplicibus pronuntiatis confecit, nullos ex disıunctionibus & coniunctionibus) modicē nos quoque genus hoc disputationis attingemus.

Quotuplex est Syllogismus copulatus? Tri-

plex : ex conditione , disiunctione , & coniunctione. Atque hic nimirum est, de quo tam valde & tam sæpe Cicero commemorat: cuius longè plurimæ (vt superius diximus) argumentationes magis Stoicæ sunt , quàm Aristotelicæ.

Quot sunt figuræ Syllogismi conditionalis? Tres: quarum prima est cum propositionis conditionalis affirmatiuæ vel ponitur antecedens, vt consequens ponatur : vel negatur antecedens, vt consequens negetur. Appellant autem Dialectici (inquit Cicero) eam conclusionem argumenti, in qua cum primum sumpseris, consequitur id quod connexum est, primum conclusionis modum. veluti : Si sol lucet, dies est. sol autem lucet. dies est igitur. Ipsa enim ratio connexi (vt ait alio loco Cicero) cum concesseris superius, cogit inferius concedere. Posterioris autem hoc exemplum est . Si sol non lucet, dies non est. sol autem non lucet. dies igitur non est.

Quæ est secunda? Cum propositionis conditionalis vel affirmatiuæ negatur consequens, vt antecedens negetur : vel negatiuæ consequens affirmatiuè pronūtiatur , vt antecedens ponatur. veluti: si sol lucet, dies est. non est autem dies: sol igitur non lucet. Item : Si sol non lucet, dies non est. Est autem dies. sol igitur lucet. Vtranque figurā Cicero lib. de Diuinatione 2. coniunxit : Si dii sunt , est diuination. sunt autem dii. est ergo diuination. Multo est probabilius: Nō est autem diuination: nō sunt
ergo

ergo dij. Nam cū id quod annexū est negaris, vt id quoque cui fuerit annexum, negetur, secundus appellatur concludendi modus: inquit Cicero in Topicis. In lib. autem de Finib. 4. Huius conclusionis firmamentum hoc profert: Docent (inquit) Dialectici, si ea quæ rem aliquam consequantur, falsa sint, falsam illam ipsam esse quam sequantur. Ita fit illa conclusio non solum vera, sed ita perspicua, vt Dialectici ne rationem quidem reddi putēt oportere. Si illud, hoc: non autem hoc: ne illud quidē. Et paulo post: Teneamus enim illud necesse est, cū consequens aliquod falsum est, illud cuius id consequens sit, non posse esse verum. Ex eodem genere illa Ciceronis conclusio est: Si pares sunt omnes virtutes, paria etiam omnia vitia sunt. Non sunt autem vitia paria, neque virtutes igitur.

Quæ est tertia? Cū propositionis conditionalis negatiue sumitur antecedens, vt tollatur consequens. veluti: Non & sol lucet, & dies non est. Sol autem lucet. Non igitur dies non est. Nam cū aliqua coniuncta negaris, & his alia negatio rursus adiungitur: & ex his primum sumpseris, vt quod relinquitur tollendum sit: is tertius appellatur conclusionis modus: inquit Cicero in Topicis. Vbi meminisse illud te oportet, quod superius monuimus, quo loco Cicero hæc tractat, quamuis Antecedentia, Consequētia, & Repugnantia nominet, tamen non quasi argumentorum locos,

sed tanquam eorū tractandorū formam & rationem exponi . quod ipse quoque disputationis illius initio his profitetur verbis : Cū tripartitò distribuatur locus hic , reperiendi argumenti locus simplex est, tractandi triplex.

De Syllogismo disiunctiuo. CAP. IX.

DEINCEPS de disiunctione videamus . Quotuplex est syllogismus disiunctiuus? duplex. Nā aut duabus tantū partibus constat , aut pluribus . verū ille propriè dicitur per disiunctionem tractari , hic verò per partium enumerationem. Rursus syllogismus disiunctiuus duplex est. nam aut ad partem alterutram vel confirmādam, vel refellendam adhibetur: aut ad vtranque . Atque hic posterior propriè Dilemma nominatur.

Quot sunt figuræ syllogismi disiunctiui? Duę: quarum prior est, cū propositionis disiunctiue altera pars sumitur, vt altera tollatur. Nam in disiunctione plus vno verum esse non potest. Atque hic quartus connexę conclusionis modus appellatur. veluti, Aut stat, aut mouetur. Stat autem, non mouetur igitur. Sic enim (vt Cicero scribit) Dialectici statuant, omne quod ita disiunctum sit , quasi aut etiā, aut non, non modò verum esse, sed etiam necessarium. & lib. de Nat. deor. i. In omnibus disiunctionibus, in quibus, aut etiam, aut non ponetur

retur, alterutrum verum esse.

Quæ est secunda? Cùm propositionis disiunctiuæ altera pars tollitur, vt altera ponatur: qui copulatæ conclusionis quintus est modus. veluti: Numerus aut par est, aut impar. Impar autem hic non est. Par est igitur.

Quodnam huius est axioma? In syllogismo disiunctiuo necesse est alterum ex duobus quæ disiunguntur verum, alterum falsum esse. Nam eæ demum disiunctiones ad has conclusiones valent, quæ ex iis contrariis sumuntur, quæ neque medium habent, & quorum alterutrum esse necesse est: de quibus suo loco differuimus. velut illa quæ modò posuimus. Item illud: Aut dormit, aut vigilat. Aut cœlebs est, aut maritus. Omne animal aut agit, aut patitur. Itaque si inter diem & noctem est diluculum, vulgata conclusio non valeret: Aut dies est, aut nox est. Illa autē perspicuè vitiosa est, Aut stat, aut sedet. potest enim cubare. quod neutrum est. Aut alb' est, aut niger. potest enim fuscus esse: qui est vtriusque particeps. Aut mas est, aut fœmina. Potest enim esse hermaphroditus. Item, mulier est aut pulchra, aut deformis. Potest enim statata esse forma.

De figuris Syllogismi coniunctiui. CAP. X.



NTE QVAM de aliis disiunctiuis differamus, locum hunc de Copulato syllogismo absolui oportet. Quot sunt figuræ coniunctiui syllogismi?

Duæ: quarum prior est cùm propositionis cōnexæ negatiuæ altera pars sumitur, vt altera tollatur: qui sextus numeratur modus. veluti, Non & dies & nox est. at nox non est. dies est igitur.

Quæ est secunda? Cùm propositionis cōnexæ negatiuæ altera pars tollitur, vt altera ponatur. qui septimus censetur modus. veluti.

Terra non & grauis est, & leuis.

At non est leuis. grauis est igitur.

Nam hic syllogismus ex coniunctionum negantia conficitur.

In quibus contrariis coniunctiuus syllogismus valet? In iis quæ neque medium habent, & quorum vtrunque verum esse non potest: sed quorum vno sumpto vel negato, alterum vel tollitur, vel sequitur. veluti: Non & vigilat, & dormit. At quæ sunt huiusmodi, vt vel eorū vtrunque verū esse possit, vel vtrunque simul & neutrum, non valet. Itaque longè dissimilis disiunctiuus & coniunctiuus syllogismi ratio est.

Cedo exemplum. Vera illa disiunctiua est: Omne animal aut facit, aut patitur. At hæc cōiunctiua non valet: Non & agit, & patitur. Potest enim facere & pati simul: vt ait Proculus Iurisconsultus. Similiter illa vitiosa est, Non & aspectus est, & cæcitas. Lippitudo enim interiecta est. Item illa: Non & mas & foemina est. Pōtest enim hermaphroditus esse. Non & terrenum

terrenum animal est, & aquatile. potest enim esse anceps.

De Dilemmate. CAP. XI.

DE I N C E P S de Dilemmate videamus. Quid est dilemma? Conclusio, per quam ex duobus propositis, vtrum aduersarius vel concesserit, tollitur: vel negarit, confirmatur. Itaque & ad confirmandum, & ad refellendum valet. Atque ex necessariarum conclusionum numero est. nā si vera est, reprehendi non potest: & ea demū vera est, quæ neque conuersione, neque partis infirmatione reprehendi potest. Verbum ex *δὴς & λαμβάνειν* fictum est: quoniam ambæ species vtrunque sic collocantur, vt elabi aduersarius quasi circumuentus non possit. qua de causa Cicero Complexionem illam appellat. nam quocunque se aduersarius verterit, tenetur. Itaque ad hanc conclusionem illud Ciceronis in Verrina Diuinatione pertinet, vbi de Q. Hortensio loquitur: Quoties ille tibi potestatem optionemque facturus sit, vt eligas vtrum velis: factum esse, necné: verum esse, an falsum: vtrum dixeris, id contra te futurum.

Cedo exemplū veri dilemmatis. Si quis Cæsari insidiatur, est aut ex amicis, aut ex inimicis. At neque ex amicis, neque ex inimicis quisquam insidiatur. nullus igitur insidiatur. quo argumento Cicero in ea pro Marcello est

vsus. Sic, Si ciuis est, aut natus est, aut factus. at neque factus, neque natus est. non est igitur ciuis. Simile illud est in Academicis: Quodcunque videtur, id aut falsum est, aut verum. at neque verum, neque falsum potest percipi. nullum igitur est visum, quod percipi possit. Item illud in lib. de Diuin. 2. Si prouideri nihil potest futurum esse eorum quæ casu fiunt, quia esse certè nō possunt, diuination nulla est. Sin autem iccirco possunt prouideri, quia certa sunt & fatalia: rursus diuination nulla est. eam enim tu fortuitarum rerum esse dicebas.

Quod est dilemma vitiosum? Vitium dilemmatis est triplex: in vtraque parte, in alterutra duntaxat, aut in pluribus. In vtraque vitiū est, cū per cōuersionem retorqueri potest: hoc est, cū eadem disiunctione id affirmatur, quod erat eadem disiunctione negatum. quod reprehensionis genus est acutissimum. In alterutra verò, cū alterutra pars infirmatur. In pluribus, cū pro pluriū partium disiunctione duæ tantummodo expostæ sunt.

Cedo exemplum conuersionis. Sumatur illud Ennij ex Herennianæ Rhetoric. lib. II.

Iniuria abs te afficior indigna, pater.

Nam si improbum Tresphontem existimaueras,

Cur me huic locabas nuptiis? sin est probus;

Cur talem inuitam inuitum cogis linguere?

Huic dilemmati vitioso Pater ita ex cōtrario respondet,

Nulla

Nulla te indigna nata afficio iniuria.

Si probus est, benè locavi: sin est improbus,

Diuortio te liberabo incommodis.

Cedo exemplum partis infirmatæ. Sumatur ex eodem: Nam ad illud vitiosum:

Nam si improbum Tresphontem existimaras,

Cur me huic locabas nuptiis? post ita respōdetur,

Duxi probum. valet autem (credidi)

Erravi, post cognoui, & fugio cognitum.

Cedo aliud exemplum de conuersione. Nō est ducenda vxor: quoniam vxore mortua, in luctum: liberis mortuis, in orbitatem incidimus. imo est ducenda: quia vxore mortua, ex liberis solatium capitur: mortuis liberis, ex coniuge. Extat etiam apud Gellium lib. 9. cap. vlt. vbi lex hæc proponitur: Vir fortis præmio quod optauerat donetur. Qui fortiter fecerat, petiit alterius vxorē in matrimoniū, & accepit. Is deinde cuius ea vxor fuerat, fortiter fecit. repetit eandem. Dilemma est actoris. Si placet lex, redde: si non placet, reddo. Conuersio defensoris: Si placet lex, non reddo: si non placet, non reddo. Cū autem hoc sit acutissimum argumentum, falli certè absurdissimè videntur, qui hanc conuersionem ad Sophismata retulerunt.

Cedo item aliud. Sumatur illud ex eodem Gellio lib. 5. cap. 10. Quod etiam vulgò inter Sophismata referri solet. Euathlus adolescēs, diues, eloquentiæ discendæ, causarumque orandi cupiens fuit. Is in disciplinam Pro-

tagoræ sese dedit: datur úmque promísit mercedem, grandé pecuniam, quantam Protagoras petiuerat. dimidiúmque eius dedit iam tunc statim prius, quàm disceret. Pepigítque vt reliquum dimidium daret, quo primo die causam apud iudices orasset & vicisset. Postea, quú diutius auditor affectatórque Protagoræ fuisset: & in studio quidem facundiæ abundè promouisset: causas tamen non reciperet, tempúsque iam longum transcurreret, & facere id videretur, ne reliquum mercedis daret: consilium capit Protagoras, vt tum existimabat, astutú. Petere institit ex pacto mercedem. litem cum Euathlo contestatur. Et cú ad iudices coniiciendæ consistendæque causæ gratia venisset, tum Protagoras sic exorsus est: Disce, inquit, stultissime adolescens utroque id modo fore, vti reddas quod peto, siue contra te pronuntiatum erit, siue pro te. Nam si contra te lis data erit, merces mihi ex sententia debebitur, quia ego vicero. Sin verò secundum te iudicatum erit, merces mihi ex pacto debebitur, quia tu viceris. Ad ea respondit Euathlus: Potui, inquit, huic tuæ tam anticipiti captioni isse obuiam, si verba non ipse facerem, sed alio patrono vterer. Sed maius mihi in ista victoria pro ludium est: cum te non in causa tantum, sed in argumento quoque isto vinco. Disce igitur, tu quoque magister sapientissime, utroque modo fieri, vti non reddam quod petis: siue contra me pronuntia-

nuntiatur fuerit, siue pro me. Nam si iudices pro causa mea senserint, nihil tibi ex sententia debebitur: quia ego vicero. sin contra me pronuntiauerint, nihil tibi ex pacto debebo: quia ego non vicero. Tum iudices dubiosum hoc, inexplicabileque esse, quod vtrunque dicebatur, rati: ne sententia sua vtrancunque in partem dicta esset ipsa sese rescinderet: rem iniudicatam reliquerunt, causamque in diem longissimam distulerunt. Sic ab adolescente discipulo magister disciplina eloquentiae inclutus suo sibi argumento confutatus est, & captionis versute excogitatae frustratus fuit.

Cedo exemplum de vitio in numero partium. Extat apud eundem Gellium lib. 5. cap. 12. quo Bias concludebat uxorem non esse ducendam: quia qui habet pulchram, habet *κοτὶνλὼν*: qui deformem, *ποινλὼν*. At recte Phauorinus docuit, vitium esse in eo, quod pars omissa est. Potest enim statura & mediocri forma uxor duci.

De Partium enumeratione.

CAP. XII.



EQVITVR, opinor, ut de multiplici disunctione quæ Partium enumeratio appellatur, differamus. Quid est Partium enumeratio? Est formula tractandi loci vel ex speciebus vel ex partibus: cum aut de genere totòve aut de v-

na specie, partéve concluditur. id est, vel affirmatur, vel negatur. In quo vitium maximū est, speciem vllam partémve principalem prætermittere.

Quæ sunt Enumerationis regulæ? Eædem prorsus, quas superiùs in loco ex speciebus ad genus, aut ex partibus ad totum exposuimus. sed illa primaria, quam modò dixi, nequa vel species vel pars idonea prætermittatur. Itaq; illinc assumentur, quæ ad hunc locum pertinebūt. Tantūm illud adscribemus, caussarum coniunctionem & concursum videri ad hunc locum pertinere.

Quotuplex huius loci vis est? Triplex. nam aut vniuersum cōfirmat, aut vniuersum refellit, aut vnā de omnibus partem remotis ceteris affirmat. Vniuersum autē affirmatur, cū ex cōiunctis vel formis genus, vel partibus totum concluditur. Quinetiam ex caussis eodem modo concludi euentus potest. Idem refellitur cū ex iisdem disiunctis & remotis totum remouetur. Pars autem affirmatur, cū singulis disiunctis & reliquis remotis, vna quæ superest, concluditur.

Cedo exemplum de affirmatione generis. Sumatur illud ex lib. de diuinat. i. Si sunt dii, neque ante declarant hominibus quæ futura sunt, aut non diligunt homines: aut quid euenturum sit, ignorant: aut existimant nihil interesse hominum scire, quid futurum sit aut non censent esse suæ maiestatis, præsignificare homi-

hominibus quę sunt futura: aut ea ne ipsi quidem dij significare possunt. At neque non diligunt nos: sunt enim benefici, generique hominum amici: neque ignorant ea quę ab ipsis constituta, & designata sunt: neque nostra nihil interest, scire ea quę euentura sunt. erimus enim cautiores, si sciemus: neque hoc alienum ducunt maiestate sua: nihil est enim beneficentia præstantius. neque non possunt futura prænoscere. non igitur sunt dij: nec significant futura. Sunt autem dij. significant ergo.

Cedo exemplum de refutatione generis vniuersi. Sumatur illud ex lib. de nat. deorum 3. Omne corpus, aut aër, aut aqua, aut ignis, aut terra est: aut id quod est concretum ex his, aut ex aliqua parte eorum. horum autem nihil est quod non intereat. Nihil igitur sempiternum est.

Cedo exemplum de affirmatione Totius. Dixi superius in loco ex partibus regulamhuius affectionis hanc esse: Positis partibus compositis, totum concedi. quare videndum, vt forma & compositio simul adsit: veluti. Si fundamentum est, & parietes, & contignatio, & tectum, & omnia composita: certè est domus. Si & radix est & truncus, & rami, & folia, & omnia forma consent: id est non auulsa, aut excisa sint: certè est arbor.

Cedo exemplum de affirmatione ex causarum concursu. Superius dictum est, ex caus-

farum omnium concursu & enumeratione effectum concludi. veluti : Si est aqua cum hordeo & lupulo ad potum cocta, est ceruisia. Si & acuto ingenio est, & disputandi arte institutus, & in eadē exercitatus, est Dialecticus. Atque hoc loco sæpe Oratores in coniecturalibus constitutionibus vtuntur : Iurisconsulti in præsumptionibus. veluti in illo Herennij: Ajax in sylua postquam rescivit, quæ fecisset per insaniam, gladio incubuit. Vlysses interuenit. occisum conspicatur. E corpore cruentum telum educit. Teucer interuenit. cum fratrem occisum, & inimicum fratris cum gladio cruento videt, capitis arcessit.


Cedo exemplum de partis vnus affirmatione. Locus hic aut duarum partium est, aut plurium. de duabus sumatur exemplū illud ex Cluentiana : Sed cum esset hæc illi proposita conditio, vt aut iuste piéque accusaret, aut acerbè indignéque moreretur : accusare quoquomodo posset, quam illo modo emori maluit. Item: Si constat corruptum illud esse iudiciū, aut ab Habito, aut ab Oppianico corruptū est. si doceo non ab Habito, vinco non ab Oppianico: si ostendo ab Oppianico, purgo Habitum.

Cedo exemplum de pluribus. Sumatur illud ex Rabiriana: Atqui videmus hæc in rerū natura tria fuisse : vt aut cum Saturnino esset, aut cum bonis, aut lateret. Latere mortis erat instar turpissimæ: cum Saturnino esse furoris

& sceleris : virtus & honestas & pudor eū cum Consulibus esse coge-
bat. Item illud ex lib. de
Orat. 2. Aut Senatui parendum de salute Reip.
fuit, aut aliud consilium constituendū, aut sua
sponte faciendū. Aliud consilium superbum,
suum arrogans : vtendum igitur fuit consilio
Senatus.

De Enthymemate.

CAP. XIII.

 VONIAM de Syllogismo satis vide-
tur dictum, deinceps ad Enthyme-
ma veniamus, in quo locum esse me-
dio superius dixisti. Quid est Enthymema?
Argumentatio quæ ex sola propo-
sitione, vel assumptione constat. Itaque συλλο-
γισμὸς ἀτελής, id est trunca, mutila, imminuta
ratiocinatio ab Aristotele appellatur. Nam in
eo mediū quidē vi ipsa inest, sed tamen diserte
nō apponitur. Dicitur autem *ὡς δὲ τὸ ἐνθυμεῖσθαι*
id est cogitare & commentari: vnde Com-
mentum à Quintiliano & Commentatio La-
tinè nominatur.

Quotuplex est Enthymema? Ego triplex fa-
cio. Vulgare, Aristotelicum, & Ciceronianū.
Vulgare autem dico ex vulgi opinione, qua
Enthymemata nominantur omnes syllogismi
trunci: id est, in quibus vel propositio, vel as-
sumptio deest: quæ nos superius argumenta
nominari diximus. veluti, Virtus sola res est,
qua vti nemo malè potest. Ergo sola virtus est

bonum. Addatur propositio: fiet Syllogismus. Id demum bonum est, quo nemo vti malè potest. Item, Pecunia quisque vti malè potest. Ergo non est bonum. Addita propositione, fiet Syllogismus. Nihil bonū est, quo quisque malè vti potest. Item: Sapiens est: ergo est beatus: id est ex loco generis Medium. Omnes sapientes sunt beati. quo adhibito plenus & perfectus existet syllogismus.

Quod est Enthymema Aristotelicū? Quod constat ἐν τῇ ἐκότητι καὶ συμείῳ: id est, cōsentaneis & signis. Consentaneum est, quod adiunctum probabile, aut verisimile, in locorū tractatione appellari diximus. Itaque ex loco adiunctorum tota hæc sumitur argumentatio. veluti: Cui quis invidet, eum odit. Quoniam hic miles est, gloriosus est. Quoniam auarus est, etiam contemptor est iurisiurandi. Quoniam studiosus est, à bello alienus est. Causa tum dubia (inquit in Ligariana Cicero) quòd erat aliquid in vtraque parte quæ probari posset: nunc melior ea certè iudicanda est, quam etiam dii adiuuerunt. Et in Lelio: Quam charus ciuitati Scipio fuerit, mœrore funeris indicatum est.

Quid est, constare ἐν τῇ σημείῳ? Signū est, quod ex eo quod est, aliud quid esse arguit. Est autem aut non necessarium, aut necessarium. quod Græci τεκμήριον vocant. Non necessariū est, veluti, si cui celeriter arteria mouetur, febricitat. Si pallet, ægrotat. Si corpus est luridum,

dum, veneno interiit. Si puluerulentis est pedibus, redit ex itinere. Si Aegyptus est desidiosus, est adulter. Necessarium autem, siue *τεκμήριον* est: veluti: Si cicatrix est, fuit vulnus. Si lac habet, peperit. Si umbra est, corpus est in sole.

Quid appellas Enthymema Ciceronianū? Quod cōstat ex sola propositione argumēti ex repugnātibz, quæ detracta negatione cū interrogatione p̄nunciatur. At quoniā acutissimæ & grauiissimę huiusmodi sentētiæ sunt, p̄pter commune Enthymematū nomen suū effecerunt. Sed in Topicis Ciceronis, vbi exempla proponuntur, nota interrogationis omīssa est. Hunc metuere, alterum in metu nō ponere? Sic enim Dialecticus protulisset: Non & hunc imbecillum metuere debebas, & illum valentem in metu non ponere. Item: Eam quā nihil accusas, damnas: bene quam meritam esse autumas, dicis malè mereri? Quod ex repugnantium loco ita concluderetur: Non & quæ non accusata est, damnanda est: & quæ bene merita est, malè merita dicenda est. Item: Id quod scis, prodest: nihil id quod nescis, obest? pro, Non & quod scis, prodest: & quod nescis, non obest. Contrariorum enim cōtraria sunt consequentia. Omnes autem illi sunt versus ex vetere Poeta, vt ipse in Oratore ostendit. Vbi postremum hunc oratorio more sic inuertit: Quod scis, nihil prodest: quod nescis, multum obest. Et à Græcis *ἀντιθίτα* hæc omnia no

minari dicit, cùm contrariis contraria opponuntur : quam Latino vocabulo Relationem contrariorum appellat.

Quibus ex locis eruitur Enthymema? Ex iisdem omnibus, ex quibus & perfectus syllogismus. Sed tum demum grauissimum & vehementissimum est, cùm ex contrariis & repugnantibus & minoris comparatione componitur. veluti: Alienum & valentem alis : Parentem senio confectum negligis. Item in Catone maiore : Quod adolescentes, & ij quidem non solum indocti, sed etiam rustici contemnunt, id docti senes extimescēt? Et Philippica 2. Quid indignius, quàm viuere cum qui imposuit diadema: cùm omnes fateantur eum iure interfectum, qui imposuerit. Item in Miloniana: Eius mortis sedetis auctores, cuius vitam si putetis per vos restitui posse nolitis. Item in eadem: Quem igitur cum omnium gratia noluit, hunc voluit cum aliquorū querela? quem iure, quē loco, quē tēpore, quē impunē nō accusas: hūc iniuria, iniquo loco, alieno tēpore, cum periculo capitis nō dubitauit occidere? In eodē genere illa sunt : Filiū obsequentē exheredas : alienum heredem instituis. Alienos iuuas: cognatos deferis. Hostibus opitularis, a micos lædis. Peregrinos iuuas: ciues negligis. Item illa ex Rhetorum antithetis: Inimicis te placabilem : amicis te inexorabilem præbes. In otio tumultuaris, in tumultu solus es otiosus. Tacito cùm opus est, clamas : cùm loqui conue-

conuenit,obmutescis. in pace bellum quæris:
in bello pacem desyderas.

De Sorite Dialectico. CAP. XIII.

HACTENVS de Argumentationi-
bus quæ medium habent disserui-
mus. Deinceps de iis quæ non ha-
bent, videamus. Quæ sunt Argu-
mentationes quæ Medium non habent? Sorites, Inductio, & Exemplum.

Quid est Sorites? Argumētatio quæ pluri-
bus attributis ordine superimpositis, vel ex
primi conuenientia, etiam vltimū conuenire,
vel ex postremi discrepantia, etiam primum
dissidere cōcludit. Duplex enim gradatio est:
vna in ascensu affirmans: altera in descensu,
negans: ob eāque causam à Cicerone Tela
Penelopes appellatur: quippe quæ & texatur,
& retexatur: hoc est, vicissim retrōque com-
meet, & reciprocetur.

Cedo aliquod exemplum. Lactantius hoc
suppeditat: Si duo sunt sexus deorum, sequi-
tur concubitus. si coeunt, habent domos & cu-
bilia: si domos, etiam vrbes: si vrbes, etiam a-
gros. Si agros non habent, ne vrbes quidē. Si
vrbes non habent, ne domos quidem: si domi-
bus carent, & concubitu carent: si concubitus
ab his abest: & sexus igitur fœmineus. In diis
autem videmus & fœminas esse. ergo dii non
sunt.

Quod est huius argumentationis firmamentum? Illud quod superius ex Aristotele proposuimus: Quoties alterum de altero ut de subiecto dicitur, quæcunque deinceps de attributo dicuntur, eadem omnia de subiecto quoque dicuntur. qua regula Soritis vim omnem Aristoteles complexus est: tametsi nusquam in ipsius Logicæ libris nominatim eius fiat mentio. Fuit enim hæc argumentationis forma Stoicorum propria: ut multis ex locis apud Ciceronem intelligitur, quo lubentius fortasse differendi artem Dialecticam interpretatur, quod in Soritis longa verborum series continuatur: sic, ut aliud ex alio nexum & omnia inter se apta colligataque videantur.

Quotuplex est Sorites? Duplex: Dialecticus, qui & propositionum veritate & legitimo artificio constat: & sophisticus, qui aut à falsitate propositionis, aut a b artificij prætermissione vitiosus est.

Vnde dicitur Sorites? *σωρός* Græcis est aceruus. Itaque ut ex multis granis superadditis fit aceruus, sic ex multis subiectis & attributis inter se cōsertis & connexis fit Sorites. Est enim argumentatio ex pluribus syllogismis constans: ut non absurdè Catenata dici posse videatur. quoniam ut catena annulis inter se cōnexis & cōsertis continetur, sic Sorites propositionibus syllogismorum inter se aptis & connexis conficitur.

Cedo aliquod exemplum in contexendo,
Sumatur

Sumatur ille sextuplex ex Ciceronis libro de Finib. 3. Illud perabsurdum est, bonum esse aliquid, quod non expetendum sit. aut expetendum, quod non placens. aut si id, nō etiam diligendum. Ergo & probandum. Ita etiam laudabile. Id autem honestum. Ita fit vt quod bonum sit, id etiam honestum sit. Item illud ex lib. Tuscul. 5. Anima ex se mouetur. quod ex se mouetur, principium motus est. quod principium motus est, natum non est. quod natū nō est, est immortale. Igitur anima immortalis est. Ex eodem genere illud Themistoclis peruulgatum: qui filiolum suum Græciæ totius potentissimum esse hoc modo concludebat: Athenienses (inquibat) reliquis Græcis imperant. ego Atheniensibus. vxor mihi. ille vxori.

Cedo item aliud. Sumatur illud Ciceronis præclarum, & Christiana philosophia dignū, ex secundo de nat. deor. extremo: Nec verò vniuerso generi hominum solū, sed etiam singulis à diis immortalibus consuli & prouideri solet. licet enim contrahere vniuersitatem generis humani, eamque gradatim ad pauciores, postremò deducere ad singulos. nam si omnibus hominibus qui vbique sunt, Deos consulere censemus, his quoque consulūt, qui has nobiscum terras ab Oriente ad Occidentem colunt: sin autem his consulunt, qui quandam quasi magnam insulam colūt, quam nos orbem terræ vocamus, etiam iis cōsulunt, qui partes eius insulæ tenent: Europam, Asiam, A-

fricam. Ergo & earum partes diligunt, vt Romam, Athenas, Spartam, Rhodum: & earū urbium separatim ab vniuersis singulos diligunt.

Cedo aliud in retexendo exemplum. Sumatur ex lib. de Diuinitat. 2. Si Deus scit, quid casu & fortuito futurū sit, certè illud eueniet. si certè eueniet, nulla fortuna est. Est autē fortuna. rerum igitur fortuitarum nulla est præsensio. Sic in lib. de Fato: Si omnia fato fiunt, appetitus in potestate nostra non est. si non appetitus, non assensio. si non assensio, nec actio: si non actio, nec laudatio, aut vituperatio iusta est. Ergo nec honores, nec supplicia. Hoc autem extremum vitiosum est. Ergo fato fieri omnia non possunt. Quod cū ita sit, vides genus hoc argumenti non satis plenè vulgo appellari A primo ad vltimum: cū vicissim addendum quoque sit, Ab vltimo ad primum.

Quid? Aristoteles nihilne prorsus de Sorite tradidit? Soritas quidem nusquā, quod meminerim, nominat: sed eos sanè diligēter tractat, li. I. posteriorum Analyt. cap. 15. & aliquot insequentibus: vbi hoc primum statuit, Soritas in iis locum habere, quæ sine vllius medij opera atque interuētū, propter se attribuuntur. Deinde in iis subiectis quæ de nullo dicuntur, & in iis attributis summis, de quibus nihil dici atque enuntiari potest: quales sunt omnes categoriæ. Tertio quoniam infinita non
pos-

possunt hominum mente & cogitatione percurri, propterea Soritarum acervos infinitos non esse, sed siue sursum progrediamur, siue rursus descendamus: tamen exitum & finem aliquem reperiri, & gradationes certo & finito numero contineri.

Quid est Sorites sophisticus? Loco tu quidem quæris. sed tamen quia certus nobis de sophisticis captionibus locus differendi constitutus est, commodius videtur hanc quoque tractationem eum in locum differre.

De Inductione & Exempla.

CAP. XV.



QUID sequitur nunc? Ut de Inductione & Exemplo differamus: quæ vulgò separatis nominibus appellantur: cum tamen Exemplum Inductionis speciem esse constet. Exemplum enim imperfecta inductio est.

Quid est inductio? Aristoteles ita definit: Inductio est à rebus singulis ad vniuersas progressio. Potest etiam hoc definiri modo: Argumentatio quæ vel ex omnibus singulis, vniuersum: vel ex pluribus similibus, simile aliquod vel affirmando, vel negando concludit. Eaque argumentatio Socratica vulgò nominatur: quæ ex pluribus collationibus id de quo ambigitur, propter similitudinem concludit.

Quamobrem Inductio medio adhibito nō tractatur? Quia vera inductio iis demū quaestionibus adhibetur, quæ sensibus diiudicantur, & medio carent. eaque re differt à ratiocinatione, quòd illa mentis & rationis conclusio est: hæc verò sensuum, qui rationis expertes sunt. Quauis enim syllogismi instar tribus propositionibus componi possit, semper tamen inductio manebit: aut certè syllogismus epagogicus dicetur: quasi quis dicat, inductionalis.

Quamobrem Inductio argumentatio Socratica nominatur? Quoniam (vt Cicero & Quintilianus scribunt) ea plurimū est vsus in sermonibus Socrates, propterea quòd nihil ipse afferre ad persuadendū volebat: sed ex eo quod sibi ille dederat, quicum disputabat, aliquid cōficere malebat, quod ille ex eo quod iam concessisset, necessariò approbare deberet. Itaque cū plura interrogasset, quæ fateri aduersario necesse esset, nouissimè id de quo querebatur inferebat, cui simile concessisset. hoc in ratiocinatione fieri nō potest: sed quod illic interrogatur, hīc fere sumitur.

Cedo exemplum. Sunt (inquit Cicero) similitudines, quæ ex pluribus collationibus perueniunt, quò volunt. hoc modo: Si tutor fidem præstare debet, si socius, si cui mandaris, si qui fiduciam acceperit, debet etiam procurator. Ex eodē genere illud est Vlpiani Iuriscōsulti: Si filius f. tenetur actionibus empti, venditi, locati,

locati, conducti, commodati, mandati: certè & depositi tenebitur. Hoc ex pluribus (inquit Cicero) perueniens quò vult, appellatur Inductio quæ Græcè ἐπαγωγή nominatur, quæ plurimum est vsus in sermonibus Socrates.

Cedo aliud exemplum. Sumatur illud ex Quintiliano: Quod est pomū generosissimū? nōne quod optimum? concederetur. quid equus? qui generosissimus? nōne qui optimus? Et plura in eundem modum. deinde cuius rei gratia rogatum est. Quid homo? nōne is generosissimus, qui optimus? Eiusdem generis illa sunt, quæ superiùs exposuimus, quibus probatum est nullum imperium esse sempiternum: & religionem Christianam nullis hominum opibus extingui posse.

Quotuplex inter Syllogismum & Inductionem differentia est? Aristoteles triplicem hanc statuit. Syllogismus in iis quæ medium habent, consumitur. Inductio verò in iis quæ non habet, & sensibus artis & rationis expertibus iudicantur. Itaque quoniam medium natura notius est eo de quo quæritur, notior quoque natura est ea ratiocinatio quæ per medium efficitur: at inductio apertior ac dilucidior est, sensuumque iudicio familiarior: ac propterea in ore vulgi frequentior. Alterum discriminē est huiusmodi: Inductio à rebus singulis ad vniuersales progreditur. veluti: Adami vita fuit ærumnosa, fuit & Enoch, fuit & Noë: fuit item Abrahami, fuit Isaaci, Iaco-

bi, ceterorúmque piorum. Ergo piorum omnium vita infesta & ærumnosa est. Ratiocinatio verò ab vniuersalibus ad singulares perducit. veluti : Piorum omnium vita infesta & calamitosa est. Timotheus pietatē colit. Quare Timothei vita erit ærumnosa. Tertium discrimē Aristoteles subtiliter hoc statuit, quòd syllogismus ex medio probat extremum in tertio : inductio verò ab extremo probat tertium in medio.

Cedo aliquod exemplum. Esto syllogismus huiusmodi: Quæ bile vacant, longæua & viuacia sunt. homo, equus, bos, elephas, asinus, bile vacant. ergo animalia hæc longæua & viuacia sunt. Hic ratiocinatio ex medio, quod est *Bile vacant*, probat maius extremū, quod est *Longæuum*, in minore : quod est subiectum. At si hoc concludamus modo : Homo, equus, bos, elephas, asinus, ceteraque bile vacant. hæc autem longæua sunt. quare quæ bile vacant, longæua sunt. tum verò conclusio hæc ex minore extremo, quod est subiectum, probat maius extremum conuenire medio. Atque hoc quidem syllogismi inductionalis exemplū est.

Quid? quomodo ab eodem exemplo inductionem constituis? Hoc modo : Homo bilis expers est : & est longæuus. Equus item, elephas item, bos item, asinus item, ceteraque item quæ bile vacant. ergo quæ bile vacant, longæua sunt.

Quis est inductionis vsus? Aristoteles multis

tis locis scribit, doctrinam omnem aut inductione, aut ratiocinatione parari. nam inductione principia & vniuersa cognosci, quoniã à rerum singularum cognitione vniuersarum cognitio ducitur. Itaque cognitionis principium rectè appellatur: ratiocinatio verò principiiis generalibus atque vniuersis conficitur, ac progreditur: quæ principia per inductionem probantur. Itaque inductionis maior est vsus apud imperitos & multitudinem. syllogismi verò apud peritos & Dialecticos.

Quid est inductio Rhetorica quam exemplum appellari dicebas? Id Quintilianus ita definit: Exemplum est rei gestæ, aut vt gestæ, utilis ad persuadendum id quod intenderis; commemoratio. Aristoteles autē hoc modo, Exemplum est, cū extremum in medio inesse ostēditur per aliquid, quod simile sit tertio. *ἡ δὲ δειγµα ὃ ἐστὶν ὅταν τῷ μέσῳ τὸ ἄκρον ὑπάρχον δειχθῇ διὰ τῆς ὁµοιότητος τριτῷ*: id est, Exemplum est, cū in medio maius extremum inesse ostenditur ex aliquo quod sit simile tertio: siue subiecto. veluti: Ponatur quæstio, An bellum Atheniensium in Thebanos (quod Subiectum est) futurum sit calamitosum: (quod Attributum est) Sumatur medium: Bellum cum finitimis. tum ita ratio ineatur: Bellum cum finitimis suscipere perniciosum est. Bellum Atheniensium cum Thebanis est bellum cum finitimis. Ergo futurum est calamitosum. Propositio verò probetur ab eo quod est simile Subie-

cto. Nam Phocenſibus cum Thebanis belligerari exitioſum fuit.

Quid? nōne Syllogiſmus hic argumentatio eſt ſolida, & firma: ſumpta ex genere ad ſpeciem? Ariſtoteles oſtendit Exemplum non habere eam rationem, quam habet Totum ad partem, aut pars ad Totum: ſed quam pars vna habet ad alteram: cū ambæ quidem in eodem Toto continentur: ſed altera notior eſt. Itaque Rhetores dicere ſolēt, Exemplū ex vnus ſingularis collatione alterum ſingulare confirmare. & Laertius in Platone ſcribit, Rhetoricā in particularib⁹ verſari. quia quod in parte quæritur, per id quod eſt in parte demonſtratur. Dialecticam autem verſari in vniuerſalibus, quia vniuerſalia per ea quæ in parte ſunt, concludit.

Sempérne argumentatio ab exemplo per ſyllogiſmum tractatur? Nihil minus. quin potius, vbi ratiocinatio conficitur, vocatur ſyllogiſmus: ſed paradigmaticus: ideſt, (vt ita loquar) exemplaris. Formula igitur huius argumentationis propria eſt hæc: vt eius momentum ſit in ſimilitudine. veluti: Phocenſibus calamitoſum cum Thebanis bellum fuit: quia bella cum finitimis pernicioſa ſunt. Athenienſibus igitur bellum cum Thebanis erit pernicioſum. vt Exemplum & Quæſtio ex medio, pari vtraque momento, pendeat. Denique vt momentum propoſitionis ſit in exemplo, non in loco argumenti. alioqui

Diale-

Dialectica erit argumentatio, & solida, non fucata & Rhetorica.

Cedo aliud exemplum. Græcis gloriosum fuit Phalarim interficere, quia præclarum est tyrannide ciuitatem liberare. Romanis igitur laudi ducatur, quòd Cæsarem interfecerint. Ex eodem genere illud est ioculare Pasquilli: Tandem Maxime Pontifex galerum: Pasquillo tribuas tuo roganti. Si sensu sine sum, rude atque marmor, Complures quoque Episcopos creari, Ipse me mage saxeos videmus.

Quid interest inter Argumentationem à simili: & Inductionem? Illa per Medium tractatur, & in iis demum quæ medium habent, versatur. hæc in iis quæ medium non habent. Præterea in forma hoc interest, quòd argumentum à simili ex vna re simili de ceteris omnibus concludit. Inductio contrà ex ceteris omnibus ad vnā. Firmamentum enim Similiū est huiusmodi: Quod in vna re simili valet, valeat in ceteris. veluti: Vt tutori pupilli rem emere non licet, ita nec curator, nec procuratori, nec negotiorum gestori. At inductionis est illud: Quod in pluribus rebus similibus valet, etiam in hac valeat. veluti, Vt neque tutori, neque curator, neque procuratori emere rem administratam licet, ita neque negotiorum gestori.

Quid interest inter argumentationem ab Exemplo & eam quæ est ex Paribus vel Similibus? Argumentum ex pari aut simili, ex vno

concludit omnia. Exemplum verò ex vno vnū tantum concludit. Præterea argumentum à simili proportionem (vt superius dictum est) nititur. causam enim rei penitus intuetur. At exemplum, si modò Rhetoricum est, rem gestam extrinsecus nulla exquisita causa considerat. Nam Rhetores, quorum præcipuus huius generis usus est, quibuscque vnus hic finis propositus est, vt iudicibus tenebras offundant, exemplo tractando argumentationes illas explicant. Quod enim exemplo fit, id etiam iure fieri vulgus putat: vt ait Cicero in Epistolis.

Cedo aliquod exemplum. Eliseus petiit à Deo, vt impios conuiciatores fulgure perderet. Ergo idem Apostolis facere ius est. Hæc Rhetorica inductio est, quæ solam rei gestæ similitudinem extrinsecus considerat. At Christus causam esse dissimilem demonstrat. Euidius Tyrannum Eglonem interfecit. Moses seditiosum sua manu occidit. Ergo idem cuius Christiano facere ius est. dissimilis causa est. nam vterque Magistratus sui iure id fecit. Quare ad vitandas harum argumentationum captiones eò reuocandus est aduersarius, vt eadem ratio & causa subsit.

Quid interest inter Inductionem & Exemplum? Aristoteles discrimen hoc statuit, quòd inductio ex singulis vniuersis extremum in medio esse confirmat: nec syllogismum ad extrema connectit. Exemplum verò cōiungit quidem:

quidem : ex omnibus autem non probat. nā
 vt modò diximus, vnum ex vno tantummodo
 per exemplum confirmatur.

De Captionibus Sophisticis.

CAP. XVI.

QUONIAM de Argumētatione Dia-
 lectica satis dictum est, superest vt de
 sophistica disseramus. Ac primum
 omnium quid est Sophistice? Falsa
 doctrinæ simulatio. nam Sophistæ dicebātur
 (inquit Aristoteles) qui ex ea quam præ se fe-
 rebant fucata & adulterina sapientia quæstū
 faciebant. quales nostris temporibus Rabu-
 las forenses numerare possumus. Cicero au-
 tē lib. de Finib. 2. ita definit: Sophistæ (inquit)
 dicebantur, qui ostentationis & quæstus causā
 philosophabantur. Itaque Sophistice defi-
 niri sic potest, Captatio verborum quæ dispu-
 tandi prudentiam fallaciter imitando adul-
 terat. Nam eodem modo Sophisticæ argumē-
 tationes à Dialecticis differunt, quo adulte-
 rini numi à probis. Sophismata autem Sene-
 ca in Epistolis scribit, Cauillationes à Cicero-
 ne Latinè appellari.

Quisnam huius doctrinæ est vsus? Idē pla-
 nè, qui in mercatorum & argentariorum vi-
 ra percipitur ex facultate probos numos ab
 adulterinis internoscendi : aut aurum ab ori-
 chalco: vel argentum à Lytargyrina. Cauen-

dum (inquit Cicero) diligenter ne fallant ea nos vitia, quæ virtutem videntur imitari: vt fortitudinem audacia, iustitiam acerbitas, religionem superstitio, & illâ disputandi prudentiam, concertatio captatioque verborum: & oratoriam vim inanis quædam profluentia loquēdi. Item in lib. Academ. 2. Multi fallacibus & captiosis interrogationibus circumscripti atque decepti cū eas dissoluere non possunt, desciscunt à veritate. Oportet igitur & ea quæ pro vero respōderi possunt, in promptu habere: & esse armatos, vt occurrere possimus interrogationibus eorum, captionesq; discutere.

Quis est finis Sophistarum? Finis quidem Sophistarum (vt ex Aristotele docuimus) est quæstus: sed opus in quo occupati sunt, est captio, siue vitiosa conclusio argumenti: qua eius quocum disputat assensionem captat: quæ captio modò τὸ ἀπορον, modò πρὸς λόγισμος, modò ἑλεγχος appellatur: quo ipso nomine Captionem significari ex eo constat, quòd ἐλέγχειν est capere, tenere, deprehensum conuincere. & ἐλεγχθεὶς, qui sic captus est, vt elabi non possit. Itaque librum Aristotelis περὶ σοφιστικῶν ἐλεγχῶν Latinè sic interpretari possumus, De sophisticis captionibus. quanquam sunt qui de Reprehensionibus, interpretari malint, pro de vitiosis argumētationibus. Sed frequentius ἀπορος λόγος, genus hoc disputationis appellatur: quoniam ita perplexum & inexpl-

inexplicabile est, ut exitum interrogato nulum præbeat. quanquam alij τὸ ἄπορον, genus: alij (ut Hermagoras) speciem fecerunt.

Quomodo tanta vis erat sophisticæ? Quoniam (ut Gellius scribit) lex est Dialecticæ disciplinæ, si de quapiam re quærat, disputeturque, atque ibi quid rogere, tum ne amplius quid dicas, quàm id solum, quod es rogatus, aut aias, aut neges: eamque legem qui non seruant, & aut aliter quàm sunt rogati respondent, existimantur rudes indoctique esse, neque disputandi morem & consuetudinem tenere.

Quotuplex istius ἀπόρου siue perplexitatis vitium est? Multiplex omnino. nã varia Stoici genera confinxerunt. Cicero quidem in veteri Rhetorico quadruplicem Reprehensionis modum exponit: sed qui ad hunc duplicem reuocari debeat. Verba illius hæc sunt: Omnis argumentatio reprehenditur, si aut ex iis quæ sumpta sunt non conceditur, (id est negatur) aliquod vnum plurave: aut his cõcessis, cõplexio confici ex his negatur: aut si genus ipsum argumentationis vitiosum ostenditur, aut si cõtra firmam argumētationem alia æquè firma, aut firmior ponitur. Nã tertius modus in primo continetur perspicuè. Quartus autem ad deliberationes tantummodo pertinet. Sed tamen tota illa Ciceronis disputatio, quæ est in capite de Reprehensione lib. de Inuent. i. diligenter obseruanda est.

Quomodo captiones vitantur? Suprema lex (inquit Gellius) in omnibus captionibus à Dialecticis hæc constituta est: Non esse captiosis interrogationibus respondendum. Sed tamen in hac captionem si respondere placet, vitabitur sophisma per negationem, id est repudiationem falsæ propositionis, qua probationis impossibilis necessitas in Sophistam transfertur. velut in illo Zenonis: Quod ratione vititur, melius est eo quod ratione non vititur. nihil autem mundo melius. Ratione igitur mundus vititur. Assumptio neganda est, quia hominis causa mundus creatus est. melior igitur homo est quam mundus.

Quoniam ita multa sunt captionum genera, neque pretium operæ est certum earum numerum definire, cedo mihi usitatas aliquot earum species. Sumamus *ψευδόμελον*, *αἰσῶδες* & *σοφίστην*. id est, Mentientem, instabilem & acervalem.

Quid est *ψευδόμελος*? Hunc Cicero in Lucullo mentientem appellat. eiusque hoc exemplum profert: Si te mentiri dicis, idque verum dicis, mentiri verum dicis. Item, si dicis te mentiri verumque dicis, mentiris. Dicis autem te mentiri, verumque dicis. mentiris igitur.

Cedo aliud exemplum. Iurisconsulti hoc proferunt: Lex Falcidia vetat testatorem amplius quarta bonorum parte in legatis consumere. nam eam integram heredi relinqui iubet.


iubet. Qui quadringentos aureos habebat, trecentos legauit hac conditione, si legi Falcidiæ in suo testamento locus non esset. hîc si legi Falcidiæ locus est, Titio nihil debetur. at si ei nihil debetur, locus Falcidiæ nō erit. ac proinde legatum Titio debebitur. l. qui quadringenta, 88, D. ad leg. Falc.

Cedo exemplum instabilis. Sumatur ex Laetant. lib. 3. Somniauit quidam ne somniis crederet. Si credat, sequitur vt credendum non sit. Si non credat, sequitur vt credendum sit. Item: Si verum est quod dicunt Academici, nihil sciri posse, necesse est id ipsum sciri quod nihil sciatur. Si autem scitur posse nihil sciri, falsum est quod dicitur nihil posse sciri. Ex eodem genere illud est: Epimenides dixit, omnes Cretenses esse mendaces. At ipse Cretēsis fuit: Si verum dixit, illi non credendum. Si mentitus est, nihilomagus. Item illud apud Iurisconsult. si Titi⁹ heres erit, Seius heres esto. Si Seius heres erit, Titi⁹ heres esto. Iulianus inutile esse institutionem scribit, cū conditio existere non possit. l. si Titius, 16, D. de cond. instit.

Quomodo hæc verborum concertatio vitatur? Reuocando aduersario ad rectam & legitimam conclusionis componendæ formulā. δὲ γὰρ ἐκ τῶν κεμένων συμβαίνει τὸ συμπέρασμα, καὶ ἐξ ἀνάγκης: inquit Aristoteles. Id est: Oportet enim ex iis quæ posita sunt conclusionem existere, idque necessario. Nam (vt Cicero scribit in Academ.) concludi argumentum non po-

test, nisi his quæ ad concludendū sumpta erāt ita probatis, vt falsa eiusdem modi nulla possint esse. velut in illo quod ibidem subiicit: Si rebus comprehensis & preceptis nisa & progressa ratio efficit nihil posse comprehendi: quid potest reperiri, quod ipsum sibi repugnet magis? Nam alter disputabat sensibus certa quædam percipi. at cū ad rationē perducta essent, incerta omnia effici. Sed huius quoque captionis in Sorite quàm maxima Sophistis facultas datur. Itaque iam tempus est, vt de Sorite Sophistico differamus.

De Sorite Sophistico. CAP. XVII.

VID est Sorites Sophisticus? Multiplex syllogismus, qui minutis additionibus & deductionibus ab eo quod p̄spicuè verum est, ad id quod perspicuè falsum est, vltro citroque perducit. Nam (vt Iulianus Iurisconsultus scribit) ea est natura cauillationis, quam Græci *συνερίπτεω* appellant, vt ab euidenter veris per breuissimas mutationes disputatio ad ea quæ euidenter falsa sunt, perducatur. Itaque Cicero in Lucullo captiosissimum interrogationis genus hoc appellat, cū aliquid minutatim & gradatim additur, aut demitur.

Cur addidisti Vltro citroque? Quoniam hoc artificium tanquam Penelope telam retexens (quemadmodum superius ex Cicerone diximus

diximus) tollit ad extremum superiora.

Cedo exemplum. Ponatur quæstio: Decem vtrum pauca sunt, an ne multa? Si pauca respondeas: inferetur, quid si vnum addidero? quid si alterum, tertium, quartum? Et vicissim retro: Si multa, responderis. quid si vnum ex-
 emero? quid si alterum, tertium, quartum? Quod in aceruo frumenti vsurpatur: vt nec decem, nec vndecim, nec singula singulatim ad quemuis numerum addita aceruum efficiant. Atque hoc illud est, quod Cicero in Lucullo scribit: Quod in numero conticuiisti: si ad eum numerum vnum addidero, multane erunt? progredere rursus, quoad videbitur. Cuius generis error ita manat, vt non videam quod non possit accedere. Atque hoc exemplum Cicero Verrina v. sed recte ac non sophisticè imitatus est. Deinde (inquit) iudices, videtis, quam infinitam sitis hominibus licentiam pecuniarum eripiendarum daturi. Si ternos denarios qui coegit, erit absolutus: quaternos denos denique, aut videnos coget alius. quæ erit reprehensio? In quo primum iniuriæ gradu resistere incipiet seueritas iudicis? quotus erit iste denarius qui non sit ferendus? Et in quo primum æstimationis iniquitas atque improbitas reprehendetur?

Quomodo hæc vitabitur captio? Cicero his in Lucullo verbis demonstrat: At vitiosi sunt sortitæ. Frangite igitur eos si potestis, ne molesti sint. placet enim Chrysippo, cum grada-

tim interrogetur, verbi causa, Tria pauca sūt, anne multa? aliquanto prius quàm ad multa perueniat, quiescere, nec diutius captiosè interroganti respondere. Insistendum est igitur in singulis, vt qua cuiusque in parte vitium lateat, facilius demonstretur. Nam vt vitiato vno annulo cathena omnis dissoluitur, ita vna interiecta propositione falsa tota coaceruatio concidit.

Cedo exemplum. Sumatur ex lib. de Nat. deor. I. vbi cū Velleius Epicureus sic disputasset, Si sunt dij, sunt beati. si beati, virtute præditi: si virtute præditi, etiam ratione vtuntur. At ratio nisi in hominis figura esse non potest. Ergo deorū forma humana est. Cū igitur illò ventum esset, Ratio nisi in hominis figura esse non potest. Tum Cotta: A beatis (inquit) ad virtutem, à virtute ad rationem video te peruenisse gradibus: à ratione ad humanam figuram quomodo accedis? præcipitare istuc quidem est, non descendere. Præterea in progrediendo videndum est, ne nimium longè res producat. Nam vt ex annulis ferreis qui magnete continentur, quo quisque magneti propior est, eò hæret tenacius, & quo quisque longinquior, eò laxior: ita sæpe in istiusmodi coacervationibus quo quidque attributum primo subiecto remotius est, eò minus illi conuenit,

De Diui-

De diuisione captionum Sophisticarum

CAP. XXVIII.

DEINCEPS de diuisione captionū videamus. Quotuplex est captatio sophistica? Duplex. vna in verbis, altera in rebus. Quæ autem captio ex verbis oritur, versatur in homonymia: id est multiplicitate vocabuli: ἀμφιβολία, ambiguitate: συνθέσει, coniunctione: διαίρειται, diuisione: προσωδία, accentu: & σχήματι λέξεως, forma dictionis.

Quæ est captio per homonymiam? Cū propter nominis similitudinem, quod vnius proprium est alteri tribuitur. veluti: Hercules est fortissimus. Ergo Hercules pictus est fortissimus. Ex hoc genere illud est Ciceronis ridiculum in Verrina VI: Nunquam tam malè est Siculis, quin aliquid commodè & facetè dicāt. velut in hac re. Aiebant in labores Herculis nō minus hunc immanissimum Verrē, q̃ illum aprum Erymanthium referri oportere. Nam Verres Herculis Agrigentini statuam magno labore demoliri & auferre conatus erat: neque tamen ille vlla labarat ex parte.

Cedo aliud exemplum. Scriptor belli Gallici fuit doctissimus. Librarius sua manu scripsit bellum Gallicum. Ergo fuit doctissimus. Nam in propositione homonymia est inter Cæsarem & librarium. Item: Qui equuleos habet, potest equitare. Verres equuleos argē-

teos à Cn. Calidio abstulit. Ergo Verres (inquit Cicero) iactabit se, & in his equitabit equuleis. Sic Dionysius (inquit idem) cùm in fanum Iouis Olympij venisset, aureum ei detraxit amiculum, grandi pondere: atque in eo cauillatus est, æstate graue esse aureum amiculum, hyeme frigidum: cique laneum pallium iniecit: cùm id esse aptum ad omne anni tempus diceret. Syllogismus erat huiusmodi: Humano corpori laneum pallium omni tempore aptum est. Istud est corpus humanum, aut quasi humanum. Ergo laneum pallium aptum est. Homonymia est propositionis & assumptionis. nam in illa corpus de animato dicitur, in hac de inanimato.

Quomodo hæc vitabitur captio? Distinctione homonymiæ: cùm vocabulum in propositione indefinitè positum ex parte conceditur, ex parte negatur. veluti: Corpori humano cōuenit, duntaxat animato. Itē qui habet equuleos, dūtaxat animatos. Itē Scriptor belli Gallici, qui idē & auctor, & scriptor est.

Quæ est captio per amphiboliam? Cùm propter ancipitem aut dictionis aut sententię significationem, quod vni conueniebat, alteri tribuitur. Dictionis autem hæc exempla sunt: Gemmæ sunt lapilli pretiosi. Gemmæ sunt in vitibus. Ergo lapilli pretiosi sunt in vitibus. Omnis canis latrandi vim habet. Sydus quoddam est canis. Ergo Sydus quoddam latrandi vim habet. Eodémque illius pertinebat calum-

calūnia, qui cū triginta dierū essent cū hoste pactę inducię, noctu populabatur agros, quod dierum essent pactę, non noctium inducię. Quoniā dies & nox contraria sunt: quod vnius proprium est, alteri non conuenit. Triginta dierū inducię pacem dierum triginta faciunt. Noctibus igitur non pax, sed bellum conuenit. Sed Diei verbum interdum lucem significat. verū more Romano dies (inquiunt Iurisconsulti) à media nocte ad mediam insequentem durat. l. more, 8, D. de feriis. Ex eodem genere illud est apud Vlpianum de testamento militis: quod tamen factum à nondum milite fuerat. Nam captio erat in his verbis: Testamentum militis non rite factum, tamen propter militare priuilegium valet. Sed Vlp. respondet aliud esse testamētum militis, aliud testamentum à milite factum. l. Titius, 25, D. de testam. milit.

Cedo itē aliud. Sumatur illud Stoicorū. Nihil mūdo melius est. quod ratione vtitur, melius est eo quod non vtitur. ratione igitur mūdos vtitur. Similiter (inquit Cic. de Na. Deor. 3.) effici potest sapientē esse mundū, similiter beatū, similiter æternū. Similiter librū optimè legere. nā quod literatū est, melius est eo quod non est. Isto modo etiam disertus, & quidem Mathematicus, Musicus, denique doctrina eruditus, postremo philosophus erit mundus. Captio est igitur ex ambiguo. Nam melius intelligitur respectu sui cuiusque generis. Ergo

in hac propositione, Mundus est omnium optimus : Negatio ita conuertenda est: Bonitas intelligitur respectu naturarum & partiũ omnium, quibus constat mundus. At in assumptione Melius cum sui generis rebus rationẽ habet. tametsi longẽ maius huius syllogismi vitium esse superiũs docuimus. Nam si hominis causa mundus creatus est, melior homo est quàm mundus. In eodem genere illa captio est: Nemo est Aristide melior. hic sutor optimus est sutor. Ergo Aristides sutor est illo melior. Bonitas enim dicitur respectu sui cuiusque generis.

Quomodo hæc ambiguitatis captio vitatur? Per distinctionem ambiguitatis, cum vocabulũ ambiguẽ posited in propositione ex parte tantũ conceditur. veluti: Gemmæ sunt lapilli. nomine quidem verẽ proprieq; intellecto. Canis latrat: duntaxat qui est quadrupes.

Cedo exemplũ de sententia. Veluti: Cũ Apollo cõsulente Pyrrho an bellũ Romanis inferret, sic respõdit: Aio te Aeacida Romanos vincere posse. Itẽ illud: Iubeo poni statuã auream hastam tenẽtem. Item: Heres meus dato vxori meæ argenti quod elegerit, pondo centum. Eiusdemmodi est etiam illud apud Iuriconsultos: Lego pocula oleaginea paria duo. nam quatuor legatarius petebat: quasi scriptum fuisset bina paria, vel poculorum paria duo. l. qui quatuor, 30, D. de legat.

Cedo exemplum ambiguitatis in Syllogismo.

mo. Quisquis arat littus, littus proscindit aratro: Ast operam perdens, littus perhibetur arare. Ergo operam perdens littus proscindit aratro. Item ex Aristotele: Quod quis videt, illud ipsum videt. Aliquis videt columnam. Columna igitur videt. Vitabitur autem captio hæc per distinctionem ambigui verbi, Arare littus: aut Videre, quod in propositione est aliud quàm in assumptione significat.

Cedo item aliud. Extat apud Ciceronem in libro de Finibus 4. eiusmodi: Vt in fidibus plurimis, si nulla earum incontenta numeris sit, vt concentum seruare possit, omnes æquè incontentæ sint. Sic peccata, quia discrepant, æquè discrepant. paria sunt igitur. Hîc ambiguo ludimur. Aequè enim contingit omnibus fidibus, vt incontentæ sint: illud non continuo, vt æquè incontentæ. Collatio igitur ista te nihil iuuat. Nec enim omnes auaritias, si æquè auaritias esse dixerimus, sequitur etiam vt æquas esse dicamus. Aliud est igitur, Fides æquè omnes incontente sunt. aliud, Fides omnes æquè incontentæ sunt. In priore, aduerbium æquè pars est subiecti: in posteriore, pars attributi.

Quæ est captio per Synthesin? Cùm verba quæ separanda erant alieno loco coniunguntur. veluti: Qui stat, potest currere: Dauus stat. Dauus igitur stans potest currere. Item: Qui non currit, potest currere. Dauus dormiens non currit. Ergo Dauus dormiens

potest currere. Itē: Quod est in meis ædibus, est in oppido. Vnicus fons est in meis ædibus. Ergo vnicus fons est in oppido. Aristoteles lib. Rhetor. II. ad hūc locum illud refert: Eum qui elementa nouit, verba etiam scire. quoniam eadem sunt.

Quomodo vitabitur hæc captio? Per deiunctionem: cū ea quæ in conclusione coniuncta sunt, separantur. Nam in conclusione participium Stans coniungit Dauum, qui stat, & quandiu stat: qui non currit, & quandiu non currit: quod est in ædibus separatim, & quod est in vrbe vniuersa. Potest etiam huc illud Aesopi ridiculum referri, qui cū pedes quatuor porcinos in ollam coquendi causa imposuisset: herus autem eius verberandi occasionem quærens vnum exemisset: ad haram profectus vnum è saginato porco abscidit, atque in ollam imposuit. pōst cū herus, ne ille diffugeret veritus, pedem reposuisset, vbi autem ad cœnam ventum est, Aesopus quinque pedes in patinam effudisset, admiranti hero, ita respondit: Duo porci pedes habent octo. qui de octo quinque detrahit, tres habet reliquos. hīc sunt quinque. Saginatus porcus qui in hara est, tres habet. Quadratur igitur numerus. Nam isto modo festiuè quæ separanda erant, coniunxit.

Quæ est captio per Diæresin? Cū verba quæ coiungenda erant separantur. veluti: Quinque sunt duo & tria. Duo & tria sunt par & impar.

impar. Ergo quinque sunt numerus par & impar. Sic omnes Græciæ sapientes erant septem. Thales & Socrates erant sapientes Græciæ. Ergo Thales & Socrates erant septem. In eodem genere illud est Laertij, in Platonis vita: Pater meus aut alius est, quàm pater tuus, aut idē. Si pater meus alius est ac pater tuus cùm sit alius quàm pater, non erit pater. si idē est, qui pater meus, idem cùm sit qui pater meus, meus erit pater. Atque in hunc numerum referri possunt, quæ in pronuntiatis separantur, cùm separanda non sunt: siue scripto siue sententia coniungantur. Scripto, veluti: Nocturnum furem ius est occidere. Nō enim separandum illud est, si se telo defendat. Sententia, veluti: Qui nihil agunt, ne alantur. Qui non laborat, ne manducet. Aegroti nihil agunt. Ergo ne alantur. Non enim separandum fuit, Cùm id possent. Ex eodem genere illud est quod Bulgarus Iurisconsultus falsò credit esse Soritem: Quod in nullius bonis est, occupanti conceditur. Res diuinæ in nullius bonis sunt. Ergo res diuinæ occupanti conceduntur. Nam in propositione coniungendum fuit, Cùm eius conditionis esset, vt aliquis esse posset.

Cedo aliud exemplum. Sumatur ex Gellij lib. 16. cap. 11. Siquis iis verbis interroget, Postulo vt respondeas, desierisne facere adulterium, annon? Vt cunque Dialectica lege responderis, siue aias, siue neges, hærebis in ca-

ptione: tam si te dicas adulterum, quàm si neges. Sit igitur alter ex Syllogismis huiusmodi: si neget se desiisse: Quod non desiisti facere, id pergis facere. Non desiisti facere adulterium. Ergo pergis facere adulterium. Respondendū est, captionē esse ex disiunctione connexorū. Quod non desij facere, cū id facere cœpissē.

Profer etiam aliud. Sumatur ex eodem capite: Quicquid non perdidisti, habēsne, an non habes? postulo vt aias, aut neges. Vtcunque responderit, capietur. Si non habere se negauerit quod non perdidit, colligetur oculos cum non habere, quos non perdidit. Sin verò habere se dixerit, colligetur eum habere cornua, quæ non perdidit. Respondendum igitur captionē esse ex disiunctione connexorum. Quod non perdidit, cū eius naturæ esset, vt perdi posset. In eodem genere videtur illud Aesopi ridiculum fuisse, qui, cū herus ipsius in poculis dixisset, se posse mare totum ebibere, eiusque rei sponsonem fecisset: postridie consilium ei dedit, vt in iudicio spōsionis diceret, se paratum esse mare interbibere, si modò flumina omnia quæ in illud influebant, arcerentur.

Quomodo vitatur hæc captio? Per coniunctionem. Nam duo & tria, Thales & Socrates, in assumptione & conclusione separata sunt: quæ in propositione coniuncta fuerant. Respondendum igitur, duo aut tria coniuncta, esse numerum imparē: Thalem & Socratem, cum

cum reliquis quinque esse septem.

Quæ est captio ex Accentu? Cùm ex praua pronuntiatione vnius dictionis, aut plurimum, error obiicitur. veluti, Omnia mala vitanda sunt. Poma sunt mala. Poma igitur vitanda sunt. Item populus est arbor. multitudo ciuium est populus. Ergo multitudo ciuium est arbor. Huc etiam illa iocularia referuntur.

Filia sub tilia mea net subtilia fila.

Item:

Mala mali malo mala contulit omnia mundo.

cùm prius Mala maxillam significet.

Quomodo captio hæc vitabitur? Distinctione accentuum & pronuntiationis, quam tamen antiquis faciliore quàm nobis fuisse, satis planè constat.

Quæ est captio ex forma dictionis? Cùm id quod non eiusdem naturæ est, quasi eiusdem naturæ esset, accipitur. vt illud in epist. Senecæ: Mus est syllaba. mus autem caseum rodit. Ergo syllaba caseum rodit. Item: Mus est syllaba. Syllaba non rodit caseum. Mus ergo caseum non rodit. Item illud: Homo est duarum syllabarum. Constantinopolitanus est homo. Ergo Constantinopolitanus est duarum syllabarum. Item illud Diogeni à Sophista obiectum: Quod ego sum, tu non es. Ego sum homo. Non igitur homo es. Nam hîc quorû non eadem ratio & natura est, pro eo quasi eadem ratio esset, accipiuntur.

Quomodo hæc captio vitabitur? Disiun-

ctione naturæ & rationis. Nam in propositione, Mus est animal. in assumptione, vox. Homo in propositione dictio est: in assumptione substantia. Sophista in propositione indiuiduū: in assumptione species.

De Captionibus extra dictionem.

CAP. XIX.

ARGESIS deinceps de Captionibus quæ extra dictionem sūt, videamus. Quot sunt captiones ex rebus? Septem: ex vario accidente, ex parte ad infinitum, ex cōsequētibus, ex petitione principij, ex falsa causā, ex multiplici interrogatione, & ex non animaduēsis insidiis.

Quæ est captio ex Accidente? Cū in assumptione accidēs ponitur dissentaneum ab eo, quod erat in propositione. veluti: Quam carnem emisisti: eam comedisti. crudam emisisti. crudam igitur comedisti. Quod nix est, hoc grando non est. nix alba est. grando igitur alba non est.

Quomodo vitabitur hæc captio? Demonstratione dissentanei accidētis. nā de carne, in propositione, nullum erat carnis accidens positum, quod in assumptione adiunctum est. In altero: Nix quidem & grando, & glaciēs accidentia sunt, non substantiæ: nam aqua substantia est. materia quoque idem sunt. At verò dissimile in assumptione quàm in propositione

acc

accidens est positum.

Cedo aliud exemplum. Sumatur illud Anaxagoræ: Omnis aqua est atra. Nix est aqua. Ergo nix est atra. Hic quod in propositione de substantia dictum erat, in conclusione dicitur de accidenti. Atque ex eodē genere sunt, quæcunque dicuntur forma mutata non eadem permanere. veluti, cū ex uvis, oliuis, spicis, vinum, oleum, frumentum factum est. ex auro, vel argento, vel ære, vas aliquod. ex lana, vestis: ex tabulis, nauis: ex arbore, trabes. vnde illæ apud Iurisconsultos quæstiones, species ex aliena materia facta cuius sit.

Cedo item aliud. Sumatur illud peruulgatum: Hic canis est pater. hic canis est tuus. Ergo hic canis est pater tuus. In assumptione accidens positum est, dissimile ab eo quod erat in propositione. Sic, Dauid est sanctus. Dauid est adulter. Ergo Dauid est sanctus adulter.

Quæ est captio ex parte ad infinitum? Hæc est quæ vulgò dicitur A dicto secundum quid, ad dictum simpliciter: cū id quod aliquatenus & quodammodo verè dictum est, quasi omnino & in totum pronunciatum accipitur. veluti, Aethiops est albus dentes: ergo Aethiops est albus. Vinum febricitanti noxium est. ergo vinum omnino est noxiū. Dauid fuit adulter & homicida. ergo fuit improbus. Hoc vitioso argumēto sæpe nationes malè audiūt. Quidam Cretenses sunt mendaces. ergo Cretenses omnes. Sic Pœni dicti sunt perfidi. Græ-

ci leues. Ex eodem genere illud est festiuium propter quod Plutarchus scribit argutatorē ab Antonij filio multo argento donatum fuisse. Quodammodo febricitanti frigida præbenda est. Omnis qui febricitat, quodāmodo febricitat. Omni ergo febricitanti frigida præbenda est. Obseruatum est autem cum vitium hoc à parte ad infinitum admittitur, tum affirmatiuā esse conclusionem: contrā cum ab infinito ad partem, tum esse negatiuam.

Cedo aliud exemplū. Sumatur illud quod Cicero lib. de Inuentione 2. existimauit esse ex ambiguo: Si pecunia indigetis, pecuniam non habetis. indigetis autem pecunia: mercaturæ enim, nisi ita esset, operam non daretis. Pauperes igitur estis. vel potius: Pecuniam igitur nullam habetis. Nam propositio finita erat: Si pecunia indigetis, ad rem amplificandam: pecuniam ad eam ipsam rem non habetis.

Quomodo vitatur hæc captio? Notatione partis, cum illa regula profertur, quam superius tradidimus: Conclusionē semper ad deteriorem se partem applicare: neque vnquā aut ex particulari vniuersalē, aut ex definita inde finitam sequi: simulque ostenditur, quantū intersit inter Esse quadantenus, & Esse omnino, infinitè, simpliciter.

Quæ est captio ex consequentibus? Cum ex consecutione reciprocatio infertur: id est ex eo quod quid consecutum est, idem ex contrario conuerti concluditur. qua de re in Locorum

corum præceptione accurratè differuimus. veluti: Si est piscis, natat. At non continuò si natat, piscis est. Si quis habet febrem, calet: at non continuò si quis calet, habet febrem. Si est ignis, calefacit. at non continuò si calefacit, est ignis.

Quæ est captio ex postulatu principij? Geometræ (inquit Cicero) non omnia docere solent, sed postulare, vt quædam sibi concedantur, quo facilius quæ volunt, explicent: hæc αἰτήματα Græci nominant. Videturque facetè Aristoteles hanc captionem sic appellasse, quasi Sophistæ Geometrarum more ac modo principium sibi concedi postularent, tãquam certum, quod tamẽ esset incertissimũ. Itaque Græci hoc dicunt ἀμφισβητέμενον ἄντι ὁμολογεμένου τι θέναι: sumere pro certo, quod dubium controuersũque est: sumere pro argumento quod in disquisitione positum est: aliquid ad probandum assumere, quod ipsum est ambiguum: quoniam isto modo incertum per incertum concluditur. veluti: Vtilis est philosophia: quia certam de rebus omnibus scientiã affert. At cùm tam variæ sint philosophorum sectæ, illud ipsum ambiguũ, an aliquid in Philosophia sit certi. Huius generis est illa quæ dicitur à Cicerone Repetitio ab vltimo, Vtinam ne in nemore Pelio, &c.

Cedo aliud exemplum. Extat præclarum apud Ciceronem lib. de Finib. 4: Quarum (inquiũt) artiũ summa crescere potest, earum e-

tiam contrariarum summa poterit augeri. ad virtutis autem summam accedere nihil potest: ne vitia quidem igitur crescere poterunt, quæ sunt virtutum contraria. Vtrum igitur tandem, perspicuisne dubia aperiuntur, an dubiis perspicua tolluntur? Atqui hoc perspicuum est, vitia alia in aliis esse maiora: illud dubium, ad id quod summum bonum dicitis, ecquænam fieri possit accessio? Vos autem cum perspicuis dubia debeatis illustrare, dubiis perspicua conanimi tollere.

Quomodo vitatur hæc captio? Cū id quod pro certo sumebatur dubium & controuersum esse ostenditur. Veluti: cū apud Ciceronem sic concluditur: Si diuinatio est, dii sunt. est autem diuinatio, ergo etiam dii sunt. Nā diuinationem esse, id verò incertum, atque ambiguum est. In eodem genere illud est: Piū est orare pro mortuis. Nam Iudas Machabeus magnam in illum usum pecuniā attribuit. Eodēque illud Pasquilli pertinet de Alexandro Pontifice.

Vendit Alexander cruces, altaria, Christum.

Emerat ille prius, vendere iure potest.

Nam si recte non emerat, recte non vendit. Quod etiam ad magistratum & dignitatum mercatores transferri potest,

Quæ est captio ex falsa causa? Cū id pro causa ponitur, quod causa non est. Veluti: Multi oratores abutuntur eloquentia ad perniciem reip. ergo eloquentia est perniciofa. Ebrietas est mala. ergo vinum malum. Multi re-

ligionis aut philosophiæ nomine abutuntur. Ergo aut religionis aut philosophiæ studio abstinendum est. Multi scripturæ sacræ lectione abutuntur. Ergo interdicenda est. Sic Cotta libro de Nat. deor. 3. quia ratio pestifera sit multis, melius fuisse disputat, non dari hominibus rationem à diis, quàm tam magnificè & largè dari. Sic Anaxagoras, quia sciret aquam nigram esse, vnde illa concreta esset: iccirco illam esse disputabat nigram.

Quomodo vitatur hæc captio? Demonstratione veræ causæ, qualis est in superioribus omnibus abusus rerum salutarium. Huic loco (inquit Cotta) sic soletis occurrere. non iccirco nō optimè nobis à diis esse prouisum, quòd multi eorum beneficio peruersè yterentur: etiam patrimoniis multos malè vti: nec ob eā causā beneficium à patribus nullum habere. Extat illud præclarum exemplum Tusc. 2. his verbis: Quod est (inquit auditor) maius argumentum nihil prodesse philosophiam, quàm quosdam perfectos philosophos turpiter viuere? Nullum verò id quidem argumentum est: respondet Cicero. nam vt agri, nō omnes frugiferi sunt, qui coluntur: sic animi non omnes culti fructum ferunt. Causa igitur non in philosophia est, sed in animi vitio.

Quæ est captio ex multiplici interrogatione? Cùm aut de vno plura, aut de pluribus vnum, aut de pluribus plura interrogantur: vt quasi ad vnam interrogationem respondeamus.

tur. De vno plura: veluti: Estne hic canis & pater & tuus? Nix estne aqua, & alba? Item si dimidium totius cuiusdam est album, alterum dimidium est nigrum: & quæraturne illud album, an nigrum? De pluribus vnum: veluti, positis duobus, quorum alterum nigrum, alterum album sit, si quæraturne an ista sint alba, aut nigra? Plura de pluribus: veluti: Nonne sobrietas & ebrietas sunt bonum & malum?

Cedo aliquod exemplum ad usum vitæ accommodatum. Extant in iure civili huius generis immunera, vbi de stipulationibus agitur. nam aut plures ab vno, vel à pluribus, aut vnam rem, pluresve stipulari possunt: earumque stipulationum variæ captiones sunt. singulas enim res singulis stipulationibus comprehendere oportet: qua de causa ad usum vitæ placuit, vt quoties plures res in stipulationem deducuntur, tot sint stipulationes quot res. veluti: Deditisne vos, populum Collatinum, urbem, agros, aquam, terminos, delubra, vtenilia, diuina humanaque omnia in meam populi que R. ditionem? Dedimus.

Quomodo vitabitur hæc captio? Rerum coniunctarum separatione: vnde à Iurisconsultis constitutum est, vt qui plures res stipulanti certas se daturum spōdet, de iis tantum obligetur. veluti, Spondes te Dauum & Stichum daturum? Stichum spondeo. Sic in illis superioribus: Canis hic pater est suorum catulorum, meus dominio. Nix est aqua respectu mate-

materiæ, alba respectu formæ. Hoc separatim album est. Illud separatim nigrum. Sobrietas separatim bonum est. Ebrietas separatim malum.

Quæ est captio ex non animaduersis insidiis? Cùm id quod diuerso respectu est multiplex, pro simplici positum contradictionem efficit. Nā quod Aristoteles πῶ τῃ ἐλέγχῃ ἀγνοίας appellat, ego captionem non animaduersam interpretor: non, vt eruditi multi, reprehensionis ignorantiam. Captio verò, siue insidiæ, sunt huiusmodi: duo respectu vnius sunt duplum, respectu quatuor, sunt dimidiatum. Ergo duo est numerus duplus, & non duplus. Contradictio enim est cùm idem de eodem & dicitur & negatur. Item: Aethiops à dentibus est albus: à cute niger. Ergo idem & albus est, & non albus. Dauid à pietate est probus: ab adulterio improbus. Ergo idem est & probus, & non probus.

Quænam huius appellationis causa est? Quia ἐλέγχεν (vt superius diximus) est capere, coarguere, & prehensum tenere. Itaque qui positas in interrogationibus insidias non animaduernerit, facile se in laqueum induit. veluti: qui ad illa rogata: Duo nōne sunt duplum vnius? Duo nōne sunt dimidium quatuor? simpliciter & incautè responderit: prius se deprehensum sentiet, quàm sibi tendi laqueum animaduernerit. Protinus enim Sophista sic inferet: Duo sunt duplum. Duo sunt di-

midium. Ergo duo est numerus duplus, & non duplus.

Quomodo vitabitur hæc captio? Tota hæc argutia, (inquit Aristoteles) ὥστε τὸ μὴ διαρίσσει, τί ἐστὶ συλλόγισμος, ἢ τί ἐλέγχος, ἀλλὰ ὥστε πλεὺς ἔλλειπιν τῷ λόγῳ γίνεται. quod sic interpretor: Nasçitur ex eo, quod non discernitur ratiocinatio à captione: non prius constituitur quid sit sýllogismus, & quid elenchus: sed ratio, id est distinctio multiplicis respectus, omittitur. Debuit enim ita respóderi, Duo cùm habent rationem ad vnum, sunt duplum, at cùm habent rationem ad quatuor, sunt dimidiatum. Vitabitur ergo hæc argutia distinctione respectus.

Cedo aliud exemplum. Nónne qui oculos habet, videt? Nónne qui dormit, oculos habet, & tamen non videt? Ergo qui oculos habet, idem videt, simul non videt. Distinguenda fuit ratio respectuum. Qui oculos habet, si vtatur, videt: si non vtatur, non videt.

Quid? Nónne imprudentia hæc non animaduersi laquei commune omnium captio-
num nomen est? Sanè verò. Itaque multis ver-
bis Aristoteles demonstrat ad hoc vnum prin-
cipium fallaces & captiosas conclusiones om-
nes renocari posse: qua de causa definitionē
Elenchi prodidit longam & copiosam: & (vt
opinor) in libris nostris vitiatam: cuius hæc
sententia est: Elenchus est contradictio quæ
ex ambiguitate & nominum & rerum confici-
tur

tur, cùm quæ aut modo, aut tempore, diuer-
sam rationem habent, quasi vnum & idem
perpetuò essent, sumuntur. huius autem
captionis vsus est in Soritis vel maxi-
mus: cùm is qui interrogatur, im-
prudens ab eo quod con-
cessit, ad id quod non
vult concedere,
deducitur.



F I N I S.



BIBLIOTECA NAZ.
ROMA
VITTORIO EMANUELE

